

ТОХИР МАЛИК

ШАЙТАНАТ

УЗБЕК БЕСТSELLЕРИ





**«SHARQ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ — 2013**




Киприклар — қорачиқнинг соқчилари,
Ҳақиқат нурларин түссанғиз агар,
Юлиб ташлагумдир битта қолдирмай...

A handwritten signature in cursive script, likely belonging to the author or poet mentioned in the text above.

ТОҲИР МАЛИК

ШАЙТАНАТ

Бешинчи китоб



«SHARQ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ — 2013

УЎК 821.512.133-31 -
КБК 84(5Ў)6
М 22

Ўзбек агадиёт

Масъул муҳаррир
Аҳрор АҲМЕДОВ

Т 22

Малик, Тоҳир.

«Шайтанат»: роман (5-китоб) Масъул муҳаррир А.Аҳмедов. — Т.: «Sharq», 2013. — 640 б.

ISBN 978-9943-26-051-1

Ҳар бир соҳада бўлганидек, шайтанат оламида ҳам маълум бир жиноят гурухи ўрнига ёшроқ авлод келади. Кесакполвон ва Чувриндининг ўлимидан сўнг ёлғизланиб қолган Асадбек киркилган икки қаноти ўрнига янгиларини тиклаш харакатига тушади. Янги авлод эса шайтанат оламига хукмронлик қилиш истаги билан унга яқинлашади. Икки авлод орасидаги зиддият, таъбир жоиз бўлса, шайтанат тахти учун кураш нима билан якун топади – мазкур китоб шу ҳақда ҳикоя қиласди.

УЎК 821.512.133-3
КБК. 84(5Ў)6

ISBN 978-9943-26-051-1

Alisher Naujux

лашриёт-матбаа акциядорлик компанияси
ирияти, 2011, 2013.

2016/102 лот.

4815 O'zbekiston MK

Бисмиллахир Роҳманир Роҳийим.

«Парвардигор шайтонга айтди:

*«Малоикалар мақомидан туш. Бас, сенга бу ма-
лоикалар мақомида туриб гарданкашлик қилиш
ярамайди. Сен хорлик билан жаһнатдан чиқ!»*
*Шайтон айтди: «Қиёматгача менга мұхлат бер,
мени ўлдирмагил». Худо айтди: «Сенга Қиёматга
қадар мұхлат берилди».*

*Иблис айтди: «Мени раҳматингдан маҳрум
қылғанинг бадалига Одам фарзандларини түғри
йўлдан оздириш учун мунтазир бўлиб тураман.*

*Сўнгра ўнг тарафларидан келиб, васваса қила-
ман ва орқаларидан келаман ва чап тарафлари-
дан келиб, йўлдан оздираман. Сўнгра уларнинг
кўнларини шукр қилгувчи ҳолларида топмассан».*

*Парвардигор айтди: «Эй шайтон, мардудлик
ҳолатида хор бўлиб, Худонинг азобига учраб, жа-
натдан чиқиб кет! Албатта,*

*Ўз зотимга қасамки, сен билан ва зурриётинг
билин ва сенга тобе бўлганлар билан жаҳаннамни
тўлдираман».*

(Аъроф сурасидан маъно таржима.)

МУАЛЛИФДАН

Буюклик ва қудратда ягона, ширк ва нүқсон кирларидан пок, бақонинг эгаси, раҳмли ва шафқатли Аллоҳ таборак ва таолонинг муқаддас номини дилимга мухрлаган ҳолда сўз бошлайпман. Барча неъматларни ато қилгувчи – Аллоҳ, сўнгсиз қаҳр билан интиқом олувчи ҳам Аллоҳ. Осмонлару ерда У зотга шукрлар адади беҳисобдир. Аввалу охир У зот учун ҳамдларга тўла!

Очиқ мўъжизалари билан бани Одам ичра мумтоз жаноби Пайгамбаримиз Мұҳаммад алаїхис-саломга, аҳли байтлари ҳамда саҳобаларига саловату саломлар бўлсин!

Ассалому алайкум, ардоқли китобхон!

Сизлар билан, яна гойибона тарзда бўлса-да, учрашираётган Аллоҳга ҳамд этиши баробаринда Ул зотдан Сиз азизмонлар хонадонига қут-баракот бермогини, шайтанат оғатидан Ўз ҳифзи-ҳимоясига олмогини ўлтижо қиласман.

«Шайтанат», аввал ҳам айтганимдек, уч китобдан иборат бўлиши керак эди. Сўнг тўртинчи китобни ёзиш эҳтиёжи ҳам тугилдики, бу меҳнатдан бўйин товлаш номардликдай туюлиб, Аллоҳга таваккул қилган ҳолда бу ишни бошлаб, ниҳоясига етказгандай бўлдик. Бу мавзуга яна қайтиш фикридан узоқда эдик. Лекин, начора, кейин эшишган, билган воқеаларимиз кўнгилни қитиқлай бошлади, асарни давом эттиришга даъват этаверди. Турли учрашувларда айрим китобхонлар «асар якунланмаган, давом эттириш керак», деган фикрларни билди-

риб, каминани құлға яна қалам олишга ундашди. Нұхоят, хайрли оқибатни умид қилиб, ишни бошла-япмиз. Учрашув ва сұхбатларда китобхонларга мурожсаат этиб, асарни шунчаки «давом эттириңг», деб эмас, «яхишилаб ёзинг», деб дуо қилишларини сұраб әдик. Дуоларнинг ижсобат бўлишига умид билан дастлабки сатрларни ёзяпмиз. Сўнгги сатрларга қадар ҳамсуҳбат бўлиб қоласиз, деган умиддаман. Шубҳасизки, айрим баёнларда қаламнинг ожизлиги сезилиб қолар, бунинг учун узр сўрайман. Асар кўнглингизга мақбул бўлса, бу Аллоҳнинг марҳаматидандир, сиз – азизларнинг дуоларингиз оқибатидандир. Сизларни бутун қалби билан севувчи адабнинг миннатдорлигини қабул қилинг. Бир-бирларимизни хайрли дуо қилишда давом этайлик.

АХТАМ

1963 ишл, 16 июнь, Магадан

Рихсия шу куни ўғил кўрди.

Сууруга тұла қызлик пайтларида, шириң хаёллар қанотида учган дамларида ботир ва ҳалол бир ўғлонни учратиши, севиб-севилиб турмуш қуришни, олти ё етти ўғил ва уч қиз кўриб, умрни шукроналик билан ўтказишни орзу қиласарди.

Бир ўғлон учраб, қиз кўнглини ром этди. Аммо, на-доматким, у ботир эмас, номард бўлиб чиқди. Унинг айёрлик ва муттаҳамлик чодирига буркалган, ҳаромни касб қилган абллаҳ эканини Рихсия кейинроқ – тақдир ёзуғидан нолиб, қамоқда ўтирганида англаш етди. Ундан бўлган болани олдириб ташлашни истади. Бироқ, қамоқхона врачи вақт ўтганини айтиб, рухсат бермади. Бола тушиб кета қолсин, деб оғир-оғир нарсаларни кўтарди, вужудни заҳарлаши мумкин бўлган нарсаларни ҳам еяверди. Лекин ҳароми бўлса-да, бир ўғил кўриши тақдир ёзуғида бор экан, унинг барча ҳаракатлари зое кетди. Қамоқхонада туғилган чақалок озодликдаги аёллар ҳам ҳавас қиласидиган даражада соғлом ва кўркам эди. Қамоқхонадаги хотинлар ҳар куни бола туғавермайдилар. Тукқанлари эса боласини эмизишдан, ҳатто унга бир қараб қўйишдан воз кечавермайдилар. Шу боис Рихсиянинг «эмизмайман ҳам, қарамайман ҳам», деб боладан юз ўгириши ҳамширанинг жаҳлини чиқарди. Аввал яхши гапирди, сўнг пўписа қилди, кор килмагач, шапалогини ишга солди.

Қадимда Оврупода ҳамшираларни «меҳрибонлик олиҳалари» деб шарафлашган экан. Агар бу сифат қамоқхона ҳамширасига нисбатан қўлланилса, «кок

иштонга жун жияқ» деганларидек, ҳам кулгили, ҳам энсани қотирадиган бир ҳол вужудга келиши мүмкін зди. Эхтимол, бу аёл озод эканида меҳрибонлик нима эканини билгандир. Лекин касалхонадаги тинчлантирувчи ва оғриқ қолдирувчи дориларни ўғирлаб, гиёхвандларга сотиши оқибатида қамоққа тушгач, энг ваҳший ҳайвонларга ҳам bemexрлик дарсидан сабок берса оладиган даражага етди. Тили эса энг сўконғич эрқакларни ҳам аро йўлда қолдириб кетадиган бўлди. Маҳкумалардан қай бири касалга чалиниб, турма шифохонасига бир марта тушса-ю, кейинроқ иккинчи бор хасталанса, шу хотинни кўрмай ўлиб кетишига минг марта рози бўлиб қоларди. Ҳамширани ана шу иллатлари учун қамоқхона маъмурияти иззат қилар, маҳкумалар эса нафратланишарди. «Ёмоннинг бир қилиғи ортиқ», деганларидай хушбичимрок маҳкумаларни қандайдир базмларга қантдай қилиб тайёрлаб бериш ҳам унинг зиммасида зди. Маҳкумалар орасидаги гўзалларнинг аксари бу хизматдан бўйин товламас, аксинча, чорланмай қолишиша кўнгиллари хуфтон бўларди. Улар бошқа нарсадан – базм якунлангач, тунни шу эрқакшода ҳамшира билан ўтказишдан безишарди. Безиша-да, кўнглини овлашга мажбур эдилар. Чунки базму майшат орқасида ҳомиладор бўлиб қолишиша, бу ҳамшира доялик қилиб, уларни бу юқдан кутқаарди.

Рихсиянинг ой-куни етиб, кўзи ёрийдиган пайтда шу ҳамшира доялик қилди. Дунёнинг ажабтурурлиги шундаки, ҳаромдан бўлган бола ҳаромни касб қилган хотин кўлида кўзларини очди.

Икки юзига шапалоқ тушган Рихсия кўзларини катта-катта очиб, ҳамширага қўркув билан каради, навбатдаги зарбани кутди. Лекин ҳамшира бошқа урмай, маҳкумаларнинг эски чойшабига йўргакланган болани унинг тиззасига қўйди.

– Агар бола очдан ўлса, сени қийнаб-қийнаб ўлдираман. Шу пайтгача одамзод кўрмаган азобларни

сенга атаб тайёрлаб қўйганман, – деб ўз хукмини маълум қилиб қўйгач, чақалокнинг юзини очди.

Қорнида қимирлай бошлаганидан бери ўлимини истаган боланинг жавдираган кўзларига кўзи тушиши билан Рихсиянинг вужуди титраб кетди. Кўкрагида илиқлиқ сезилди. Бир оз қараб тургач, кўкрагини очиб, эмиза бошлаганини ўзи ҳам сезмай қолди. Чашлоқ эма-эма ухлади. Рихсия уни бағрига босганича ўтироқчи эди, ҳамшира рухсат бермади. Болани юлқиб олиб, темир панжарали эшикнинг темир панжарали даричасини очди-да, даҳлизда пойлаб турган аёл назоратчига узатди. Рихсия эмизаётган пайтда ҳамширанинг кетмай қараб тургани сабабини билолмай ажабланган эди. Боласи худди кераксиз буюмдай панжара нарёғига бериб юборилгач, вужудида титрок турди.

– Нега у ёққа бериб юбордингиз? Болам ўзим билан ётмайдими? – деди йиғламсираб.

– Уйингда туққанингда ёнингда ётарди. Бу ер онангнинг уий эмас, – деб ҳамшира гапни калта қилди. Кейин асабий равишда тўнғиллади: – Ҳозиргина болангта ўлим тилаётувдинг-ку, энди меҳринг уйғониб қолдими?

Бу гапни айтгандан кура, ҳамшира уни тепа-тепа абжағини чиқариб юборгани маъқулрок эди. Ҳамшира туҳмат қилмади, ҳақ гапни айтди. Аччик ҳақиқатни тан олиш бу муштипар учун ниҳоятда оғир эди. Эмиза туриб «болада ҳеч қандай гуноҳ йўқ-ку?! Нега унга ўлим тиладим, ундан кўра туғиб ўлганим аълорок эмасмиди?» деб ўзини ўзи лаънатлади. Бола тўйиб эмиб, ширин уйқута кетгач, ўзининг ўлиши мумкин эмаслигини, гўдагини кўкрак сути билан бокишга мажбур эканини тушунди. Оналик масъулиятига итоат этган нафасда фарзандини бағридан юлиб олдилар. Шунда у даҳшатли ҳақиқатни англади: қамоқхонада дунёга келган ўғли ўзи каби озодликдан маҳрум эди! Ўзи-ку, жинояти учун жабр тортилти, аммо болада нима гуноҳ!

Назоратчилар инсоф қилишса, кунда түрт ёки беш марта, боланинг бигиллаб йиғлашидан безишса, тунда ҳам темир панжарали эшикнинг темир панжарали даричасини очиб, болани латтага ўралган буюм каби узатардилар. Чақалоқ эмиб, нафси ором топгач, яна шу ҳолда қайтариб олардилар. Рихсия боласининг оғзига кўкрагини солгач, унинг секинроқ, шошилмай эмишини истарди. Бағрида қўпроқ олиб ўтиришни хоҳларди. Ҳар сафар болани қайтариб бераётганда Рихсиянинг юрагидан битта томир узилгандай бўлаверарди.

Бир ҳафтадан сўнг ҳамшира унга бир янгиликни маълум қилди:

– Болангга туғилганлик ҳакида гувоҳнома ёзиб беришди. Отасининг тайини бўлмагани учун ўзингнинг фамилиянгда қолди. Оти «Ахтам» бўлди.

Рихсия мактабда ўкиб юрганида синфдош болага кўнгил кўйганди. Бу туйғу севги мартабасига етмаган бўлса-да, уни кўп эсларди. Ўғлига ўша йигитнинг исмини беришни ният қилиб ўтирганда бу хабарнинг маълум қилиниши уни ажаблантириди:

– Нега «Ахтам»?

– Кўз очиб кўрган йигитимнинг оти Ахтам эди. У бутун Татаристонни ётқизиб-турғизарди. Москвага борса, энг зўр мафиозлар ҳам қуллук қилиб турарди. Ўшанга ўҳшаб юрсин, деб ният қилдим. Шу исм мендан сенга ёдгорлик бўлиб қолсин. Қамоқхонада ўлиб кетмасанг, озодликка чиққанингда эслаб юрарсан.

Бу гапни эшитиб Рихсиянинг кўз олди коронгилашди. Бола туғилганда келажаги гўзал бўлсин, деб умид қилинарди. Бу хотин эса бир ўғри-каллакесарга ўхшашини ният қилибди. Рихсия ҳужжатда зикр этилган исмни сира тилга олмади. Боласини қўлига олганда сийганининг исмини айтиб, эркаларди. Ахтам бу исмга кўнишиб ҳам қолган эди. Болалар уйига жўнатилгач, онаси суйган исмни унугиб юборди.

Ахтам чақалоқлик ёшидан ўтиб, эммай қўйгач, Рихсияга камроқ кўрсатадиган бўлишди. Бола уч ёшга

тўлган куни ҳамшира уни етаклаб кириб, она қалбини тилка-тилка қилиб юборувчи янгиликни айтди:

– Ўғлинг билан хайрлашиб ол, энди, ўлмасанг, қамоқдан қутулганингдан кейин кўришасан.

– Нега? – деб сўради Рихсия боласини хавотир билан бағрига босганича.

– Негалигини билмайсанми? Қамоқхонада туғилганлар уч ёшга тўлгандан кейин ташқаридаги болалар уйига юборилади. Ўглинг озод бўлди, қувонсанг-чи!

Уч йил мобайнода қамоқхона боғчасида улғайган, озод дунё, озод болалар қандай бўлишини билмайдиган бегуноҳ гўдакнинг эркинликка чиқиши, албатта, қувонарли эди. Лекин у қайси шаҳарнинг қайси болалар уйига боради? Қандай даврада камолга етади?

Бу қамоқхонада она учун ҳам, бола учун ҳам биргина юпанч, биргина бахтли дақиқалар бор эди. Кўришмоқлик, дийдор саодати бу онда барҳам топди. Нақадар беражмлик! Бундан сўнг дийдорга қачон етишадилар? Дийдор киёматга қолса-чи?

Онанинг қалби шу саволлар исканжасида. Бола қалби бу азобдан холи бўлса-да, онасини бошқа кўрмаслигини сезибми, йиғлай бошлади.

– Вакт бўлди, ташқарида кутиб туришибди. Ўлмасанг, етти йилдан кейин кўрасан болангни, – ҳамшира шундай деб, Ахтамни елкасидан ушлаб ўзига тортди.

Рихсия кўйиб юборгиси келмади.

– Жоним болам, эсингда турсин, сен билан мени бебаҳт қилган одамни улғайганингда топасан! Бу хўрликларимиз учун ўч ол! Унинг оти...

Боласи эслаб қолсин учун бу исмни уч марта қайтарди. Уч ёшли боланинг бу гапларга тушуниши кийин эди. Шунга қарамай, умид билан айтди. Ҳамшира Ахтамни она бағридан юлқиганча ажратиб, тугун каби қўлтиқлаб олди-да, ташқари томон юрди. Боланинг йиғиси даҳлиздан эшитилиб турди. Йиғитинмай туриб, Рихсия хушсиз йиқилди.

Бу дунёда йигирма беш йил умр күрган жувон бу айрилиққа чидолмади. Кундан кунга сўлиб бораверди. Уч ойдан кейинadolatciz дунёни ташлаб кетди...

Эркинликдаги болалар уйида ўйинчоқлар кўп бўлгани билан Ахтамга ёқмади. Озодликда туғилиб-ўсаётган болалар билан қамоқхонадан келган Ахтамнинг тил топишиши қийин кечди. Озодликда улғаяётган икки бола ўйинчоқ талашса ёки уришиб қолса, энагалар уларга танбеҳ бериб кўя қолишарди. Ахтам талашса ёки биронтасини урса, жазога тортиларди. Қамоқхона боғчасидан келган болага муносабат ўзгача эди. Ахтам буни гўдакларга хос фаҳми билан англади. Атрофига нафрат кўзи билан қараш ҳисси шу ерда туғилди.

Мактаб ёшига етганда яна бошқа етимхонага жўнатилди. Онасининг қамоқдан чиқиб олиб кетишини тоқат билан кутди. Кун санаб яшади. Үн ёшга тўлганида онаси озодликка чиқиши керак эди. Бу шодлик куни яқинлашган сайн соат ва дақиқалар санаб яшади. Ўша кун, ўша соат, ўша дақика етди. Аммо онаси келмади.

Етимхонада бир меҳрибон энага бор эди, сураб-суритириб, Рихсиянинг вафот этганини аниқлади. Лекин ўша йили буни болага билдирамади. Ахтам кун, соат санамаса ҳам онасининг келиб, олиб кетишини кутиб, умид билан яшайверди. Меҳрибон энага «онаси ўлган бўлса, тоғаларими ё амакиларими бордир?» деган илинжда яна сураб-суритириди. Рихсиянинг акаси яшайдиган манзилни аниқлаб, унга хат ёзди. Жиянининг ахволини баён қилди. Тоғадан келган мактуб очиб ўқилгунича меҳрибон энага қалбига қувонч бахш этди. «Биз у бадбаҳт сингилдан юз ўтирганмиз, демак, жиянимиз ҳам йўқ», деган сатрлар эса бу қувончни заҳарли тирноқлари орасига олиб эзғилаб ташлади. Энага бу хатни Ахтамга бермади. Ахтам мактабни битириш арафасидагина кўрсатди.

— Нима учун бундай деб ёзганини билмайман. Балки ўшандан нимадандир норози бўлгандир, энди

ҳовуридан тушгандир. Унинг олдига бор, ёлғиз юрма, ёлғизлиқ ёмон, – деди.

– Шу ёшгача қариндошларсиз яшадим, бундан кейин ҳам яшайман, – деди Ахтам ўжарлик билан.

Шундай дегани билан орадан бир йил ўтмай она юртига йўл олди. Қариндошлардан паноҳ излаб эмас, балки онаси ва ўзининг баҳтиқаролиги сабабини аниқлаш мақсадида борди.

ФАЗЛИЯ

1984 йил, 7 август

Фазлия эрининг қимор ўйнашига ҳам, кеч келишига ҳам, бир неча кунлар йўқ бўлиб кетишига ҳам кўнишиб қолган. Эри пайдо бўлганда «нега кеч келдингиз?» ёки «кечча қаерда санқиб юрувдингиз?» деб кўкрагига санчқи тирамайди. «Овқат иситайми, чой ичасизми?» деб сўрайди. Қиморда баҳт қуёши қиягина кулиб бокқан бўлса ҳам, эри олиб келган пулини ўртага ташлаб, то тонгта қадар мағтанишдан чарчамайди. Фазлия пулларни кўриб шодланиб кетмайди, сарфлашга ҳам щошилмайди. Рўзғорга кераклисини олиб, қолганини эрининг кўзидан панароққа яширади. Эри ютқизиб келса сувга бўккан мушукдай қунишиб олади. Тонгтacha ухламайди, дардини ичига ютиб, ўз ёғига ўзи қоврилиб жимгина ўтираверади. Охири «пулдан қолганми?» деб хотинига ялинади.

Фазлия қиморбозларнинг яхши-ёмон одатлари ҳакида кўп миш-мишларни ҳам, туғри гапларни ҳам эшитган. Хотинларни қиморга тикиб юбориши оқибатларини озми-кўпми билади. Жойнамозда ўтирган хотинга қиморбозларнинг тегмаслигини унга айтишган. Лекин у эрининг бу қадар пасткашликка бормаслигига ишонгани учун сира жойнамоз устида кутиб ўтиргмаган.

Эри бу кеч уйида тунамай, пешинга яқин қайтди. Фазлия унинг тунд чехрасига бир қарашдаёқ ютқизиб келганини англади. Одатига кура, ортиқча гап-сўз қилмай, ошхонага кириб овқат иситди. Эри овқатга қарамади. Узатилган пиёлани олди-ю, ҳатто чойни хўпламай дастурхон устига кўйди. Фазлия ундан садо чиқишини тоқат билан кутиб ўтираверди. Эри қарзга ботган бўлса, сандикда эҳтиётлаб кўйган тугунчани очади, етмаса, сигир-бузоқни сотар... Унинг хаёли эрини қарздорлик ботқоғидан кутқариб олиш билан банд. Эрининг уч-тўрт марта хўрсиниб, сўнг пушаймон бўлган одамнинг хаста овози билан «пулдан борми?» деб сўрашини, пулнинг дарагини эшигтгач эса «иккинчи ўйнамайман», деб қасам ичишини кутди.

Эри хўрсинди. Лекин пул эмас, ароқ сўради. Ярим шиша ароқ бор эди. Катта пиёлани тўлдириб, ютоқиб-ютоқиб ичди. Газак қилмай, афтини буриштирганича ўтириди. Бунаقا одати йўқ эди, шунинг учун Фазлия хавотирлана бошлади. Охири «тинчликми, дадаси?» деб сўради. Эри «тинчлик» дегандай бош иргаб кўйди. Лекин унинг кўзларига қарашга ботинмади. Унинг бу ҳолатидан Фазлияning хавотири баттар ошди. Ҳатто хаёлига «Мени қимор ўлгурига тикиб, ютқизиб келган бўлса-я!» деган ўй келиб, енгилгина сесканиб олди. «Ёшгина таннозлардан бўлсан экан, қиморга тикса, ютиб олган одам мени бошига урадими!» деб ўзига ўзи таскин берди.

Бундай ўтиравериш ўзининг ҳам жонига тегдими, эри туриб кўча томон юрди. «Ҳозир келаман», деб тўнгиллаб кўйди-да, чиқиб кетди. Шу кетганича икки кун кўринмади. Фазлия кайноғасиникига бориб маслаҳат сўрамоқчи эди, эридан гап очиши билан тўхтатишиди:

– Мен у абллаҳга гапиравериб чарчаганман, келин. Ҳадеб бошимни оғритаверманг. Қарз сўраб келган бўлсангиз, аввал олган пулларини тўлаб кўйсин.

– Пул сўраб келмадим, маслаҳатингиз керак...
Карзларни... тўлаган эдилар-ку? Ё яна олувдиларми?

– Қарзни қачон олиб, қачон тўлагансанлар? Пул ҳар куни ишлаб турмаса, айланиб турмаса қадри кетади. Сенлар обдон қадрини тушириб, кейин қайтаргансанлар. Жигарим экан, деб индамадим. Энди бундан бу ёғига жигар-пигарчилик йўқ.

Бошқа гапга ҳожат йўқ эди. Фазлия эрини окламайди, лекин пул туфайли икки жигарнинг айри-айри бўлишига чидаши қийин эди. Пул – қўлнинг кири. Қўлнинг кир бўлиши ҳам осон, ювилиб, тоза бўлиши ундан-да осон. Лекин бу оқибатсизларнинг онаси тирилиб келиб бирига ака, бирига ука туғиб бермайди-ку...

Эри шомга яқин қайтди. Ширакайф эди. Қўлидаги халтада яна икки шиша ароқ, озгина колбаса билан нон бор эди. Сўрига чиқиб, дастурхон солинмаган хонтахта устига нарсаларини қўйди. Ошхона остоносини ҳатлаган Фазлия унинг ҳаракатларини индамай кузатиб тураверди.

– Шунқорбойваччадан йигирма беш сўм қарз олдим, эртага сўраб келса, берворасан, – деди эри унга қараашга ботинмай. Сўнг халтадан чети учган пиёла чиқаргач, ароқни очди-да, тўлдириб қуиб сипқорди.

Мана шунисига Фазлия чидай олмади. Чакқон юриб келиб сўрига чиқди-да, унинг қўлидаги пиёлани юлқиб олди:

– Бу қанақа қилиқ? Қаердан олдингиз буни? – деди титроқ овозда.

– Бу ёққа бер, пиёла магазинчиники, эртага сўраб келса берворасан.

– Балони бериб юбораман. Менга қаранг-чи? Нима бўлди? Яна ютқиздингизми?

– Менми? Мен ютқизаманми? Йў-ўқ... Мен ҳеч қачон ютқизмайман. Мени алдаб-алдаб, ахмок қилиб ютишади. Ҳали мен уларга кўрсатиб қўяман!

Фазлия унинг қанақасига кўрсатиб қўйишини

билимаса-да, овутиш максадида «ҳа, у жувонмаргларни боплайсиз», деб күйиб ароқни олмоқчи эди, эри жонқолатда шишага ёпишди. Фазлия ичиб-ичиб ухлаб қолар, эртага ўзига келар, деган ўйда сўридан тушди. Эри ичонғичлардан эмасди, салгинага маст бўлиб қоларди. Иккинчи шишадан ярим пиёла ичиб-ичмай ёнбошига шилқ этиб тушди. Фазлия унинг бошига ёстик қўйиб, устига чойшаб ёпди.

Хуфтон қоронғилиги атрофни ўз ҳукмига олганда болалар ухлаб қолишган эди. Кенжаси инжиқлангани учун Фазлия унинг ёнида ётиб кўзи илинган экан. Юраги ўйнадими ё гойибдан бир нима туртдими, аниқ билмайди, чўчиб кўзини очди. Қандайдир хавотир билан иргиб ўрнидан турди. Эрининг йиғламсираган овозини эшишиб, ташқарига отилди. Ошхона эшиги тепасидаги чироқ оғилхона томонни ҳам хирагина ёритиб туради. Ўша томонда эрининг қораси кўрингач, Фазлия югурди. Арқон ушлаб олган эри тимирскилануб ниманидир излар, йиғламсираганича ўзига-ўзи лаънат ўқир эди:

– Бу кунингдан ўлганинг яхши Норбой! Сен аҳмоқни қийма-қийма қилиб ташлаган одам савобга қолади! Туғилишинг билан онанг тагига босиб ўлдириб қўйганида минг марталаб яхши бўларди. Сендай палидга кафан ҳам ҳайф, гўр ҳам ҳайф...

Бу гапларни эшишиб Фазлияning вужудидан жончикиб кетаётгандай бўлди.

– Дадаси!

Ўз назарида фарёд қылгандай эди. Лекин ўз овозини ўзи аранг эшилди.

– Дадаси!!

Бу сафарги қичқириғи довдираётган эрини ҳам чўчитиб юборди.

– Қоч, Фазли, қоч, менга халакит килма, – деди у минғирлаган овозда.

– Уйга юринг...

– Фазли, қоч, мени Худо уриб кўйди.

– Ютқизган бўлсангиз, ўрни тўлиб кетар, сиқилманг.

– Энди ўрни тўлмайди, Фазли. Энди менга бир сўм ҳам сарфлама.

Эрининг аҳди қатъийлигини сезган Фазлия бир сапчиб, унинг қўлидаги арқонни тортиб олди. Эри бундан баттар довдириб, ҳўнграб йиглай бошлади. Атрофига олазарак қараб, ўнг томонидаги бешлик санчқини чангллади.

– Фазли, кет! Кета қол!

Фазлия арқонни четга ирғитиб, у ҳам санчқининг дастасини маҳкам ушлади.

– Нега ундаи қиляпсиз? Шунчалик кўп ютқиздингизми?

Эри жавоб бермай ҳўнграганича пешонасини унинг елкасига кўйди. Ҳам хавотир, ҳам иложсизлик чангалида қолган Фазлия қўрқибгина сўради:

– Мени ютқиздингизми?..

Эри жавоб ўрнига баттар ҳўнгради. «Мени ютқизгандир», деган шубҳа ҳақиқатга айланди. Эридан нафратланди. Бетларини юлиб олгиси келди.

– Шунчаликка бордингизми? – деди нафратли титроқ билан.

– Фазли... Фазли... Сен ўйлагандан ҳам баттар... Сен болларни олиб бирон ёққа қоча қол. Келганлар билан ўзим ҳисоб-китоб қиласман.

Бу гапи ажабланарли бўлди.

– Нега қочаман?

– Фазли, сен билмайсан, мени Худо уриб қўйди... Қиморга сени тикай десам, кўнишмаса, аччиқ устида болларни тикиб юборибман. Сен болларни олиб қоч, ҳозир келиб қолишади у номардлар...

Фазлия қиморга опа ёки сингиллар, хотинлар, ҳатто янгалар ёки келинлар тикилганини эшигтан, аммо ўз фарзандини бу балога рўпара қила олувчи ҳайвоншева оталар ҳам мавжудлигини тасаввур ҳам қилолмас эди. Фазлия «ростданми?!» деб аниқлаштирмади. Эрининг

гали унинг ақлу хушини парчинлаб ташлаган эди. У бор кучи билан санчқини тортди. «Фазли, қоч! Фазли қоча қол!» деб тинмай ялинаётган эри дастани қўйиб юбормади. Оқибатда эр-хотин ўртасида санчқи учун олишув бошланди. Эри киндигига тиззаси билан зарба берганда Фазлия оғрикқа чидолмай букчайди-да, бир қўлини қўйиб юборди. Шунда бўйнига иссиқ бир нима томди. Кейин яна томди. Бошини кўтариб қараб дод деб юборди. Санчқи эрининг бўғзига санчилиб қолган эди...

Фазлия даҳшат тўрига бурканиб, нима қилишини билмай турганида орқа томондан овоз эшитилди:

– Эрини гумдон қилиби-ку!

Овоз келган томонга қараб, нотаниш икки кишини кўрди-ю, хавотир билан уй томон қаради.

– Эринг бизга ютқизиб қўйган эди... Эрингни ўлдирган бўлсанг, бу сенинг ишинг. Бизга бу аҳмоқнинг жони керакмас. Бизнинг ҳисоб-китобимиз бошқа.

– Қанақа ҳисоб-китоб? – деди хиркироқ овозда Фазлия. Буларнинг мақсадини билса-да, яна сўради: – Қанақа ҳисоб-китоб? Ана – эрим, мана – мен! Ҳисоб-китобингизга иккита жон камлик қиласдими?

– Сенинг жонинг тикилганда, сен билан ҳисоблашардик. Сенинг жонинг итга ҳам керакмас.

Шундай деб уй томон бурилишганда Фазлия санчқини чанглаб югурди-да, йўлларини тўсди:

– Инсофинглар борми ўзи! Болаларда нима гуноҳ?

– Бизда инсоф бор, эрингда йўқ эди ўша инсоф. «Болларингни тик», деб ҳеч ким зўрлагани йўқ.

Шундай деб улар яна уч-тўрт қадам қўйдилар. Фазлия тисарилди. Сўнг санчқини ўқталди.

– Ўзимам ўламан, икковингниям ўлдирман, лекин болаларимнинг битта тукини ҳам тўқтирмайман.

Улар бир-бирларига қараб олиб, тўхташди.

– Яхши, биз одамхўр эмасмиз. Эрингни кўмиб ол, сенга кирқ кун муҳлат берамиз. Эрингнинг қарзини тўлайсан. Бўлмаса, етимчаларингни олиб кетамиз.

Күркма, ўлдирмаймиз. Сендан кўра яхшироқ қараймиз. Бизнинг хизматимизни қилиб катта бўлишади. Балки шу болларинг туфайли остананитача тилладан бўлиб кетар.

Улар ўгирилиб кетишгандан кейин ҳам Фазлия жойидан жилмади – санчқини маҳкам ушлаганича тошдек қотиб тураверди. Кейин секин-секин тисарилганича уй останасига борди. Кўшниларни ёрдамга чақириш, эрига қарашиб хаёлига ҳам келмади. Назарида бу икки одамхўр уни алдаб сал нари кетишгану ҳадемай қайтишиб, болаларини бир-бир сўйиб чиқишидигандай эди.

Қанча турганини билмайди. Дарвозалари олдида машина тўхтагач, сергакланиб ўша томон тикилди. Бирин-кетин югуриб кирган икки милиция ходими унга тўппончаларини ўқталиб бақиришди:

– Паншахангни ташла, бўлмаса отамиз!

Фазлиянинг назарида боягилар милиция кийимида қайтиб келгандай туюлиб, санчқини ўқталганича қотиб тураверди. Милиционер йигитлар яқинлашишга ҳайиқиб, яна огохлантиришди. Шовқинни эшитиб чиқкан кўшнилар аввалига ҳайратланиб туришди. Фазлиянинг ҳолатида ўзгариш сезилмагач, бу хонадонга сирдош бўлган кўшни хотин унга аста яқинлашиб, елкасини силади. Сўнг қотиб қолган бармоқларни санчқи дастасидан ажратди. Шундан сўнг милиционерлардан бири югуриб келиб, Фазлиянинг қўлига кишин солди. Буни кўрган кўшнилар норози бўлиб, йигитларни ўраб олишди.

– Бу хотин эрини ўлдирган! Милицияга қаршилик кўрсатди, – деди кишанлаган йигит, сўнг атрофдагиларга «тарқалинглар!» деб буюрди.

Оғилхонадаги ахволдан бехабар кўшнилар дарров бўш кела қолишимади.

Лекин... чорасиз эдилар...

Фазлияни эрини қасддан ўлдиришда айблаб, олиб кетишди.

Фазлия эрига санчкі қандай санчилганини билмай қолған зди. Шу боис айбга бүйин эгишдан үзга чораси қолмади.

Мурдани қариндошлар, күшнилар күмишди. Гарчи кафанга арзимаса ҳам кафандашди, гарчи лаҳадда ётишга лойик бўлмаса ҳам, икки кулоч ер-у битта гувалани ундан аяшмади.

Болаларни қариндошлар битта-битта бўлиб олишган зди. Қирқ кундан кейин уларнинг барчаси бир кунда, ҳатто бир соатда ғойиб бўлдилар...

АСАДБЕК

1955 ийл 30 октябрь.

Асад онасидан ҳам ажрагач, қўни-қўшнилар унинг тақдиридан ташвишлана бошлишди. Унинг ошиқ тепувчи қиморбозларга дастёрчилик қилаётганидан ҳабар топган Жалилнинг отаси аввалига яхши гапириб кўрди. Ўшанда Асад ўртоғини сотқинликда айблаб, у билан хафалашиб колганди. Жалил ўртоғининг қиморбозлар орасида ўралашиб юрганини, чўнтағида пул пайдо бўлиб қолганини билгани билан отасига айтмаганди. Қўшни маҳалладаги битмаган иморат ёнидан ўтаётган Жалилнинг отаси ичкарида ошиқ тепаётганлар орасидаги Асадни кўриб қолганди. Насиҳат қулоққа олинмагач, қўшнилар Асаднинг узоқ қариндошлари билан биргаликда маслаҳат қилишиб, уни мактаб-интернат деб аталмиш янги услубдаги етимхонага топширишни маъқул кўришди. Асад зътиroz қила олмасди, чорасиз зди. Овози раста бўла бошлаган ўсмирнинг озод ҳаётдан бу эрксизликка ташла ниши оқибатини ҳеч ким ўйламаганди. Улар болани ёмонлар даврасидан асрашмоқчи здилар. Ҳолбуки, бола бу давра булоғидан баҳра олишга улгурган зди. Энди у учун яхшилар булогининг суви bemaza тую-

лишини қўшнилар тасаввур эта олмасдилар. Аввалига норози бўлгани билан, бир-икки ҳафтадан сўнг Асад қўшниларининг бу тадбирларидан қувонди. Қиморбозларга қўшилганида қўшниларнинг сезиб колишларидан чўчирди. Энди, интернат ҳавосини олгач, истаган пайтда ғойиб бўлиши мумкинлигидан мамнун эди.

Бу интернатда етимлардан ташқари, ота-онаси тирик болалар кўпроқ эди. Катта-кичик мартабаларда хизмат қилиб, боласи тарбияси билан шуғулланишга вақти йўқ ота ва оналар фарзандларини етимхонага топширишдан истиҳола қилишиб, шундай мактаб-интернатларни барпо этишганди.

Асад интернатга жойлашган куниёқ бир қизга маҳлиё бўлиб қолди. Маҳалласида ҳам, мактабида ҳам чиройли қизлар кўп эди, лекин уларни кўрган онларрида бундай туйғу уйғонмаганди. Болалик даврлари ортда қолиб, ўсмириликнинг тотли фаслига кириб келганини у ҳали фаҳмламас эди. Унинг билгани – шу ёқимли ва чиройли қизни кўрганида юраги бошқача ура бошлайди. Яна билгани – шу гўзаллик олиҳасига утина эга чиқиши керак! Бошқача бўлиши мумкин эмас! Шу қиз учун олишиш шарт бўлса – олишади! Унга етишмоқ учун қоплон бўлиши зарур бўлса – қоплонга айланади, илон бўлиш талаб этилса – бундан ҳам қайтмайди! Энди у «халк душмани»нинг фарзанди»га нафратларини изҳор этиб, башарасига тупурилаётган пайтда мутелик билан турувчи бола эмас. Энди у ғазабини яширмайди, энди атрофни олов бўлиб куйдиришга ҳам кодир...

Қалбда уйғонган муҳаббат чўғи янги Асадни тарбия кила бошлаган эди.

Интернатга келганининг учинчи куни нонушта пайтида, ёнида ўтирган шерикларидан сўраб ҳам ўтирмай, стол устидаги повидлоли тўртта ширин сомсани олди-да, чой ичиб ўтирган ўша қизга яқинлашди. Бир стол атрофидаги тўрт қиз, жумладан, ўша гўзал ҳам, унга ажабланиб қарадилар.

- Отинг Манзур экан-а? – деди у дабдуруустдан.
- Манзур эмас, Манзура, – деди ўша чиройли қизнинг дугонаси лабини буриб.
- Нима фарқи бор? – деди Асад, тўпорилик билан, кейин сомсаларни қизнинг олдига кўйди. – Бу сенга.
- Менга? – деб ажабланди Манзура. – Нима қиласман?
- Нима қиласдинг, ейсан. Озғинлигингни қара, сен кўп овқат ейишинг керак.
- Сенга озғин қизлар ёқмайдими? – деди бояги қиз, хиринглаб кулиб.
- Сендақа хомсемизларга тоқатим йўқ, – деди Асад кўполлик билан.

Бу гаплардан ранжиган Манзура шарт ўрнидан туриб, икки бетини кафтлари билан ушлаганича, ошхонадан чиқиб кетди. Дугоналари ҳам ўринларидан туришди. Бояги қиз дугонасига эргашаётib Асадни бир гап билан чақиб олишни унутмади:

– Одаммисан, тўнкамисан, нима бало!

Асад ичиди сўкинди-ю, қиз бола билан тенг келишни истамади.

Ошхонадан чиқаёттанида бўйдор бир бола уни тўхтатди:

– Нега Манзурнинг атрофида ўралашиб қолдинг? – деди у беписандлик билан.

– Ўралашганим йўқ, сомса бердим, – деди Асад унга тик қараб.

Янги келган боланинг бундай қарashi бўйдорга ёқмади, унинг ёқасига қўл юборди. Асад чакқонлик қилиб, билагидан маҳкам ушлади. Бўйдор унинг кучини ҳис қилган бўлса ҳам, бўш келишни истамай дағаллик билан деди:

– Агар яна Манзурга яқинлашсанг, битта оёғинг синиб қолиши мумкин, чўлоқланиб юриш ёқса, билганингдан қолма.

– Икки оёғинг сингандан кейин эмаклаб юришнинг бирор кўрса, орқаси билан кулса керак? – деди Асад заҳарли пичинг билан.

Бу гапни эшитиб, бўйдор қулинни силтаб тортиб олди. Бу онда икки жўжахўроздинг юзма-юз туришидан бир ёмонлик исини сезган тарбиячи ҳай-ҳайлаб қолди.

– Ким эмаклаб қолишини кўрсатаман!

Бўйдор шундай деб ташқарига йўналди. Асад, уч бола унга эргашганидан, унинг интернат зўрларидан эканини билди. Тарбиячи унга яқинлашиб, енгидан силтаб тортди:

– Нега уришяпсан? – деди қўпол оҳангда.

– Уришганим йўқ, танишдим.

– Сен ўзингдан кетма, бола! Суннатиллани жигига тегмай, жим юр.

– Менинг бу болангиз билан ҳам ишим йўқ. Фақат бир савол берди, шунга жавоб топишим керак экан.

– Қанақа савол?

– «Битта оёқ синиб чўлоқланиб юрган яхими ё икки оёқ синиб эмаклаб юрган яхими?» деб сўради.

Бу гапни эшитиб, тарбиячининг капалаги учиб кетди. Ҳатто лаблари бир оз титради ҳам.

– Агар Суннатиллани чертгудай бўлсанг отасидан балога қоласан! – деди.

– Отаси зўрми?

– Зўрми, зўр эмасми, бу сенинг ишинг эмас!

«Яхши бола бўлиб юришга» сўз бериб, тарбиячининг тарбиявий дақиқасидан кутулгач, Асад синфдошлиридан бўйдор ҳакида сўраб-суроштириди. Тарбиячининг чўчиб тушиши бежиз эмас экан, бўйдорнинг отаси жисмонан эмас, мартаба жиҳатдан «зўр» бўлгани учун ҳамма унинг эътиборидан чўчиб тураркан. Бўйдор куч жиҳатдан эмас, ана шу обрў жиҳатдан интернатнинг зўри – «пахани» ҳисобланаркан.

Уша куни пешиндан кейин Асад бўйдорга яна рўпара келди.

Икки дугонаси билан чинор дарахти соясида суҳбатлашётган Манзурага Асад хумор кўзларини қадаганича сал нарида ёниб турарди. Бўйдор ҳам шу яқин атрофда эди. Асад унинг ҳаракатларини ҳам на-

зардан қочирмасди. Бўйдор чўнтағидан қоғоз чиқариб, шеригига берди. У, ҳаялламай, қизлар томон юрди. Манзурага хатни тутқазди-да, қулоғига нимадир деб пичирлади. Қизлар сирли равишда кулишди. Манзура эса уялиб, кафтини бетига тутди. Иккинчи кўлидаги хатни ўқимай, ғижимлади.

Асадбек кузатиб тураверишга ортиқ тоқат қилмай, киз томон юрди. Унинг яқинлашаётганини кўрган қизлар нари кетишди. Манзура жойидан жилмади. Бу Асадга маъкул келиб, янада дадиллашди.

– Бу хат менга экан, бола пакир адашиб сенга бе-рибди, – деб қўлинни чўзди. Манзура чўчинқираганича бўйдор томон бир қараб олиб, сўнг ихтиёrsиз ҳолда хатни узатди. Асад хатни олиб, баттар ғижимлаганича деди: – Сен у найновга қарама, хатларини ҳам ўқима.

– Қараётганим йўқ, ўзи шилқимлик қиласверади, – деди Манзура нажот нигоҳи билан унга қараб. Асадга бу ҳолат ҳам ёқиб тушди.

– Энди шилқимлик қилмайди, менга ваъда қилди, – деди Асад қатъий. Манзура бу гапга ишониб, изоҳ берди:

– Олдинги шанбада уйга кетаётганимда орқамдан эргашиб борди...

– Энди бормайди.

Асаднинг дадил гапириши Манзурага ёқди. Боланинг эрталабки тўпорилиги учун ранжиган киз кўнглидан хафалик чиқиб кетди. Беихтиёр «раҳмат» деди-да, бурилиб, дутоналари изидан югурди. Асадбек хатни майда-майда қилиб йиртган чоғида бўйдор унга яқинлашди.

– Кучайдингми? – деди ўқрайиб қараб. Асад унинг таҳдидига парво ҳам қилмади.

– Нима демоқчисан?

– Чиройли қизлар кучли одамларники бўлиши керак.

– Тўғри айтасан, чиройли қизлар эгасиники бўлади.

– Нима демоқчисан? Эгаси... сенмисан?

— Ҳа, менман.

— Кече келиб, бугун хўжайинлик қилмоқчимисан? Чиқасанми? — деди бўйдор Асадни олишувга даъват этиб. Асад бу пўписага ҳам парво қилмади:

— Бирга-бирми ё думларинг ҳам қўшилишадими?

— Олдин битта думим билан тушасан. Уни қойил қиласанг, кейин менга чиқасан.

— Ҳозирми?

— Йўқ, ҳозир қорнинг очиб, шилқиллаб турибсан. Коронги тушганда, ошхонанинг орқасида. Хоҳласанг ўзинг ҳам думларингни олвол.

— Дум сенда бўлади. Мен ўғил боламан!

Бўйдор жавоб қайтара олмади. Гапдан енгилгани алам қилиб сўкинди-да, ўз даврасига қайтди.

Белгиланган жойга шом қоронғисида Асаднинг бир ўзи келди. Ўн чоғли бола уни кутиб турган эди.

— Гапимиз ўғил болачасига бўлади, — деди бўйдор уни қарши олиб. — Олдин Шуҳратик билан тушасан. Эпласанг эпладинг, бўлмаса, жимгина писта қилиб юришга сўз берасан.

Асад куч жиҳатдан Шуҳратнинг зўр эканини фаҳмлади. Бу болани бўйдор пул берибми ё бирон ваъда биланми ўзига қарам қилиб олганининг сабаби барчага номаълум эди.

Чап бетига тарсаки, ўнг бетига енгил мушт тушганда Асад гангиб қолди. Тўпланганлар масала ҳал бўлди, икки муштлик ҳоли бор экан, деган тўхтамга келишди. Айниқса, бўйдорнинг кўзлари шодлиқдан кулди.

Уртадаги икки йигитча бир-бирини яхши танимасди. Шуҳратдан фарқли ўлароқ, Асад нима учун муштлашаётганини аниқ биларди. Бу олишувда Шуҳрат қул мақомида эди: хўжайини буюрди, у уришяпти. Енгса, хўжайини миннатдор бўлади, енгилса — кўп нарса йўқотмайди — сўкиш эшитади. Асад эса енгса, кўнгил кўйганига эга чиқади, маглуб бўлса — ўз фикрига кўра, ҳамма нарсасини бой беради — хорлик ботқоғига чўқади. Шу боис унга фақатгина ғалаба керак!

Асад ҳарифидан кўзларини узмаган ҳолда тезгина тисарилди. Ошиқ тепувчи уйғур йигит унга хитойча тепишни ўргатган эди. Асад ҳозир ўша тепкини ишга солиш вакти келганини англади. Ўнг оёғини орқага буқди, ўнг қўли билан панжасини ушлади-да, оёққа куч берди, сўнг қўйиб юборди. Оёғи худди камондан узилган ўқ каби учиб Шуҳратнинг жағига урилди. Бунақа тепкини ҳеч ким кўрмаган, демакки, кутмаган эди. Асад тепиш жараёнида устозининг яна бир ўгитига амал қилди: рақибининг онасини эслаб, бўралаб сўкди. Шуҳратнинг ҳушидан кетишига битта тепки кифоя қилди. Асаднинг сўкишини эшиitmади, сўкиш бу ёқдагиларнинг кулокларини қоматга келтирди. Шуҳрат уч-тўрт дақиқада ўзига келди. Болалар аввалига ўлиб қолди, деб кўркишди ҳам. Асад уларни кузатганича майдондан чиқмай тураверди. Жағи шиша бошлаган Шуҳрат ҳушига келгани билан муштлашувни давом эттирадиган ҳолда эмасди. Шу боис бўйдор енг шимариб ўртага тушди.

— Бекор қиляпсан, сенга шунинг ўзи кифоя эди, — деди Асад, уни огоҳлантириб.

Бўйдорнинг кўзларида қўрқув зоҳир эди, аммо сир бой бергиси келмади:

— Сен бугундан бошлаб эмаклаб юрадиган бўлиб қоласан!

Бўйдор дағдага қилмокчи эди. Лекин овозида таҳдид эмас, ишончсизлик оҳангисизлиги сезилиб қолди. Аввал зарба учун пайт пойлагандай давра ўртасида айланаверишди. Асад ҳужумни бошламади. Бўйдорнинг муштларига чап бериш билан қаноатланди. Бир маҳал тепиш учун оёғини орқага буқди. Бундан сергакланган бўйдор тисарилди. Лекин Асад уни тепиб шикастлашдан ўзини тийди. Башарасида из қолишини, кейин шу туфайли қандайдир балоларга дуч келишини истамади. Бўйдорни белига кўл юбориб, маҳкам кисди-да, кулатди. Сўнг уни миниб олиб, ўнг қўйини орқасига қайириб олди. Бўйдор оғриқдан додлаб юборди. Болалар «пахан»ларини кутқаришга чоғланишганда бўй-

дор ётган ерида: «Қайтларинг! Ўзимиз келишамиз!» деб бакирди.

Келишдилар...

«Пахан»лик мартабаси ўша ондан Асадга ўтди.

Ўша онда у ўз оламини белгилаб, чегаралаб олди. Ўз оламига ҳоким бўлди. Ўзининг мустаҳкам қалъаси пойдеворига биринчи мустаҳкам тошни кўйди.

Ўшанда энг чиройли қизга тўла эга чиқдим, деб янглишган эди. Орадан йиллар ўтиб, уйланиш палласи келганда, совчилари куруқ қайтишганда адашганини сезди. Энди қизга муштлашув орқали эга чиқа олмас эди. «Қиморни ташлайман» деб қасам ичгач, Жалилнинг отаси қиз хонадонига қатнайвериб, кўнмагунларича ҳоли-жонига қўймади...

Асадбекнинг қиморбоз дўстлари ҳиммат қилишиб, тўйни дабдаба билан ўтказиши. Манзура келинлик либосида остона ҳатлаб кирганда Асадбек ўзини ilk маротаба чинакамига бахтли хис килди.

АБДУРАҲМОН ТАБИБ

1990 иш, 3 июнь.

Дев аканинг ҳужрасини макон тутганлар ҳадеганда йўқолишмади. Худди бу ерга бутунлай кўчиб келишгандай бамайлихотир яшайвериши. Бу атроф қишлоқларни назорат қилувчи милиционер йигит ҳам уларга бир мартагина рўпара бўлди холос, кейин «нима учун берухсат ётибсизлар?» деб сўрамади.

Абдураҳмон табибининг сезгир юраги кандайдир зулмни хис килиб, сиқилаверди. Беш-олти марта ҳужра ёнидан ўтди. Аввалига нотаниш маллалар ажабланиб қараб қўйиши. Шу қишлоқда туғилган, улғайган палласида шайтон йўриғига кириб кетиши туфайли бу тупроққа бегона бўлиб қолган Қоравой эса норози киёфада кўз тикди. Маллаларнинг ажабла-

ниши ҳам, Қоравойнинг норозилиги ҳам бежиз эмасди. Бешинчи марта ўтаётганида Қоравой хужрадан чиқиб, унинг йўлини тўсди.

– Бу томонларга бунча серқатнов бўлиб қолдингиз? – деб сўради у саломни унутиб.

– Доим ўтиб юрадиган йўлим, сенга нима кутқулиги тушиб қолди? – деди Абдураҳмон табиб зарда билан.

– Юришингиз ошналаримга ёқмай турибди, сал наридан айланиб ўтганингиз маъқул.

– Ёқмаётган бўлса, ошналарингни олгин-у, бу ердан қорангни ўчир.

– Ўчакишманг, ошналаримнинг жаҳли ёмон.

Тақдир баъзан шундай ғаламислик қиласдики, таажжубдан кўра ғазаби келади, кишининг. Айниқса, сурбет одам билан юзма-юз келганда ўз қорнига ўзи пичоқ тортиб юборишга ҳам рози бўлиб қолади. Қоравойнинг туриши, нурсиз нигоҳидаги зулм булутининг сояси, тилидан учган совуқ гаплар Абдураҳмон табибни шундай кўйга солди.

– Гўрга кириб кетган жаҳли ёмонларни санаб адодига етиб бўлмаслигини ҳеч ўйлаб кўрганмисан? – деди у жаҳлини яширмай.

Қоравойга бу ҳақиқат ҳам таъсир этмади, ўша совуқ оҳангда эътиroz билдириди:

– Булар осонлик билан гўрга кирадиганлардан эмас.

Жимгина оқаётган сув ўз остидаги гирдобни ҳар вақт ҳам яшириб сақлай олмаганидек, Абдураҳмон табиб ҳам вужудини қамраб олаётган ғазаб ўтини жиловлашга ожизлик қилиб, овозини кўтарди:

– Унақада буларингни Худо ёмон урибди: ошналирингта гўр ҳам насиб этмас экан...

Бу гапни эшитган эси бутун одам келажагини кўз олдига келтиролса, юраги ёрилиб, ўлиб қолиши ҳам мумкин эди. Қоравой эса пинагини бузмади. Аламини ичига ютиб юрган кишиникига ўхшатиб заҳарханда қилди:

— Совуқ нафас қилманг. Биз ҳали кўп яшаймиз, майшатлар қиласиз, ўйнаб-куласиз.

— «Яшаймиз» дедингми? Сен ҳали ўзингни тирик одам қаторида кўряпсанми? Сен Мамасолининг сигирини ўғирлаган кунинг ўлган эдинг. Сен одам эмас, хунук бир шарпасан.

— Агар бир пайтлар онамни даволамаганингизда ҳозирги гапингиз учун гўрингизга бенавбат кирғизворган бўлардим. Иззатингизни билинг-у, жўнанг бу ердан!

Абдураҳмон табибни ғазаб баттар бўға бошлади. Бу бадбаҳт қанчалар қарғишга лойиқ бўлса ҳам, шариат йўриғига амал қилиб, дуоибад этмай, унга инсофатвиқ тилади-да, нари кетди.

Қоравойнинг нурсиз нигоҳи унга кимнидир эслатди. Ўйлай-ўйлай ёдига тушди, чувакдан келган, сўхтаси совуқ одамни эслади: ўтган йили «ошнам касал, тузатсангиз, оғзингизга сикқанича сўрайсиз, бир тийин кам берган – номард!» деб катта кетган бу одамнинг илтимосини рад этгач, «билиб қўйинг, ошнам ўлса, бу уйда битта ҳам тирик жон қолмайди!» деб дўқ урган эди. Ўшанда табиб: «сен... валади зинога ўхшайсан» деб гапини калта қилганди. Аравондаги улоққа олиб борилаётган отлар ўлдирилганди ўшанда. Абдураҳмон табиб ўша воқеани, иблис нури билан чақнаган ўша кўзни унутиши мумкин эмас. Яқинда бир туш кўрди: кўкатлари жазирамада қуриб, ковжираб кетган гўр устида бир калла турганмиш. Кўзларни таниди: ўша одам. Бу кўзлардан қон оқа бошлагач, Абдураҳмон табиб босинқираб уйғониб кетди...

Қоравойнинг кўзлари ҳам ўшанга ўхшайди. Зулмни касб қилганларнинг нигоҳлари бир-бирига шунака ўхшармикин?..

Орадан бир неча кун ўтгач, хуфтонни ўқиб бўлиб, ётишга тайёргарлик кўраётган онида кўча эшиги тақиллади. Бу хонадонда табибнинг ўзими ё энг ки-

чик ўғил набирасими бўлса, бас, бирор чакириб келса, эшикни очиш у ёқда турсин, аёллар овоз беришмас эди. Абдураҳмон табиб гўдаклигидан бери биладиган бу одатга ҳеч қандай ўзгартиш киритмаганди. Ҳозир ҳам «мен ётятман, бирортанг чиқа қол», деб буюрмади. Кўйлагини эринмай кийиб, эшик сари юрди. Остона нарёғида турган Қоравойни кўриб ажабланди. Бу сафар Қоравой салом берди. Табиб алик олди. Атроф коронғи бўлмаганида унинг лаблари салгина титраганини, юзига ташвиш булути соя ташлаб турганини сезган бўлар эди.

– Маслаҳатга келувдим...

Қоравойнинг bemavrid ташрифидан ажабланган Абдураҳмон табиб бу овозда титроқ сезиб, таажжуби янада ошди. Ичкарига таклиф қилди. Қоравой кирмади.

– Мен билан бирга мозорга бориб кела оласизми? – деди умид билан.

– Мозорга? Ҳозирми?

– Ҳа... ҳозир...

Тунов кунги учрашувда гўрга бенавбат кирғизвориш истагидаги одамнинг коронғи кечада мозорга таклиф қилиб келиши ғоят ажабланарли ҳол эди.

– Нима бўлди? Сабабини айт-чи?

– Кўзимга бир нарсалар кўриняпти. Асли... қишлоққа келганимдаёқ бошланувди. Ўтиб кетар, деб ўйловдим. Баттар кучайяпти. Икки кундан бери уйку йўқ. Кўзларимни юмсан, юрагим портлаб кетай деяпти.

– Ўлдирган одамларингни кўраётгандирсан, мурдалардан қўрқмасанг ҳам бўлади.

– Улар эмас... онам кўринадилар...

– Үнда... онанг қилаётган ишларингдан безовта экан. Сени деб бечора маломатларга қолди, йўлингга кўз тикиб ўлди. Ўғил бўлиб гўрига бир сиким тупроқ ташламаган эдинг. Ишқилиб адашган бўлайн, ҳар

холда қайтганингдан кейин ҳам мозорбошига бормагандирсан?

Коравой бу аччиқ ҳақиқатга дарров икror бўлмади. Сукут саклади. Кейин хўрсинди:

– Адашмадингиз...

– Анави куни «сен ўлик одамсан», десам аччиқландинг...

– Илтимос, мени ҳозир сўқманг, мозорга бориб келайлик. Онамга сиз кўп яхшиликлар қилгансиз. Отам ўлганидан кейин ўн ой ўтиб түғилганимни ҳам биламан. Онамни уятдан куткариш учун «шунақаси ҳам бўлади, баъзан бола бачадонга ёпишиб қолади», деганингизни ҳам одамлардан эшитганман. Ҳақиқий отам кимлигини онам айтмаганлар, сиз ҳам..

Абдураҳмон табиб унинг таънасини эшитиб: «алваладу сирру абиҳ», деб пичирлаб кўйди. Коравой унинг лабидан учган сўзларни эшитди-ю, англамади:

– Нима дедингиз? – деди ажабланиб.

Абдураҳмон табиб «бала отасининг сиридур» деган ҳикматни унга тушунтиришни истамай, гап маромини бурди:

– Мендан сўрамагансан. Сўраганингда ҳам жавоб бера олмас эдим. Бу сир Худога-ю яна онанг билан чин отангга маълум эди.

– Онам кўзимга кўрингандарига аввал сиз томонга бошлияптилар, кейин мозорга... Балки ўша ерда бир сир бордир?

– Буни Худо билади. Бугун ичганмисан ё наша тортганмисан?

– Йўқ...

– Мозорга бормоқчи бўлсанг, аввал ичкари кир, таҳорат қилиб, покланиб ол, бу ҳолатингда қадам босма у жойга.

Коравой билганича, чала-пулча поклангач, йўлга тушдилар. Бу вақтда тўлин ой терак бўйи кўтарилиб, атроф гўзал нурга бурканга бошлаган эди. Коравой ярим қадам орқада борарди. Абдураҳмон табиб орқа-

сига ўгирилиб қаради – Ой нури Қоравойга чирой бахш этишга ожизлик қылган, юзи ўликники каби совук – нурсиз, ифодасиз эди.

– Кўзингга кўринган шарпа қайси кўчалардан олиб ўтганини эслайсанми? – деб сўради Абдураҳмон табиб. У «онангнинг арвоҳи» демокчи эди, юмшоқроқ гапириш мақсадида «шарпа» деб қўя колди. Ҳолбуки, арвоҳни тилга олган тақдирда ҳам Қоравой қўркиб, лабига учук тошмаган бўларди.

Қоравой саволга жавобан бош иргаб, тасдиқ ишорасини қилди.

– Унда олдинга ўт, – деб буюрди Абдураҳмон табиб.

Қоравой бугун ароқ ҳам ичмаган, наша ҳам чекмаган эди. Бироқ, кеча ҳар иккисининг кайфида ўтирганида кўзига онаси кўринганди. Кайфи тарқалганда «мозорга хаёлан бориб келдим», деб ўйлаганди. Аслида эса ўзига-ўзи гапириб, худди тунги ойпаст бемор талвасасида бориб келганди.

Мозорнинг кунботар томонида Дев аканинг хужрасига нисбатан ободроқ бир уйча бор эди. Уй сохиби Дев акага ўхшаган девонаваш бўлмаса-да, одамларга қўшилмасди, оила ҳам қурмаган эди. Барчага «Гўрўғли» деган ном билан танилган бу одам, Абдураҳмон табиб тахминича, ёш жиҳатдан қишлоқнинг улуғи эди. Исмининг келиб чиқиши ҳақида турли миш-мишлар юрарди: бирорлар «онаси ҳомиладорлигига ўлиб, кўмилгач, лаҳадда туғилган, гўрков боланинг йигисини эшишиб, кавлаб олган», дейди, бошқаси: «очарчилик пайтларида қўшни қишлоқлик хотин боласини боқолмай гўрковга ташлаб кеттан», деса, кўпчилик унинг қасби – гўрковлигига ишора қиласди. Унинг неча йиллардан бери гўрковлик қилишини бирор ҳисоблаб кўрмаган. Гўрўғли эса эллик йилнинг нари-берисида кимнинг қаерга ва қачон кўмилганини аниқ кўрсатиб бера олади. Унга қабристоннинг яна айрим сирлари ҳам маълумки, бу

ҳақда бирорга гапирмайди. Фақат Абдураҳмон табиб билан сұхбат қурганда айримларидан уни вөкиф қилиб қўяди. Сир иккинчи одамга айтилса, сирлигидан чиқади, дейишади. Бироқ, гўрковнинг Абдураҳмон табибга айтган сири маҳфийлик чегарасини ҳатламаган, Қоравойнинг онаси ва ҳақиқий отасига таалтуқли сир ҳам шулар жумласидан эди.

Абдураҳмон табиб фақат бир марта Гўрўғидан эшитган маҳфий гапни ошкор этишга мажбур бўлганди. Ушанда Гўрўғли Исматнинг арвоҳи безовталанаётганини айтиб, сабабини англаёлмай гаранг бўлаётганини билдирганди. Арвоҳнинг безовталик сабабини Абдураҳмон табиб тахминан биларди. Исмат янги уй солаётганида ўзининг ҳовлиси кенгги на бўлишига қарамай, қўшниси еридан бир қисмини эгаллаб олган эди. «Кенгга кенг дунё» деб яшовчи қўшни норози бўлса ҳам жанжал қилмаганди. Фақат бир марта Абдураҳмон табибга дардини айта туриб: «қўшним охиратини ўйламади-да», деб афсусланганди. Абдураҳмон табиб унинг бу афсусини етказганида Исмат бўш келмай, «асли ҳовлисини таг-тути билан олиб қўйсан ҳам ҳаққим бор. Бу жойларнинг эгаси менинг катта дадам эди», деганди. Абдураҳмон табибнинг: «Ад-дунё ёвмун ва лано фиҳо савмун» – дунё бир кундек ва биз унда рўзадормиз. Иним, бу ерларнинг, бу сувларнинг эгаси битта – раббимиз Аллоҳ! Сиз билан биз вактинча фойдаланувчилармиз. Бир-биirimiz билан жой талаша-талаша дунёдан кўз юмганимизда бизларга икки қулочгина ер насиб этади. Талашганимиз учун эса охиратда Аллоҳ ҳузурида уялиб қолишимиз мумкин», деган ўгитига парво ҳам қилмаганди. Арвоҳнинг безовталигини эшитгач, Исматнинг ўғлига бу сирни ошкор этишни мақсадга мувофиқ деб билди. Ўғил отасидан фарқли ўлароқ, бамъни эди, табибнинг гапларини эшитгач, «шу уй хосиятсиз бўлди, бузиб ташлайман», деди. Бироқ, уйни бузишга қўшниси йўл бермади. У мозорга бориб,

Исматнинг қабри тепасида розилигини Абдураҳмон табиб гувоҳлигида айтди... Ўшанда, қабристондан қайтишда Абдураҳмон табиб бир байт айтиб, маъносини тушунтириб берганда Исматнинг гунохини кечирган ўша қўшниси йиглаб юборган эди. Эртасига қоғоз-қалам кўтариб чикиб, «кеча айтганингизни ёзиб беринг, ёдлаб олиб, керакли жойларда тушунтириб бераман», деб илтимос қилди. Абдураҳмон табибга бу маъкул келиб, хусниҳат билан ёзди:

«Дунё эрур мазраъан фохира,
«Ад-дунё мазраъатул-охира».

Кейин қайтадан тушунтирди:

– Бу байт ҳазрат Навоийники. Илоҳий ҳикматни назмга солиб, деганларки: кўзимизга кўриниб турган дунё чиройли, фахрланса арзигулик экинзорга ўхшайди, аслида эса «бу дунё у дунёнинг полизидур». Бу дунёда яхшилик экинини эксанг, у дунёда жаннат меваларини терасан. Бу дунё полизига ёмонлик уруғини қадасанг, Қиёматда дўзахнинг оташ тошларини ютасан...

Қабристон ҳудудига етганда Қоравой чўчиб, бир неча нафас тўхтаб қолди. Абдураҳмон табиб «юрмайсанми?» деб зўрламади. Бир қадам нарида тўхтаб, сабр қилди. «Бироннинг молини ўғирлаётганда, молига қўшиб жонини олаётганда қўллари титрамаган бўлса керак, – деб ўйлади Абдураҳмон табиб. – Наҳот, ўликлар оламидан кўрқаётган бўлса? Ҳа... кўрқаётгандир. Ўзини бирон хавфдан асраш учун тирикни ўлдириши мумкин. Ўлик таъкиб қилса-чи?..»

Абдураҳмон табиб хаёлидаги саволга жавоб топмай туриб, Қоравой дўмпайиб турган гўрлар орасидаги ёлғизоёқ йўл бўйлаб юриб кетди. Ичкариликдаги белгисиз, ташландик қабр олдида тўхтаб, ўгирилдида, «бу жойда ким ётибди?» дегандай табибга қаради. Табиб бу қарашининг маъносини англамагандай инда-

мади. Бир неча нафас тургач, Қоравой яна юриб кетди. Сўнг яна бир ташландик гўр олдида тўхтади.

– Онанг шу ерга кўмилган, – деди Абдураҳмон табиб унинг савол назарига жавобан.

Қоравой чўқди. Абдураҳмон табиб тик тураверди. «Худонинг инсоғ бергани рост бўлсин», деб ўйлади.

Икки-уч дақиқадан сўнг Қоравой қаддини тикилаб:

– Мармартошнинг энг зўридан ўрнатиб қўяман, – деди.

Абдураҳмон табиб «мармартош қўйиш ўрнига ҳидоят йўлига кирганинг аълорок», демоқчи бўлди-ю, бу гапнинг ўрни ва мавриди эмаслигини билиб, индамай кўя қолди. Қоравой эса яна қабрлар оралаб юриб, Гўрўғлининг кулбасига яқинлашди-да, «энди нима қиласай?» деган маънода қаради.

– Шу ерда тура тур.

Абдураҳмон табиб шундай деб, пастак эшикни фижирлатиб очгач, эгилиб ичкари кирди-да, кулба соҳибининг уйғонганига ишонган ҳолда:

– Менман, ака, – деб овоз берди.

– Сенлигингни билиб турибман, – Гўрўғли шундай деб қўлига гугурт олди-да, қорачироқ пилигини ёқди. – Шўртумшуқ бошлаб келдими? Кеча ҳам ивирсиб юрувди. Изғиб-изғиб, тонгта яқин кетувди. Кеча бошқача эди. Бутун бошқачароқ.

– Кўзига онаси кўринганмиш.

– Кўринади-да... Бу хотин кўмилганидан бери тинчигани йўқ. Сен унинг ёнини олиб, бекор қилгансан. Шармандалиги учун тириклигида роса азоб чекканидайди, ўлганида бунчалик руҳи қийналмасмиди... Үғлининг рангига қараб «Қоравой», деб сен исм қўйган эдинг. Аслида бу валади зинонинг юраги қора эди, ўшандәёқ билганман...

Гўрўғли бу дашномни авваллари ҳам бир неча марта тақрорлаган эди. Шу боис Абдураҳмон табиб ўзини оклашга киришмади.

Рост, ўшанда бу жувоннинг бадном бўлишини

истамаганди. Чунки унинг суюқоёқ эмаслигига ишонарди. Суюқоёқ бўлган тақдираидан ҳам, эрининг гўри совимай, бегона тўшакка кириши мумкинлигига ишонмасди. Зинонинг асл сабабини аёл бирорга айтмади. Ҳатто Абдураҳмон табиб ҳузурида ҳам ўзини оқламади. Гуноҳини бўйнига олгандай, бош эгиб жимгина ўтираверди. Ҳатто йигламади ҳам. Бу воқеага қадар кўп йиғлаган эди, эҳтимол, кўз ёшлари қуриб битгандир?..

Аввал эридан ажралди, кейин отасидан. Автомобиль ҳалокатида эри нобуд бўлди, унинг кир ювдиси куни отасини қамоққа ташладилар. Машинани отаси бошқаргани учун ҳалокатга асосий сабабчи деб билдилар. Отасини қутқариб олиш имкони бор экан... Ўша одам озодлик эвазига озгина пул талаб килганида уйига пул олиб борган эди... зўрланиб, номуси топталган, хорланган ҳолда қайтди. Гарчи айбсиз бўлсада, ўзидан ўзи ирганди. Ўзини осмоқчи ҳам бўлди. Кўлига аркон ҳам олди, аммо ўлишдан қўркди. Агар келажакда шармандалик билан ўлишини ўша онда билганида эди, арқондан сиртмоқ ясаётганида кўллари қалтирамаган бўларди. Кўрқоклиги ўз бошига бало бўлди. Ҳомиладорлигини билганида ўз эридан ёдгорлик деб ўйлаб, ҳатто кувонди. Ҳалокатдан бир тун олдин қўшилишларидан аввал эри Худога ёлвориб, ўғил фарзанд тилаган эди. Гинекологга биринчи боришидаёқ, адашганини билиб, ўзини яна ўлдирмоқчи бўлди, яна қўркди...

Боши узра ёғилган ташвиш дўлларининг ҳисоби унинг ўзигагина маълум. Унинг бегуноҳлигига оз одам ишонади. Агар ўша дамларда арзини айтганида қишлоқ аҳли унга ишонган бўларди. Лекин айтмади... Оқибатда хотинлар орасида «жувонмарг бўлгур эри тириклигига ҳам ўйнашган, бўлмаса кирки чиқмаёқ иккиқат бўлиб қолармиди?» деган висир-висир гап айланди. Фийбатчи хотинлар Абдураҳмон табибининг гапига қарши чиқишга журъатлари етмагани сабабли

бу ҳакиқатни барадла айтиб, уни шарманда килишга журъат эта олишмасди.

Абдураҳмон табиб жим тургани учун Гўрўғли гапини давом этди:

– Бу хотин кўмилган куниёқ гўри устида арвохининг чирқиллаб турганини кўрганман: Кўкшапка тириклигида безовта арвохи ўшаникига тинимсиз қатнарди. Кўкшапка ўлганидан кейин унинг гўри атрофида айланадиган бўлди. Кўкшапкани қарғармиди, билмайман...

Гўрўғли «Кўкшапка» деб атаётган одам шаҳардаги «НКВД» идорасида каттароқ лавозимда ишлаган, Сталин замонида кўп бегуноҳларнинг шўрини қуритиб, етимлар ва беваларнинг қарғишига қолган, кейинчалик бу ердагиларга номаълум бўлган сабаб билан хизматдан ҳайдалиб, қишлоққа қайтган эди. Хизматдан мосуво бўлса-да, бошига кўк фуражкани қўндириб юришни канда қилмасди. Бу килиқ унга отамерос эди. Отаси ўттизинчи йилларда шундай юради, ўнлаб дехконларни узоқ ва совук ўлкаларга сургун қилганидан керилиб яшарди. «Кўкшапка» деган лақаб ўшангага тақалганди. Кейинчалик бу лақаб ўғилга ўтган эди. Кўкшапка, гарчи амал чавкари устида бўлмаса ҳам, қишлоқдагилар ундан ҳайиқиб туришарди...

Хотира селидан кутулмоқчи бўлган Абдураҳмон табиб: «Зоҳир ўлуб «буъсира мо фил-кубур», жилва қилиб «хуссила мо фис-судур», деб пичирлади.

– Бир нима дегандай бўлдингми?

– Ҳа... Қабрдагилар қайтадан чиқарилсалар, дилдагилар ошкор қилинса эди...

– Нима деяпсан? Одам тушунадиган қилиб гапир.

– Балки энди отасининг ким бўлганини айтиб қўйиш керакдир? – деди Абдураҳмон табиб.

– Ҳеч кераги йўқ, – деб эътиroz билдириди Гўрўғли. – Отаси билан ўша гўрда топишади. Шу билан бу лънатиларнинг зурриёти батамом курийди.

Үшандан кейин қишлоқقا маълум қилиб қўясан, токи бошқаларга ибрат бўлсин.

Шундай дегач, чироқни пуфлаб ўчирди. Абдураҳмон табиб кесакига бошини уриб олмаслик учун эгилганича чиқиб, эшикни ғижирлатиб ёпди. Қоравой унга умид билан бокди:

– Нима дедилар?

– Ҳеч нима... Сен қўрқма, кўзга кўринган нарсанинг зарари йўқ. Эрталаб масжиднинг имомига борсанг, дам солиб қўяди, тинчийсан-қоласан.

– Ўзингиз ўқисангиз-чи?

– Менинг бунақа одатим йўқ.

– Онам сизникига бошлаб бордилар мени...

– Тушда одамга ҳар нарса кўринаверади.

– Ухламаган эдим.

– Сенга шундай туюлган. Бир дақиқага кўзинг илинса ҳам, оламжаёнга татийдиган воқеаларни тушингда кўраверасан.

Абдураҳмон табиб шундай деб олдинга тушди. Қоравой то унинг уйигача жимгина эргашиб борди. Остонасига етгач, табиб «бўлди, изингта қайтавер», дегандай ўгирилиб қаради.

– Мен сизга бир гапни айтиб кўйишим керак, – деди Қоравой хавотирли овозда.

– Айтгинг келса, айт... – деди Абдураҳмон табиб.

– Бизнинг ҳужрага бекорга келмагансиз. Юрагингиз бир нарсани сезган.

– Бир шумликни сезяпти, – деб аниқлик киритди Абдураҳмон табиб.

– Балки шунақадир. Биз аслида камоқда ҳали кўп ўтиришимиз керак эди. Бир хизмат қилиб беришимиз эвазига чиқариб, бу ерга олиб келишди.

– Қанақа хизмат? – деб сергакланди Абдураҳмон табиб.

– Қанақалигини вақти келганда айтамиз, дейишган. Менинг билганим – бу атрофларда биздақалардан яна бор. Сизга айтганимни билиб қолишиша, мени ўлдиришади.

- Унда нима учун айтдинг?
- Билмадим... онам буюрдилар шекилли... Сиз мени ёмон кўрасиз... шерикларим мендан ҳам баттар. Ёмон ишлар бўладиганга ўхшайди. Бола-чақангизни олиб, бошқа жойда тура турганингиз яхшимикин?..
- Мени ўйлама, мени Аллоҳим асрайди. Сени «ўликсан» девдим, сен тирилишингни ўйла. Тирилсанг-тирилдинг, йўқса, жувонмарг бўласан.

Абдураҳмон табиб шундай деб, остонасини ҳатлаб, ичкарига қадам босди. Зулфни илмади, эшик қия очик қолди. Қоравой бир оз ҳаракатсиз турди-да, изига қайтди. Лекин ҳужрага кирмади. Харсангтош устига ўтирганича кўзига онаси кўринишини хавотир билан кутди. Тонг отгунинга қадар уни ҳеч қандай шарпа безовта қилмади. Тонготарда шерикларидан бири үйғониб чиқиб, унинг ёнига ўтириди-да, газета парчасига ўралган нашани тутатди. Ундан чиқкан тутун Қоравоига ҳуш ёқиб, қўлинини узатди. Шериги кулоғига қистириклиқ ўрамни олиб берди. Қоравой уч-тўрт марта чукур-чукур тортгач, ташвишлардан фориғ бўлди-ю, ҳужрага кириб, то кечга қадар қотиб уклади.

I б о б

1

– Менинг бу дунёда ҳали ҳаким кўп, – деди Асадбек, бошини кўтармай, – ҳакимни тўлатиб олмагунимча кетмайман, бу дунёдан. Сен яшаш учун туғилган бўлсанг, мен қасос олиш учун келганман.

Зулм учқунлари сараб турувчи бу гап Жалил учун янгилик эмас эди. Эллигинчи йилнинг биринчи кунида дўстининг совукдан кўкариб кетган лабларидан учган: «Мен уларнинг ҳаммасини ўлдираман!» деган аҳдни у унутмаганди. Үшандан бери қасос олажаги ҳақидаги гапни Асадбекдан кўп эшитган, бир куни

ҳатто «Сен баҳт излаб умр кечирмадинг, қасос умида-да яшадинг, ўч илинжида нафас олдинг», деб дангал айтган ҳам эди. Аввалгиларидан фарқ этувчи ҳозирги гап оҳангидаги ёвузлик Жалилнинг вужудига минглаб игна каби санчилиб, сескантириб юборган бўлса-да, дўстининг руҳиятини инобатга олиб, жавобдан ўзини тийди. «Мен бир нарса десам оловга мой қўйгандай бўлиб қолмай, ўзингиз насиҳат қилиб қўйинг» деган каби Муҳиддин отага қаради. Муҳиддин ота бу қарашининг маъносини англади, бироқ дарров суҳбатга қўшилмади. «Гапининг давоми бордир», деган ўйда Асадбекдан садо кутди. Асадбек бошка гапирмади.

Муҳиддин отанинг назарида Асадбек фарзандининг вафотидан кейин тилидан учайдиган сўзларига эътиборсиз бўлиб қолгандай эди. Гўё бу фожиа зарбаси биринчи галда сўзларга посбонлик қилувчи ақлни янчиб ташлаганди. Шунинг натижасидами, у айтажак сўзларига хожа эмас, айтилганларига қул бўлиб қолган эди. Айниқса, Асадбекнинг «Худо билан шартномам бор: энди мен унинг уйига қадам босмайман, у меникига кирмайди», деган гапи ўшанда Муҳиддин отанинг юрагига бигиз бўлиб санчилган, орадан бир неча ҳафта ўтганига қарамай, тиф азоби ҳалигача кўтарилимаган эди. Асадбек-ку тавба килди, лекин Худо кечирдимикан? Албатта, Муҳиддин ота меҳрибон Аллоҳнинг тавбани қабул этишидан умидвор. Тавбанинг тилда айтилиши кифоя қилмаслиги, амалда ҳам гуноҳлардан тўхташи лозимлигини билгани учун қалби хотиржамликни йўқотган. Ҳатто учтўрт марта саждага бош қўйган пайтида Асадбекнинг ўша гапи ёдига тушиб, танасидан жон чикиб кетгандай туюлган эди. Кечалари таҳажҷуд намозини ўқиб бўлгач, кўзларида ёш билан Яратганга илтижо қилиб, дўстининг зурриётини авф этишини сўради...

Асадбекнинг ҳозирги гапи аввалгиси каби куфрона тарзида жарангламади. Жарликка қулаётган одамни билагидан ушлаб толиққан киши жисмонан кийналса,

Мұхиддин ота рұхан азобда эди. Ҳозир дардига банди Асадбекка ачиниш билан қараб, Абдурахмон табибининг гапини беихтиёр эслади. Түй арафасида боришганда, намоздан сүнг табиб: «Худди шу ерда ўтириб, инимиздаги рұх хасталигининг чекинмоғига умид қилиб зор. Умидимиз сароб бўлиб чиқибди. Инимиз зулмни аввалгидан кучлироқ ҳолда касб қилибдилар. Ожиз иймонлари янада ожизлашибди», деганда Мұхиддин ота «Замон буларнинг тилини ҳам, дилини ҳам тош қилиб қўйган... На илож... ҳархолда Аллоҳдан умидимиз бор...» деб жавоб қайтарган эди. Бу гап Абдулҳамиднинг ўлимидан олдин айтилганди. «Отамлатсанг отамлатгин, бўтамлатмагин», деб кетганлар бу айрилиқнинг иймонни янада сустлаштириши мумкинлигини ҳам инобатга олганмидилар? Айрилик синовига дуч келганда Аллоҳга интилмай, юз ўтирганларни эртага нима кутяпти?

Мұхиддин отанинг юраги қизиб, беихтиёр ўрнидан турмөкчи бўлгандай қимиirlаб қўйгач, Асадбек унга қаради. Мұхиддин ота ичиде ёнаётган вулқон оловига чираб, одатига хилоф қымай, оқисталик билан, худди ўзига-ўзи насиҳат қилаётгандай сўз бошлиди:

– Ҳаёт – бешик ва тобут орасидаги тор бир йўл ва йўлчиликдир. Дунё ҳаёти сўнгсизлик ичиде бир совун кўпиги кабидир. «Инсонлар идрок қилган ҳаёт нимадан иборат?» деган саволга ернинг заҳи ва қабр тошларининг қаттиклиги энг тўғри жавоб бўлур эди. Шундай экан, нафсоний орзулар ва вужуд йўлида ўтган умрнинг маъноси нима ҳам бўлур эди? Бўтам, қасос деганингиз нафсоний умиднинг бир қирраси, холос. Қирраси кескир тошни қўлга олсангиз, ҳеч бўлмаса бармоқларингизни қонатади...

– Китобларда зўр нарсаларни ёзишади-ю... лекин китобнинг гапи бошқа, ҳаётнинг ҳикмати бошқа.

– Фикрингиз ғалат бўлди, бўтам. Сизга қарши баҳс очмайман, чунки сиз ўзингизни ҳаётда кўп адолат-

сизлик кўрганлардан бири деб ҳисоблайсиз. Сизга ўхшаганларнинг фикрини ўзгартириш қийин. Лекин бошларига адолатсизлик дўли ёғилган факат сизгина эмассиз, буни ҳам ҳисобга олишингиз керак. Бу дунёда текин нарса йўқ. Ҳамма нарса учун ҳақ тўлаш керак. Хусусан, киши ўзининг роҳати ва фароғати бадалига ҳамиша тўлов тўлаб туриши зарур. Сиз учун бу кунларда бу тўловнинг номи – сабрdir, бўтам. Одам боласи қасос олгани эмас, Аллоҳ белгилаб қўйган синовлардан ўтиш учун туғилиб, яшайди. Сизу биз яшаётган олам қасос эмас, синов дунёси. «Қасос – Ҳақдандир», дейилган улуғ Китобда.

– Китобда нима деганини билмайман, лекин менинг тақдиримга қасос ёзилган экан.

Бу гапдан кейин Жалил чидаб туролмади. Мухиддин отанинг насиҳатомуз ҳилм оҳанги қайсар дўстини инсофга келтира олмаслигини англаб, ўзининг синалган одатини ишга солди: аввал курагига енгил шапати урди. Фам юкидан эзилиб ўтирган Асадбек кутилмаган бу шапатидан чўчиб тушди. Дўстига «Жиннимисан!» деган маънода қаҳрли нигоҳини қадашга улгурмай, Жалил гапини бошлади:

– Тақдирингга қасос ёзилганини сенга бирор айтдими?

Асадбек ошнасининг ташланишидан осонрок кутулиш мақсадида «Ҳа, айтди», деб қўя қолди. Бошқа мавзу бўлганида Жалил эҳтимол, шу жавобга қаноатланиб, гапини бас қилиши мумкин эди. Лекин қандайдир балолардан огоҳ этаётган қасос аҳди сабрга ўрин бермади.

– Қайси аҳмоқ айтди шу гапни? – деди бу сафар овозини сал баландлатиб.

– Сенга ўхшаб ишларимга бурнини тиқаверадиган аҳмоқ камми бу атрофда?

– Қани, ўша аҳмоқнинг биттасини айт-чи? – Жалил шундай деб дўстининг курагига яна бир шапати туширди.

– Танимайсан, бигта фолбин айтган.

– Сен... ҳали фолбингга бордингми?

Асадбек ўйламай гапириб юбориб, арининг иини кавлаб қўйганини англади. «Ёлғон айтдим», деса яна гапчувалашишни билиб: «Манзура борган экан», деб қўя қолди. Жалил Муҳиддин отага қаради:

– Гапини эшитдингмизми? Хотини фолбингга борибди, – Муҳиддин отадан жавоб кутмай Асадбекка қаради: – Ростдан борибдими?

– Ростми ё ёлғонми, ана, ўзидан сўра.

– Агар ростданам фолбингга борган бўлса, ишинг чатоқ ошнам, хотининг талоқ бўлибди, бошқатдан никоҳ ўқитишишинг керак.

– Бўлди қил, ақлингни ўша домлаларингга бориб ўргат! – деди Асадбек кескин тарзда.

– Ота, бу бўтангизга бир нима денг. Эсини йифиб олсин. Орқалаб юрган гуноҳлари ҳам етарли, энди никоҳсиз хотин билан...

– Бўлди қил, деяпман!

Икки ошнанинг баҳси чукурлашиб, жанжалга айланиб кетиши эҳтимоли борлигини сезган Муҳиддин ота гапга аралашибди:

– Фолбингга бориш дуруст одат эмас, бўтам, фолбингга ишониш иймон сустлигидан.

– Дангалига «кофирлик», деяверинг. Бунингиз «иймон сустлиги»ни тушунмайди.

– Бутунлай кофирга чиқарманг, – Муҳиддин ота шундай деб, Жалилга норози қараганича бош чайқади. – Айнан мана шу ишлари кофирларга хос бўлибди. Агар астойдил тавба қилсалар, инша Аллоҳ, гуноҳлари кечирилади.

– Никоҳ-чи? – деди Жалил бетоқатлик билан.

– Никоҳми?.. – Муҳиддин ота нимадандир истиҳола қилдими ё ўзи ҳам бу масаланинг ечимини аниқ билмасмиди, дарров жавоб бермади. Бундан ажабланган Асадбек унга тикилганича жавоб кутди: – Ҳамонки, банда кофирнинг ишини қилган бўлса,

никохи бузилади, деган ҳукмни эшитганман. Аммо фатвога ожизман, уламолардан сўраб билиш керак. Агар улар «никоҳ қайта ўқилиши керак», деган ҳукмга иттифок қылсалар, начора, бўйсуниш лозим. Бу бир адашиш холос, фожиа эмас.

— Сиз шунақа дейсиз-у, бунга ўхшаган калта-фаҳмлар фолбинларга тинмай бориб юришибди-да, сал бошқачароқ туш кўришса ҳам югуришади. Бунинг гуноҳлигини сиз билан мен айтиб турмасам, бошлирига балолар орттириб олишади. Булар фолбин нима, сехр нима билармиди? Ҳатто Сулаймон алайҳиссалом ҳам сехргару фолбинларнинг шўрини куритганлар, тўғрими?

Жалил бу гап билан нимани назарда туваётганини яхши англамаган бўлса-да, Мухиддин ота унинг шаштини қайтармаслик учун аста бош ирғаб қўйди. Жалил буни тасдиқ ишораси сифатида қабул қилди, гўё ота «Гапираверинг бўтам, айни ҳақ сўзларни баён қиляпсиз», дегандай бўлиб, Асадбекка тикилганича ваъзхонлигини давом эттириди:

— Ўша замонларда Сулаймон алайҳиссаломнинг атрофларини сехргарлар ўраб олишган. Сенга ўхшаган довдир-совдирлар Худога ишонмай, ўша шайтонларнинг найрангларига эргашишган. Шунда Сулаймон алайҳиссалом сехргарларнинг китобларини қўлларидан тортиб олиб, тахтларининг тагига кўмдириб ташлаганлар. Сулаймон алайҳиссаломнинг ўлимларидан кейин жинлар таҳт тагини кавлаб китобларини олволганлар. Нодонларнинг уларга сиғиниши камлик қилиб, Бобил шаҳридаги икки фариштанинг сехрларига амал қила бошлашган. Улардан биттасининг оти Ҳорут, иккинчисиники Морут бўлган. Ота, тўғри гапирияпманми? Янгишсам, ўзингиз тўғрилаб қўйинг. Ҳорут билан Морут фаришта бўлгани тўғрими, ё малоика бўлишганми?

Мухиддин ота бу савонни эшитиб, Асадбекка бир қараб олгач, мийигида кулимсиради.

– Бўтам, «фаришта» ҳам «малоика» ҳам бир маънода. Унақа десангиз ҳам, бунақа десангиз ҳам маъқул, адашмайсиз. Факат Ҳорут билан Морутнинг фаришталиги хусусинда уламолар орасида баҳс бор. Кўпчилик уламо фаришта, деган фикрга иттифоқ қилишган. Биз каби илмсиз бандаларга шуни билиш кифоя.

– Буни ўзим ҳам билардим, лекин бир пайтавафаҳм мени енгмоқчи бўлди-да.

– Илм саёзлигидан кутула олмаган биз каби бандалар учун баҳсланиш дуруст эмас, оқибатда кулгига қолишимиз мумкин. Шунинг учун, бўтам, сира баҳслашманг.

Мухиддин ота Жалилни таниганидан бери унинг одатларини зимдан кузатиб, феълинин тушуниб қолган эди. Қаердадир, кимдандир эшитган ривоятми ё афсонами ўзига манзур бўлиб қолган бўлса, охиригача айтмагунча тўхтамаслигини билгани учун ортиқча гапдан ўзини тийди. Асадбек эса «бу чала мулланинг гапи отага ёкиб қолди шекилли», деб ўйлаб, ошнасини гапдан тўхтатмади. Унинг сукут саклаши Жалилга илҳом бериб, гапини давом эттириди:

– Ҳорут билан Морут одамларнинг гуноҳ ишларини кузатиб, уларга таъна тошлари отганларида Худо уларга қараб «Инсонларга берилган нафс сизларга ҳам берилса, сизлар ҳам ўшаларга ўхшаб исёнда бўласизлар», деди. Иккала фаришта ҳам Худонинг бу гапига қўшилмай: «Агар бизга нафсни ғолиб қилганингда ҳам биз ҳаргиз исён этмасмиз», деб катта кетишиди. Шунда Аллоҳ таоло уларга нафсни ғолиб қилиб, синамоқ учун ерга туширган экан. Улар ерга тушиб олишгач, халқнинг тепасига қози бўлиб, хукм суваверишган. Шунда Аллоҳ таоло синааб кўриш мақсадида бир аёлни шикоят билан уларга юборди. Бу аёл ниҳоятда соҳибжамол экан. «Нафсни берсанг ҳам исён қилмаймиз», деб катта кетган Ҳорут ҳам Морут ҳам унга маҳлиё бўлиб, ваъдаларини унугтди. Хотин билан қўшилгилари келди. Хотин уларнинг талаби-

ни эшитиб, «шартим бор», деди-ю, ароқ ичишлари-ни талаб этди. Ароқни ичиб, хотинга яқинлашмоқчи бўлганларида бир одам пайдо бўлиб, йўлларини тўсди. Бу одамни шартта ўлдирдилар. Ўлдирдилар-у, ҳукумат олдида жиноят қилганларини билиб, жазоланишдан қўрқдилар. Талвасага тушиб турғанларида шайтон ҳукумат одами қиёфасида пайдо бўлиб: «Агар бутга сифинсаларинг сенларни жазодан қутқариб қоламан», деди. Улар жонларини сақлаб қолиш учун бутга сажда қилдилар. Ўшандада Аллоҳ таоло уларни фаришталик мартабасидан туширган. Кейин ё бу дунё ё у дунё азобидан бирини танлашни айтди. Улар гуноҳлари учун бу дунёда азоб чекиши танладилар. Улар Чоҳи Бобил деган жойда соchlаридан осилган ҳолатда азоб чекарканлар.

Шу ерга келганда Асадбек чидаб тура олмади:

– Бориб қўриб келдингми уларни? Раҳминг келмадими, азобдан қутқариб қўя қолмабсан-да! – деди заҳархандалик билан.

– Худонинг ишлари гапирилаётганда бунаقا майнавозчилик қилма. Мен домлалардан эшитганимни айтяпман.

Жалил нафсга тааллукли ҳикмат Асадбекка ҳам тегишли эканини ўйлаб кўрмай, бу гаплар эсига тушиб қолгани учунгина айтган эди. Жалил ўйламагани билан Асадбек ўзини исён қилганлар қаторида қўриб, ғашланди-да:

– Ҳа, ўзи шунаقا бўлади: кўр ушлаганини, кар эшитганини қўймайди, – деб минғирлади.

– Кўр десанг ҳам майли, кар десанг ҳам, чала мулла десанг ҳам кўнавераман. Мен арабча ҳарфлардаги эски китобларни ўқиёлмаганимдан армон қиласман. Ўқиёлганимда...

– Ўқиёлмаганинг ҳам яхши, – деди Асадбек унинг гапини узиб, – бўлмаса мияларимизни ачитиб ташлардинг.

– Сен...

— Энди бирпас жим тур, отам билан маслаҳатлашадиган гапим бор.

— Бўпти, мен кетдим.

— Бирпас жим ўтири, дедим!

Кўнгли оғриб ўрнидан турмоқчи бўлган Жалил дўстининг бу жеркишидан сўнг амрга итоат эта қолди. Асадбек эса Муҳиддин отага қараб гап бошлади:

— Сабр қилиш керак, деяпсиз, тўғри, бундан бошқа чорам ҳам йўқ. Сабр киляпман. Лекин барибир кўнглим тўлмаяпти. Ойимнинг бир ёnlарида Самандар, яна бир ёnlарида Ҳамид ўғлим. Ўзим боргуним-ча адамни олиб келиб қўйишим керак. Шунда жамулжам бўлиб ётамиз. Илтимос, мусулмончиликка тўғри келмаса ҳам мени бу йўлдан энди қайтарманг.

— Бўтам, агар кўнглингиз тўлмаётган бўлса, на чора, бориб олиб келиш керак.

— Мусулмончилик йўл берадими, ахир?

— Мусулмончиликнинг қаршилиги йўқ... Марғилондаги маҳалламиизда бир авлиёнинг қабри бўларди. Йигирма тўққизинчи йилнинг кузида эди шекилли, қайси бир большевик бадбахтнинг бузуқ бошига шу зиёратгоҳни бузиш ишқи тушган экан. Халқ кўтарилса ҳам тракторини тираб қўйди. Шунда ақлли одамлар маслаҳатлашиб, мурдани кўчиришга иттифоқ қилишди. Дурадгорлар алоҳида тобут ясашди. Суякни лаҳаддан олиб, яна қайта кафанлашди. Кейин қайта жаноза ўқилиб, қабристонга қўйилди. Тумонот одам тобутни бир марта кўтаришга илҳақ бўлган эди. Жанозанинг биринчи сафида турганларни битта қўймай олиб кетишли. Жанозани дадам раҳматли ўқиган эдилар...

— Биз ҳам шундай қиласиз бўлмаса... Фақат... тумонот одам бўлмайди, биринчи сафдагиларга бирор даф қилолмайди.

— Аҳдингиз қатъий бўлса, бирга борамиз... Абдужалил ошнангиз билан учовлон бориб кела қоламиз.

Бу тадбирда ўзининг иштирок этишини Муҳиддин ота тилидан эшитгач, Жалил эътиroz билдира олмади.

Бу режани амалга ошириш пайсалга солинмади. Асадбек ўша куниёқ Козловга құнғироқ қилиб ниятни билдиргач, йўлга отланишди. Хонгирейнинг ўлимидан сўнг Красноярга қайтган Козлов лозим бўлган барча ишларни амалга ошириб қўйган эди. У насороларнинг одати бўйича ялтилаб турган тобут ясаттиргани билан, мусулмонлар одати бўйича кафандик шартлигини ҳисобга олмаган эди. Асадбекку, бунақа одатлардан бехабар, ҳатто барчага ажл ўргатувчи Жалил ҳам буни ўйламаганди. Мухиддин отанинг тугунча кўтариб олгани иккала ошнани ажаблантирган бўлса-да, «ўзларига керакли бирон нарсадир», деб кўя қолишганди. Тугун ичида кафандик борлиги маҳкумлар қабристонига борилганда маълум бўлди.

Йигитлари қабрни ковлашаётганида Козлов Мухиддин отани четга чорлаб секингина: «Тобутга солиб кўмишганми?» деб сўради. У пайтларнинг хожалари «халқ душманлари» деб хорлаётган одамларига тобутни раво кўрармидилар? Насоролар тобутсиз, мусулмонлар кафансиз ва лаҳадсиз ётибдилар бу ерда. Мухиддин ота биродарининг юзини дарахт пўстлоғи билан ёпиб, ҳашак билан кафандаган эди. Ёнидаги малла йигитга буларни гапиргиси келмади. Саволига жавобан аста бош чайқаб, «йўқ» ишорасини қилди. Козлов янада пастроқ овозда: «Суякни олаётганимизни Бек кўрмай кўя қолсин», деди. Мухиддин ота ҳам шуни ўйлаган эди. Маъқул ишорасини қилиб, Асадбекка яқинлашди-да, кўлидан ушлади:

– Бўтам... – деб мақсадни англатмоқчи эди, лаблари титраб, гапдан тўхтади.

Асадбек ўгирилиб, унинг намланган киприкларига кўзи тушди-ю, нима демоқчи бўлганини англади.

– Мени қайтарманг, – деди йиғламсираб. – Жон берётганларида ўғил бўлиб ёнларида ўтиргмаган эдим, лаҳадга қўёлмаган эдим. Энди йўлимни тўсманг, ўз қўлим билан олай...

Жалил ҳам дўстини четроқда туришини истаган эди. Асадбекнинг гапидан кейин у ҳам жим қолди. Йигитлар сүякка қадар ковлашгач, юқорига кўтарилишиди.

Асадбек пастга тушди. Отасининг сүякларини гўё кўз ёшлари билан ювди. Сүяклар юқорига олингач, Мухиддин ота авайлаб ювиб, кафандади...

Юртта қайтишгач, Асадбек айтганидай бўлиб, одам тўпланмади. Лахадга ўзи тушиб, кафандланган сүякларни кўйди... Кўя туриб нимкоронги лаҳадга олазарак қараб олди. Гўрковга иш буюраётганда «лаҳадни кенгроқ кавла, вақти келгандан мени ҳам шу жойга қўясан», деб тайинлаган эди. Паҳад асли қандай ҳажмда кавланишини билмаса ҳам, назарида гўрков буйрукни бажаргандай туюлди. Ўзининг яқин орада шу жойда ётишини тасаввур қилди-ю, кўркувдан юраги тўхтаб қолгандай бўлди. Баданига муз югурди. «Бу дунёда хеч кимдан ва хеч нимадан қўрқмайман, қасос олмагунимча ўлмайман», деб катта кетадиган одам бу онда қўрқди. Одам зотининг табиати ажабтовор: ҳар қадамда хавотир ва зулм таъқиб этадиган ёруғ дунёда қўрқмай яшайверади, хеч қандай таҳдид йўқ лахадда гинчгина ётишдан эса қўрқади... Чувриндини кўмишганида «Бу ер менинг жойим эди, Маҳмуд укам. Сен келдинг. Ёнингда яна бир жой бор...» деб ўйлаганида ҳам, ўзига мўлжалланган жояга ўғли кўйилаётганида «бу жой меники эди!» деб фарёд урганида ҳам ҳозирги даҳшатни ҳис қилмаган эди. Юқорида турган Жалил дўстининг ҳаракатсиз туриб қолганидан хавотирланиб, меҳрибонлик оҳангода «Асад!» деб чакирди. Пастдан овоз бўлмагач, баландроқ овозда чакириб, «Бўлди энди, чиқақол», деди. Дўстининг овози Асадбекнинг жонини қайтаргандай бўлди. Ҳушига келиб, кафан устини меҳр ва ўқинч билан силагач, тепага кўтарилди. Унинг оқариб кетган, тер қуяилаётган юзига қараб Жалил қўрқиб кетди. Пешонасига боғланган оқ сурп рўмолни олиб,

дўстининг бетларини артди. Асадбек худди ёш боладай муте ҳолда турди. Кейин эгилиб, лаҳад оғзини гувалалар билан ўзи ёпмокчи эди, Жалил елкасидан ушлаб тұхтатди:

– Бу ёғи гўрковнинг иши, сен тепага чиқ.

Шундай деб аввал ўзи юқорига чиқди-да, қўлини Асадбекка узатди. Асадбек унинг амрига сўзсиз итоат этди. Қабр айвони бўшашини кутаётган гўрков шу заҳоти сакраб тушиб, ўз ишига киришди.

Тупрок тортилди. Абдулҳамиднинг қабри бобоси ва бувисининг гўрлари орасида қолди. Мухиддин ота «Таборак»ни тиловат қилиб, фотиха ўқигач, ўринларидан туришиб, оғир-оғир қадамлар билан юра бошлишди. Жимгина чиқиб кетаверишни маъқул кўрмаган Жалил гап бошлади:

– «Ўлим – кутилмаган меҳмон», дейишади. Вакти соати етганда меҳмонни кутиб оламиз-у, биллалашиб шу ерга келаверамиз.

Бу гапни эшитган Мухиддин ота унга ажабланб қаради:

– Кутилмаган меҳмон, дедингизми? Йў-ўқ, аксинча, кутилган меҳмон. Фақат биз уни кутишга, қаршилашга яхши тадорик кўриш лозимлигини унугиб яшаймиз. Биз унинг ташрифи муқаррарлигини унумасак, қадамларига пояндоз солиб кутсак, азиз меҳмон каби кутган бўламиз. Пояндоз деганим бу дунёдаги яхшиликларимиз. Кутилган меҳмон шоҳу гадога бир хилда муносабатда бўлади. Унда бу борада айрмачилик иллати йўқ. Жон бергувчи банде меҳмонини қаршилагач, унинг учун энди фоний дунёда фожиа йўқдир. Фожиа – марҳумнинг ортида қолаётган тириклар учундир...

Мухиддин отанинг ҳикматга тўла бу гапига зътиroz ҳам билдирилмади, жавоб ҳам берилмади. Қабристондан чиқишгач, Жалил яна тилга кирди:

– Шу ерда хайрлашамиз. Ҳамма уй-уйига.

Асадбек унинг бу қилиғидан ранжиб, Мухиддин отага илтимос назари билан қаради:

- Келинингиз бизни кутяпти.
- Яна зиёфатми? Мен бормайман, – деди Жалил.
- Жириллайверма. Қанақа зиёфат? Ярим косадан мастава. Ичсанг ичарсан, ичмасанг жим ўтирасан. Ярим соат жим ўтира оларсан, а?

Жалил дўстига жавобан жаҳл билан қўл силтади. Муҳиддин ота қулимсираб, икки ўртоқни муросага келтирмоқчи бўлди:

- Мастава бир баҳонаи сабаб, суҳбат ғанимат, бўтам, бора қорайлик.
- Биласиз-ку, бидъатларга тоқатим йўқ.
- Талабни жуда тор олиб юборманг, бўтам, диннинг бағри кенг. Биродарнинг кўнглини олиш сизнинг фикрингизча бидъат бўлса ҳам – бидаъти ҳасана, яъни ёқимли одат.

2

Кунлар ўтгани сайин Асадбек Муҳиддин отанинг насиҳатлари бўйича янгича ҳаёт кечира олмаслигига тобора ишониб борарди. Хос йигитларга жавоб бериб юборгани билан болохонасига кўзи тушганда пойлоқчилар «хизмат борми, Бек ака?» деб қараётгандай бўлишарди. Уларга рухсат бериб юборганида уйда келинлар борлигини баҳона килган эди. Кесакполвонга: «Сен билан мени Худо асрайман, деса шу пойлоқчиларсиз ҳам асрайди. Худонинг жонига теккан бўлсак, атрофимизни икки минг кўриқчи билан юз қатлам қилиб ўрасак ҳам Азроил уларнинг орасидан bemalol ўтиб келиб, жонимизни суғуриб олаверади», деганида дўсти: «Худонинг жонига тегмаслик учун одам ўзини эҳтиёт қилиши керак. Бу баҳонанг ўтмайди ошна, кўчангга битта уйча қурдириб, пойлатаман...» – деб эди. Келинлар кетишди... Уйча қурдириб, кўриқчи қўядиган Кесакполвоннинг танаси Москванинг қайсиadir ахлатхонасида ириб-чириб ётибди. Калласи эса Асадбекнинг марҳамати билан

лаҳадга кўйилган. Ўшанда «илдизимиз битталигини унугаётганга ўхшайсан. Билиб қўй: сенинг тинчлигинг – менинг тинчлигим, сенинг обрўйинг – менинг обрўйим», деганди.

«...илдизимиз битталигини...»

Шу гапини кўп ўйлади. Илдизнинг битталиги қисматнинг бир эканлигими?

Хонгирейнинг ўлими ҳақидаги хабарни эшиганидан кейин кўнгил хижилиги янада ортди. У Хонгирейнинг шунчаки ўлимини эмас, унинг юрагига ўз қўли билан ханжар санчишни истарди. Шунчаки ханжар санчиш билан қасос шаробидан маст бўла олмаслигиги биларди. Хонгирей ўзига душман санаган одамининг бошини кесиб, кутига солиб, яқинларига «совға» килишдан лаззатланарди. Асадбек учун қасоснинг лаззати нимада? Дунёдаги энг ёвуз одам килмаган ваҳшийликларни қилса: Хонгирейнинг кўзларини ўйиб ташласа, кўкрак қафасини ёриб, юрагини суғуриб олса, танасини майда-майда қилса ҳам кўнгли ором ололмаслиги ўзига маълум. У бир нарсани аник хоҳларди: ўлим билан рўпара келган Хонгирейнинг кўзларида талvasани кўришни истарди. Асадбекка яхшилик истаган дўстлари уни бу лаззатдан ҳам маҳрум қилдилар.

Хонгирей қандай ўлим топганини билмайди, бироқ, бу ўлим энди осойишта ҳаётга эмас, янги фожиалар жарлиги томон йўл очганини фаҳмлаб туради. Бу жарликка ўзи ёлғиз кулайдими ё йигитларини тўплаб, кулфатдан кутулиб қоладими?

Асадбек Красноярга бориб келгач, биринчи галда шу масалани ечиш режасини пишита бошлади.

Муҳиддин ота билан Жалилни кузатгач, ҳайҳотдай меҳмонхонасига кириб, диванга чўзилганида Манзура эшикни кия очиб:

– Ҳали овсиним телефон қилувдилар, – деди.

Асадбек Кесакполвоннинг хотини нима мақсадда кўнғироқ қилганини фаҳмлаган бўлса-да, сир бой бермай:

- Нима иши бор экан? – деб сўради.
– Билмадим, Ҳайдар акадан дарак йўқмишми?
Қаерга кетаётганларини айтмаган эканлар.
– Қаерга кетарди? Юрғандир дунё ташвишларидан
кутули-иб, у ёқда ошналари кўп...

Асадбек буни худди ўзига-ўзи гапираётгандай
паст овозда айтган эди. «У ёқда...» деганини Манзура
бирорта курортдадир, деб тушуниб бош ирғаб қўиди.
Асадбек қаддини кўтарди-да, телефон симини ушлаб,
ўзига тортди. Сўнг рақамни териб, нотаниш овозни
эшитгач, ажабланди:

- Сен кимсан? – деб хотинига қараб олди.

Манзура эри телефонда гаплашаётгандан қулок со-
лишга одатланмаган эди. Шу сабабли орқасига қайтиб,
эшикни ёпди. Телефондаги овоз «Мен сартарошман»,
дегач, Асадбек сўкиниб кўйди-да, дағал оҳангда:

- Кеннайингни чақир! – деб буюрди.

Кесакполвоннинг хотини сартарошнинг яқинида
экан шекилли, дарров овоз берди:

- Ҳа, ким бу?

– Ҳа, сингилжон, одам танимайдиган бўлиб қол-
дингми? – деди Асадбек пичинг билан.

– Вой, Бек ака, сизмидингиз? – Хотин шундай деб
салом берди-ю, бидирлаганича ҳол-аҳвол сўрай кетди.
Гал Манзуранинг аҳволини сўрашга келганда Асадбек
унинг гапини бўлди:

– «Опажоним», дейсану ҳолидан хабар олмайсан.
Сендақа сингилларни бобовларга бериб юбориш ке-
рак.

- Вой, ҳар куни телпон қилиб турибман.

– Телпонинг кимга керак? Бу дунёда сендан бекор-
чироқ одам йўқ, келиб тур.

– Вой, шунақа дейсиз-у Бек акажон, уйдан
чиқолмай қолдим. Күёвим қилиқ чиқарган, юрагим
ҳар куни така-пука.

- Нима бўлди?

– Шунча йил индамай яшаган йигит ўлгур, энди
хотинини рашк қиласидиган бўлиб қолибди.

– Яхши-ку! – деди Асадбек кулимсираб. – Куёвинг энди эркак бўлиби. Сен индама, қўйиб беравер.

– Вой, шунаقا дейсиз-у...

– Эринг қани?

Тўсатдан берилган саволдан хотин гангиб қолди. Аслида бу саволни у бермоқчи эди.

– Сиз биласизмикин, деб ўйловдим, – деди у мужмаллик билан.

– Мен эрингнинг қоровулиманими? Уйдан чиқаётганида «Қаёққа кетяпсиз?» деб сўрасанг бирон жойинг камайиб қоладими?

– Вой, шунаقا дейсиз-у мен сўраганим билан укангиз жавоб берармидилар?

«Худо бу хотинни ақлдан қисиб, ўрнига ўрин икки қарич тил берган», Асадбек шундай деб ўйлаб, яна унинг гапини кесди:

– Эринг Московга иш билан кетувди. «Иш битгандан кейин денгиз бўйларига бориб уч-тўрт кун айланаб келаман», девди, телпон қилмадими?

– Йўқ.

– Телпон қилса, мен билан хабарлашсин. Шу эр ҳаппаи ҳалол ўзингники, эрта-индин ўзингга қайтиб келади, хавотир олма.

– Қайтиб келмай, гўрга борармиди, Бек ака...

Бу гапни эшитгач, Асадбек хайрлашмаёқ гўшакни жойига кўйди-да, овоз чиқариб сўкинди.

...қайтиб келмай, гўрга борармиди...

«Эрининг боши гўрда эканини билганида нимадерди? Танаси ахлатхонада ириб ётганидан хабардор бўлса-чи? Бундай бефаросат хотин билан яшагандан кўра гўрга боргани ҳам дурует...» Москвага кетиш арафасида бир бева танишларининг уйланишини истамаётганини айта туриб, «қип-қизил аҳмоқ у! Хотиндан осон кутулганига Худога шукр қилиб, битта момақаймоқни олволмайдими! Агар хотиним ўлса, кўмиб, мозордан қайтишимдаёқ уйимга уйланиб келардим», деган эди. Хотинига ўлим истаган эди, мо-

зорда қолиш ўзига насиб этди. Хотини эридан аж-ралганини билса, бир-икки кун йиғлаб-сүқтагандан кейин нима қиласы? Битта лақма эр топиб, тегволиш харакатига тушадими... Эрининг ўнларча ёки юзларча ўйнаши борлигини билған хотин умрининг охиригача аза тутиб ўтирармикин?

Асадбек шуларни хаёлидан ўтқазиб, күнгли гашланганича ўрнидан турди. Алхол беихтиёр равиша Манзураси билан бу хотинни таққослаб, ўзини омадли эрлар қаторига құшды. Эр-хотиннинг ўзаро бурчларини түғри англаганда эди, ўзини шунчаки омадли хисоблабгина қолмай, баҳтли деб билиб, бунинг учун Яратғанга шукрлар қилған бўларди. Шукр қилмаса ҳам, хотинига бўлған меҳри жўшиб, қўшни хонага чиқди. Деразага яқин кўйилган хонтахта ёнида ўтириб китоб ўқиётган Манзура эшик очилиши билан ялт этиб қаради-ю, эрини кўргач, шошилиб ўрнидан турди.

— Ўтириб, ўтиравер, — Асадбек шундай деб унга яқинлашди-да, лўла болиш ташланган томонга ўтириб, хотини ўқиётган китобни қўлига олди. Муқовасига қарамай, тагига чизиб кўйилган сатрларга кўз ташлади:

«Худога ва Унинг расулларига ихлос билан иймон келтирган ва амрларини бажо келтирган ана шу жамоалар сиддиқлардир. Парвардигор наздида мартабалари улуғлар – шаҳидлардир. Аллоҳ таоло уларга комил ажр ва иймон нури ато қилған. Аммо коғир бўлғанлар ва Бизнинг оятларимизни инкор қилғанлар дўзах асҳобидирлар. Эй мўъминлар, билингларки, дунёнинг тириклиги ўйин-кулгидир ва зеб-зийнатдир, бир-бирларингиз билан фахрланишдир, молларингиз ва фарзандларингизни кўпайтиришдан иборатдир. Бунинг мисли шунга ўхшайдики, осмондан ёмғир ёғиб, ерлардан гиёҳ қўкарса, дехқонлар хурсанд бўладилар ва «кўп ҳосил оламиз», деб умид қиласилар. Кейин бир совуқ шамол келса, ҳаммасини куритса, бас, бар-

глари сарғайиб қурий бошлаганини кўрасан, кейин ҳаммаси синиб, майдаланиб, сомонга айланади. Дунёнинг нашъу намоси ана шулардан иборатдир. Аммо охиратдаги аҳвол икки ҳолатдан ташқари эмас: бири – қаттиқ азоб, иккинчиси – Аллоҳнинг мағфирати ва розилигидир. Дунё ҳаёти одамни алдайдиган лаззатдан бошқа нарса эмас...»

Асадбек саҳифани охиригача ўқигач, хотинига қаради:

– Тагларига сен чиздингми? – деб сўради ажабланиб.

– Мендан олдин ўқиганлар чизишибди.

– Ақлли гаплар экан: одам умид қилган ҳамма нарса майдаланиб, сомонга айланиб кетади... Ким ёзибди?

– Адаси, сиз Куръони Каримнинг маъносини ўқидингиз шекилли...

Асадбек Манзурада диний китоблар ўқишга кизиқиши кучайганини, икки кўча нарида яшайдиган отинойидан дарс олиб, савод чиқараётганини биларди. Манзура бу ҳақда маълум қилганда у «Куръон ўқишни ўргансанг сени сўкишим мумкин бўлмай қоладими?» деб ҳазиллашган ҳам эди. Абдулҳамиднинг вафотидан сўнг у кўпроқ Манзурадан хавотирда эди. «Боласининг ғамида ўзини еб, адо қилмасайди», деб чўчиётган эди. Отинойиникига чиқа бошлаганини билгач, Манзуранинг фарзанд ҳажри азобини енга олишига ишониб, кўнгли бир оз хотиржам тортди.

Манзура эрининг китобдан яна ўқишини истади. Лекин Асадбек китобни унга узатиб, кўшиб кўйди:

– Бу гапларни овсининг ўқиши керак экан, одами алдайдиган лаззатлардан роҳатланиб юрибди, эртаниндин хор бўлиши мумкинлигига калласи ишламайди.

– Адаси, унақа деманг, яхши нафас қилинг, ҳеч ким хор бўлмасин бу дунёда, – деди Манзура китобни қўлига авайлабгина олиб. У тагига чизиб қўйилган сатрларни ўқиётганида «бизнинг туриш-турмушимиз

ҳақида экан, адамизга ўқиб берсам бўларкан», деб ният қилувди. Нияти тезгина амалга ошди-ю, лекин Асадбек ўқигани билан ўзига тегишли хулоса чиқара олмади.

Бу он ташқаридан овоз эшитилиб, Манзура ўрнидан турди-да, дераза оша ҳовлига қаради.

— Вой ўлмасам, иккита милиса турибди, — деди Манзура хавотирланиб.

— Менинг уйимда милисага нима бор экан, чиқиб сўра, гапи бўлса айтсин, — деди Асадбек. Манзура эшик томон юрганда ташқаридан йигитлар йўклигини эслаб, қаддини кўтарди. «Ўзим чиқаман», деб уни оstonада тўхтатди. Асадбек ташқарига чиққач, Манзура эрига эргашди. Йигитлардан бири салом бергач, эҳтиромдан холи совук ва расмий оҳангда «Асадбекнинг прокуратурага чақирилаётганини» маълум қилди.

Белидаги энли камарга киshan осиб олган милиса йигитнинг беодоблигидан ғазабланган Асадбек бу чорловдан мақсад нима эканини билолмай ўйланиб қолди. Аниқ бир тўхтамга келишга фикри ожизлик килиб:

— Бўпти, кетаверларинг, вақтим бўлса эртага ўтарман, — деди.

— Эртагамас, сизни ҳозир етказиб боришимиз керак.

— Мени сенлар етказиб борасанларми, кейин-чи, кейин қамайсанларми?

— Бу бизнинг ишимиз эмас, биз сизни олиб бориб топширишимиз керак, — деди иккинчи йигит шеригини кувватлаб.

— Мени танийсанларми, кимлигимни биласанларми? — деди Асадбек уларни жеркиб.

— Танисак-танимасак, биз буйрукни бажаряпмиз. Ҳозир олиб кетмасак бўлмайди.

Манзура бир эрига, бир милиса йигитларга қараб йиғини бошлашга тайёр бўлиб қолди. Асадбекка тек-

канидан бери уйларига милиса бунақа бостириб кирмаган эди. Манзура эрини ҳимоя килиб милиса йигитларга бир нима демоққа оғиз жуфтлаган эди, эрининг қаҳрли қарашига кўзлари тўқнашди-ю, нафасини ичида ютди.

Кўнгли бир ғаламисликни сезиб, ғашланган Асадбек уларни сўкиб ҳайдашни ҳам, талабларига итоат этишни ҳам билмай гарангсиди. Болохонада бунақа милиса йигитларнинг саробини бир дақиқада тўғирлаб юборадиган шотирлари бўлмаса-да, у ҳали Асадбек – «ўқ илон» мартабасидан тушмаган эди. Шу мартабасида турган ҳолда энди дағдаға килди:

– Мени сенлар олиб кетасанларми? Кетаверларинг, изларингдан ўзим етиб бораман.

– Йўқ, биз билан бирга боришингиз керак.

– Бормасам-чи? – деди Асадбек қайсарлик билан. – Ҳозир погонингни юлиб ташласам-чи!

– Ўзингизга қийин бўлади. Куч ишлатишимиизга ҳукуқ берилган. Ҳозирги гапингизни ҳам етказамиз, протоколга киритиб кўйишади.

– Шунака дегин? – Асадбек гапираётган милиса йигитни уриб юбориш қасдида унга яқинлашди. Эрининг бу ҳайбатидан чўчиган Манзура беихтиёр «Вой, адаси!» деб юборди. Асадбек ғазаб оловидан қизарган кўзларини хотинига тикиб қаради-да: «Нари бор!» – деб ўдағайлади. Манзура аста орқасига чекинаётганда «Жамшидни топ!» деб буюрди. Шундан сўнг ғўдраниб сўқинди-да, олдинга тушди. Белидаги камарга икки ҳалқали кишанни савлат билан осиб олган милиса йигитлар унинг икки ёнидан жой олдилар.

Икки милиса ҳамроҳлигига милиса машинасига ўтқазиб олиб кетилаётган Асадбекни битта кўшни кўриб қолган эди. Асадбек прокуратурадан қайтунича ўтган бир ярим соат вақт ичидаги шаҳар бўйлаб мишимиш тарқалишига шу қарашининг ўзи кифоя қилди.

Прокуратура терговчинининг муомаласи милиса йигитларницидан фарқ қилмади. Идора расм-русум-

ларига амал этгани ҳолда, исм-насабни сўрашдан бошлаб, Асадбекнинг қаҳрли жавобини эшилди:

– Ҳали исмимни билмай туриб чакиртирдингми бу ерга? Эҳтимол сенга Асадбек эмас, Аҳадбек керакдир?

– Ёшингиз катта бўлса ҳам мени сенсираманг, чақалоқлигимда бешигимни тебратиб кўймагансиз. Саволларимга аниқ жавоб беринг, – деди терговчи бўш келмай.

«Ҳавоси баланд-ку, буларнинг, – деб ўйлади Асадбек. – Менга бекорга бундай ташланишмаётгандир... Орқаларида ким турибди?» Асадбек арқонни узун ташлаб, терговчининг талабига итоат этишни маъқул кўриб, саволларига оғриниш билан бўлса-да, жавоб бера бошлади.

– Эслаб кўринг: бир минг тўққиз юз тўқсонинчи ийл иккинчи апрелда қаерда эдингиз?

Эслашининг ҳожати ҳам йўқ. Аввал Тбилисига, ундан Москвага ўтгани билан булар нима учун қизиқиб қолиши? Буларга Илико керакми ё Хонгирейми? Москвадаги прокурорларнинг тиши ўтмайдиган одамларга бу тирранча нимага қизиқяпти? Асадбек шу саволларга жавоб топмоқ истагида бир оз сукут саклади.

Терговчи йигит эса «анигини айтасиз, алдашингизга йўл кўймайман», дегандай унга тикилиб олди. Асадбек бунақа нигоҳлардан чўчийдиган одамлардан эмасди. У ҳам терговчига қаттиқ тикилиб, бу «нигоҳлар тўқнашуви»да енгди.

– Эсладингизми? – деди терговчи кўзини қоғоздаги сатрларга қаратиб.

– Нимани? – Асадбек шундай деб киприк қоқмай тикилиб тураверди.

– Иккинчи апрелда қаерда юрганингизни? – деди терговчи унга яна бир қараб олиб.

– Иккинчиди бу ерларда нима фалокат юз берганини билмайман, аммо мен ўша куни Тбилисида эдим. Дўстларим Сулико билан Иликонинг боболарини тўйга таклиф қилгани борган эдим.

- Гувоҳларингиз борми? – деб сўради.
- Гувоҳми? – деб сўради Асадбек, сўнг телефонни кўрсатди: – Ана, гувоҳ. Аэропортга телефон қил.
- Мени сенсираманг, – деб яна танбеҳ берди терговчи.

«Сендақаларнинг жонини Кесакполвон киргизиб қўяр эди. Бахтингга у ўлиб кетди», деб ўйлади Асадбек, унга ғазаб билан тикилиб. Алҳол терговчи яна бирон нима деб танбеҳ берса, Асадбекдан ширин гап эшитмаслиги аниқ эди. У гапга оғиз жуфтлаган пайтда эшик очилиб, прокурор ёрдамчиси кириб келди. Асадбек уни танирди. Винзавод директори Қилич Сулаймонов тақдирига боғлиқ масалаларни Чувринди шу одам билан ҳал қиласади. У дамларда бу одам Асадбекнинг номини эшитгандаёқ қўлини кўксига қўйишга тайёр туарди. Энди-чи? Асадбек «Энди сениям димоғинг куртладими?» деган маънода унга ҳам қовок уюб қаради. Ёрдамчи Бек акасининг кайфияти ёмон эканини шу қарашданоқ сезса-да, сир бой бермасдан жилмайди-ю, салом бериб, кўшқўллаб сўрашмоқ учун унга яқинлашди. «Дуруст, ҳали ўзингдан кетмабсан», деб ўйлаган Асадбек тундлик либосидан дарров чиқа қолмади.

- Мен акахонни хонамда кутибман, бу ерда нима қилиб олиб ўтирибсан, чой-пой ҳам қилмабсан? – ёрдамчи шундай деб тергаб, Асадбекка хижолатомуз қаради: – Ҳали ёш-да, булар, салом-аликни ҳам яхши билишмайди.

- Салом-аликни билиш учун одам таниши кепрак, бу... – Асадбек «тиррақи», деб сўкинмоқчи эди, ҳақоратланганини ошкор қилиб, ўзини ерга ургиси келмади.

- Мен сенга нима деган эдим? – деди ёрдамчи овозини бир парда кўтариб.

- Олдириб кел, дедингиз... – Терговчи «буйруғингизни бажарсам ҳам айборманми?» дегандай елка қисди.

— Вой галварс! Мен-а? Мен Бек акам билан маслаҳатлашиб кўриш керак, деганман!

Асадбек айтган гапидан тониб, «кўркқан олдин мушт кўтарар», қабилида иш юритувчи каззобларнинг одатини яхши билгани учун бу томошани шу ерда узиб, сўради:

— Қанақа маслаҳат?

— Омади юришган бир ашулачи ўлдирилибди, яна биттаси изсиз йўқолибди. Шунга маслаҳатингиз керак бўлиб қолди.

— Мен ўлдирмабманни ишқилиб? — деди Асадбек пичинг билан.

— Йўғ-е, йўғ-е! Худо асрасин! Иккала ашулачи куёвингиз... Элчин акамларга шогирд эканми...

— Элчин акангнинг ахволини биларсан?

— Биламиз, биламиз, ўзларидан сўраб кўрайлик, десак, яхши гапиролмаётган эканлар. Балки ўша йигитларни сиз биларсиз, деб ўйлабмиз-да.

— Отарчиларнинг асбобини кўтариб юрганимни кўрганмидинг? — Асадбек ўрнидан турди. — Аҳмоқлик ҳам эви билан бўлиши керак. Бек аканг яхши ашулачининг елкасига тўн ёнади, кафандикка ўрамайди, билиб кўй.

Асадбек хонадан чиқишга отланганида эшик очи-либ, Жамшид кўринди. У ҳеч бир мулозаматсиз ичкарига бир қадам қўйиб, хавотирли нигоҳини хожасига қадаганича:

— Бек ака, тинчликми? — деб сўради.

— Тинчлик, — деди Асадбек ижирғаниб. — Укахонлар бир пиёла чойга таклиф қилишган экан, ивирсиб етиб келгунимча чой ҳам совибди. Ҳайдар аканг Қора денгиздан қайтганида унга айтгин, укахонларни меҳмонга чакириб, би-ир сийласин.

Асадбек шундай деб прокурор ёрдамчисига маънодор қараб қўйди. Ёрдамчи Кесакполвонни биларди, аммо унинг танасидан жудо бўлган калласи бир неча кун аввал Ҳосилбойвачча ётган лаҳадга кўйилганидан

бехабар эди. Буни уч кишигина – Асадбек, Жамшид ва гүрков билардиким, меҳмонга чорланиш ҳақидаги ҳозирги гапдан мақсад не экани ҳам шу хонада турган икки кишигагина аён эди. Асадбек «эртами-кечми Ҳайдарнинг изсиз йўқолганидан шубҳаланиб ковлаштиришни бошлишганда шу гапим асқотади», деган мақсадда айтган эди. Меҳмонга чорлаш ҳақидаги гапни Жамшид аввалига айнан англади – «буларни Ҳайдар акамнинг ёнига жунатиш керак экан-да, шунаقا гуноҳ иш қилишибдими?» деб ўйлади. Ҳожасидан топшириқ олганда «нима учун?» деб сўрашга одатланмагани сабабли «хўп», деб кўйди-ю, Асадбекка эргашиб кўчага чиқди. Машинага ўтириб вазифасини ойдинлаштиришга уринганида Асадбек унинг бу соддалигидан кулиб «Ҳе, эси йўқ, уларга тегиб бўладими! Уларни аҳмоқ десам, сен ўтиб тушдингку!» деб мақсадини тушунтириди-да:

– Эски шаҳардан жой тайёрладингми? – деб сўради.

– Ҳайдар акам вассажуфтли бир уйни мўлжаллаб кўйганидилар. Савдо пишмай турибди. Уйнинг эгаси қариrok одам экан, феълига тушуниб бўлмаяпти: бир сотмоқчи бўлади, бир «отамдан қолган жойга ўлганимдан кейин кирасанлар», дейди. Пулнинг ярмини бериб кўйганимиз...

– Кўнмаёттан бўлса... индамай қўя қолларинг. Эски жойимизда ўтира турамиз... – Асадбек шундай деди-ю, қарорининг боисини айтмади. Чувринди ўлганидан кейин бу идорага киришга юраги бетламаётганди. Бошқа жойга кўчишни шунинг учун ихтиёр этганди. Энди ўйлаб қараса, кимнингдир кўзларини ўйнатиб ҳавасини келтираётган, кимнингдир юрагига ваҳима солаётган идорадан воз кечиб панароқдан жой излаши ожизлигидан дарак бериб қўйиши мумкин экан. «Бу ердан кўчсам, эрта-индин оёқости қилиб ташлашади», деган ўй аввалги қарорини ўзгартиришга баҳона бўлди. Шаҳар марказидаги уч қаватли иморат

ертуласидан жой олган видеобар ниқобидаги идораси унинг назарида энг оғир зарбаларга ҳам дош бера ола-диган метин қалъа эди.

— Йигитларингни бир эла-эла қилиб, саралаб олсанг бўларди, — деди Асадбек ўйчан тарзда.

Жамшид кейинги ҳафталар ичи «ўнг қўл вазир» мақомида юрган бўлса-да, «йигитларингни» деган сўзга алоҳида урғу берилганини сезиб, хожасига қаради. Бу сўз фармон мақомида айтилиб, вақтинчалик топширилган мансаб тахтининг энди тўла ва узил-кесил инъом этилганига ишора эди.

— Тарзанга нима дейсан? Юриш-туриши қанақа?

— Ёмон эмас, — Жамшид шундай деди-ю хожасининг «мен топган болани менсимаяпсанми?» деб қолишидан чўчиб, тезгина изоҳ берди: — Сиз одамни бир кўрищаёқ кимлигини билиб берасиз. Бекорга на-зарингизга тушмаган.

— Акаларингдан қайси бирига ўхшайди?

— Маҳмуд акамга. Ўйламасдан бир иш қилмайди.

— Кўп ўйлайверишнинг ҳам зарари бор-а?

— Ҳали сизнинг тарбиянгизни олмаган-да. Ўрганиб кетади.

— Ҳайдар акангнинг ўрнини босадиганлари ҳам борми?

— Бор.

— Ўйлаб ўтирумай дангалига «бор!» деяпсан, бирор-тасини мўлжаллаганмисан?

— Тарзанинг ошнаси бор. Гавдаси ҳам, қиликлари ҳам ўхшайди. Тарзанинг режаларини ўша амалга ошириб беради.

— Ҳайдар акангнинг қаҳри қаттиқ эди.

— Бу ҳам худди шунақа. Юмшоқ кўнгил бўлиши сирам мумкинмас.

— Нега?

— Айтувдим-ку, қамоқда туғилган аламзадалардан. Тарзан билан гаплашган кунингиз уни ҳам кўрувдингиз-ку?

– Эсимда... Ҳозир топ уни. Гаплашиб кўрай-чи. – Асадбек буйруқни бергач, ҳазин оҳангда – Акаларингнинг ўрнини тўлдириш керак, – деб қўйди.

Чувринди билан Кесакполвон унинг икки қаноти эди. Энди янги қанотларга эҳтиёж сезди. Ҳозир «акаларингнинг ўрни билинди», демоқчи бўлди-ю, ўзининг бу ондаги ҳимоясиз бечораҳоллигини ошкор қилиб қўйишдан тийилди. «Акаларингнинг ўрнини тўлдириш керак», дегани билан бу икки ўринни аввалгидай қойилмақом тарзда тўлдира олиш мумкин эмаслигини биларди. Кесиб ташланган икки қанот ўрнига янгисини улаш қийин эмас, бироқ бу янги қанотларнинг танага аслидай ўрнашиб кетиши амри маҳол. Айниқса, Чувриндининг ўрнини ҳеч ким, ҳатто Жамшид ҳам боса олмайди. Кесакполвон охирида хиёнат кўчасига ўтиб олган бўлса-да, унинг Асадбек учун қадрли томонлари кўп эди.

Жамшид хожасининг амрини тез бажарди: Тарзаннинг шериги икки соатдан сўнг Асадбекнинг рўпарасида ўтирасида эди. Қамоқхонада туғилиб, уч ёшига қадар онаси ётган қамоқхонада катта бўлган, сўнг болалар уйига ўтказилган Ахтамнинг саргузаштларини Жамшид топшириқ олган кунлариёқ аниқлаб, хожасига қисқа тарзда баён қилган эди. Қамоқхонада туғилгани учун бола айбдор эмас, лекин икки марта майда ўғирлик билан қўлга тушиб қамалиши Асадбекка маъқул келмаган, шу боис ўзига яқинлаштиrmай турганди.

Асадбек унга ўткир нигоҳини қадаб, сўз бошлишга шошилмади. Ахтам ҳам «майли, обдон тикилиб олинг», дегандай жим ўтираверди. Йигитнинг кўзлари ўйнаб туриши Асадбекка ёқинкирамади. «Чакиртириб бекор қилдимми, изига қайтариб юбораверайми?» деб ҳам ўйлади. Кейин «қанот бўлолмаса, калта дум бўлишга яраб қолар», деган тўхтамга келди.

– Мени қаерда кўрганинг эсингдами? – деди Асадбек, ундан кўзини узмай.

– Сизни кўп жойда кўрганман. Лекин сиз мени бир жойда кўргансиз, – деди Ахтам.

– Эсинг жойида-ку, – деди Асадбек кулимсираб. – Лекин... шилта ишлардан ҳазар қилмас экансан.

– Ҳар қанақа ишнинг ўз ўрни бўлади, ўз ўрнида қилинган ишнинг мазали роҳати ҳам бўлади, – деди йигит, дадил оҳангда.

Жамшид, ҳатто Чувринди ҳам Асадбек билан бундай оҳангда гаплашишга журъат қилган эмас. Бунақа бетгачопарлик фақат Кесакполвонга хос эди. Рўпарасида йигирма йилга ёшарган Кесакполвон ўтиргандай бўлиб, Асадбек ғашланди.

Ахтам рўпарасида ким ўтирганини биларди, лекин у қимтиниш ёки тортиниш каби фазилатлардан холи эди. Асадбекка рўпара бўлган энг дадил ва жасур йигитлар ҳам тиззалари қалтираб қолмаса-да, ҳар-ҳолда эҳтиромлари юқори эканини ҳеч бўлмаганда қўл қовуштириш билан аён этиб қўярдилар. Бу йигит эса... Асадбек унинг дадил ўтиришини кузатиб: «Қамоқхона мактабини аъло баҳога тугатибди», деб ўйлади.

– Лақабинг нима? – деб сўради Асадбек.

– «Мурда».

– Қаёқдан топасанлар бунақа лақабларни. Безбетлигинг учун шундай дейишганми?

– Йўқ, бошқа сабаби бор.

– Ҳамманинг олдида шунақа сўррайиб ўтирасанми?

– Бўлганим шу.

– Мендан чўчимайсанми?

– Ҳозир чўчимайман. Чунки чақиришингизни билардим, – деди Ахтам.

– Тушингга кирдимми? – деди Асадбек киноя билан.

– Мен туш кўрмайман.

– Йўғ-е?

– Ресторанда менга тикилиб қараган эдингиз.

Кўнглингиздан бир гап ўтганини сезганман. Эртасига Жамшид ака суриштирганларини ресторандагилар айтишган.

– Сезинг жуда-а ўткирга ўхшайди. Қани айт-чи, кўнглимдан қандай гап ўтган бўлиши мумкин?

– Мен сизга керакман.

Кўзлари ўйнаб турган йигит шундай дегач, Асадбекнинг ўткир нигоҳига тик қаради. Ундан бундай дадил гапни кутмаган Асадбек бир оз гангиб ҳам қолди. уни йигитнинг дадиллиги эмас, кўнглидаги яширин ниятни англай олгани ҳайрон қолдирди. Асадбек ҳам мард ва дангалчи эди. Бирок, бу онда: «Қойил, ўтил бола, дилимдагини топибсан!» деб тан бермади. Аксинча, кўзлари муғомбирлик билан кулди:

– Менга керакмисан? – деб сўради пичинг оҳангиди. – Чой қуйиб узатадиган мулозимга ҳожатим йўқ. Эҳтимол мен сенга керакдирман?

– Мени ўша куни кўрдингиз: чой сузиб ўтирадиган сўтакка ўхшайманми?

Ҳаддида туриш нималигини билмайдиган Ахтам бу гапи билан Асадбекнинг сабр косасини чайқатиб юборди.

– Сен баҳоингни ўзингча оширворибсан, бола! Сенга ўхшаган тирраки бузоқларнинг аллақанчаси баланд дорга осиламан деб ўлиб кетганини эшитмаганмисан? – деди Асадбек зардали оҳангда. Унинг кўзларидан сачраган ғазаб учкунлари ҳатто ўзига якин аёнларни ҳам саросимага соларди. Бу йигит эса пинагини ҳам бузмади.

– Мен бу дунёга осонгина ўлиб кетиш учун келмаганман, – деди кўзларини чақчайтириб.

Шу безбетлиги Асадбекка Ҳосилбойваччани эслатиб, ғазаби оловига мой сепди.

– Сен катта кетаверма, бола! Кўрпангга қараб оёқ узат. Яна чатаноғинг йирилиб кетмасин!

Даврасига олишни мўлжаллаган йигитлар билан Асадбекнинг ўзи гаплашарди. Билаги кучга тўлган,

бирок калласи бўм-бўш йигитлар онда-сонда бўлса ҳам учраб қоларди. Кимнинг ҳузурида турганларини фаҳм этмай ҳурмат доирасидан чиқкудай бўлсалар, Кесакполвоннинг бир-икки тепкисини еб, келган жойларига кетаверар эдилар. Асадбекнинг ғазаблана бошлаганини дарров сезиб, чора кўрадиган Кесакполвон энди йўқ.

«Энди ҳар қанақа тиррақи менга тик қарайверадими? Ҳар қанақа палид мени оёқости кила-верадими?!» Шу савол ҳаёлини яшин нури каби ёритди-ю, баданига муз югурди. Заҳрини сочишга шайланганида Ахтам «Бек ака!» деб мурожаат қилди. Асадбекнинг назарида бу сафар унинг овозида ҳам меҳр, ҳам илтижо оҳанги сезилгандай бўлиб, ғазаб алангаси сал пасайди.

— Бек ака, — деди яна Ахтам, — мендан жаҳлингиз чиқмасин, турган битганим шу. Мен қамоқда туғилганман.

— Биламан.

— Мен қамоқда ўладиган одамман, буни ҳеч ким билмайди.

— Худо билади.

Асадбек бу гапни эътиқод соҳиби тили билан эмас, одамларга одат бўлиб қолган шунчаки бир гап сифатида айтди. Ахтам ҳам буни жиддий ҳақиқат ўрнида қабул қилмади. Ҳидоят хусусида жиндеккина тасаввур бўлганда ҳам «Албатта Худо билади», деб қўйиши мумкин эди. Лекин бу гап айтилмади.

— Худо мени яратишга яратиб қўйиб, унутиб юборган. Қаерда ўлишимни ўзим биламан. Одамлар «Худо! Худо!» деяверишади. Лекин мен қойил эмасман, уларнинг худоларига. Менинг айбим нима эди? Хўп, қамоқда туғилибман, онам темир панжаранинг у томонида, мен бу томонида бигиллаб ётибман. Уч ёшимгача қамоқнинг сассиқ боғчасида сассиқ ўйинчоқларни ўйнаб ўтирадим. Бундан кўра ўлдириб юбора қолганлари яхши эмасмиди? Нима учун ўлмай

қолганимни кейин билдим. Мен бу дунёга қасос олгани учун келган эканман. Қамок боғчасидан болалар уйига чиқаришганда қасам ичганман: мен уларнинг ҳаммасини ўлдираман!

Бу аҳдни эшитган Асадбекнинг эти жимирилашиб кетгандай бўлди.

Дадасини қамоққа олиб кетишганда у ҳам шундай деган эди. Қирқ тўққизинчи йилнинг ўттиз биринчи декабрида уйларига бостириб кириб, ҳамма ёқни титиб ташлаган, сўнг дадасини «халқ душмани» деб ҳақоратлаб олиб кетган икки кишининг қиёфаси ҳали ҳам кўз ўнгида: бири новча, иккинчиси паст бўйли одамларнинг сурати кўз олдига муҳрланиб қолган. Ётса ҳам, турса ҳам, бири паст бўйли, иккинчиси новча одамдан қасос олишни ўйлаб яшади. Қасос олди ҳам. Бироқ, кўнгли барибир таскин топмади. Асадбек баъзан ўзи ҳам ҳазар қилиб кетадиган бу оламга «қасос туфайли кирганман», деб ўзини ўзи ишонтиromoқчи бўлади. Ана шундай пайтда қандайдир овоз «ўч мақсадида кирган бўлсанг, қасос олганингдан кейин нима учун чиқиб кетмадинг?» деб нидо қилиб вужудини титратар эди. Тасодифми бу: бир неча кун олдин Муҳиддин ота билан Жалил бу дунёning қасос эмас, имтиҳон дунёси эканига уни ишонтиromoқчи бўлишган эди. Рўпарасидаги йигит ҳам қасос олиш учун яшаб юрибди. Агар унга Муҳиддин отанинг гаплари айтилса, нима деркин, тушунармикин?

Асадбекдан тап тортмай безбетларча турган йигит ҳам қасос олмоқчи... Қасос шунчалар ширинми? Ширин қасоснинг оқибати нима? Ширин ўлимми? Асадбек унга ҳаёт фалсафасидан дарс ўтиш нияти йўқ эди, шу боис «Ҳали кўп нарсаларга ақлинг етмайди», деб қўйди. Ахтам унинг бу гапини ҳам ўзига олмади. Киприк қоқмай тикилганича:

- Мен сиз ўйлагандан кўпроқ нарсаларни биламан, – деди.
- Дўзахда куяётган бир йигитчадан «бу ерга нима

учун барвақт тушиб қолдинг?» деб сўрашганда, кўп нарсаларни билиб юборган эдим, деган экан.

— Мен унақалардан эмасман. Уч ойлигимда ўлди, деб қамоқхонанинг ўлихонасига ташлашган экан. Қарашса тирик эканман. Демак, мен бир марта ўлиб бўлганман. Балки ҳозир тирик одаммасдирман, арвоҳдирман. Арвоҳни осонлик билан ўлдириб бўлмайди, мендан кўнглингиз тўқ бўлсин.

Асадбек унга қараб ўйланди. **У Ахтамни Кесакполвоннинг ўрнида кўришни истаган эди.** Бу бола ўнта Кесакполвонга дарс берадиганга ўхшайди. Яхши ҳамки, уни қаноти остига олди. Йўқса, қайси бир овлоқларда писиб, пайт пойлаб, эртами-индин кутилмагандага ўзига сапчиши тайин эди. Лекин... бугун бўлмаса эртага барибир сапчиди. Фақат тўғридан-тўғри Асадбекка сапчидими ё аввал Тарзанни, сўнг Жамшидни янчиб ташлашга уринадими? Жамшид билан Ахтамга Ҳайдар билан Махмуднинг тақдирини насиб этадими? Энди бир-бирларини ғажиб адо этиш навбати буларга келдими?

Кўнглини ғаш қилган бу фикрларни ошкор этмади. Ахтамга «боравер», деб синов сухбати якунланганини маълум қилди. Иигит ўрнидан тургач:

— Лақабингни ўзгартир, мен атрофимда мурда ила-кишиб юришини ёқтирамайман, — деди.

— Үзингиз кўйиб бера қолинг.

— Башарангга қараган одам сурбетлигингни дарров билади.

— «Сурбет» демоқчимисиз? Унда айтишга осонрок қилиб «Сур» деб кўя қолайлик. Билган одам «Сурбет» деб ўйлар, билмаган одам «душманларини йўлдан суриб ташлайдиган азamat», дер?

Унинг бу гапи Асадбекка маъқул келиб кулимсиради:

— Яхши, лекин ҳозирча биринчи маъноси тўғри, — деди.

— Ичимда яна битта гапим бор, қолиб кетмасин, айтиб олай: сиз шахмат ўйнашни биласизми?

- Хўш, билсам нима эди?
- Қамоқдалингнинг бир одам айтган эди: бу дунёниг ҳаёти шахмат ўйинига ўхшаркан. Сиз ҳозир мени ўзингизнинг ўйинингизга тортмоқчисиз, тўғрими?
- Хўш, тўғри ҳам дейлик, нима демоқчисан?
- Шахмат таҳтаси устида ҳар хил доналар бор, мен қайси бири бўламан? Пиёдами?
- Қай бири бўлишни хоҳлардинг? Фарзинми?
- Мен от юришни ёқтираман. От ёмон тепади, фарзинни ҳам пачогини чикаради.
- Максадинг яхши. Лекин от иккита бўлиши керакку?
- Ҳа. Биттаси – Тарзан-да.
- Тепсанг тепавергин-у, аммо ҳаддингдан ошма.
- Ҳаддимни биламан: сиз шоҳсиз. Тўғрими? Мен шоҳларга ачинаман.
- Нега?
- Шоҳ ёлғиз, бечора ҳамиша ҳимояга муҳтож. Вақти келса, битта пиёдага кучи етмайди. Битта пиёда сурилиб келиб, мот қилиб қўйиши мумкин.
- Ақлинг шунга етса, билиб ол: нодон шоҳ мот бўлади. Сен ўйнайдиган ўйинда аҳмоқ шоҳ йўқ!

Асадбек – ўз оламида от суриб юрган ғурурли инсон, эшак аравага осилиб бу оламига кираётган бир тирранча билан отидан тушиб гаплашгани учун ғашланди. Айни чоғда сўнаётган гулхан якинидаги чўғ аланга олиши муқаррарлигига ишончи борлигиги маълум қилиб қўйган эди. Бири кенгайтирган зулм сўқмоғига иккинчиси ибтидонинг ўзидаёқ безбетларча кадам босгач, интиҳоси нима бўларди?!

Яхши ҳамки, буларнинг иккови ҳам: «Эй Одам фарзанди, мен Аллоҳдирман, бандаларни Уз кудратим билан яратдим, бас, кимларгадир Мен яхшиликни ирода қилиб, яхши хулқни бериб қўяман, кимларгадир ёмонлик бўлишини ирода қилсам, унга ёмон хулқни бераман», деган илохий калимадан бехабар. Билганларида эди, бу ҳикматни ўзларича нотўғри

талқин этиб, аввал қилған зулмлари ва эндигиларини «ҳаётнинг ўзгармас қонуни» деган ахмоқона тушунчалари билан оқлаган бўлардилар. «Бирорга азоб беришни, ҳатто ўлдиришни менга Худо буюрган», деб даъво қилишдан қайтмасдилар. Аллоҳ ҳар банданинг қаршисида икки йўл очиб кўйганини, шайтон йўлидан юз ўтириб, Раҳмон йўлига бурилиши учун унга ақл ва заковат берганини эса ҳатто ўйлаб ҳам кўрмасдилар. Атрофдаги ҳамма нарсани шайтон кўзи билан кўриб, шайтон қалби билан ҳис этиб, шайтон қулоғи билан эшитиб, шайтон ақли билан фикр қиласверишгач, улардан нимани кутиш мумкин?

II б о б

1

Орадан кунлар, ҳафталар ўтиб юз беражак яхши ёки ёмон воқеани кўнгил олдиндан сезиши аниқ. Фақат одамзод ўз кўнгли хитобига қулоқ солмайди, «Бошга тушганни кўз кўрар», деб юраверади. Бўрон бирданига кўзғолмайди, жала бирданига қуймайди. Бўрондан олдин шабада эсади. Одам боласи ҳадемай атрофни ағдар-тўнтар қилиб юборадиган бўрон бошланишини тасаввур ҳам қилмай, шабададан роҳатланади.

Хонгирейнинг ўлими ҳақидаги хабар Асадбекка ёқимли шабада роҳатини бериши керак эди. Лекин қасос лаззати бўлмагани учун бу хабарда роҳатбахш шабадани ҳис қилмади. Аксинча, кўнгли бўлажак ёвузликни сезди. Афсуски, сезги инсон вужудига давомли равишда ҳукмронлик қила олмайди. Кўпинча огоҳлантирувчи сезги чақмоқ нури каби тезоб бўлади. Асадбек Краснояр сафарини режалаштираётгани учун кўнглини хижил қилған сезигига етарли аҳамият бермади.

Кўнгли алдамаган эди. Красноярга унишидан бир

кун олдин Москвада янги зулм дарахти экила бошланди.

Шайтанат дунёсида вақт шайтоннинг ўзи сингари ҳамиша бедор ва сергак бўлади. Милиция ухлаши мумкин, лекин кўча ҳамиша уйғоқ – киприк қоқмайди. Айниқса, ўғрилар оламини бир нафас ҳам ғафлат босмайди. Тўданинг ярми қирилиб кетса ҳам, ҳатто биттагина ўғрининг юраги уриб турса ҳам бу олам тирик ҳисобланади. Хонгирейнинг шериклари ва тобелари унинг ўлимини фожиа деб эмас, балки душманлардан шафқатсиз равишда ўч олишга чакириқ сифатида қабул қилишди. Хонгирей жон таслим қилган оннинг ўзида «унинг ўрнини ким эгаллайди?» деган савол туғилган эди. Бу савол Асадбекнинг хаёлини ҳам банд этганди. Аввалига Маматбейни кўз олдига келтирди. Лекин Полшага олиб ўтилмай қолган қорадори машмашасида унинг ҳам иштироки борлиги катта марта-бани эгаллашига монелик қилиши аник эди. Хонгирей Кесакполвонни ўлдиртириб, Маматбейга марҳамат қилган бўлса-да, ўзидан четлаштириши аниқлигини Асадбек тўғри тахмин қилганди.

Полшага қорадори олиб ўтилган тақдирда ҳам Хонгирей Маматбейни ўзига ворис деб тайин қилмаган бўларди. Маматбейда князлик мавқеини тутиб тура оловчи қобилият йўқлиги Хонгирейга маълум эди. Шу боис унинг яхши ва беминнат дастёр мақомидан ташқарига чиқишига йўл кўймасди.

Москва атрофида хукм юритувчи тўдалар орасида Хонгирейнинг давраси ҳимоя нуқтаи назаридан энг ишончлиси ҳисобланар, ҳатто «Горбачёв ўзини ҳимоя қилишни княз Хонгирейдан ўргансин», деган ҳазилнамо гаплар ҳам юрарди. Мақталган ўша кучли ҳимоя қалқонлари орасидан битта ўқ учун кичкинагина тирқиши топилиб қолишини Хонгирей билмасмиди? Унинг ўзи бировни ўлдирмасди, ёнида тўппонча олиб юрмасди. Ўзини ўлимдан қўрқмайдиган қилиб қўрсатарди атрофидагиларга. Аммо... ёвузликни касб

этгани билан, тирик жон-да, барибир ўлимдан кўркарди. Кўркмаганида атрофини қўриқчилари ҳалқаси билан ўраб оларми?.. Бошқаларни ўлим даҳшати билан кўркитишдан лаззатланувчи одам «мен ўлимдан кўркмайман!» деб жар соган тақдирда ҳам у билан баҳслашиб ўтирамай, кулимсираб қўя қолгани маъкул.

Бирон хатардан огоҳ бўлса-ю, юрагида кучли хавотир уйғонмаса, ҳовлиқмаса, ўлим шарпасидан чўчимасди. У юрагининг алдамаслигига ишонарди. Ўзи тобе бўлган олам аҳлининг узоқ умр кўрмаслиги, ажалини кутиб тўшакда ялпайиб ётмай, биттагина дайди ўқ, биргина томчи заҳар ёки бир қулочгина чилвирдан иборат сиртмоқдан ўлим топишини тан олгиси келмас, ҳаёт шоми хабарчиси бўлган тушларига ҳам, таъбиричиларнинг гапларига ҳам ишонмасди. «Ҳали ўлимимга кўп вақт бор, бугун менга кафан бичаётгандарнинг ўзлари ажалим етгунига қадар гўрда сұякларигача чириб кетади», деб ҳисобларди.

Ҳар қандай тўдабоши сингари Хонгирей ҳам ёнида ишончли одамлар бўлишини истарди, бироқ бу ишончли йигитлари орасида ўзидан кучлироқ, ўзидан ақллироқ ва эпчилроғи бўлишини хуш кўрмасди. Қачондир, кимнингдир қўлидан ўлим топганидан сўнг ўзининг ўрнини ким эгаллашини ўйларди. Вақти келганда Хонгирейнинг тахтига ўтирадиган одамга хожасининг васиятномаси кифоя қилмайди. Бу одамни атрофдаги тўдалар тан олиши шарт. Гўрда ётадиган Хонгирейга бунинг аҳамияти йўқ. Унинг учун энг муҳими – тўдасининг обрў-эътибори сусаймаслиги зарур. «Хонгирей» деган номни эшитганда одамлар унинг ўлимидан кейин ҳам титраб туришлари керак. Нотавон банда! Қиёматга қадар қабр азобига гирифтор этилган, танаси лаҳад куртларига ем бўлиб ётган одамга бу шуҳратнинг нима зарурати бор экан?!

Дўзах азоби нима эканини сал-пал эшитган, бироқ, Қиёматга қадар давом этадиган қабр азоби нимадан иборат эканидан мутлако хабарсиз Хонгирей ўлимни

ўйлаганда энг аввало ўлимидан кейин шуҳрати сўнмаслигини режа қиларди. Қанчалаб одамларнинг шўрини қуритиш эвазига тикланган қонли шуҳрат саройи унинг назарида узоқ йиллар қад ростлаб туриши керак эди. Бу қонли саройдаги қонли тахтда ўтиришга эса унинг назарида факат Ахвердил ҳақли эди. Спорт аҳли орасида халқаро миқёсдаги самбо устаси Ахвердилнинг шуҳрати ҳали сўнмаган, ўғрилар олами эса уни ўликхоналар эгаси Моргаш деб билгани учун иззат қилмас, юкори мартабаларга ҳам лойик кўрмас эди. Спортда омади юришиб турган кезлари, навбатдаги ғолиблик қувончини ресторонда нишонлаб, кайфи ошиб қолган Ахвердил нимадандир норози бўлиб шовқин кўтарганида танбеҳ берган милиционер йигит кўзига ёмон кўриниб, биттагина мушт туширган эди. Спортдаги мартабасининг барбод этилишига, бир неча ой Москвада хору зор бўлиб юришига шу мушт кифоя қилди. Агар Хонгирейнинг назари тушмаганида шу биргина мушт учун неча йиллик умри қамоқнинг исқирик хоналарида ўтмоғи ҳам мумкин эди. Хонгирей Ахвердилнинг кўшни овулдан эканлигини билгач, уни қанотига олди. Ахвердил милиционерни ургани учун ўғрилар оламида қадрланишини у дамда билмасди. Хонгирей собиқ чемпионни синамоқ учун кичикрок бир ўликхонани унинг ихтиёрига топширди. Ахвердил оғриниб, норозилигини яширмаганида Хонгирей унга бир гап айтди: «Сенга топшираётган ишимнинг яхшилиги шундаки, ўликхонада хизмат қиладиганларни бошқалар ўлдирмайди. Агар бу ишнинг қадрига етсанг, меровлик қилмасанг, эртага, ҳатто индинга ҳам тирик юришингни аниқ биласан». Ахвердил бу гапни хикмат ўрнида қабул этиб ишга астойдил киришди. Оқибатда ҳатто Хонгирейни ҳам таажжубга солиб, бир йилда шаҳардаги барча ўликхоналарни ўз кўл остига олди. Спортда шуҳрати сўна бошлаган ёки омади юришмаётган бақувват йигитлар ўликхоналарда «санитар» деган вазифадан ҳазар қилмай ишга ёлланиш-

ди. Ўликхоналарда ҳар куни неча минг долларлаб пул айланишини бу ерга иши тушмайдиган одам қаердан ҳам билсин? Шаҳардаги пуллик ҳожатхоналарнинг эгалари ҳам бойлар қаторида савлат тўкиб юришганда ўликхона эгаси хорланар эканми? Одам пуллик ҳожатхонага кирмаса ҳам тириклиги ўтаверади. Аммо ўликхонага тааллукли ишини бошқа жойда бажара олмайди. Ҳукумат пуллик ҳожатхоналарни ёпиб кўйса ҳам, ўликхонага даф қила олмайди. Ҳуллас, барча ўликхоналар Ахвердилнинг назоратига ўтгач, ўғрилар олами унга «Моргаш» деган лақаб берди.

Хонгирей бу чапдаст ва қўрқмас йигит билан кўп ишларни амалга оширмоқчи эди...

Асадбек Краснояр сафарига тадорик кўраётганида Моргаш Москвадаги «Лебединая песня» деб номланмиш ресторанда меҳмон кутарди. Аслида у тождор ўғрилар тўплантисини чорлашга ҳақсиз эди. Ечилиши мураккаброқ муаммони ҳал килиш учун одатда эътиборли ўғрилар тўпланардилар. Баъзи тўплантида биринки юз ўғри иштирок этса, айримлари беш-олти ўғри билан чекланарди. Шу боис Моргаш ресторанга факат Кофказга тааллукли тождорларни таклиф этишни маъқул кўрди. Баҳона: «Улугъ княз Хонгирей рухини шод қилиш». Тўпланти «Хонгирейнинг ўрнига фалончи бўлсин», деб қарор чиқармайди. Муҳими – бу марта бага даъво қилаётган Моргашни улар тан олишлари лозим. Дарров тан олмасликлари ҳам мумкин. Лекин ҳурматлари юзасидан маълум қилиб қўйиши шарт.

Таклиф қилинган меҳмонлардан факат биргина киши – Ҳамзатбей ҳаяллади. Вақтида етиб келган меҳмонларнинг ҳар бири ўзига яраша обрў-эътиборга эга бўлса-да, мезбонни шошилтиришмади. Дастурхонга қўл узатмай, сигарет тутатиб ўтиришди. Ўши олтмишларни қоралаган бўлса-да, адл қоматини йўқотмаган, кўзлари бургутники каби ўткир, ҳаракатлари кескин Ҳамзатбей ярим соат кечикиб келди. Осто-

на ҳатлаши билан салом бергач, икки қадам босиб тұхтади-да, дастурхон устига норози қиёфада бокди:

– Насронийчасига аза очяпсанми? Хонгирей насрониймиди?

Насронийлар дағы маросимидан сүнг дастурхон атрофида йиғилиб, ароқ ичиб, гүё мархұмни эслаган, руҳини шодлантиргандай бўлишади. Ҳамзатбей дастурхон устидаги ичкиликларни кўриб шу одатни эслатган эди. Ҳаётлик пайтида Худони танимаган одам ўлганидан кейин ароқ ичиб эсланадими ё ароқсизми, аслида фарқсиздир. Ҳамзатбей ҳам, бошқалар ҳам, гарчи ўзларини насроний ҳисобламасалар-да, уларнинг яхши-ёмон одатларини беками кўст бажараётгандарини тан олгилари келмайди. Ҳозир мусулмонликка риоя қилиб «Аллоҳ, бу бандангнинг гуноҳини кечир», деб ароқ ичмаганлари билан, бир соатдан кейин бошқа ресторонда бўкиб ичишлари қайси динга мансуб эканини хеч ўйлаб кўрмаганлар.

Ҳамзатбейнинг ҳозирги танбеҳи ўтирганларни хижолатга солмади ҳисоб. Шунчаки гап сифатида қабул қилишди. Лекин Моргаш мезбон сифатида муносабат билдириши лозим эди, шунинг учун ўрнидан туриб, меҳмонни кучоқ очиб қаршилади:

– Хуш келдингиз, ардоқли Ҳамзатбей! Нималар деяпсиз? Қанақасига насроний, қанақасига аза? Ахир Хонгирей ўлдими? Сиз бизнинг устозимизсиз, ўзингиз айтинг: қадрдонимиз Хонгирей ўлдими? Йў-ўқ! Хонгирей ҳали ўлгани йўқ! Факат кимдир шунчаки аҳмақона миш-миш тарқатибди. У қисқа муддатли хизмат сафарига кетди. Аниқроғи... отасини кўргани кетди. Кўради-ю, қайтади.

Моргашнинг бундай дейиши ҳамма учун кутилмаган эди. Шу сабабли бир-бирларига саволомуз қараб олдилар. Факат Ҳамзатбейгина ундан қаҳрли нигоҳини узмади.

– Хонгирей ўлмаган бўлса, нега унинг ўрнида

Крим хонига ўхшаб ялпайиб ўтирибсан. Фақат «билимай ўтириб қуйибман», дема, пичокқа илинадиган баҳона топ.

– Ҳеч қанақа баҳонам йўқ. Хонгирейнинг ўрни мен учун муқаддас бир жой. Қандайдир аблаҳ довдираб-совдираб кириб келиб, эгаси борлигини билмасдан ўтириб қўймасин, дедим холос. – Пичинг аралаш тагдор гапларнинг хотимаси яхши бўлмаслигини билган меҳмонлар энди бир-бирларига маънодор қараб олдилар. Моргаш эса ўзини соддаликка солған ҳолда манзиратини давом эттириди:

– Мухтарам устоз, Хонгирей узок сафарда эканида жойи совимасин, бу ерда ўтириш фақат сизга ярашади.

Ҳамзатбей бундай лаганбардорликка алданадиган лақмалардан эмасди. Асли қашқир бўлган Моргаш шу топда тулки либосида турган бўлса, Ҳамзатбей аслини ўзгартирган – кўзлари йўлбарсники каби ёнарди. У дадил юриб бориб, тўрдаги ўринга эмас, ёнидаги бўш жойга ўтириди-да:

– Агар Хонгирей сафарга кетган бўлса, албатта қайтади. Унинг бу «муқаддас жойи»га ўтиришга ҳеч ким ҳақли эмас, – деди кескин оҳангда. «Муқаддас жойи» деган таъкидда киноя оҳангни мавжудлиги ўтирганларга аниқ сезилса-да, эътибор берилмади. Фақат Моргаш бу лутфдан кувонгандай енгил таъзим билан деди:

– Сиз бизнинг пиrimизсиз, бундай ақлли гаплар фақат сиздан чиқади.

Моргаш Ҳамзатбейнинг рўпарасидан жой олди. Хонгирейнинг устози ҳисобланса-да, ҳеч қачон тўрга чиқмаган Байгильдиндан Моргашнинг юқоририкда ўтириши Ҳамзатбейни ғашлантиргани билан, индамади. Хизматдаги йигитлар ичимликлардан қуишишгач, Моргаш ўрнидан турди:

– Азиз меҳмонлар, таклифимизни ерда қолдирмай ташриф буюрганингиз учун миннатдорлигимизни

билидирали. Нихоят, «тож гули» жамулжам бўлди. Аввал дастурхонга қарайлик, гапни кейинроқ гаплашаверали.

– «Тож гули» дедингми? Бу ердагиларнинг ҳаммаси «тож гули»га алоқадорми? Мен бегоналарни ҳам кўряпман шекилли? – деди Ҳамзатбей Моргашга тикилиб.

Моргаш унинг мақсадини англаб, айбор одам каби қулимсираб, бошини эгди:

– «Бегона» деганда мени назарда тутяпсиз, билиб турибман. Тўғри, мен тождор ўғри эмасман.

– Ҳа, билар экансан! Билсанг, қўрпангга қараб оёқ узат. Сен ҳатто «дайди», ҳатто «ялангоёқ» ҳам эмассан. Сен шунчаки «йўловчи» бўлишинг мумкинлир. Йўловчи эса эл бўлмайди, истаган бекатда тушиб қолаверади.

– Бу гапингиз ҳам тўғри... Лекин... – Моргаш талмовсирагандай бўлиб, худди меҳмонлардан нажот истагандай уларга қараб олди, – муҳтарам Хонгирей аввалги тўплантида менга тож кийдиришни таклиф қилган эди.

– Қанақа тож! – Ҳамзатбей шундай деб ўрнидан туриб кетди. – Сенинг бу пўк каллангта қайси ахмок тож кийдиради? Тож кийиш учун ҳеч бўлмаса биринки марта қамоқда ўтириш керак. Умрида ўғирлик қилмаган одамни тождор ўғрилар қаторига ким қўшади?! Бу сенга компартиями, ариза берган ҳар қандай довдирни қабул қилаверадиган!

Унинг ғазабдан лаблари титрай бошлаганини кўрган ўғрилар «гапингиз маъқул», дегандай бош ирғаб қўйишиди.

Ҳамзатбей Зелихон-Академик, Байгилдин, яқинда Соликамскдаги қамоқда сирли равища жон берган Петка-Жавҳар ва яна Монгол каби ўғрилар қаторида бу оламнинг «мўйсафид»ларидан саналарди. Хонгирей сингари нисбатан ёшрок ўғрилар билан бу «мўйсафид»лар орасидаги фарқ факат ёшда эмас, ўз

оламларида қарор топган қонунларга бўлган муносабатда ҳам мавжуд эди. Ҳамзатбей ва унинг тарафдорлари ўғрилар оламининг қонунларига ўзгартириш киритишга мутлақо қарши эдилар. Бу соҳада Зелихон, айниқса, қаттиққул эди. Ҳамзатбей қандай масалага дуч келса, унга суюнарди. Академикнинг ўлимидан сўнг Петка-Жавҳар бу оламни кўлда тутиб турган эди. Олтмиш йиллик умрининг кирқ йилини турмада ўтказган бу чўнтаккесар ўғридан Хонгирей ҳам ҳайиқиб турарди. Байгилдин табиати юмшоқ бўлгани учун маслаҳат бериш билан чекланарди. Қонунларнинг дахлсизлигини химоя қилишда бўшлиқ қиларди. Тождор ўғриларнинг муқаддас қонунларидан бири – уйланмаслик, оила қурмаслик, фарзанд кўрмаслик талабларига бўйсунмасликни Ҳамзатбей Худога қарши жанг қилиш билан баробар кўради. Ўтган йилги тўплантida «ўғрининг уйланиши мумкинмас», деган қонунга содик қолган ҳолда «фарзанд кўриши мумкин» деган изоҳнинг қабул этилишига у чидолмай, Хонгирейни ҳақорат қилмаган бўлсада, шунга яқин гапларни айтишдан тап тортмаганди. Кўпчиликни ташкил этмаган бу йилги тўплантida ўзларини «ишбилармон тадбиркор» деб атовчи одамлар билан ҳамкорлик қилишга ижозат этилишини ҳам қонунни бузиш деб хисоблади. Ўша одамларнинг оладиган фойдадан ўн фоиз тўлаб туришлари эвазига ўғрилар химоясида бўлишларини Ҳамзатбей ўғрилар оламига иснод деб билди. Тўплантиларда у ёшлар даврасида ёлғизлик қилиб қолаётганди. Ёшлар унинг ўжарлигини қарилек инжиклиги деб билиб, гапларини малол олишса-да, ёшини, ўғрилар оламидаги хизматлари ва мавқенини ҳурмат қилиб, чора кўришдан ўзларини тийишарди.

Ҳар бир соҳада ҳам кекса авлод билан ёшлар орасида доимий келишмовчилик мавжуд бўлади. Катта авлод ҳаётдаги ўзгаришларни дарров тан ола қолмайди, ёшлар талаб қилаётган янгиликларнинг

ҳали мавриди келмади, деб қаршилик қилишади. Қирқ-эллик йил муқаддам, урушдан олдинги ҳаёт тақозоси билан вужудга келган ўғрилар оламининг қонунлари эскириши мумкинлигини Ҳамзатбей тасаввур ҳам қила олмасди. У «агар зарур бўлиб қолса динимни ўзгартиришим мумкин, лекин ўғрилар қонунини ўзгаришига йўл қўймайман», деб очиқ айтарди. Үғирлик қилиш усуллари ўзгаргани, изни усталик билан ёпиш маҳорати ошганини тан оларди, милициянинг иш услуби ҳам энди ўзгача эканини биларди-ю, қонунларнинг эскириши мумкинлигини, ислоҳга муҳтож бўлиб қолишини эса рад этаверарди. Охирги тўплантида Моргашга тож кийдириш масаласининг кун тартибиға қўйилиши ҳам Ҳамзатбейнинг назарида қонунларга юзсизларча ҳамла қилишнинг бир кўриниши эди.

Моргаш унинг ҳозир ғазаб билан айтган гапларидан ранжимагандай босик оҳангда деди:

– Ўтган сафар ҳам шундай деган эдингиз. Мен сиздай азиз инсонларнинг ёнидан теппа-тенг жой олишга даъвогар эмасман. Бу таклиф менинг илтимосимсиз, Хонгирейнинг шахсий ташаббуси билан айтилувди. Мен ўғриларга холис хизмат қилганидан қувониб юрувчи бир хокисор одамман.

– Ҳа, билар экансан, хизматингни индамай қилиб юравер. Хонгирей сени ахлатлардан арzonгаровга сошиб олган эди. Иззатингни шунга қараб билавер.

– Мен иззатталаб эмасман. Кўчада қолган кунларимни унуганим йўқ. Хонгирей мени одам қилди, десам унинг хизматини камситган бўламан. Хонгирей мени ўликларнинг қироли қилди. Ҳа, «ўликлар қироли!» Ҳамзатбей оға, бу унвонни менга ўзингиз берган эдингиз, эсингиздами? Хонгирей княз эди, тирикларнинг қироли эди! Мен эсам ўликларнинг қироли бўлганимдан фахрланаман.

– Тан олганинг яхши. Хонгирейнинг ёрдами билан сен ўликлар оламига эга чиқдинг. Тұғриси, сенга барь-

зан қойил қоламан. Пойтахтдаги барча ўликхоналарни бу қадар тез муддатда қўлга олишингга тан бериш керак. Яна тан берадиган бир масала бор: ҳаммамиз эртами-кечми ўликхонангга меҳмон бўламиз. Тириклигимизда аламингни ололмасанг, ўлигимизни хорлаб хумордан чиқарсан.

– Ундей деманг, Ҳамзатбей оға! Яна шайтонлар «омийн» деб юбориши масин-а! Худо сақласин сизларни, ўликхонага сирайм ишларингиз тушмасин. Энди... қисқароқ айтадиган бўлсам, Хонгирей мени яхши кўради. Ие, нималар деяпман, «яхши кўради», эмас, яхши кўради!

– Яхши кўриши тўғри, – деди Ҳамзатбей муроса оҳангига кўчиб.

– Ҳа, ана, ўзингиз тасдиқлаяпсиз: Хонгирей яхши кўради, лекин сиз негадир мени ёқтирамайсиз. Бу ҳам ҳақиқатми?

– Нега ажабланасан? Дунё ўзи шунаقا яралган: кимдир сени яхши кўради, кимнингдир эса сени кўрарга кўзи йўқ. Мен сени яхши кўриш учун яшаб юрганим йўқ. Яшашдан менинг мақсадим бошқа. Мен сени ёмон кўрсам ҳам яшаб юраверасан. Лекин мен ўғрилар оламига бир дақика безътибор қолсам, ҳаммамиз хароб бўламиз.

– Бу гапингиз ҳам тўғри. Менам кимларни дир ёқтирамайман. Менга энг маъкули – ўлик одамлар.

– Ҳаддингдан ошма, оғзингни юм, дайди!

Ҳамзатбей шундай деб беихтиёр равишда қўлини ҳаволатди. Моргаш якироғида турганида тарсаки уриб юборищдан қайтмаган бўларди. Моргаш унинг ғазабланганини сезмагандай осойишталик билан гапини давом эттириди:

– Хонгирей сафарга кетмасидан олдин иккаламиз ака-ука тутиниб, дилдан сухбатлашиб бир ишни режа қилган эдик. Хонгирей тириклар салтанати билан ўликлар қироллигини бирлаштирумоқчи эди.

Бу ғоя Ҳамзатбей учун янгилик эмасди. Кундан кун кучайиб бораётган Моргашни жиловини тортиб

туришни унинг ўзи Хонгирейдан талаб қилган эди. Хонгирейнинг Моргашга тож кийдириб, ўғрилар оламидаги эътиборли зотлар қаторига тортишдан мақсади ҳам шу эди. Моргашга тож кийдирилиши озгина муддат ижобий самара бериши мумкин, яъни у бир йилми ё икки йилми олий зотлар ҳурматини сақлаб юриши эҳтимоли бор эди. Кейин эса кутура бошларди. Ит кутурса биринчи галда эгасини қопишини Хонгирей биларди. Лекин ит кутуриш арафасида отиб ташланади, деб ҳисобларди. Ҳамзатбей Моргашнинг бирлашиш ҳақидаги гапини энди эшишиб таажжубланган кишидай чимирилди:

– Яхши-ку! Демак, бирлашгач, сен подшоҳ, Хонгирей эса содик вазиринг бўлармиди?

– Нима деяпсиз? Хонгирейнинг қандай ақлли эканини ҳаммангиз мендан яхшироқ биласиз. Подшоҳлик тугул, мен вазирликка ҳам арзимайман. Мен Хонгирейнинг вафодор ити эдим, ўлгунимча ҳам шундай бўлиб қоламан. Фақат... Хонгирей сафардалиги вактида юзага чиқадиган масалаларни ҳал этишда иккала қиролликни бирлаштириб туришни хоҳлаган эдим. Қарасам, Хонгирей сафарга кетганидан кейин бир-икки муаммолар пайдо бўлиди. Ўйлай-ўйлай, Хонгирейнинг режасини амалга оширдим. Байгильдин оғамизга маслаҳат солган эдим, маъқуллади. Хонгирейнинг салтанатига бир-икки кўзларнинг ола қараётгани менга ёқмай қолди. Бирлашишдан мақсад ўша кўзларни ўйиб олиш. Ахир биз ҳаммамиз биродарлармиз-ку? Бугун қайси бир қанжиқ Хонгирейнинг салтанатига панжа урса, эртага сизга қараб акиллашдан тоймайди. Мен уларнинг панжаларини синдираман, акиллайдиган тилларини кесиб оламан. Ана шунда ҳаммаларимизнинг уйларимиз осойишталик роҳатидан баҳраманд бўлади. Айтмоқчи, Хонгирей сафарга кетмасидан олдин уч-тўртта тобут ясатиришимни буюрган эди. Тобутда кимлар ётишини ҳам айтган, бизнинг ишимизда тобутлар узоқ вақт

бўш ётиши мумкин эмас. Бунинг учун менга сизларнинг ёрдамларингиз шарт эмас. Энг муҳими сиз азизлар, айниқса, сиз муҳтарам Ҳамзатбей устоз – менга ҳалакит бермасаларингиз бас. Бирдан-бир илтимосим шу, устоз, мени яхши кўришингиз мутлақо шарт эмас, факат йигитларингиздан бирортаси оёғимиз орасида ўралашиб қолмасин. Билмасдан босиб олсак, сиз айбламасангиз ҳам ўзим куйиб адо бўламан.

– Қичкириғинг оламни бузадиган-ку, а, жўжахўроз! Сен аввал тобутларингга эгаларини жойлагин-да, кеин ногора қоқ! Менинг бошқа гапим йўқ!

Ҳамзатбей шу гапларни асабий тарзда айтиб, бошқаларга «хайр» дегандай бир-бир бургутқарааш қилиб чиққач, эшик томон юрди.

2

«Жўжахўроз» дейилиши кечириш кийин бўлган ҳақорат саналса-да, Моргаш индамади. Уйғонгандан ғазабини заҳарли илжайиш билан жиловлади. Бу заҳарли илжайиш чодири остида адоват туғилганини бирор билди, бирор билмади. Зиммасига Ҳамзатбейнинг уругини куритиш вазифаси юклangan бу адоват шу ҳақорат айтилмаса ҳам барибир туғиларди. Ўз ҳаракатлари, ўз талаблари ва дъяворлари билан ўғрилар олами даҳолигига талабгорлик қилаётган Ҳамзатбей русларнинг «ўзганинг чанасига ўтирма», деган мақолини унугтаётганди. Тўғри, унинг ёши бошқаларникига нисбатан улуғроқ эди, ўғрилар оламида эътибори юқори эди. Бироқ, ҳар бири ўзини Худо деб ҳисобловчи бу оламга катталик қилиш учун шу эътиборнинг ўзи кифоя қилмасди. Бу мартабага Зелихон эришмоғи мумкин эди. Лекин у тўдалашиб юришни ёқтиирмасди. Академикдан кейин Петка-Жавҳарнинг сўзи кескир эди. Буларнинг олдида Ҳамзатбей ким бўлибди? Орада кофқазликларга хос кексаларни иззатлаш одати бўлмаса, ўзини катта олаётган бу одамни славянлар янчиб ташлашади.

Ҳамзатбейнинг изидан бошқалар ҳам туриши. Қўполлик қилмай, тавозелик билан хайрлашган бўлсалар-да, уларнинг кўзларидан «Хонгирейнинг ўрнида сени кўришни истамас эдик», деган маънени уқиш мумкин эди. Агар бу фикрни тилларига чиқаришса-ю, улардан «Хўш, кимни кўришни истардиларинг?» деб сўралса, жавоб бермай елка қисиб кўйишилари аниқ эди. Моргаш буни зиёфатга чорламасидан олдин ҳам биларди. Буларга қолса, Хонгирейнинг ўрнини ҳеч ким эгалламаса-ю, салтанатини ўзаро бўлиб-бўлиб олишса.

Мехмонлар кетишгач, Моргаш тўрдаги бўш ўринга ўтириди. Байгилдин унинг ўнг томонидан, Маматбей эса сал қуириоқдан жой олди. Моргаш ароқ қуиб кўйилган қадаҳни қўлга олди-да, бир кўтаришда бўшатди. Байгилдин билан Маматбей ҳам ичишли. Икковининг қарашларида ҳам «энди нима қилдик?» деган хавотир сезилмасди. Улар ҳам янги хожалари каби тўплантининг шундай якун топишини олдиндан билгандай хотиржам эдилар.

— Байгилдин, — деди Моргаш бир неча нафаслик сукутдан кейин, — мен уларнинг маслаҳатига муҳтоҷ бўлиб чақиртирмаған эдим. Ниятимни маълум қилиб кўйишим шарт эди, шунинг ўзи уларга етарли. Битта каллага битта маслаҳатчи етарли. Хонгирей сени ҳурмат қиласди. Менам ҳурмат қиласман. Менга маслаҳат бераётганингда ўғри эмаслигим эсингда турсин. Ўғриларингнинг қонун-понунларини сарик чақага олмайман. Тожини кийишга кўзим учуб тургани ҳам йўқ. Уришгиси келганлари билан уришман. Маматбей, Хонгирей сени яхши кўрарди. Полшага қорадори етиб бормагани учун сени ўлдириши керак эди. Мен сенга атаб тобут ҳам ясатиб кўйган эдим. «Нега ўлдиритирмади?» деб кўп ўйладим. Энди билсан, ўзининг ўлимини сезиб, сени қарздор қилиб кўйган экан. Энди бу қарзингни менга тўлайсан. Сен Урта Осиёни яхши биласан. У бизники бўлиши керак.

Энди хато қилсанг, нима бўлишингни ўзинг биласан. Сенинг тобутингни алоҳида меҳр билан ясаттирган эдим. Бирорга бериб юборганимча йўқ.

Унинг аҳди муҳокама талаб этилмасди. Шу боис маслаҳаттгўй ҳам, итоаткор ҳам эътиrozга оғиз жуфтлашмади.

Моргашнинг сўздан амалга ўтиши орасидаги ма-софа жуда қисқа эканлиги эртасига ёқ маълум бўлди. Хонгирейнинг ўлими ҳақида газетага хабар берган мухбирнинг ўлиги ҳожатхонадан топилгач, бу оламга алоқадор одамлар Моргашнинг иш бошлаганини англашди. Мухбирнинг жасади пойтахтнинг қоқ маркази – Ленин мавзолейи рўпарасида жойлашган катта дўконга кираверишдаги пуллик ҳожатхонадан топилгани тасодиф эмасди. Мухбирнинг оғзига ўша газета тикиб қўйилгани ниманинг эвазига ўлим топганига ишора эди.

Баъзи жаллодларга одамнинг дўпписини олиб келиш топширилса, юксак санъатини намойиш этиш ниятида ўша одамнинг бошини ҳам кесиб келаркан. Бу замонда ундај жаллодлар қолмаган бўлса-да, шу зайлда иш кўрувчи мухбирларнинг уруғи кўпайиб кетган эди. Уқувчиларининг дикқатини жалб этиш учун акл бовар қилмас бемаъниликларни ҳам тўкиб ёзадиган бўлиб қолишганди. Хонгирей аслида ҳожатхонада чаваклаб ташланмаган, балки ҳаммомдан чиқаётганида ўлдирилган эди. Жиноят оламида юксак мартабага эга бу одамнинг хорлик билан ўлим топганини бурттириш ниятида мухбир «ҳожатхонада чаваклаб ўлдирилди», деб ёзган, бу ёлғони учун жазо ҳаялламаслигини хаёлига ҳам келтирмаганди.

Одамлар доимий равишда покланиб туришга эҳтиёжлари бўлгани сабабли ҳаммомни ўйлаб топишган. Йигирманчи асрнинг то сўнгги чорагига қадар ҳаммомнинг вазифаси биттагина эди. «Неча минг йиллар мобайнида яшаган одамлар содда бўлишган эканми, ҳаммомда ювинишдан ташқари кайф-сафо ҳам

килиш мумкинлигини билишмаган», дейилса, авомга мўлжалланганлари назарда тутиладиким, подшоху боёнлар саройи, қасридаги ҳаммомлар назардан соқитдир.

Масковдайин дабдабали шаҳардаги дабдабали уйларда покланиш учун ҳамма шароит мавжудлигига қарамай, ҳаммомларга бўлган эҳтиёж сусаймади. «Красная пресня» даҳасидаги машҳур рус ҳаммомларининг асл вазифаларига ҳам ўзгартиришлар киритилди. Ҳаммомнинг буғхонасида чўмилгиси келган ишчими ё профессорми бу жойга келишни орзу қилмай, уйидаги душхонада бошидан илиқ сув куйиб ювениб олишга одатланган. Туркларга алоқаси бўлмагани ҳолда «Турк ҳаммоми» деб номланувчи ҳаммом Хонгирейнинг ихтиёрида эди. Бунга келувчиларнинг мақсади сувда чўмилиш эмас, таъбир жоиз бўлса, гуноҳлар балчиғига янада баттар булғаниб кетиш эди. Бу ерда ақл бовар қилмас мураккаб масалалар ҳам бир зумда ҳал қилиб ташланарди. Ҳаммомнинг эшигидан марҳамат истаб кириб келган икки дўстнинг бири ложувард ҳовузчада нозанинлар қуршовида чўмилиб роҳатланиши, иккинчиси эса Моргашнинг ўликхонасини четлаб ўтиб гўрга кириши ҳам мумкин эди. Ҳовузда майшат қилган ўша биринчи одам кетар вақтида «менинг ёнимда дўстим бор эди-ку?» деб сўраб ўтирмасди.

Кимнингдир яшаш ёки яшамаслиги, яна кимнингдир иши юришиши ёки юришмаслиги ҳал қилингач, албаттга дам ҳам олинарди. «Дам олиш» ёш нозанинлар иштироқидаги майшат билан якунини топарди. Асадбек Хонгирейнинг ўзига хос мана шундай «қабулхонаси» борлигини, катта-кичик амалдорларнинг ҳам «хизмат юзасидан» келиб туришларини эшигтан, аммо ўзи келиб кўрмаган эди. Катта-кичик амалдорлар айрим зарур хужжатларга шу ҳаммомда имзо чекишгач, шунга яраша мукофотларини олардилар. Мансабдорлар Хонгирейнинг «Интурист» меҳ-

монхонасидаги шоҳона идорасига киришдан чўчирдилар. Орқаларидан ҳуфялар кузатиб юришган бўлса, балога учраб қолишдан ҳайиқармидилар ё нафсларига банди бўлиб, гуноҳ ишга кўл уришгач, шу ернинг ўзидаёқ покланиб чиқиб кетишини хаёл қиласмидилар, Худо билади. Эҳтимол, уларнинг назарларида сув ҳар қандай гуноҳни ювса керак-да.

Ҳаммомда доимий бўлмаса-да, вакти-вақти билан қиморбозлар катта ўйинларга тўпланиб туришарди. Сулико ҳам кўп келган, бир марта чўнтағидаги борини ташлаб, кейингиларида тўкилганини тўлдириб олганди. Тикилган пул ярим миллиондан ошган пайтларда атрофни ўлик сукунат қоплаб оларди. Бирор ҳам молини, ҳам жонини ютқизиб, тақдирга тан берарди, яна бирор қулоғига қадар карзга ботиб, бу ташвишдан қандай кутулишни ўйлаб қоларди. Ютқизганларнинг қайғуси тушунарли. Лекин ютганлар ҳам ташвиш билан тарқардилар. Улар ташқарида ўзларини нима кутаётганини билмасдилар. Ютганлар таланган кунлари «ё укаси Иликога ё бошқа ўғрилар тўдасига маълум қилиб қўйган», деб Суликовдан гумонсирашарди. Унинг ўлимига айнан шу гумон сабаб бўлганди. Қайси аламзада қиморбоз кимни ёллаганини Хонгирей билмайди. Лекин Илико шубҳаланаётган одамлар орасида ўзининг номи борлигини тахмин қиласди. Катта ишлар орзусида қанот ёзаётган дамларда Иликонинг ўзига душман бўлиб қолишини сира истамасди. Бу оиласа қадрдон бўлган Асадбекка тўғридан-тўғри ташланмай, «патларини» киши билмас тарзда юлишига сабаб ҳам шу эди.

3

Моргашнинг Хонгирей билан ака-ука тутингани, ўликлар ва тириклар қироллигини бирлаштириш масаласи ҳаммомда ҳал қилингани ҳақидаги гапи лофтэмас, ҳақиқат. Сўнгти учрашув чиндан ҳам ҳаммомда бўлиб ўтган эди.

Момақалдириқли тонг Москва ахли учун ажабтовор янгилик эмас. Хонгирей әрталаб осмон гумбуридан уйғонганида ажабланмади. Үрнидан туришга эриниб, чап томонига ўғирилди. Юрагига нимадир ботиб, нафаси қайтди. Ётолмай, қаддини күтарди. Кейинги пайтларда бундай ахвол такрорланиб турарди. Ўзини врачга күрсатганида тунги майшатлар вактини қисқартириши лозимлиги ҳақида маслаҳат олди. Врачлар ҳам баъзан нодонлик қилишади-да: майшат кишига лаззат берәётган дақиқаларда әрталаб юраги безовта бўлишини ким ўйлар экан?

Хонгирей бу кунги юрак безовталигини ҳам тунги майшат сабабидан деб билди. Бундан кейин бу тўшакда эмас, лаҳадда ётажагини, момақалдириқли тонг сурурдан энди баҳра олмаслигини юраги ҳис қилган эди, акли сезмади.

Туришга эриниб ётганида Томскдан Балабуха кўнғироқ қилиб, ҳол-аҳвол сўради. Кейинги ҳафтада нишонланиши мўлжалланаётган туғилган кунига таклиф этди. «Сендей улуғ княз дастурхоним тўрида ўтиrsa, мен учун шараф. Шу зиёфат баҳонасида иттифоқлигимизни мустаҳкамлаб оламиз», деди. Ўзи Томскда яшаса ҳам, Москва атрофидаги славян тўдаларига сўзи ўтадиган Балабуха авваллари ҳам Хонгирейга кўнғироқ қилиб турарди. Москва ва унинг атрофларига ҳукмронлик қилувчи Кофқаз гурухлари билан Славян гурухлари орасида келишмовчилик чиккудай бўлса, албатта Балабуха аралашарди. Красноярда ғойиб бўлган Козловнинг Балабуха қаноти остига келишини Хонгирей таҳмин қилган, лекин изини топа олмаётган эди. Агар таҳмини тўғри чикса, Балабуханинг албатта боғланишига ишонарди. Тонгги кўнғироқ унга шу хушхабарни етказгандай бўлди. «Демак, Козёл Томскда, демак, унинг тақдири Балабуханинг зиёфатига қадар ўша ерда ҳал қилиниши керак», деб ўйлади.

Одати бўйича ҳаммомга келганида ҳам хаёли шу ўй билан банд бўлди.

Уни Моргаш кутиб олиб, хос хонага бошлади. Хожасининг кайфиятсиз эканини сезиб, аҳвол рухиятидаги ўзгариш сабабини аниқламоқчи бўлгандай ўйчан кўзларига бокди. Хонгирей буни сезиб, пешонасини тириштирди. «Менга бунаقا тикилма», деб гўлдираганича диванга чўкди. Сўнг «Наполеон»дан куй», деб буюрди. Тўлдирилган қадаҳни бир кўтаришда бўшатиб, Моргаш узатган газакка қарамай, лабини билагига артди. «Хўжайнин, нима бўлди, айтинг, дардингизни олай», дегиси келса ҳам Моргаш жим ўтиришга мажбур эди. Дарди бўлса, айтишни лозим кўрса хожасининг ўзи гапиради. Ундан сўрашга бу атрофда факат Байгилдин ҳақли. Бироқ, одамнинг кўзларига қараб, ичидаги дардни сезиш қобилиятига эга Байгилдин бу ҳукуқидан деярли фойдаланмайди. У ҳам шогирдининг гап бошлишини сабр билан кутади. Байгилдиндай одам кутганида Моргаш бетоқатлик қилсинми? Нихоят, Хонгирей тилга кирди. Аъёнига айёrona бокиб, деди:

— Моргаш, Москвадаги ўликхоналар сенга камлик килмаяптими?

Кутилмаган бу саволдан мақсад нима эканини англаёлмаган Моргаш жавоб ўрнига елка кисиб кўйиши майқул кўрди.

— Бошқа шаҳарлардаги ўликхоналарни қўл остингга олишга нима учун уринмайсан? Нега бунча лаллясан?!

— Қайси шаҳарни айтяпсиз?

— Масалан... Томскни. У ердаги ўликларнинг хўжайнин ким, биласанми?

— Биламан. Сигизмунд деган гиёҳванд бола. Ёшлигида тош кўтариб юради. Россия биринчилигида бронзадан нарига ўтолмаган.

— Ўша наркоманга кучинг етмайдими?

— Етади.

— Етса нимани кутиб юрибсан?

— Қачон тинчтай?

– Кеча тинчтишиңг керак эди. Э, ландавур!.. –
Хонгирей шундай деб сүкінди-да, жим қолди. Сұңг
яна бир нохуш воеаны эсладими, сүкишни давом эт-
тириди. Ғазаб олови шу сүкишлар билан чиқиб, оташ
босилғач, яна сүради: – Ўша наркоманнинг Балабуха
билан алоқаси қанақа, биласанми?

– Чурраси тушиб, хор бўлиб юрганида Балабуха
уни одам қилган, дейишади.

– Балабуха одам қилган бўлса, унга тишинг ўтиши
осонмас. Катта кетма. Сен... ёмон бола эмассан-ку, ле-
кин битта айбинг бор, биласанми?

– Айбим кўп, тан оламан, – деди Моргаш ўлимга
ҳукм қилинаётган гуноҳкор қиёфасида. Унинг бу ту-
ришини кўриб, Хонгирей истеҳзо билан кулимсиради.

– Айбинг кўплиги ҳеч кимга сир эмас. Ҳар бир
айбинг учун ўлимга ҳукм қилинсанг биласанми,
нима бўлади? Кунда икки марта сени отиб ўлдириб,
яна икки марта тирилтириш керак. Айбинг тамом
бўлгунича Худонинг ҳам силласи қуриб кетади.

Бунақа гапни фариштадай покиза, гуноҳсиз одам
айтса ярашарди. Моргаш ҳар куни икки марта тирил-
тирилиб, икки марта ўлдирилса, Хонгирей ҳар соатда
шундай жазога лойиқ кўрилиши керак эди. Моргаш
ҳазил тариқасида бўлса ҳам шундай дегиси келарди,
лекин бу ҳазили эвазига қандай мукофот олишини
яхши билгани учун «Қойил гапни айтдингиз!» деган-
дай жилмайиб қўйиши маъқул кўра қолди. Хонгирей
эса давом этди:

– Майда-чуйда айбларинг учун Худо билан ўзинг
келишаверасан. Мен учун битта энг катта айбинг бор:
ўғри эмассан! Мен мана шундан афсусланаман. Ўғри
бўлмаганинг учун калланг яхши ишламайди, доим
калта ўйлайсан. Агар ўғри бўлиб қамоқхона яғирини
ялаганингда атрофга кўзларингни катта-катта очиб
каардинг. Бизга даф килиши мумкин бўлган энг кич-
кина, энг заарсиз хасни ҳам кўра олардинг.

– Менинг қамалишум ҳечам мумкинмас, – деди
Моргаш ҳазил оҳангода.

- Нега энди? Орқангда ой кўринганми?
- Агар бир йилга қамалсам ҳам, чиққанимда бу атрофни сўтак болалар босиб кетган бўлади.
- Бу гапингда жон бор. «Ўғри қамоқда ўтириши керак», деган қонун ҳаётга тўғри келмай қолди. Мен охирги марта қамоқдан чиққанимда кўчаларнинг эгалари мишики болалар эди. Уларнинг гердайган гарданларини буқкунимча онамни кўрай дегандим.

Хонгирей тўғри айтди. «Кўчага мен хўжайнинман» деб керилиб юрганларнинг бурнини ерга ишқаши осон бўлмаганди. Бу «хўжайн»лардан унинг гапини кулоғига олиб, йўриғига юргани одам бўлди, эгилиши истамагани кўчанинг унутилган тарихига сингиб кетди.

Моргаш бу тарихни озми-кўпми эшиттани учун «ўшанда сизга чиндан ҳам қийин бўлган, бечорагина хўжайним», дегандай маъюс кўзларини унга қадаб тураверди. Хонгирей «кўй» деган маънода қадаҳга ишора қилди. Моргаш бу амрни дарров бажарди. Хонгирей қуидиришга қуидирди-ю, ичишга шошилмади. Қадаҳни чирокқа тутиб, конъяк таркибини текширгандай бўлди. Унинг бу қилиғидан Моргашнинг юраги пича ҳовлиқди: агар конъяқда зарра қадар нимадир бўлса унинг шўри қурийди. Моргашнинг хавотири ортиқча эди. Хонгирей конъякни чирокқа тутиб, унинг тиниқлигига маҳлиё бўлаётганди. Ўз ишидан қониқча, икки ҳўплам ичиб, қолганини Моргашга узатди. Моргаш қадаҳни эҳтиётлик билан олиб курси устига кўймоқчи эди «Ичиб қўй!» деган амрни эшитди-ю, ўша нафаснинг ўзидаёқ буйруқни адо эттида, бу лутфдан нақадар кувонганини билдириш учун хожасига миннатдор кўзлари билан бокди.

— Агар конъяқ заҳарланган бўлса, иккаламиз баравар ўламиз, — деди Хонгирей ўткир нигоҳини унга қадаб.

Бу гап ҳазилми ё чинми эканини билмаган Моргаш довдира бўлди. Ҳазил деса, хожаси ғазаб билан тики-

либ турибди. Чин деса, бу ерда гумонга сабаб бўлувчи хавотирли ҳаракатнинг ўзи бўлиши мумкин эмас. Хонгирейнинг чиғириғидан ўтган хизматчиларнинг барчаси содик қуллар каби эдилар. Хонгирей Моргашга тикилиб қарай-қарай охири кулиб юборди:

– Улимдан шунчалик кўрқасанми, э сўтак! Уликларнинг ичидаги юравериб без бўлиб кетишинг керак эди.

– Мен ўзимдан эмас... – Моргаш хожаси учун жон фидо қилишга ҳам тайёр эканини изҳор этмоқчи эди, Хонгирей гапини узди:

– Мендан хавотирландингми? Хавотирланганингда аввал ўзинг ичардинг.

Бир марта шундай қилганида Моргаш нафси бузуклиқда айбланиб, балога қолган эди. Кўнгли хира бўлиб турган Хонгирейга бугун иссиқ ҳам, совуқ ҳам ёқмаслигини англаған Моргаш айбдор бола сингари бўйинни қисиб тураверди.

– Ҷўк, – деди Хонгирей рўпарадаги юмшоқ стулни кўрсатиб. Моргаш лозим пайтда сапчиб туришга шай ҳолда бўлиш учун, омонатгина ўтирди.

– Эрталаб Балабуха кўнгироқ қилиб, меҳмонга айтди. Ўши киркка бориб қолибди, у шохи йўқ ҳўқизнинг. Қирқ йиллик умр битта ҳўқизга кўплик қилмайдими?

– Жуда кўп, – деди Моргаш кулимсираб.

– Қирқ йил яшаш, нима дегани биласанми? Билмайсан. Бу ҳаётда қирқ йил азоб чекишига мен айборман. Бу азоблардан қутулишига олдинроқ ёрдам беришим мумкин эди. Нега пайсалга солдим? Меҳрибонлик қилдимми? Ҳа... меҳрибонликнинг ҳам ёмон томонлари бор. Энди... яна беш йилми ё ўн йилми азоб чекишига йўл кўймаслигим керак. Унгача туғилган кунини қойилмақом қилиб ўтқазиб олсин, а? Эрталабдан бери «нимада совға қилсан экан?» деб бошим қотяпти. Ҳиндистондан она-бала фил олиб келти-

раймикин? Тепасига жавҳару ёкут қадалган гиламча ташласам, а? Шунақа совғага арзийдими ўзи? Арзимайди! Уша филиинг тезагига ҳам арзимайди. Красноярлик Козёл нима бўлди? Балабуха билан қалин ошна эканидан хабаринг борми? Сенлар Козёлнинг изини йўқотдиларинг... – Козловни қидириш ишларига аралашмаган Моргаш тухматдан ўзини ҳимоя қилишни ҳам ўйламай индамасдан ўтираверди. Хонгирей эса гап оҳангини ўзгартирмай давом этди: – У ҳаромини мен ўзим топдим. Ақлим билан топдим! Балабуха Томскда Козёлни тиззасига олиб, бошини си-лаб ўтирибди. Туғилган кунига силаётган ўша бошни совға қиласман. А, нима дединг? Бунақа алламбало совғани тушида ҳам кўрмаган. Қараб турасан, сенинг қўлингга келгунича жиннихонага тушиб чиқади. Агар менинг ёнимда юраман, десанг, доимо каллангни ишлат. Ҳар ишдан лаззат олишни ўрган. Шартта отиб кетишни кўчадаги ҳар қанақа аҳмоқ ҳам бажараверади. Гап ўлдиришда эмас, гап роҳатланишда! Қани, куй.

Моргаш қадаҳга конъяқ қуйгач, узатишни ҳам, аввал тотиб кўришни ҳам билолмай гарангсиди. Сўнг таваккал қилиб, лабига олиб борган эди, ҳожасининг қаҳрли овозини эшитди:

– Нима, мен сенинг саркитингни ичаманми?

Моргаш қўлидаги қадаҳни шошилганича курси устига қўйди-да, бўш қадаҳни конъяқ билан тўлдириб, узатди. Бу сафар Хонгирей чўқишириб ичди.

– Асадбекнинг кўзларида ёш кўриб қанчалик роҳатланганимни сен билмайсан. Мен унинг ҳам жиннихонага тушишини кутган эдим. Дијдаси қаттиқ экан энағарнинг. Аслида иккала ўғлини гумдон қилишимиз керак эди. Яна меҳрибонлигим панд бераби, роҳатим яримта бўлди. Бу хатони тузатиш қийин эмас. Яқинда роҳатим бутун бўлади. Мен битта хато қилдим: Ҳайдарни ўлдирмаслигим керак эди. Асадбекни фақат ўша аҳмоқ янчиши мумкин эди. Жамшидга ишонганим чатоқ бўлди.

– Ишончни оқламаса, менга беринг уни.

– Йў-ўқ, сенинг кўлингга тушишига ҳали вақт бор. Уни менга Академикнинг ўзи тавсия этган. Устозим одам танлашни биларди. Жамшид хиёнат қилмайди. Фақат... ғўрлиги бор. Шу кунларда Асадбек билан олишишга кучи етмайди шекилли. Шунинг учун уни мен сенга бермайман, сени унга бераман. Асадбекни гумдон килишда Маматбей ҳам иш беролмаса керак. Эсингда турсин: зарур бўлиб қолган пайтда бу ишни ўзинг кўлга оласан.

Хонгирей бу онда келажак режаларини баён қилаётгандай эди. Бир неча соатдан сўнг режанинг васиятга айланишини буларнинг иккови ҳам билмас эди.

Хизматчи йигитлардан бири эшикни қия очиб, Ҳамзатбей келганини айтди. Хонгирей бу ташрифдан норози бўлса ҳам, уни худди кутилган азиз меҳмондай қарши олди. Ҳамзатбей ўтиргач, дастурхон тузаш учун кирган хизматчи йигитни изига қайтарди-да, «шошиб турибман», деб изоҳ берди. «Шошиб турибман»нинг тагида «зарур гапим бор», деган маъно ҳам яширин эди. Моргаш буни англаб, хизматчи йигитта эргашмоқчи эди, Хонгирей кўз қараши билан «ўтиравер», деб амр қилди. Тождорлар билан яккама-якка гаплашишни ёқтирувчи Ҳамзатбейга «дум» иштирокида сухбатлашиш малол келса-да, меҳмонлик иззатига хилоф қилмай, индамай қўя қолди.

– Эшитдингми, Петка-Жавҳарни ўлдиришибди, – деб Моргашга бир қараб олди.

Хонгирей бу нохуш хабарни бошқачароқ тарзда эшитган эди. Шу сабабли ажабланиб сўради:

– Ўлдириб кетишибдими? Ким?

– Сенга «ўзини ўзи осди», дейишувмиди? Шунга ишондингми? Петка-Жавҳарни Соликамскка жўна-тишгандаёқ кўнглим бир бало сезувди. «Оқкуш» Петка-Жавҳар борадиган жой эмас.

Соликамскдаги қамоқ лагерига ким ва нима учун

«Оққуш» деб ном берганини ҳеч ким билмайди. Балки «Бу ерга келгандар узок яшамайды, тез орада жони оққуш каби парвоз этади», деган маънода қўйилгандир бу ном. Хонгирейнинг ўзи у қамоқ лагерида ётмаган-у аммо довруғни эшитган. Бир-бирига муҳаббат билан қараб турган икки оққуш сурати байроқ каби деворига илиниб турладиган бу лагерда инсоний муҳаббат, меҳр деган фазилатлар йўқ эди. Ҳукуматга ёқмаган маҳкумлар кўпинча шу лагерга юбориларди. Бирон ақллироқ одам топилса-да, бу қамоқ лагери номини ўзгартириб, «Оққуш» ўрнига «Кирасану чиқмайсан», деб қўйса мантиққа муносиб иш килган бўларди.

– Петка-Жавҳар ўлиши шарт бўлгани учун ўша ёққа «этап» қилинган. Унинг ҳукуматга ёмонлиги йўқ эди. Чўнтаккесар ўғридан ҳукумат қўрқмайди. Петка-Жавҳар ўзини осадиган аҳмоқлардан ҳам эмас. Умрининг қирқ йилини қамоқда ўтказган ҳалол ўғри эди у! Қайси бир қанжикнинг бир тепкиси билан ўзини осадиганларнинг тоифаси бошка.

– Ҳукуматнинг чўнтаккесар ўғридан қўрқмаслиги тўғри, – деди Хонгирей ўйчан тарзда.

– Чайналмасдан очикроқ гапир.

Ҳамзатбейнинг қўрслиги ғашини келтирса-да, Хонгирей сир бой бермади. Фикрини очикроқ баён этишга ҳам шошилмади. Хонгирейнинг узок ўйлаб сўнг гапирадиган тоифадан эмаслигини Ҳамзатбей жуда яхши биларди. Зелихон-Академик унинг баъзи телбатескари гапларидан аччиқланиб, «калта ўйлама!» деб танбех берганларига бир неча марта ўзи гувоҳ бўлган. Хонгирейнинг ҳозирги ўйчан кўриниши никоб эканини Ҳамзатбей сезмаса яна ким сезсин? Сезса-да, шошилмади, тоқат билан кутди.

– Ҳукуматнинг чўнтаккесар ўғридан қўрқмаслиги тўғри, – деб қайтарди Хонгирей, тусини ўзгартирган ҳолда, – лекин... у сиз учун оддий ўғри. Биз учун эса тож гулига сўзи ўтадиган юқори эътиборли ўғри. Петка-Жавҳарнинг уйи ҳам биз, оиласи ҳам биз,

болалари-ю қариндошлари ҳам биз эдик. Барча унга сўзсиз бўйсунарди. У тож гулини истаган томонга буриб юбориши мумкин эди. Ҳукумат эса буни биларди.

– Ҳа, яхши биларди, – деб бу фикрни қувватлади Ҳамзатбей, – чунки ичимиздаги айрим қанжиқлар ҳукуматни доимий равишда огоҳлантириб турарди. Ҳукумат билан биздаги қанжиқлар тил бириттирган пайтда ҳалол ўғриларнинг ўлим топиши осонроқ бўлади. Петка-Жавҳарни ҳукумат одамлари ўлдирмади, ўлдиришга шароит яратиб берди. Уни ўзимизнилар ўлдириди. Петка-Жавҳар охириги учрашувда менга бир сир айтган эди: Академикнинг ўлими тўғрисида унда етарли маълумот бор экан. Зелихон Фарғонадаги турклар билан бўлган жанжални Москва одамлари уюштирганини билгани учун ўлдирилган. «Ҳукумат одамларига Академикни топишда ёрдам берган ўзимизнинг қанжиқларни қамоқдан чиққанимдан кейин тўплантида фош қиласман», девди. Академик билан Петка-Жавҳарнинг қисмати бир бўлди.

Ҳамзатбей бу янгилик қандай таъсир этар экан, деган хаёлда Хонгирейга қаттиқ тикилди. Хонгирей эса тусини ўзгартирмади, қоши сал учгандай бўлди-ю, сир бой бермади:

– Менга ҳам айтган эди шу гапини, – деди босик овозда.

– Айтган бўлса... Академик жонингни саклаб, сени одам қилган эди. Шу пайтгача нега қотилини қидириб топмадинг?

– Қидиряпман, лекин бу менинг зиммамдаги қасос, шунинг учун сизга ҳисоб беришим шарт эмас.

– Академик сенинг устозинг эди. Петка-Жавҳар билан менга эса ардокли дўст эди. Биз дўстнинг қадрини унутмаймиз. Сендақа ёшлар бизнинг ишимизда дўстлик бўлмайди, деб валдираиверасанлар. Биз ҳалол ўғрилигимизни унуганимиз йўқ. Дўстни ҳам эсдан чиқармаймиз. Бугун Пермга кетяпман. Эрта ё индин жасадини олиб келиб, кўмамиз. Мен билан

бирга бормаслигинг аниқ. Лекин кўмишга тайёргарлик қўриб қўй. Маросим олий мақомда бўлсин. Петка-Жавҳар славянлардан бўлса ҳам, бизга яқинлиги бор эди. То олиб келиб кўммагунимизча славянлар билан нари-бери гап қилиб юрма.

– Жасадини беришарканми, суриштирдингизми? Ё одамларимни ишга солайми?

– Сен айтилган вазифани бажар. Бу ёғини менга кўйиб бер. Битта ўлик топиб, Петканинг жасадига алмаштириш қўлидан келмайдиган ландавурга айланиб колганманми?!

Ҳамзатбей аҳдини шу тарзда баён қилгач, шашт билан қаддини ростлади. Хонгирей жойидан қўзғолишни истамаса ҳам, ўзини ўзи мажбурлаб ўрнидан туриб, меҳмонни кузатди. Ҳамзатбейни кузатиб, жойига қайтгунича хаёли унинг кейинги гаплари билан банд бўлди. Хонгирей «Менга ҳам айтиган эди», деб ёлғон гапирди. Петка-Жавҳар у билан бу ҳақда сира гаплашмаганди. Хонгирей Академикнинг ўлимига ким алоқадор эканини яхши биларди, шу боис қотилни қидиришнинг ҳожати ҳам йўқ эди. Ўғрилар орасида «ўз оламинг аҳли хузурида ёлғон гапирма», деган қонун мавжуд бўлса-да, Хонгирей бу қонунни бузишдан тап тортмади. Сири очилай деб турган маҳалда қайси ахмоқ ёлғон ишлатмайди? Ёлғон ишлатиш бир масала, бу ёлғонга бошқаларнинг ишонишлари янада муҳимроқ масала. Ҳозир Ҳамзатбей унинг ёлғонларига ишондими ё йўқми – Хонгиреяга маълум эмас. Хонгирей бир нарсадан ҳадиксиради: Ҳамзатбейнинг гапларида «Академикни хукумат одамларига сен рўпара қилганингни Петка-Жавҳар билиб қолгани учун уни ҳам йўқотдинг», деган маъно яширинмаганмиди?

Академикнинг ўлимидаги хизмати бор, бу гунохини одамлардан яширгани билан, Худонинг қачондир жазо беришини ҳис қиласи. Лекин Петка-Жавҳарнинг ўлимига алоқаси йўқ. Ҳамзатбейга ўхшаган «мияси айниб қолганлар»ни бунга қандай ишонтирун?

Ишонтириш қийинми ё... ишонмаганларни Петка-Жавхарнинг изидан жўнатиш осонроқми?..

Бу иккинчи навбатда ечиладиган масала эди. Биринчи галда Балабуха билан Козловнинг тақдери ҳал этилиши шарт эди. Ҳамзатбей «славянлар билан нари-бери гап қилиб юрма», дегани билан бу вазифани орқага суриси хатарни яқинлаштиражагини Хонгирей англаб турарди. Шу боис Ҳамзатбей билан хайрлашгач, узининг гапларини чукур мулоҳаза қилиб ўтиrmай, ўзининг асосий мақсадига кўчди:

– Кечаги ўйин қандай бўлди? – деб сўради Моргашдан.

– Кротнинг иши пачава, иштонигача ечиб олиши-ди. Сулико ўлганидан кейин анча гердайиб, сувюқмас бўлиб қолган эди, яна пачаги чикди, – деди Моргаш.

– Сенга индамадими?

– Кечаси олдингизга бормоқчи эди, тўхтатдим.

– Ҳозир қаерда?

– Қаерда бўларди, сизни кутиб аза тутиб ўтириби.

– Чакир.

Кеча ўйин қизигандан қизиганини, Кротнинг каттага тушганини эрталаб эшигтан Хонгирей унга мос вазифани тайин қилиб қўйган эди. Насаби Кротский бўлган Андрей исмли йигитча қиморбозлар оламига кириб келган пайтларда унга лақаб излаб бош қотиришга ҳожат бўлмаганди. Насабидаги ҳарфларни қисқартириб «Крот» деб кўя қолишганди. Крот қиморни жону дили или яхши кўрса-да, каллани ишлатиб эмас, ҳаяжон билан ўйнагани учун омадсизликдан кутулиши қийин бўларди. Ютқизикни тўлашга қурби етмай қолганида Хонгирейнинг паноҳига қочарди. Ўғрилар олами қиморбозларни ёқтирмаслигига қарамай Хонгирей у каби омадсизларни қаноти остига олишдан чўчимасди. Уларнинг қарзини тўларди-ю, ўзларини бирон-бир балога рўпара қилиб, мушкул ишларини бажартириб оларди-да, ўзининг жонини хатардан, номини эса шубҳалардан кутқариб оларди.

Икки йил муқаддам айни шу ҳаммомда Сулико-га рўпара келган Крот бор-йўғини ютқизиш камлик килиб, устига-устак тўрт юз минг рубл қарз бўлиб қолди. Агар йигирмата «Волга»си бўлганида бозорда пуллаб, белгиланган муддатда қарзини тўлай оларди. Крот чакана одамлардан эмасди, ўзига яраша тўдаси, жиноят оламида эътибори ҳам бор эди. Лекин қофқазлик ака-укаларга тенг келолмаслигини биларди. Ўтган йили Суликога эллик минг рубл ютқизганда, бир амаллаб узилганди. Эндиғи қарз!.. Ўшанда Хонгирей қаршисида тиз чўкканди. Бу оламда бир томон тиз чўкса келишмайдиган иш йўқ. Хонгирей унинг илтижосини рад этмади. Крот эса бу қарзни бир-икки қалтис ишдаги иштироки орқали узадиган бўлди.

Бу марҳаматдан кўнгли тўлган Крот Москвада анча эътиборли саналган «Прага» ресторанида синглисинг туғилган кунини нишонлаётган эди. Майшат авжига чиққанида унга икки бақувват эркак ва бир аёл якинлашди. Крот уларни танирди: эркакларнинг бири – оғир вазнли машҳур боксчи Копитов, иккинчиси маҳсус қисмнинг собиқ офицери, каратэ усууларини мукаммал билувчи Потапов эди. Крот уларни танигани учун ҳам нима учун келишганларини тахмин қилди-ю, бироқ, айрим кинофильмларда кўрсатилгандек қочиб кетишга ёки бирон найранг ишлатишга уринмади. Аксинча, дастурхонга лутфан таклиф этди. Крот Копитовни Хонгирейнинг «Турк ҳаммом»ида бир-икки кўрганди. Потапов билан учрашуви эса ўзгачароқ бўлганди. Бир йил аввал «Салтиковка» ресторани ҳожатхонасида нотаниш йигитлар унинг нақ бўғзига тўўпонча тираб ўттиз минг рубл талаб қилишганда Потапов уни кутқариб қолган эди. Потаповнинг бундай қалтис пайтда тўсатдан пайдо бўлиши тасодифмиди ёки атай уюштирилганмиди, Крот аниқлай олмади. Хонгирей юборган бу икки элчининг вазифаси хожаларининг гапини етказиш эмас, балки қарз эвазига буюриладиган вазифанинг

бажарилишига Кротнинг ё розилигини, ё жонини олиб қайтишлари шарт эди. Крот буйруқни ҳеч бир мулоҳазасиз қабул этди. Чунки, гарчи қиморбоз бўлсада, бу вазифа унинг учун янгилик эмас, демак, мураккаб ҳам эмасди. Сартарош соч-соқол олишни одатий иш деб билгани каби ўғрилар йўлини танлаган Крот ҳам бирор тўплаган бойликни шилиб олишни шундай оддий юмуш деб биларди.

Хонгирейдан зарур йўл-йўриқни олгач, ишончли йигитларига бош бўлиб Латвияга караб жўнади. Риганинг машхур ибодатхонаси рўпарасидаги беш қаватли уйда йигирма беш йил роҳатда яшаб, энди янада фароғатлироқ ҳаёт кечириш илинжида ҳорижга кетишга шай турган Самовичнинг уйига бостириб кириб: «Сенга Хонгирей салом деб юборди. Қарзингни вақтида тўламай номардлик қилибсан», – деганида у бечора ақлдан озиб қолаёзди. Самович бу ёруғ дунёда Хонгирей деган одам борлигини ҳатто эшитмаганди. Танимаган, билмаган одамдан қанақасига қарз бўлишини тушуниб етиши учун кўп вақт талаб этилмади. Ҳорижга кетишга тайёрланаётган танишларидан бир нечасининг уйини талончилар босиб, топган-тутганларини кўтариб кетганларини эслади-ю, бошига кулфат тоғи ағдарилганини фаҳмлаб, айёрикка хос ниманики билса, барчасини бирин-сирин ишга sola бошлади. «Хонгирей деганингни танимайман, ҳеч кимдан қарзим йўқ», деган гапига бостириб кирганлар киприк ҳам қоқишимагач, ўзининг камбағаллигидан нолиб йигламсирай бошлади. Кротга бу ҳолат янгилик бўлмагани учун аввалига қўйиб берди.

Самович газли сув сотиб, мол тўплаган эди. Сабротокати туфайли томчи сувлар тилла буюмларга айланганди. Энг арzon кийим-бош кийиб юрувчи бечоррасифат кўринишдаги бу одамни босқинчиларга ким сотиби экан? Ахир унинг четга кетишини жуда оз одам биларди-ку? Айёрик усувларини бир-бир ишга solaётган Самович айни чоғда бу саволга ҳам жавоб

топишга уринарди. Жавоб топган такдирда ҳам чорасиз эканини эса уйламасди.

Хонгирейдан салом олиб келган Крот бу хона-дон ахли кўзига Аэроил бўлиб кўринаётгани билан аслида худди Самович сингари тақдирни қил устида турган бир нотавон эди. Агар буни билганида Самович балки «ўзинг ҳам мендан баттар ночор экансан, кел, яхшилик билан тил топишайлик. Сенга пулимнинг ярмини берайин-у, у муттаҳамлар кўзидан нари бўлиб беркинишингга кўмаклашай», деб таклиф қилган бўлармиди? Мол аччиғида қақшаётган Самович бойлигининг бир қисмини беришга тайёр эди. Лекин кўзлари косасидан чиккудай бўлиб тикилиб турган Крот бу марҳаматга кўна олмасди. Чунки Хонгирей бу хона-дон тўплаган бойликнинг микдорини айтган, бир сўм бўлса-да камроқ олиб бориш Кротни ўғриларнинг умум пулига хиёнат қилишда айблаш учун кифоя қиласди. Яхшики, бу уйларнинг жони йўқ. Бўлгандами, эгаларига қўшилиб титрай бошласа, ён-атрофни қиёмат тўзони босарди. Алҳол, ажал тарозусининг бир палласига мол талаб қилаётганинг, иккинчисига тийинлаб тўплаган тиллаларини кўзи қиймаётган бойлик эгасининг жони кўйилган эди. Шу боис ҳам Кротнинг Москвага қуруқ қўл билан қайтиши ҳечам мумкин эмасди. Самович «Менда ҳеч қандай бойлик йўқ», деб туриб олгач, аввал ўзи, сўнг қўркувдан ранги оқариб кетган қуёви обдон дўппосланди. Бу ҳам иш бермагач, ортиқча ади-бади айтиб ўтиrmай, табобатнинг энг охирги ютуқларига мурожаат қилинди – Самович ақлий жараённи фалаж қилиб қўювчи дори билан эмланди. Оқибатда салкам бир миллион нақд пулга қўшиб яна бир талай олтин буюмлар билан изларига қайтишди.

Вазифани ортиғи билан бажариб кўнгли шодланган Крот бу ўлжадан улуш олишга умидвор эди. Чарм жомадонни стол устига кўйиб, очганда Хонгирейдан «Боплабсан, яхши хизмат қилдинг, ўлжанинг ярми

сеники», деган марҳамат кутди. Лекин Хонгирей арзимаган матоҳга менсимасдан қараб қўйгандай қўз кирини ташлади-ю, аъёнига «олиб қўй», деган маънода имлади. Рига сафарининг тафсилоти билан қизиқиб ҳам кўрмади. Крот жонини хатарга қўйиш эвазига қарзидан қутулишдан ташқари Хонгирей қўлидан бир қадаҳ конъяк ичиш билан кифояланди. Алами ичини куйдирса-да, сир бой бермади. Хонадан чиқишида Хонгирей тўхтатиб, дўстона маслаҳат берди:

– Бундан бу ёғига ақлингни ишлатиб ўйна!

Ўшандан бери ютқизмай ўйнаётган Крот бу муваффакиятини ўз аклу фаросатининг маҳсули деб ўйларди. Хонгирейнинг марҳамати туфайли омад кувончидан роҳатланаётганини эса ўйлаб ҳам кўрмади. Кеча тунда Хонгирейнинг марҳамат булоғи куримади, аксинча, яна бир қармок ташлаб Кротнинг кекирдагидан илиб олди.

Қадим Римнинг Каликула деган султони бўларди. Ўз синглиси билан ўйнашишдан ҳам қайтмагани учун бузуқлик тарихида, синглисининг ҳомиласини ўз қўли билан суғуриб олгани учун ваҳшийлик бобида тенгсиз ҳисобланган бу бадбаҳт билан Хонгирейни тенглаштириш балки инсофдан эмасдир. Ҳарҳолда бузуқликнинг барча турларини татиб кўргани билан синглисига тажовуз қилмаган. Каликуланинг яна бир одати бўлган: ҳар хафтада биттадан қулни озод этган. Озодликка эришувчи қул қўлига қилич олиб хукмдори билан олишишга мажбур бўлган. Оч-наҳор, силласи куриган қулнинг олишуви нима бўларди? Каликула танадан учган бошни кўриб хузурланарди. Хонгирейда ҳам шундай одат бор эди. Ўзига тобелардан бирининг кўнглида норозилик ёки шумлик сезса, унга озодлик инъом этарди. Озодликка чанқоқ аъёни ўз ихтиёри билан яшаш баҳтига эришиш учун Римдаги қул сингари сўнгти олишувга чорланарди. Бу олишувда Хонгирей майдонга тушмасди. Ҳатто майдон ташқарисидан кузатмасди. Озодлик илинжиидаги

одам Хонгирейнинг душманларидан бирига рўпара бўларди. Душманни маҳв қила олса, орадан кўп ўтмай ўзи ҳам ўша қурбонининг изидан жўнарди. Буни билган аъёнлар унинг марҳаматидан чўчиб туришарди.

Бу кеч Хонгирей Кротга ҳам шундай марҳаматни лозим кўрганди. Кечаги ютқизик аламидан дунё кўзига тор бўлиб кўринаётган Крот чорловдан максад айнан шу эканини фахм этмай унга рўпара бўлди.

Саломлашганларидан сўнг чўкишириб ичдилар-у, кечаги ютқизиқдан гап очмадилар.

– Суликога ютқизиб қўйганингда ёнингни олганим учун Илико мени ёмон кўриб қолган. Энди акасининг қотиллари қаторида мени биринчи ўринга қўйяпти шекилли. Сен Кофқазнинг одатини билмайсан: «конга – кон, жонга – жон!» – бошқача хукм йўқ. Майли, Илико билан тил топишиш учун ўзимнинг бошим оғрий қолсин, – Хонгирей «гапларимга тушуняпсанми?» дегандай Кротга тикилиб қолди. Чорловдан асл мақсадни билмаган Моргаш эса бир хожасига, бир омадсиз қиморбозга қараб, гапга аралашмай тураверди. – Ригага бориб келганингдан кейин сенам мендан ранжиган эдинг, тўғрими?

– Йў-ўқ... – Крот бош чайқаб эътирозини бошлаган эди, Хонгирей гапини давом эттиришга йўл кўймади.

– Топиб келганингнинг учдан бирини сенга берсам ҳам бўларди. Лекин яна ютқизишингни кўнглим сезиб, улушкингни эҳтиётдан олиб қолган эдим. Кўнглим алдамаган экан, яна расвойинг чиқибди. Энди ўша ҳақингни берганим билан қарзингни қоплай олмайсан. Мендан ёрдам кутаётган бўлсанг, мен ёнингдаман, ошналаримни хор қилиб қўймайман. Факат... сен ҳам менга ошначилик қиласан. Оёғимнинг тагини қичитаётган бир хас бор, шуни олиб ташлаш керак. Уни Самовичга ўхшаб кийнаб ўтирмайсан. Менинг салом ўқимни пешонасига қадайсану изингга қайтасан.

– Княз, сен иш буюрганингда мен ҳеч қачон йўқ демаганман. Ўл, десанг ўлишим мумкин.

– Сен ўлма, мен учун тирик юравер. Ҳаётнинг лазатли онларидан маст бўлиб яша. Агар Азроилга ўлик етишмаётган бўлса, оёғимиз остида ивирсиб юрган падарлаънатлар тикилиб ётибди. Битта-битта териб бераверамиз. Унга қадар сен Моргаш билан бир жойга бориб келасан. Қаергалигини айтайми?

Хонгирей худди синаётгандай Кротга синчковлик билан тикилди. Унинг ўткир қарашига кўнишиб қолган Крот бу сафар сабабини ўзи ҳам билмаган ҳолда бир оз ўнғайсизланди. «Хоҳласанг айт, истамасанг гапирма», дегандай нигоҳини ерга қадади. Хонгирей эса саволига жавоб кутди. Сўнг:

– Қизиқиб ҳам кўрмайсанми? – деди нигоҳини узмай.

– Мен сен отган ўқман. Ўқ «қаерга бориб санчилай?» деб сўрамайди. Ўқ учун тепки босилиши кифоя.

Крот «жавобим маъкулми?» дегандай Хонгирейга қараб, унинг юзини мамнунлик ели силаб ўттанини кўрди.

– Агар қиморга аралашиб аҳмоқлик килиб юрганингда сендан зўр ўғри чиқсан бўларди. Бу каллага ўғриларнинг тожи ярашади, тўғрими, Моргаш?

Кротга бу шарафнинг лозим кўрилиши Моргашнинг ғашини келтирган бўлса-да, хожасининг кўнгли учун жилмайиб қўйди.

– Томскда ҳеч қимор ўйнаганмисан? – деб сўради Хонгирей. Крот бу саволни эшитиб, юзига муздек сув томчилари беҳос урилгандай сесканди. Аммо сир бой бермаслик учун кўзларини олиб қочмади. Худди саволга тушунмагандай қараб тураверди. Хонгирей гўё унинг оғир мушкулини енгил қилмоқчидай саволни ўзгартирди: – Ютганмисан ё ютқизганмисан?

– Қиморда ҳар қанакаси бўлади. Томск менга ёқмайди.

– Дишимиз бир хил экан, менга ҳам ёқмайди у лаънати шаҳар. Шаҳар ёқмаса ҳам танишларинг бордир?

– Бор: Яшқа-Валет, Заргар...

— Менга қиморбозларинг керакмас. Ўғриларини танимайсанми?

Эндиғи савол совук сув эмас, гүё қайноқ ёғ томчиси бўлиб томиб тепакал бошини кўйдирди: «Нега гапни айлантиряпти? Арқонни узун ташлаб, кейин бўғиб ташламоқчими? Сездими? Ким сотди?»

Хонгирей уни мавхум ўйин билан қийнамоқда эди. Крот унинг кўлида қандай карта борлигини билмай гарансиди. Хонгирей ютукли карталари билан ҳужум қиляптими ё куруқ пўписами – буни билиш кийин. Лекин ўзининг кўлидаги карталар билан факат ўлимни ютиши мумкин, буниси – аниқ! Уч кун олдин Яшка-валет билан «Арагви» ресторанида кўришиб, Балабуханинг таклифини қабул қилганди. Балабуханинг вазифасини амалга оширишга уриниши шарт эмас, ўлим топиши учун таклифга кўнганининг ўзи кифоя... Яшка-валет ишончли одам, унда ким хоинлик қилди? Крот узоқ ўйлашга ҳақли эмасди. Хонгирейнинг кўлидаги карталар ютукли эмас, шунчаки ваҳима, деган тўхтамга келиб, «ўйин»ни дадил давом эттирди:

— Балабухани танийман.

— Балабухани? Танийсанми, номини эшитганмисан ё кўрганмисан, ё ачомлашганмисан?

— Бир марта кўрганман. Томсклик ғирромлар қилиқ қилганда катта жанжал чикувди. Ўшанда Балабуха келиб тинчиттан.

— Демак, адолат қилганми?

— Шунаقا бўлган.

— Сенга адолат қилибди, демак сен ундан хурсандсан? Пулингни ундириб берганми?

— Бу ўтиб кетган воқеа.

— Шунаقا дегин... Сенга адолат қилган одам менга номардлик қилса ажрим қандай бўлиши керак?

— Мен тушундим, княз, оёқ остини қичитаётган хас йўқотилиши шарт.

— Қачон йўқотилади?

— Аслида кеча йўқотилиши керак эди. Лаллайиб, озгина кечикибмиз.

— Озгина эмас, анчагина кечикдинг. Шунинг учун бугуноқ жунайсан адолатли одамнинг ҳузурига!

Хонгирей шундай деб амр эттач, Моргашга қараб «қўй» деб ишора қилди. Крот конъякни ичиб «тўймадим» дегандай аввал хожасига, сўнг Моргашга қаради. Хонгирей кулимсираб кўйгач, шишани ўз кўлига олиб катта қадаҳга тўлдириб куйди-да, «ишимиз ўнгидан келсин», деб симириди.

Ҳаётда тасодифлар кўп учрайди. Бироқ Крот ҳозиргина рўпара келган тасодиф тарихда сира юз бермаган бўлса керак. Кечагина Балабуха Хонгирейнинг ўлимини истаганди. Бугун Хонгирей унинг пешонасига ўқ қадамоқчи. Бу ўқни Крот ўз кўли билан қадаши керак! Балабуханинг топшириғи осонроқ – Крот тўппонча отмайди. Хонгирей ҳаммомдан чиқаётганида олдинда келаётган соқчисини чалғитса кифоя. Қолганини рўпарадаги мерганнинг ўзи қойиллатади. Хонгирейнинг топшириғини эртага бажариши керак. Балабуха эса бу кечга мўлжаллаган...

Кротнинг бахтига Хонгирей ҳаммомда узок қолмади. Крот кузатиш мақсадида унга эргашиб кўчага қадар чиқди. Чиқди-ю, рўпарадаги такси машинасигининг кўк чироғига кўзи тушди. Бу мерганнинг шай турганига ишора. Крот шошиб қолди. Ўзини мастиликка солиб чайқалди-ю, қоқилиб кетгандай олдинда бораётган соқчига урилди. Соқчи қанчалик зийрак бўлмасин, бу кутилмаган зарба туфайли оёқда тура олмади.

Ўша заҳоти ўқ узилди. Пешонасидан ўқ еган Хонгирей нима бўлганини билмай ҳам қолди.

Эртасига унинг ҳожатхонада отилгани ҳақидаги хабар газетада эълон килинди...

Бўлиб ўтган воқеанинг асл тафсилоти кўпчилик қатори Асадбекка ҳам сирлилитигча қолди. Балабуха ҳам, Козлов ҳам бу қасоснинг тафсилотини унга маълум қилишни лозим кўрмадилар.

Моргаш ҳам нима бўлганини аниқ билмасди. Лекин Кротнинг бекорга қоқилмаганига гумони бор эди. Тож гулини йиғиш арафасида уни ўликхонага чақиртириди:

— Нима учун қоқилиб кетганингни суриштирмайман. Энди менинг ўйинимни ҳалол ўйнаб бермасанг, турмайдиган бўлиб қоқиласан. Хонгирейнинг топшириғи ўз кучида қолади. Факат буни менсиз бажарасан. Режани ҳам бир оз ўзгартирамиз. Аввал Козлов, кейин Балабуха... Князнинг битта тилла бошига икки аҳмоқ калла узилмаса, тарих бизни кечирмайди! — деган марҳамат билан унинг ҳаётини бир оз узайтириб берди. Крот вазифасини англаб, орқасига ўгирилганида Моргаш ўзича «аслида уч аҳмоқ калла», деб минғирлаб қўйди.

III б о б

1

«Истеъфодаги майор Солиевни зиёрат килиб келмаймизми?» деган гапни эшишиб, Зоҳиднинг кўнгли бузилди. Бу аччиқ ҳақиқат эсланмагани дуруст эди. Тўғри, ҳеч ким фоний дунёга устун бўлолмаган. Туғилган одам борки, аввал ерни таталаб эмаклайди, кейин бора-бора одамларнинг бетларини таталайтаталай, мансаб пиллапояларидан юқорилайди. Пиллапоянинг энг юқорисига чиққач, бўшлиқни кўради-ю, алам оташида ёниб, ўтган кунларини лаънатлади ва қайдандир пайдо бўлган афсуснинг темир тирноқлари ўз қалбини тимдалай бошлайди. Кейин эса не-не ҳунарлари эвазига эгаллаган чўққисидан пастга қараб думалайверади. Юқорига чиқиб кетаётганида «бирорвлар менга орқа томонимдан даф қилмасин», деб эҳтиёт чораси сифатида экиб кетган тиконлари энди баданига санчилиб, жонини сугуриб олаверади.

Гарчи Мақсад Солиев бу тоифа одамлардан бўлмаса-да, қачондир истеъфога чикиши, умрини

бағишилган ишидан кетиши аниқ эди. Фақат унинг бу ҳолатда, «хизматта яроқсизлиги учун», «мажрух» тамғаси билан хайрлашуви Зохидга оғир ботган эди. У Ҳамдам билан учрашган онда «истеъфо ҳакида иккинчи сўз очманг», деб танбех беришни кўнглига туғиб, йўлга чиқди. Лекин Ҳамдамнинг биринчи гапиёқ хаёлини чалғитиб юборди:

– Устознинг олдига белни бақувват қилиб борадиган бўлдик, – деди у чўнтагини силаб қўйиб.

– Маошларини олволдингизми? – деди Анвар содалик билан.

– Ҳой прокурор, совет милициясининг маоши чўнтакни шундай қаппайтириши мумкинми?

– Агар ҳаммаси бир рублликдан бўлса қаппайтирап?

– Зеҳнингга қойилман. Лекин чўнтағимдагиларнинг энг майдаси «қизил сўлкавой». Қолгани йигирма бешталиқ. Элликталиқ, юзталиқ ҳам бор. ОБХССдагиларда майда пул йўқ экан, тантлил қилиб юборишиди.

– Тушунмадим?

– Шу тушуниш қийин масалами? Устозга белгиланган пенсия пулинини эшишиб, капалагим учиб кетди. Ёрдам қилмасак бўлмайди, деб ҳамкаслардан тўпладим.

– Пенсиялари... қанча экан?

– Мен айтмай, сен эшишиб қуйма. Совет милициясига бизнинг хизматимиз ҳалол, ўзимиз... – Ҳамдам шундай деб алам билан кўл силтади. – Агар майор Солиев ушлаб қаматган ўғрилар унинг оладиган пенсиясини эшитишса, орқаларини очиб кулишади.

– Фақат ўғрилар эмас, бошқалар ҳам кулиши мумкин.

– Тўғри, лекин ўғрининг кулиши бошқача бўлади. Мен уларнинг феълини яхши биламан. Улар масхара қилиб кулишга куладилар-у, лекин майорни бу ҳолда ташлаб қўймайдилар. Пенсиясига ўн ҳисса қилиб нафақа тўлаб турадилар.

– «Обшак»данми? Шу ерда ошириб юбордингиз.

Агар қариганимизда бизларга ҳомийлик қилиб сийлашса, ҳозир «ахлат» деб ҳақорат қилишмас эди, бу – бир. Иккинчидан ва энг мухими – Мақсуд aka бундай садақанинг бир тийинини ҳам олмайдилар.

– Сен дўстларинг билан ҳам прокурорчасига гаплашадиган бўлиб қоляпсан, бу бир. Иккинчидан, сенга мисол тариқасида ҳам бир гап айтиш амри маҳол, учинчидан, агар улар шу ишни қилсалар билки, мақсад меҳрибонлик эмас, балки ҳақоратлаш, «бу кунингдан ўл!» деган маънода тупроқ билан тенг қилиш. Тўртинчидан ва энг мухими, агар гаров ўйнасанг, мен ўзим қаматган ўғрилар билан гаплашиб, ҳазилни чинга айлантириб беришим ҳам мумкин.

– Буниси қўлингиздан келади, – деди Зоҳид кулимсираб.

– Гап кўлдан келиш ёки келмаслигида эмас, ўғри зотини ҳамма ёмон кўради.

– Тўғрироғи – ҳамма улардан кўрқади, – деди Зоҳид аниқлик киритиб.

– Айниқса, прокурорлар, – деб янада аниқлик киритди Ҳамдам.

У ҳазил оҳангига гапирган бўлса ҳам, беш кун аввал шаҳар прокуратураси ҳовлисидан икки «Волга»нинг ўғирлаб чиқиб кетилганига ишора қилаётганини англаган Зоҳид эътиroz билди. Мўлжални аниқ нишонга олганидан қувонган Ҳамдам эса бу жимликтан фойдаланиб давом этди:

– Ҳаммани кўркувда ушлаб турувчи... – Ҳамдам кейинги сўзларга ургу бериб, ҳамроҳининг кўзларига тикилди, – ўғриларнинг тўғриларга ўrnak бўладиган фазилатлари ҳам бор. Масалан, улар дўстларига хиёнат қилмайдилар.

– Шерикларига, – деди Зоҳид унинг гапини бўлиб.

– Хўп, сен айтганча бўла қолсин: шерикларига хиёнат қилмайдилар.

– Чунки хиёнат ўлим билан жазоланади. Демак, уларнинг ўзаро садоқати онгли ва холис эмас, ўлим

кўркуви остида яшагани учун инсоний фазилат саналмайди.

– Гапингни мантиқан тұғри, деб ҳисобласанг, унда жавоб бер: ўлим кўркуви бўлмагани учун тўғрилар бир-бирларига хиёнат қиласверадиларми ёки бошқа сабаб ҳам борми?

– Сабаблар кўп, буни ўзингиз ҳам яхши биласиз.

– Бир мен эмас, ҳамма билади. Барча бало ҳам айнан шунда. Тўғрилар ҳаётида шахсий манфат биринчи ўринда туради. Ўғрилар, сен айтгандай, кўркув остида бўлса ҳам ўз давралари манфаатини баланд қўядилар. Шунинг учун ҳам уларга қарши курашишимиз қийин кечади. Сен ўғриларга кўп рўпара бўлмагансан, шунинг учун уларнинг феълини билмайсан. Тасодифий қотилликларни очиш бошқа, ҳар бир харакати ўйлаб амалга оширилган ўғирликни фош қилиш бошқа. Тасодифан қотиллик қилган одам иккинчи бу жиноятга қўл урмайди. Лекин ўғри эканидан фахрланувчи абллаҳни қийма-қийма қилиб ташлаб, сўнг қайтадан тикласанг, барибир ўша йўлидан қайтмайди. Нега шунаقا? Уларнинг мияси чатоқми ё юрагида бир иблис борми?

– Чиройли савол. Буни ҳозир Мақсуд акамдан сўраймиз.

– Сўрасанг сўрайвер, мен нима дейишларини биламан: жавоб кейинги саволнинг ичиди – уларнинг юрагида бир иблис бор!

2

Баҳорнинг тотли нафаси билан ёзниңг беҳаловат ҳарорати табиатга эгалик қилиш учун олишаётган паллада хаста одамлар оромларини йўқотадилар. «Қассоб»дан эсадалик бўлиб қолган хасталик туфайли уйга ипсиз боғланган Солиев шогирдларини кўриб кувониб кетди. Ҳамиша кўчада юрган одамнинг уйда ўтиравериши ҳам ўзига яраша азобдир. Кўз кўча

Эшигига қадалган, авваллари ёқтирган одаминг кириб келса ҳам юрагингда бир чирок ёқилгандай бўлаверади. Собиқ майор тез-тез хабар ололмаётган шогирдларидан гина қилмайди, уларнинг ҳар бир дақиқалари ҳисобли эканини билади. Ўзи ҳам шундай эди. Баъзан яқин қариндошларини йўқлашни галга соларди. Сўнг беоқибатлиги учун улардан уяларди. Мана энди эрталабдан кечгача бекор, қани эди кўчага чикиб, қариндошлариникига бора олса! Доктор «секин-секин юраверинг», деб ижозат берган. Аммо аҳли аёлининг ҳукми қатъйирок: яна бир-икки ойсиз кўчага чикишни ўйлаши ҳам мумкинмас. Солиев «меҳр кўзда», «одам тафтини одам олади», деган ҳикматларнинг қадрини боши ёстикка етгач англади. Тағин ҳам қариндошлари, биродарлари тирнок остидан кир кидиришмайди, «саломга яраша алик бўлади» ёки «мен касал ётганимда йўқламаган», деб бемехрлик килишмайди. Касалхонада ҳушига келганидан бери барчалари атрофида парвона.

Зоҳид билан Ҳамдам учрашиб, устозникига отланишганда гала-гала булутлар осмон юзини тўла қоплаш қасдида изғишарди. Қора булут оқ ва қўнғир галалар билан бирлашишни истамай бағрини яшин билан чоклаб сузарди. Ана шу гала Солиев яшайдиган маҳаллани майда дўл доналари билан савалаб ўтибди. Ҳамдам билан Зоҳид олдинма-кейин ҳовлига киришганда муз парчалари ҳали тўла эриб битмаган, пайҳон бўлган атиргуллар маъюс бош эгиб қолган эди.

Айвонда ўтирган Мақсад Солиев табиатнинг бузулмидан озор чеккан гулларга ачиниб қаради.

Мехмонлар билан кўришгач, ачинишини баён қилди:

— Осмондан ёғилган нарса неъмат ҳисобланади-ю лекин табиат ҳам баъзан адолатсизлик қилиб кўяди, — деди гулларни кўрсатиб.

— Бу адолатсизлик эмас, бу яшаш учун кураш! — деди Ҳамдам.

— Эҳтимол шундайдир... — Солиевнинг баҳслашишга хуши йўқ эди, шу боис Ҳамдамнинг фикрига қарши чиқмади. Устознинг кайфиятини сезган Ҳамдам сұхбат мавзуини бурди:

— Зерикмай ўтирибсизми, ишқилиб? — деди меҳрибонлик билан.

— Беминнат сұхбатдошим бор, зерикишга вақт йўқ, — деди Солиев айвон тўрида турган телевизорга ишора қилиб.

— Сұхбатдошингиз соқовми? — деди Ҳамдам кулиб.

— Бу сұхбатдошнинг яхши томони шундаки, мен эшитишни истаган пайтда гапиради, хоҳламасам — соқовга айланади.

— Ҳозир соқовликка ҳукм қилинганми? Бечоранинг жинояти нимадан иборат экан?

— Жиноятими? — Солиев кулимсиради. — Тилининг бесуяклиги-да.

Телевизор Москвадаги депутатларнинг мажлисини кўрсатарди. Овозиз тасвирдаги ҳаракатларни кузатган киши юзида беихтиёр кулги пайдо бўларди.

— Томошанинг зўрини топибсиз. Чарли Чаплин ҳам бунақа кино ишләймаган бўларди, — деди Ҳамдам.

— Бу томошага «СССР Олий Советидаги масхара-бозликлар», деб ном қўйганман.

— Сал ошириб юбормаяпсизларми? — деди Зоҳид бу кинояларга қўшилмай.

— Прокуроримизга ҳазил ёқмайди. Бу укахонимиз мутойибалар улашиб бўлингандан кейин туғилгандар, — деди Ҳамдам кинояларини давом эттириб. Зоҳид унга жавобан кулимсираб қўйди-да:

— Гап ҳазилда эмас, бу мажлисда жиддий гаплар ҳам айтиляпти. Янги ҳаво оқимини ҳис қилиш мумкин, — деди жиддий тарзда.

— Бу ёғи сиёсалашшиб кетди, — деди Ҳамдам унга норози қиёфада қараб. — Энди «демократияга етишдик», дерсан?

— Бу демократия эмасми?

Савол Ҳамдамнинг гапига эътиroz сифатида бे-рилган бўлса-да, жавоб ундан кутилмай, икковлари ҳам устозларига қараши.

— Мана шу мажлисда мингта депутат ўтирган бўлса, минг хил демократия, минг хил ҳакиқат бор. Ҳар бири ўз демократияси билан сафсата сотади. Ўзининг ҳакиқатини ҳимоя қиласди. Битта демократия, битта ҳакиқат бор, деган фикр хаёлларига келмайди. Сен тўғри айтдинг, — шундай деб Зоҳидга қаради, — жиддий гаплар ҳам айтиляпти. Лекин «куруқ гап қулоққа ёқмас», деган мақол бор. Бизниклардан биттаси чиқиб, куйиб-пишиб гапириб Орол денгизининг қуриб бораётганини билдириди. Эшиттан бўлсанг, унинг чиқиши сенга ёқкан, албатта. Катта минбардан ҳакиқатни айтиш балки сен учун қаҳрамонлик бўлиб туюлгандир. Лекин бу қаҳрамон аканг айтган гаплар ҳаммага маълум-ку? Йигирма-үттиз йилдан бери тинмай гапирилади-ку? Унинг Сибир дарёлари сувини Оролга буриш ҳақидаги эски таклифини бир рус ёзувчиси чиқиб рад этди. «Шимолий муз океанига салбий таъсир қиласди», деди. Қозоқ чиқиб, «Сибир дарёларининг суви Урта Осиё ерларидағи тупроқ таркибини бузади», деди. Бу ҳам зўр гапларми? Аввало бу сафсатабозлар сиёсий мажлисда илмий муаммони ҳал қилишмоқчи. Ҳолбуки, учовида ҳам илм йўқ. Мен бу масалаларни ўн беш йил олдин матбуотда ўқиган эдим. Сени маҳлиё қилаётган бу қаҳрамонларингнинг битта мақсади бор: минбарга чиқиб ўзини кўз-кўз қилиш. «Азага келган хотин ўз дардини айтиб йиғлайди», деган мақолни биларсан-а? Буларинг ўшанақа хотинга ўхшашади. Лекин мен бу бечораларни қораламайман. Буларда сиёсий кураш, сиёсий баҳс тажрибаси йўқ. Менинг назаримда кимдир бирор арининг уясини чўп билан кавлаб-кавлаб, ўртага микрофон кўйиб кўйганга ўхшайди.

— «Азага келган хотинлар» ҳам бор, лекин Болтиқбўйидан келганлар унақа эмас-ку?

— Зийраклигингга қойилман. Менам асосан ўшаларни эши таман. Уларнинг аниқ режалари, аниқ мақсадлари бор. Шу кетишда мақсадларига етадилар.

— Мақсадлари... ажралиб чиқиши? – деди Ҳамдам иккиланган оҳангда.

— Үзгача бўлиши мумкин эмас.

— Уларни бўш кўйишдан балки бошқа мақсадлари бордир. Осоинликча эркинликка қўйиб юбориши мас?

— Ит куруқ суюкни ҳам қизғаниб, ириллади. Тўкин дастурхоннинг бир улушкини ажратиб олинишига ким индамай қараб турар экан? Менингча, уларнинг дадил гапларни айтишга йўл қўйиб берилиши бежиз эмас. Москва уларга ким эргашишини билиб олмоқчи.

— Шароит туғилса, ҳамма эргашади, бунинг нима-си қоронғу?

— Гап ким биринчи эргашади ва қайси йўл билан боради? Қорабоғ билан Бокудаги қонли воқеалар, ўзимизнинг Фаргонадаги фожиалар нимага уюштирилди? Энди навбат кимга?

Солиев саволга жавоб кутгандай сукут саклади. Сиёсат бобидаги бундай дангал гапларни ҳар ким, ҳар ерда айтавермас эди. Айниқса, улар хизмат қиласиган соҳада бу ҳақиқатга дуч келинганда кўз чирт юмилиб, четлаб ўтишга ҳаракат қилинарди. Солиев билан бирга бўлинган йилларда сухбат мавзуи асосан жиноят бобида бўлиб, сиёсат оламига камдан-кам ҳолларда назар солинарди. Бир марта чой устида ҳалқаро ахволдан гап очилганда Солиев буларга «бошларингни оғритмаларинг, бизнинг ечадиган масаламиз жиноят оламида, бошқа оламга мўраламай, жим юраверларинг», деб танбеҳ берганди.

Бир дақиқалик сукутни Ҳамдам бузди:

— Телевизор сизга беминнат сухбатдош эмас, сиёсий устоз бўлиб қолибди-ку? – деди кулимсираб.

— «Устоз» дейсанми? Ўргулдим бунақа «устоз»дан. Ҳамма нарсани айқаш-уйқаш қилиб ташлади. Булардан кула-кула, ўзимиз ҳам ўшаларга ўхшаб қоляпмиз. Қўй, бу гапларни, ўзимизнинг сиёсатдан гапир.

Сұхбат мавзуининг жиддийлашганини сезган Солиев шундай деб, жилмайди.

– Бу сиёсатчилар сафсата сотаёттган дамларда жиноятчилар ўз сиёсатларини қойилмақом қилиб бажарабирилдилар, – деди Ҳамдам истекъзо оҳангига. – Бугунги асосий масала: бир ашулачи ўлдирилган, унинг қадрдон дўсти эса изсиз йўқолган. Бир занжир ҳалқаси бўлмаса, буни оддий жиноятлар сирасига киритиш мумкин эди.

– Қандай ҳалқа экан?

– Иккала ашулачи ҳам Элчиннинг шогирди экан. Элчин эса Асадбекнинг куёви.

– Бу занжирни ўзинг ўйлаб топдингми? Билишимча, Элчин ҳали касалдан ўнгланмаган.

– Ҳа, ўнгланмаган. Қотилликка алоқаси йўқлиги аниқ. Лекин гумоннинг бир учи барибир Асадбек томонга бошлайди.

– Бошламаслиги ҳам мумкин.

– Бошлаб бўлган. Асадбекни шу масалада шаҳар прокуратурасига чакиришган. Кейин узр сўраб, кузатиб қўйишган.

– Қизиқ... – Солиев афсуслангандай бош чайқади. – Шошилиб-шошилиб, оқибатда қовун тушириб қўйишади-да. Тепадагилар билишадими буни?

Зоҳид ўзига қарата айтилган саволга «хабарим йўқ», деб қўя қолди. Ҳозир тилга олинган жиноятга доир ишни олиб бориш икки соатдан сўнг ўз зиммасига юкланишини билганида жавобни бундай қисқа қилмаган, йўл-йўриқ суриштирган бўлармиди...

Яна бир неча дақиқа давом этган сұхбатдан сўнг устознииг толиқа бошлагани сезилгач, ишлари кўплигини баҳона қилиб, хайрлашдилар. Улар кетгандан сўнг Солиевнинг хотини қоғозхалтани бўштаётиб, бир ўрам пулга кўзи тушиб, аввалига ажабланди. Буни эрига айтмасликка қарор қилиб, «кейин келишганда қайтариб берарман», деган ўй билан жавонга яшириб кўйди.

Асадбек янги қүшқанотлари билан янада баланд-рок учишга ҳозирлик кўра бошлади. Аввалги аҳдидан воз кечиб, ўзи жорий этган салтанатидаги қонун-қоидаларни бирин-сирин қайта ўнглади. Бунинг натижаси ўлароқ, болохонада йигитлар яна пайдо бўлди, Асадбекнинг атрофидаги зирҳли қўрғон ҳам тикланди. Гарчи жудолик азоби озаймаганини юзидаги ажинлар ошкор этиб турса-да, у ўзини бошқалар олдида тетик тутишга ҳаракат қиласади.

Абдураҳмон табибникида даволанаётган кезлари унинг қалби бир оз юмшагандай бўлиб эди. Кейин яна аслига қайтди. Чунки у тавба йўлини танламаган, балки бу хайрли амал томон шунчаки бир назар ташлаб кўйган эди. Дунёга муккасидан кетган, унинг алдовларига ишониб, шаҳватлар оғушида қолган кишининг қалби, шубҳасиз, тавба амалидан ғофил, бу неъматдан бебаҳрадир. Бундай одам ўлим жари ёқасида турган бўлишига қарамай, ўлимни эсга олишни ёқтирмайди. Эслаган тақдирда ҳам дунёси қолиб кетаётганига афсус қилиб, бунга ўлим сабабчи бўляпти, деган бемаъни хаёлга боради. Ўлимни бу тарзда эслаш яқинлик ҳосил бўлишига эмас, балки Аллоҳдан узоклашишига сабаб бўлади. Ўғлининг ўлими уни баттар узоклаштириди. «Ким Аллоҳ билан учрашишни хоҳламаса, Аллоҳ ҳам у билан учрашишни хоҳламайди», шарафли ҳадиснинг ҳаётдаги исботи Асадбек ҳаётида ўз аксини топди. Асадбек ғофил эди, жоҳил эди. У ҳаётда ўз хоҳиши бўйича яшашни истарди. Яратган ва тарбиячи бўлган Аллоҳ буйруқларига итоат этиши шартлигини эшитган бўлса-да, бу ҳикматдан кўз юмиб юраверарди. У оламлар Роббисининг «Эй Одам фарзанди, ўлим келмасдан бурун ўзинг учун яхши амаллар қилиб ол. «Бу дунёда қилган гуноҳларим охиратда жазосиз қолади»,

деб кибрланма. Чунки яқин кунда Аллоҳ ҳузурига са-
фар килурсан ва қилган гунохларингдан сўрқ берур-
сан. Ҳаётлик даврингдаги орзу-ҳаваслар сени савоб
ишлардан қолдирмасин. Агар бу ўтитларни рад этсанг,
пушаймонлар фойда бермайдиган кунда – қиёматда
афсус қиласан», деган хитобидан бехабар эди. Ҳа-
бардор бўлган тақдирда бу огоҳлантиришни қулогига
олармиди? Ғофил кўзлари очилармиди? Дадил равиши-
да «Ҳа!» дейиш мушкул. Қалбини шайтонга топшири-
ган кимсани ғафлат уйқусидан уйғотиш ғоят қийин...

Асадбек ўз ташвишлари билан банд, Манзура эса
эрининг салтанатига бутунлай зид бўлган янги олам-
га кириб борарди. Ўғлиниң хотирасига бағишлиланган
маъракада мавлуд ўқиган Отин ойи унга ёқиб қолган
эди. Орадан кунлар ўтгани сайин уни кўргиси келавер-
ди, юпанчни айнан шу аёл берадигандай бўлаверди.
Сабр қалъаси, тоқат қасрининг калитини шу аёл инъ-
ом этадигандай қалби ўша томон интилаверди. Келин-
лари билан Абдусамати хорижга қайтиб кетишгач, у
олам аро ёлғиз қолгандай азобланаверди.

Ўлим – қисмати, қабр – қароргоҳи, тупрок – тў-
шаги, Мункар ва Накир – сухбатдоши, курт-ку-
мурсқалар – улфати, ер ости – хос хонаси, маҳшар-
гоҳ – ваъдалашган жойи, жаннат ё дўзах сўнгти ман-
зили бўлган ҳар бир кишининг фикру-зикри ўлим,
тадбиру тадориги ҳам ўлим учун бўлиши табиий.
Манзура ҳам бошқалар каби ўлимдан кўрқади. Лекин
у ўзининг эмас, эри ва фарзандларининг ўлимидан
кўрқади. Эри тузалмас касалга йўлиққанини билгани-
да тунлари билан кўз ёшлари тўкиб, Худодан шифо
тилади. Ўғли ётиб қолганида қон ёшлари тўкиб илти-
жо қилди. Қанча муножот қилмасин, ўлим уйларига
кириб келди. Аммо Манзура эрига ўхшаб Аллоҳ билан
ҳақ талашмади. Асадбек шифо топганида шукр қилди.
Ўғлидан жудо бўлганида эса ўзига сабр, фарзанди-
га жаннатдан жой сўради. Ўзига маълум бўлмаган

қандайдир гуноҳлар учун ҳақ тўланганини ҳис этиб, ўғлиниң руҳи олдида тавбалар қилди.

Манзурага бу ҳовлидаги барча нарса ҳам бегона, ҳам шумшук кўринадиган бўлиб қолди. Ҳатто бу уйни сотиб, бошқа жойга кўчишини эрига таклиф қилмоқчи бўлди. Лекин ўғлиниң сўнгги нафаси чиқсан уйдан узоқлашишини ўйлаганда жон таслим килаёгандай туюлди. Мутелик билан умр кечирган аёл энди ёлғиз яшай олмаслигига ишонч ҳосил қилди. Отин ойи билан учрашиш ниятида уйдан чиқди. Мавлуд ўқитганда уни қариндошлари таклиф килиб келишганди. Сўрабсуриштириб, шаҳарнинг кунботар томонидаги янги маҳаллада жойлашган уйни топиб борди. Эшнк кия очик эди. Кўнғироқ тугмаси йўклиги учун ичкарига иккиланганича қадам босиб «Овсин!» деб чақирди. Овози паст чиққани учун айвонда меҳмони билан сұхбатлашиб ўтирган Отин ойи чақирикни эшиitmай, сұхбатини давом эттириди:

– Не-не баҳодирлар ер тишлади, «дунёга устунман!» деган сонсиз ботирларга, кисрою қайсаларга ваъда ҳақ бўлди! Аллоҳ уларни тубсиз чоҳга қулатди. Бас, улар қасрлардан қабрларга, нур балқсан бешиклардан қоп-коронғу гўрларга кўчдилар. Аёллар ва болаларни эркалаш лаззатидан маҳрум бўлиб, ҳашарот ва очофат куртларга ем бўлдилар. Таом ва шароб неъматидан кесилиб, қаро тупроққа қорилдилар. Улфатларнинг ҳузурбаҳш базмидан узилиб, даҳшатли ёлғизлик, сўнгсиз безовталик ичра қолдилар. Устоз Фаззолий бу китобда шу маъноларни очиб бериб, гўё бизга шундай хитоб киладилар: айтинг-чи, дунёда ўлимни сақлайдиган бирор қалъя ёки куч борми?! Бор бўлса, у билан ҳимояланинг, қани, ўзингизни ўлимдан тўсиб кўринг-чи? Ҳа, ҳеч ким тўса олмайди. Ҳасан Басрий ҳазратлари шундай деганлар: «Сабрли бўлинг, белни маҳкам боғланг. Кунлар ўткинчи. Сиз гўё карвонсиз. Манзилга оз қолди. «Тўхта», дейилса, бас, чақирикқа жавоб берасиз. Кўчяпсиз, манзилга энг яхши нарсалар билан боринг».

Отин ойи шундай дегач, жим қолди. Бундаи фойдаланган сұхбатдош аёл гап бошлади:

– Китобдан шу маъноларни тушуниб, ақлим лол қолди.

– Тушуниб ўқиганингиз, сўнг уққанингиз яхши. Тушунгандарингизга амал қилсангиз янада аъло! Аллоҳни фақат илм билан таниш мумкин. Ҳозир илм олишга имкон берилди. Бу имкониятдан фойдаланилмаса, ғофиллик ботқоғига ботилади. Тўртта хотин йиғилиб миш-мишу ғийбат гуноҳига беланмай, илм саодатидан баҳраманд бўлса, охират саройини қурган бўлади. Китобни ўқиб яна нималардан ҳайратландингиз, тушунгандарингизни айтинг-чи?

– Абу Мусо Ашъорий ўлимларига яқин қолган кунларда ибодатга қаттиқ берилган эканлар. Шунда у кишига «Сал дам олиб, нафсингизга енгиллик бермайсизми?» дейишибди. Шунда у зот бош чайқаб шундай жавоб қайтарибдилар: «Чопаётган отлар маррага етай деб қолганларида бутун жон-жаҳдлари билан ташланиб чопмайдими?! Менинг ажалимга бундан ҳам оз вақт қолди». Кўп ўтмай жон берибдилар. Менга яна халифалардан бирининг минбардаги гапи қаттиқ таъсир қилди, ҳатто ёдлаб олдим.

– Қани, айтинг-чи?

– «Эй Аллоҳнинг бандалари! – деб хитоб қилган экан ўша халифа. – Кувватингиз борича Аллоҳдан кўркинглар. Билинг! Дунё фонийдир, ўлим бошингиз узра соя соляпти, сафар тадоригини кўринг. Қисқагина муддат учун яралган бу дунё лахза сайин кемтилиб, соат сайин емириляпти. Кун ва тун аталмиш ғойиб шарпа уни еб битиряпти. Бу майдонга кирган инсон ё зафар кучади ё мағлуб бўлади. Демак, инсон доимо сафарбар туриши шарт. Нафсига насиҳат этган, тавба қилиб, шаҳватдан ғолиб бўлган киши Парвардигорига ёруғ юз билан йўлиқади. Ажал қачон йўлиқишини инсон билмайди. Орзу-ҳаваслар инсонни алдайди. Шайтон унинг ёнида туриб, тавбани кечикиришга,

гуноҳ килишга ундаиди. Гуноҳ амалларни чиройли кўрсатиб, ўлимдан ғофил қолдирмоқ қасдида бўлади. Огоҳ бўлинг! Сизлар билан жаннат ё дўзахнинг орасида фақат ўлим бордир. Воҳ! Ўлим келса-ю, сиз бундан ғофил бўлсангиз, ўтган умрингиз ўзингизга қарши хужжат бўлса, кунлар сизни бадбахтлик сари судраса, бу қандай ҳасрат!»

Суҳбатдош аёлнинг овози титради.

— Аллоҳ сизни ва бизни Ўзининг неъматига шукр қилгувчи, тоатида бардавом этсин, — деди Отин ойи, сўнг бир неча нафас тин олгач қўшиб қўйди: — Ўлимдан сўнгги ҳасратдан асрасин. Шу ёд олганинг сўнгги нафасда айтган гапларини ҳам ўрганинг: «Шошилинг, нажотга шошинг, — деганлар ҳазрат. — Қаён юз буряпсиз?! Кальбанинг Эгаси ҳаққи, билинг, ўлим ёнгинангизда, сиз билан баробар турибди. Парча нонга қаноатланган, ямоқ кийимга рози, ерга ёпишиб ибодатта берилган, хатолари учун йиғлаган, уқубатдан қочиб, раҳматидан умидвор бўлган кишига Аллоҳнинг раҳмати бўлсин». Шундай деб жон берган эканлар. Минг йилнинг нарисида айтилган бу гапни биз ҳам бир васият ўрнида қабул этиб, амал қилмоғимиз жоиз.

Ховли томон бир неча қадам кўйган Манзура оқ бўз парда билан тўсилган ичкари томон юришдан истиҳола қилиб тўхтади. Парда ортидаги айвондан эшитилаётган бу суҳбатга беихтиёр қулоқ тутди. Кейинги хитобларни эшитди-ю, бадани жимиirlаб кетди. Йўқ, ўлим тилга олингани учун кўркмади, орзуҳавасларга алданиб яшаётган инсонлардан бири эканини яна бир марта англаб, афсусланди. У суҳбатнинг давомини эшитишни истарди. Лекин ўғриларча тинглашдан уялди. Шундай туравериши ҳам нокулай эди. Шу боис бу сафар баландроқ овозда, энди «Отин ойи!» деб чақирди.

Суҳбат узилиб, Отин ойи «Лаббай, ҳозир!» деганича ўрнидан турди. Суҳбатдош аёл ҳам қўзғалиб,

кетишига изн сўради. Парда сурилгач, мезбон билан хайрлашди-да, Манзура билан сўрашиб, чиқиб кетди. Отин ойи Манзурани таниди. Шаҳарга донғи кетган одамнинг хотини ўзи келиб, келганда ҳам ичкарига киришига ийманиб туришидан ажабланди. Лекин бу таажжуб сониялари узоқ давом этмади. Очик юз билан яқинлашиб, саломлашди-да, меҳмонни айвонга бошлади. Манзура ҳозиргина сұхбатдош аёл ўтирган жойни эгаллади. Фотиҳа ўқилгач, Отин ойи ҳол-аҳвол сўради. Сўнг Манзуранинг келиши сабабини билиш учун сукут саклади.

— Мавлуд куни сизни яхши кутиб ололмадим, хафа бўлмадингизми, ишқилиб? — деди Манзура айбдор одам овозида.

— У кун чорловингизни қабул қилишдан муддао зиёфатда еб-ичиш эмас, жаноби Расули акрамнинг муборак ҳаётларидан сўзлаб бермоқлик эди. Меҳмонларингиз бу ҳикоялардан ўzlари учун бир ибрат олган бўлсалар кифоя. Қолган иззат-икромлар бекорчи ҳаракат ҳисобланади.

— Яна бир борармикинсиз, деб таклиф қилгани келувдим.

— Яна мавлудми?

— Йўқ... бу сафар мушкулкушод ўқитмоқчийдим...

Бу гапни эшитиб Отин ойи унга тикилганича жим қолди. Манзура бу қарашни рад жавобига ишора деб ўйлаб, энди ялиниш оҳангига илтимос қилди:

— Отин ойи, йўқ деманг, кунини белгиламадик, айтган вактингизда ўтказамиш.

Отин ойи чиндан ҳам бу таклифни рад этмоқчи эди. Бироқ, бунинг сабабини қандай тушунтиrsам экан, деган мулоҳаза билан ўйга толганди. Манзура ялиниш оҳангига ўтгач, ўзини гўё нархини ошираётган ашулачи хис қилиб, хижолат бўлди.

— Опа, илтимос, мени «Отин ойи» деманг. Исмим Афруза. Мен бир кун мавлудга, иккинчи куни мушкулкушодга қатнайдиганлардан эмасман. Кўпчиликка

акл ўргатадиган даражада илмим бўлганида «Отин ойи» деб иззат қилсангиз ярашарди. Ёшлигимда кимё соҳасида ўқиганман, ҳозир шу касбим бўйича ишлайман. Яқинларимнинг илтимосини ерда қолдиргим келмай, зеҳним етганича сұхбат қилиб бсралан. Сизни кига ҳам шу боис бориб эдим.

Афруза Москвада аспирантурада ўқиётган кезлари бир татар аёлникида ижарада туриб, ундан Ислом илмини ўрганганини айтиб ўтиргади. Ўз ҳаётига доир маълумотларни баён этмоқликка ҳожат ҳам сезмади. Унинг учун ҳозир энг муҳими – бу аёлнинг кўнглини оғритмаган ҳолда илтимосини рад этиш эди. Кўриниб турибдики, бу аёл Ислом илмидан анча узок. Кескин гапириб юборса, шубҳасиз, ранжиди.

– Опа, нима учун мушкулкүшод ўқитмоқчисиз? – деди у суюмли сингилнинг меҳрибонлиги билан.

– Биласиз-ку...

Манзура ўғлининг вафотини тилга олишга кийналди.

Афруза унинг ахволини тушунди. Рўпарасида ўтирган аёл шунчаки илтимосчи эмас, фарзанд доғида куйиб адo бўлаётган ОНА эди! У ўз дардини енгиллатиш учун мушкулкүшод ўқитмоқчи эмас. Асло! Она-нинг мақсади – фоний дунёни навжувонликда тарк этган фарзандига бокий дунёдаги фароғатни тилаш. Шундай тилакдаги онанинг кўнглига озор етказиш мумкинми? Лекин... кўнглига қараб, гуноҳдан асраслилик ундан-да ёмонроқ...

– Мушкулкүшод ўқитиши ўзингиз ўйлаб топдингизми ё бирор ўргатдими? – деб сўради Афруза ўйчан тарзда.

– Одамлар қилишади-ку...

– Опа, хафа бўлмасангиз, бир-икки нарсани тушунириб қўярдим.

– Вой, нега хафа бўларканман, тушунираверинг.

– Сизнинг дардингиз менга бегона эмас, чунки, мен ҳам онаман... Ёлғиз ўғлимни Афғонистондан те-

мир тобутга солиб олиб келишган. Жонсиз танасини кучоқлаш ҳам насиб этмаган менга. Аллоҳнинг иродасига кўра бокий дунёга кетган яқинларимиз биздан тўкин дастурхон тузаб, зиёфат беришимизни кутишмайди. Улар – дуоталаблар. Ҳар бир яхши иши миздан ҳосил бўлган савоблардан уларни баҳраманд этишини сўраб Аллоҳга ёлборишимиз керак. Тўғри, бу фарзандларни биз туқканмиз. Лекин уларни бизга Аллоҳ берган эди. Ўзи истаган вақтда олди. Фарзанд берганида етарли шукр қилдикми? Буйруқларини бажардикми? Энди-чи? Сабрда, қаноатда ожиз эмасмизми? Шукр киляпмизми? Бу гапим сизга ғалати туюлди, а? «Ўғли ўлган одам ҳам шукр қиласими?» деб ғашланётгандирсиз? Ҳа, опажон, мен адаш гап айтмадим, бу кисматта ҳам рози бўлиб, шукр қилишимиз шарт. Гиёҳвандлик ёки бошқа бузуқчилик билан жон беришса, бизларни иснодларга колдириб кетишса нима қиласидик? Додимизни кимга айтардик? Аллоҳ жаннатда фарзандларимиз билан бизларни қовуштириш учун оғир синовни берди. Аллоҳим мен билан сизга ўҳшаганларга қаратса айтади-ки: «Эй Одам фарзанди, сабрли бўл ва ўзингни паст тут, ўзим сени олий даражага кўтараман. Истиғфор айтгил, мағфират қиласай. Ҳарна сўрагил, мен уни берай. Менга тавба қил, қабул қиласай. Молингдан садақа қил, токи молингга барака берай. Қариндошларингга яхшилик қилиб қўшилиб юр, умрингни узун қиласай». Яна «Эй бандаларим! – деб хитоб қиласди. – Мен бандаларим ичиди бир мўъмин кишини бирон мусибат етказиб имтиҳон қилсан, у менга ҳамд айтиб, менинг имтиҳонимга сабр қилса, у ўша жойидан турганида хатодан – гуноҳлардан онаси туққан кунидек пок бўлиб туради». Тушуняпсизми, опа, биз сабр ва шукр билан бу имтиҳондан ўтамиз, кетма-кет дастурхон ясатиш билан эмас. Лекин эҳсон ҳам яхши, савоб амаллардан ҳисобланади. Фақат эҳсонни тушуниб, тўғри ҳолда, исрофсиз амалга ошириш керак. Тўқ одамларни чор-

лаб, беш-үн хил таом билан сийлаш хайрли эҳсон саналмайди. Эҳсону садақалар муҳтожларга аталган бўлсагина савобдан умид қилиш мумкин. Аллоҳ ана шу савобдан ўтганлар руҳини баҳраманд этади. Агар неъматлар исроф этилса, гуноҳ-ку?! Ўтганлар руҳига шу гуноҳларни тортиқ қиласизми? Сиз ўқитмоқчи бўлаётган мушкулкушоднинг мукофоти гуноҳдан бошқа нарса эмас. Кичикроқ гуноҳ бўлса ҳам майли эди. Бу амал ширк бўлгани учун олимлар уни гунохи кабира, яъни жуда катта гуноҳ деб аташади. Ширк – қайси бир ҳолдадир Аллоҳнинг шериги бор, дейишнинг ўзиёқ гуноҳ. Мушкулкушод ўқилганда мушкулларни осон қилиб бериш қандайдир Биби сесланбадан тиланадими?

Афруза шу саволни бериб, жавоб кутмаса ҳам сукут қилди. Манзура бир-икки марта мушкулкушод ўқилган маросимда иштирок этган, аммо ўқилган сатрларнинг кўпи қулогига кирмаган эди. Эшигларини ҳам унугаёзганди. Эсида қолгани бир етимча кизнинг оғир аҳволију бир хотиннинг мўъжизалари...

– Ҳар қандай ёрдам фақат Аллоҳдан тиланади. Ҳатто пайғамбардан ҳам тиланмайди. Жоҳиллигимиз учун баъзан азиз-авлиёлардан фарзанд тилаймиз, дарахт шохларига латта-лутталар боғлаб келамиз. Мушкулкушод ҳам ана шунга ўхшаган хурофотларнинг бири. Агар мадфун фарзандингиз учун яхшилик тиласангиз, илм олинг, Исломни ўргансангиз савоб топасиз. Илмсиз одамнинг гуноҳ кўчаларига кириб кетиши осон.

- Бир-иккита китоб ўқидим...
- Илм олиш учун бир-иккита китоб етарли эмас. Китобни ҳам танлаб, билиб ўкиш керак.
- Биз... энди... қўлимизга тушганини ўқийверамиз-да, – деб ўзини оқламоқчи бўлди Манзура.
- Ундей қилманг. Агар дилингизда илмга мойиллик уйғонган бўлса, мен ақлим етганича ёрдам берай.
- Вой... қанийди! Сўрашга тилим бормай турувди... вақтингиз бўлармикин?..

— Илм олмоқчи бўлганларга вактимни эмас, жонимни ҳам фидо қилгим келади.

Афруза шундай дегач, Манзурага диннинг моҳияти ҳақида қисқа тушунча берди-да, кейинги келишига китоблар олиб кўядиган бўлди.

Хайрлашишдан олдин айтиб берган ривоят эса Манзуранинг қалбига муҳрланиб қолди. Уйига қайтаётганида хаёли фақат шу ривоят билан банд бўлди: «Барчага ибрат ва маслаҳаттўй бўлган бир орифнинг ўғли вафот этди. Таниш-нотаниш – барча бу фожиадан қайғурди, йиглади. Бирок, ориф одам кўз ёши тўкмади. Ахли аёли бундан ранжиб дедики:

— Фарзандимиз қисмати учун ҳатто бегоналар ҳам зор йиглаб турса-ю, сиз нега йигламайсиз? Шунчалар бағритошмисиз? Қалбингиз шунчалар қотган бўлса, маҳшар куни қандай қилиб инсонларга Аллоҳнинг изни или мөхр-шафқат кўрсатиб, шафоат қиласиз?

Улуғ зот аёлига дедики:

— Эй ҳаётимнинг вафоли йўлдоши, йигламаганимга мени марҳаматсиз, юраги тош қотган, деб ўйламагин. Менинг коғирларга ҳам раҳмим келади, уларга иймон насиб этсин, дея дуо қиласан. Кўппакларга ҳам ачинаман, ҳатто мени тишлаган кўппакка ҳам. «Ё Раббий, бу бечоранинг феълини ўзгартиргин, одамлардан калтак емасин, унга тош отишмасин», деб дуо қиласан.

Бу сўзларни эшитган аёли:

— Қалбингиз шунчалар шафқат ва марҳаматга тўла экан, нега ўғлимиз учун йигламаяпсиз? – деб яна гина килди.

— Инсон бир нарсани йўқотганида ёхуд ундан айрилганида йиглайди, ранжиди. Ўз фасли хеч қиши фаслига ўхшайдими? Фарзанд ўлсин ёки тирик юрсин – улар кўнгил кўзидан йўқолмайди-ку?! У шундек кўз ўнгимда кезиб ўйнаб юрар экан, нега энди сенга ўхшаб йиглайн, хафа бўлайн? Ўғлимиз бу замон даврасидан чикди, холос. У йўқолмади, атрофимизда айланиб юрибди, ахир!

Сүнг у ориф одам яна дедики:

— Йиғи ё аламдан, ё айрилиқдан келар экан, мен севганларим билан биргаман. Табиий, ўлган болам билан вуслатдаман. У билан югуриб юрибман. Одамлар уларни тушида күрса, мен уйғоқ ҳолда, очик-равшан күряпман. Бу дунёда ўзимни яширганимда ҳам, борлик дараҳтидан туйғу япроғини силкитганимда ҳам у билан биргаман...»

Неча кунларки, Манзуранинг елкасидан нимадир босиб турғандай бўлаверарди. Афрузаникidan қайтишда бу юқдан халос бўлганини сезди. Зулмат ихтиёридаги қалбига ёқилган чироқдан кўнгли равшанлашди. Ана шу равшанлик билан уйига қайтди. Дарвозаси яқинида турган нотаниш аёлга кўзи тушиб, машина ҳайдовчисига тўхташни буюрди. Асадбекнинг амрига кўра, Манзура машинага ҳовлида ўтириб, ҳовлида тушиши шарт эди. Аёлни кўрганда эрининг бу буйруғи эсидан чикди. Ҳайдовчи хожасининг буйруғини биларди. Шу боис тўхтатмади. Дарвоза очилиши билан ичкари кирди. Манзура бундан аччиқланса-да, йигитга гапирмади. Машинадан тушиби билан орқага қайтди. Дарвозани ёпаётган йигит унга савол назари билан каради-ю, тўхтатишга журъат этмади. Манзура кўчага чиқиши билан нотаниш аёл тез-тез юрганича унга яқинлашди-да, салом берди.

— Худойимга шукур, сизни бугун ҳам учратолмай қайтиб кетармикинман, деб кўрқаятувдим, — деди у Манзура алик олиб, кўришгач.

— «Бугун ҳам» дедингизми? Унда... кеча ҳам кутувдингизми?

— Ҳа...

Манзура икки кун кўчага чиқмаган эди. Ўзини кимдир интиқ кутиши мумкинлигини ўйлаб ҳам кўрмаганди. Демак, бу аёл кеча келган... ялингандир, йигитлар қўйишмагандир. «Шунчалик ноинсофлик бўлиши мумкинми?» Манзура кўнглида туғилган бу саволга жавоб қайтаришга ожиз эди. Журъати етиш-

са, буни эридан сўрарди. Эрининг нима дейишини эса билади...

– Опа, менинг уст-бошимга, куринишимга эътибор берманг. Гапни чўзмай, тўғрисини айта қолай: мен ўтган куни қамоқдан чиқдим. Болаларимнинг ташвишида ўзимга қарагим ҳам келмай, нажот тилаб, тўғри сизнинг олдингизга шошавердим.

– Нажот... Мендан? – ажабланди Манзура. Шу топда Афрузанинг гапини эслади: – Нажотни Худо беради, синглим...

– Худо нажот бериши учун ўзим елиб-югуришим керак-да. Ўзимнинг қўлим калта, кўп ишларга ақлим ҳам етмайди. Агар сиз ёрдам бера олмасангиз... билмадим... ўлимдан бошқа нажот қолмаса керак...

– Болаларингизга нима қилди?

– Ўғирлаб кетишибди.

– Ким?

– Қиморбозлардан гумоним бор. Болаларимни эрим ютқизиб қўйган экан...

Бу гапни эшитиб Манзура титраб кетди. Эрга текканидан кейинги ўзининг аҳволини, қўрқувда ўтган кечаларини эслаб, баданига муз югурди.

– Отингиз нима, синглим? – деб сўради бир неча нафаслик сукутдан сўнг.

– Отим Фазлия.

– Фазлияхон, кўчада гаплашмайлик, юринг, ичкари киринг...

Асадбек йигитларига «Мен йўғимда бу ҳовлига ҳатто бегона пашша ҳам учиб ўтмасин», деб амр қилган эди. Манзура Фазлиянинг елкасига қўлини ташлаб, ичкари бошлагач, улар ноилож қолишиди.

ган, аммо икки кўзи тириклигидагидай назар қилиб турарди. Ҳукамолар бу туш таъбирини айтолмасдилар. Шунда бир дарвиш келиб деди-ки: «Мулк, салтнант бошқаларга қолганидан ҳануз кўз ногирондир»...

Бу ҳикматни Асадбек билмас эди. Кесакполвон ҳам эшитмаган, эшитган тақдирида ҳам оддий гап каби қабул қилган бўларди. Чунки унда ҳикмат мағзини чақиш қобилияти йўқ эди. Луқмони Ҳакимдан: «Ҳикматни кимдан ўргандингиз?» деб сўраганларида у муҳтарам зот: «кўзи ожизлардан ўргандим, чунки улар оёқ қўядиган ерни билмагунларича одим отмаслар», деган эканлар. Кесакполвон, гарчи басир бўлсада, оёқ қўядиган жойига қараб олмаган эди. Ҳўroz қанчалик шиддатли жанг қила олса ҳам, темир панжа бургутга ҳеч қачон teng кела олмаслигини у ўйлаб кўрмаганди. Мушук сичқон тутган онда ўзини шер фаҳмлагани каби у «Асадбекнинг мулки икки кишига эмас, бир кишига қолиши керак», деган ўз қонунини яратди. Чувриндининг ўлими бу қонунинг ғоят тўғри эканини тасдиқ этгандай ҳам бўлди. Лекин у нотавон банда ҳаёт қонуниятини маҳлук эмас, Ҳолик яратишини фаҳм этмас эди. У она қорнида ҳам шошилганди – муддатидан эртароқ туғилганди. Асадбек мулкига эга чиқишига ҳам шошилди – ҳаётдан эрта кетди. Ўзининг ҳавасини келтирган тилла-ю жавҳарлари энди кимнинг кўнглини шодлантиради? Яширин темир сандиқдаги бойлик тўплаган кишисига садоқат қилмагани ҳолда энди кимга ёлғон саодат ваъдасини берар экан?

Кесакполвоннинг хотини кечаги оқшом кўнғироқ қилганида Асадбек «Ҳадеб бошимни қотираверма, эринг Масковда сап-сариқ жононга уйланиб олган, энди ундан умидингни уз», деган эди. Бу эзма хотинга битта гап камлик қилишини Асадбек фикрлаб кўрмаганди. Нонушта пайти телефон жиринглагандада ҳам кечаги хархаша давом этишини кутмаганди. Гўшакни Манзура кўтариб, «айланай овсин, яхши

ўтирибсизми», деб гап бошлаганида хотинларнинг ўзаро вайсаши бошланди, деб ўйлади. Аммо вайсаши кўпга чўзилмай, Манзура «Ҳа, борлар, ёнимда ўтирибдилар», деб гўшакни узатгач, «яна нима балони бошламоқчи», деб ажабланди.

Кесакполвоннинг хотини салом-аликни қисқа қилиб, муддаога ўта қолди:

— Мулла ака, кеча ҳазиллашувдингизми ё сарик мегажинга уйланиб олганлари ростми?

«Ҳазиллашувдингизми?»

Бу сўз Асадбекка малол келиб, қошларини чимирди. «Мен сен билан ҳазиллашадиган эрманми?» деб бобиллаб бермоқчи бўлди-ю, ўзини тийди:

— Ҳа, нима, рашкинг келяптими? Кечаси билан ухлолмай чиқдингми?

— Бо Худо! Рашк қилиб зарил кептими?! Феълини сезиб юрардим. Бир марта «агар ўлсанг, сени кўмиб, мозордан қайтишимда уйланиб келаман. Сенга жаноза ўқиган мулла ярим соатдан кейин мени ўн саккиз ёшли жононга никохлаб қўяди», деган. Мегажинни Масковдан топган бўлса, у ёқда никоҳ ўқилмайди, мулланинг пули ҳам ёнига қолибди. Уйланса ундан нарига, фақат келиб, сейфнинг калитини қўлимга тутқизиб кетсин. Жувонмаргта бу уйдан битта чўпни ҳам бермайман.

Ҳар бир одам калласига келган гапни айтишга ҳақли. Айни чоғда бу гапни эшиштан ҳар бир одам бу каллага мушт туширишга ҳам ҳақли. Ҳозирги гапларни Кесакполвоннинг хотини эмас, бошқа эр киши айтганида Асадбек муштлашдан қайтмаган бўларди. Бу хотинга эса гап топиб бериши қийин. Шу боис Асадбек кескин равишда:

— Калитни менга бериб кетган, уйингда ўтир, ҳали бораман, — деб гўшакни жойига ташлади. Сўнг бир зум ўйланиб турди-да, гўшакни яна кўтариб, лозим рақамни терди. Жамшиднинг овозини эшиштгач:

— Сейф очадиган уста топ, — деб буйруқ берди.

Мартабаси анча юқорилаганига қарамай, Жамшид ҳамон «хўжайнин «нимага?» деган саволни ёмон кўрадилар, «хўп бўлади»ни ёқтирадилар», деган қоидасига хилоф қилмасдан иш юритарди. Агар ҳозирги топшириқ Кесакполвонга берилганида унинг «банкни ўмармоқчимисан?» деб сўраши тайин эди. Эшитадиган жавоби ҳам шунга яраша бўларди: «Сенга ўхшаган майда ўғриманми, банкни урадиган?»...

Асадбек шаҳар марказидаги уч қаватли иморатнинг ертўласига «видеобар» никобида жойлашган идорасига етиб келганда Жамшид вазифани деярли бажарган эди.

– Уста бир соатдан кейин бўшар экан, – деб хожасининг кўнглини хотиржам қилди.

– Ишонарли одамми? Гуллаб қўймайдими?

Асадбек аъёнининг ишни пухта килишини билса ҳам, шубҳа булатуни ҳайдаш учунгина шундай деб сўраган эди.

– Маҳмуд акамнинг сейфлари бузилиб қолганида очиб берган эди. Кўли гул уста.

– Бунака кўли гулларнинг харидорлари сероб бўлади. Ўғрилар билан олди-бердиси йўқми?

– Бу томони ҳам пишиқ. У нозик идоранинг рўйхатида туради. Ўғрилар яқинлашишолмайди унга.

– Ҳайдар акангникига борамиз. Сандигини очиб, бойлигини олиб бермасак, хотини юрак ўйноғи бўлиб қолади. Мен «элинг Московда уйланиб, ўша ерда қолди», деганман. Уйланган одамнинг ўша ёқда ўлиши ҳам осон. Маржасининг ўйнаши бир ёқлик килиб кетар, а?

Жамшид хожасининг муддаосини англаб, кулимсираб қўйди:

– Московда аҳмақона ўлим топадиган эркаклар қанжикларининг ўйнашлари қўлида жон берар экан.

– Ҳайдар акангга шуниси ҳам насиб этмади. Аблак бўлса ҳам, уйида жон бериб, одамга ўхшаб қўмилгани яхши эди. Туриб-туриб ачиниб кетаман унга...

Уста келгач, ортиқча гап-сўз килиб ўтирмасдан йўлга тушдилар. Жамшид «тилингга маҳкам бўласан», деб пухталаб қўйгани учун уста «қаёққа, нимага?» деб суриштирмади.

Кесакполвоннинг уйига кириб келган Асадбек пастак думалоқ стол атрофида қарта ўйнаб ўтирган нотаниш йигитни кўриб, ғашланди. Қошларини чимириб «ким бу тавия?» дегандай уй бекасига қаради. Бу савол назарини англаган хотин дарҳол таништириди:

– Бу Гогик, миравой мастер, бизнинг личний парикмахеримиз.

– Между прочим, Гогик Ленинграддаги международний конкурсида приз олди, – деб онасига қўшимча қилди Моника.

Кўпни кўрган Асадбек бир қарашидаёқ, «личний парикмахер»нинг бошқа хизматлари ҳам борлигини фаҳмлаб, баттар ғазабланди. Агар ҳозир ёнида Кесакполвон бўлганида барча ғазаб ўқларини унга қараб отган бўларди. Чунки, унинг фикрича, хотиннинг ёмонлиги учун фақат эр айбдор. Осмоннинг устуни бўлишни мўлжаллаб юрган одамнинг уйидаги бу аҳволга чидаш мумкин эмасди. Асадбекнинг хаёлига «баттар бўлларинг!» деган ўй ҳам келди. Лекин баттар бўлишига у йўл қўя олмасди. Чунки, Кесакполвон бу дунёдаги мукофотини олиб, ўликлар оламига кетган бўлса ҳам, номи қолган эди. Бу номни тилга олишга ҳазар қилса-да, ўз исми билан чамбарчас боғлик эканлигига иқрор бўлмоққа мажбур эди. Агар бу оиласади бузуқлик ҳақидаги хабар эртага кўчага тарқалса, «Асадбекнинг қадрдони Ҳайдарнинг хонадони балчиқ экан», дейишлари аник.

– Менга қара, «миравой мастер»мисан, яна нима балосан, шаҳарда сартарошхонанг борми?

– Личний ўзимники эмас-ку, но, зачислит қилинганман.

– Энди ўша «зачислит қилинган» жойингда ишла. Буларнинг сочига бит тушса, ўша жойда тараб қўяверасан.

– Вой, муллакажон, унақа деманг.

– Сен ўчириб тур! – Асадбекнинг қаҳрли овози баландлагач, хотиннинг нафаси ичига тушди. – Эринг Масковдан телпон килиб, «Гогик деган хотинчалиш остонамни ҳатлаб ўтадиган бўлса, тумруғидан осиб кўй», деди.

– Ну-у, бу энди жуда через чур не культурна! – деди Моника лабини буриб.

– Сен жикиллама, отанг бунчалик талтайтириб юборганини билмаган эканман. Эринг қаерда?

– Юргандир, где попало.

– Эрингни топ. Бугун сенларни бу уйга кўчириб кўйишади. Онанг билан бирга яшайсан.

Асадбек Мониканинг ҳар куни шу ерда эканини билмасди. Шунинг учун она-боланинг кўз уриштириб олишлари унга ажабланарли туюлди.

– Сейфинг қаерда? – деди хотинга қовоқ уюб караб. Асадбек бу уй битганда «муборак бўлсин»га бир мартагина келган, хоналарнинг вазифалари, ашёларининг ўрни унга номаълум эди.

– Калити қани?

– Калит кўчада пойлаб турибди.

Хотин бу гапга тушунмасдан талмовсираб турдида, сўнг Асадбекни эрининг хос хонасига истамайгина бошлади. Дераза рўпарасида чарм диван. Кесакполвон шу диванда чўзилиб ётиб, деворга чизилган гулларнинг расмига маҳлиё бўлишни яхши кўради. Наққош уста деворни беназир тарзда гулга буркагани учун пўлат сандиқнинг ўрни билинмасди. Хотин қўли билан кўрсатмаганида Асадбек бойликни бағрига сиғдирган жойни тополмай турган бўларди. У осто на ҳатлаб тўхтаган Жамшидга қаради. Жамшид хожасининг амрини шу кўз қарашиданоқ англааб, орқасига қайтди. Икки-уч дақиқа ўтмай устани бошлаб кирди. Устанинг факат «қўли гул» эмас, кўзи ҳам ўткир, зийрак экан. Сандиқ қаерда экани айтилмаса ҳам, деворга бир назар ташлашда аниқлаб, яқинлашди-да, портфелидан керакли очқичларини олди.

Асадбек чарм диванда ўтириб, унинг ҳаракатларини жимгина кузатди.

Яқингинада бу жойда шу бойликнинг эгаси яйраб ўтиради. Баъзан пулларни олиб санаб, тилла, жавоҳир буюмларни бир-бир силаб, қалби роҳатланарди. Зайнаб ўғирланган кезлари Асадбек руҳи синик, маъюс оҳангда «Топган-тутганларимиз невара-чевараларимизга ҳам етиб-ортади. Бизга яна нима керак?» деганида Кесакполвон унга ўша заҳоти жавоб кайтармаганди. Уйга келиб, шу диванга ёнбошлаб ўйлаганди: «Бизга яна нима керак?» дедими? Тентак! Бу дунёда нима қилиб юрибмиз ўзи! Бой бўлмасанг сени бирор одам ўрнида кўрмайди. Худо бериб турган пайтида тўплайвермайсанми! Невара-чеварангга етадими ё йўқми, санаб нима қиласан? Санаб адогига етадиган бойлик бойликми?! Тарозида тортадиган бўлганингда керилсанг арзийди...»

Ўқилоннинг якин орада чувалчангта айланаяжаги, тахтга ўзи ўтиражаги ҳақидаги ширин умид ҳам шу диванда ётганида туғилган эди.

Москвада ўлдирилган одамнинг арвоҳи ўз уйига келиб, сарсари кезадими ё йўқми – буни ҳеч ким билмайди. Агар шундай бўлиши мумкинлиги тасаввур этилсами...

...ширин орзулари туғилган диванда Асадбекнинг хон тахтини эгаллаган каби ўтиришини кўрган Кесакполвоннинг арвоҳи қанчалар азобланар экан? Яна бир неча дақиқа ўтиб, пўлат сандиқ очилгач, бойлигининг хотини кўлига ўтганини кўраётib арвоҳ қанчалар нолалар қиласар экан?..

Уста ишини бажариб, эшикни салгина қиялатиб очди-да, ичкарига разм ҳам солмай, орқасига чекинди.

– Шу қулфга мослаб калит ишлаб берайми? – деб сўради у, асбобларини портфелига жойлаётиб.

– Йўқ, йўқ! – деди хотин шошилганча. – Янги сейф буюриб кўйганман.

Хотиннинг шубҳаланганини сезган уста, оғринсада, индамади. Асадбек унинг кўнглини оғритмаслик

учун «Калит кейинрок керак бўлади. Ўшанда чакирамиз яна», деб кўйди.

Жамшид устани эргаштириб, изига қайтди. Хотин «Асадбек ўрнидан туриб келиб, сандик ичини бир тафтиш қилар», деган хавотирли ўйда унга савол назари билан қаради. Асадбек ўрнидан турди. Аммо пўлат сандик томон эмас, эшикка қараб юрди. Остонаяга етгач, тўхтаб, унга ўгирилди. «Отлар топиб, эшаклар ейди» деган мақолнинг исботи шу бўлади» деб ўйлади. Бироқ тили бошқа гапни айтди:

– Эрингни қарғайверма, шунча бойликни сенга илиниб йикқани учун дуо қил. Орқа-олдингга қараб сарфлассанг, етти пуштингта етади.

– Бо Худо, ётиб еганга тоғ ҳам чидамайди, мулла ака!

– Сен ётиб ема, юр, бирни ўн қилиш ҳаракатида бўл. Хоҳлассанг, эрингнинг соғин сигирларини ўзингта хатлатиб бераман.

– Қанақа соғин сигир?

– Эринг кооперативларини шунақа дейди. Такси кооперативи бор, яна чойхонами, хуллас, алланима ба-лолари бор. Шу ишларни юритолсанг юрит, бўлмаса, фойдаси Масковдаги кундошингга оқиб кетаверади.

– У мегажин заҳаргинани ютсин. Ўзингиз бир ақллироқ одам топиб берсангиз, куёв билан биллалашиб амаллаймиз.

– Ҳа, амаллайсан... Сен бундаги бойликдан озгинасини эрингта атаб олиб қўй. Балки қайтиб келар?

– Мегажини билан ўша ёқда қўшмозор бўлсин. Укангиз... «қарғама» дейсиз-у, гўрсўхтани қарғамасам юрагим ёрилиб кетади-да...

– Ўзинг биласан. Қарғишиңг уриб, ўша томонларда ўлиб кетса, кейин пушаймон ейсан.

Асадбек шундай дегач, чиқиб кетди. Хотин пўлат сандик ичига бош суқишини ҳам, меҳмонни кузатишни ҳам билмай гангриб қолди. Асадбекнинг қадам товушлари узоклашгач, сандик эшигини ланг очди.

Кесакполвоннинг аҳмоқ қилиқлари кўп эди. Бироқ, ўғрилик кўчасида улғайгани учун эҳтиёт чораларини ҳам унутмасди. Ўғриларга хос эҳтиёткорлиги туфайли яна бир жойга бойлик яширганди. Бунинг сирини ҳеч ким билмагани сабабли ер остида қолиб кетди – ҳеч кимга насиб этмади...

3

Асадбек ёмон хотинлар ҳақида турли гап-сўзлар эшитган, лекин бунақаларга ўзи рўбаро бўлмаган эди. Кесакполвоннинг хотинини эси пастроқ, тилига эътиборсиз бир вайсақи деб биларди. Унинг бу даражада бемеҳр, тошбағир эканини тасаввур ҳам этмаганди. Уйдан чиқар маҳалида «Кесак бу ҳайвонни аллақачон уриб ўлдирвориши ё уч талоқми, саккиз талоқми қўйиб, йўқотиши керак эди», деб ўйлади. Мирзо Бобур Ҳусайн Бойқаро оиласи ҳақида сўзлай туриб, «биринчи хотини шу даражада ёмон эдиким, ул гўё бул дунёдаги дўзахнинг айнан ўзи эрди, Ҳусайн уни қўйди ва дўзах азобидан қутулди», деганини Асадбек билганида «Ҳайдар бу дунёдаги дўзахига у дунёдаги дўзахни улаб кетди», деган бўлармиди...

Уч қаватли бино ертўласидаги ҳашамдор хонасига киргунига қадар ҳам Жамшидга индамади. Идорани бошқа жойга кўчирмасликка қарор қилганидан кейин бу ер тезлик билан таъмирланган, ҳатто деворларнинг ранги ҳам ўзгартирилиб, барча жиҳозлар янгисига алмаштирилган эди. Хонада Чувринди билан Кесакполвонни эслатувчи ҳеч нима қолмаганди. Бўтқанинг ўрнига қўйилган йигитни топиш осон бўлмади. Оёқ-қўли чаққон, тили тиш ҳатламайдиган одамни топиш унча қийин эмас. Лекин садоқатда барчага ўрнак бўла оладиганини бирданига аниқлаш қийин. Жамшид тавсия этаётганларнинг барчаси садоқатли бўлишга қасам ичишга тайёр. Лекин тилда айтилгани қалб қасами билан қувватланадими ё йўқми – буни ҳеч ким аниқлаб

беролмайди. Узок вақт текшириш, йигитни ҳамиша шубҳа остида назорат қилиш ҳам яхши натижә бермаслиги мумкин. Шу боис Жамшидга қариндошлиги бор йигитни танлаб, қошлари қалинлигига ишора қилнб, унга «Қорақош» деб лақаб берди.

Қорақош Бүтқага нисбатан сезгирроқ ва чакқонрок эди. Ҳожасининг кайфияти бузук ҳолда қайтганини фаҳмлаб, буйрукни кутмаёқ чой кўтариб кирди. Асадбек «сен айтдингми?» дегандай Жамшидга қаради. Ҳожасининг жаҳли чиқиб турганида бақириб юбориши мумкинлигини билган Жамшид бу савол назарини англамагандай индамади. Қорақош чой қуийб узатгач, орқага тисарилиб «буюринг, хожам», дегандай қўл боғлади. Гарчи буйрукни Асадбекдан кутаётган бўлса-да, Жамшидинг имлаб қўйганини кўриб, изига қайтди.

— Уйланадиган бўлсанг, қизнинг етти пуштини сўраб-сuriштири. Қошу кўзига хумор бўлсанг, ана шунақасига учрайсан. «Кўзини сузиб, қийшанглаб турадиган бу жононинг сенга икки дунёда хотин бўлмайди», деб Ҳайдар акангта бошида айтганман. Ҳайдар аканг бу тавия билан ётмай қўйганига минг йил бўлгандир. Шунинг учун ҳам бунга эри тирикми ё ўликми – барибир. Вақти келиб, «Ҳайдар акамни Масковда ўлдириб кетишибди», деб хабар берганингда башарасига яхшилаб қараб ол: тариқча ачинишни кўрмайсан. Одамлар айб қилмасин, деб ёлғондан кўз ёши қилиб берар, лекин юраги йиғламайди. Юраги йиғламайдиган хотиндан Худо асрасин! Сени Маҳмуд тарбия қилгани билан, Ҳайдар акангга ўхшаб кўп бевош юрасан. Эҳтиёт бўл, шунақасига илиниб қолма.

— Ҳўп, Бек ака... лекин... менинг уйланадиган ниятим йўқ.

— Қаматворган хотиннинг алами ҳали ҳам борми? Уйланмайман, дейишинг нотўғри. Одамлар тушунишмайди, маломатга қоласан. «Бу йигитнинг хотин зотига нафрати бор экан», дейишмайди, «майдакадам

бўлса керак», деб хукм чиқариб қўяверишиди. Йигит кишига ёмон от бир ёпишмасин, кейин қутулиш қийин. Агар ёнимда юришни истасанг, оила қуриб, бола қўришинг шарт.

Жамшид жавобга оғиз жуфтлаган пайтда эшик қия очилиб, Қорақош кўринди:

– Бек ака, Масковдан телефонда сўрашяпти, – деди ичкари кирмай.

– Кимлигини сўрамадингми? – деди Асадбек, норози оҳангда. Унинг талабига кўра, Қорақош тўлиқ маълумот бериши керак эди. Қорақош дарров хатосини тузатди:

– Сўрадим, «Хонгирейман», деди.

Бу гапни эшитиб Асадбек билан Жамшид бирбирига ажабланиб қаради.

– Адашмадингми, аниқ шунаقا дедими? – деб сўради Жамшид унга якинлашиб.

– Адашмадим: «Хонгирейман, хўжайнингга «княз Хонгирей чакирияпти», деб айт», деди.

Асадбек гўшакни олиб, кулоғига тутгандан кейин ҳам дарров гапирмади. Қандайдир товуш эшитишни истагандай пича кутди. Кейин бўғиқ овозда «Алло», деди.

– Саломатмисан, Бек, эшитишмча йўталмай кўйганмишсан, а? Одамнинг йўталмай кўйиши баҳти кулганидан даракми ё бирон кулфатнинг хабарими бу? Сен нима деб ўйлайсан?

Овоз таниш туюлди, лекин кимлигини аниқлай олмади. Унинг учун бир нарса аниқ бўлди: «Мен Хонгирейман», деб телефонга чакирган бу одам асти Хонгирей эмас. Сурбетлик билан гап бошлишига қараганда ўз кучу қудратига ишонадиган тоифадан. Асадбек Хонгирейнинг ўлимини эшитган онда қасосдан маҳрум бўлгани учун алам ёғида қоврилган, айни дамда, ғанимнинг ўлимидан сўнг, хотиржамлик курсисига ўтирмаган ҳам эди. Чунки у ўтни ўчириб, чўғини қолдириш, илонни ўлдириб, боласини саклаб

қолиш донишмандлар иши эмаслигини яхши биларди. «Үрмонни кимсасиз деб ўйлама, қайси бир бута орқасида оч қоплон ётгандир», деганлариdek, Асадбек ўша қоплоннинг ириллаб товуш беришини кутаётган эди. Ҳозир унга қоплон терисидаги ўша ваҳшнийнг ким эканлиги номаълум эди, холос. Ӯзини «Хонгирей» деб таништирган одам унинг хавотирланишини ёки ҳаяжонланишини, ҳеч бўлмаганда ажабланишини кутганлиги аниқ. Асадбек буни тушунгани учун ҳам сир бой бермай, менсимаган оҳангда сўради:

– Ким бу?

– Бизларни унугиб қўйдингми, Бек? Үғри биродарлар сени ҳали эсларидан чиқаришганича йўк.

– Ўзинг кимсан?

– Оббо, ошнам-е, овозимдан танимадингми? Иўталинг тузалибди-ю, қулоқ кетибди-да, а? Агар Худо эсингни ҳам олиб қўйган бўлса, ахволингга ҳавас қилмайман. Энди Москвани, «Оккуш қўшиғи» ресторанини кўз олдинга келтир: уч киши ўтирибмиз – Хонгирей, сен ва мен.

Асадбек энди таниган бўлса-да, дарров жавоб бермади. Чунки бу одамнинг Хонгирей номидан гапира олишга журъат этишини кутмаган эди.

– Ҳали ҳам эсламадингми?

– Эсладим: Моргашмидинг? Ҳа, Моргаш, «ўликлар кироли», тўғрими?

– Тўғриликка тўғри, лекин қўполликни сал оширвормадингми?

– Қўполлик қилаётганим йўқ. Хонгирей шундай деб таништирган эди. Бошқача исминг борлигини мен билмайман.

– Бу гапинг ҳам тўғри. Хонгирей ҳар хил номларни тўқиб, ҳазиллашишни яхши кўрарди. Эшитгандирсан-а: Аллоҳ уни ёнига чақирди, лекин у ўлгани йўқ. Хонгирей ўрнига унинг сояси Гирейхон қад ростлади. Англадингми? Гирейхон – менман! Сен менга бир нарсани яширмай, очиқ айт: Хонгирейнинг ўлими

муносабати билан бошлаган байраминг адогига етди-
ми ё ҳали ҳам давом этяптими?

– Мен бирорнинг ўлимидан шодланадиган махлук
эмасман. Сен ҳозирча шунинг ўзини билиб қўйсанг
етарли.

– Сен мени билмайсан, лекин мен сенинг калланг-
даги ўй-хаёлларгача биламан. Мени шу пайтгача ҳеч
ким лақиллатиб кетмаган. Сен ҳам ҳозирча шуни би-
либ қўйсанг етарли. Хонгирей оддий одам эмас эди.
Янгишмасам, у сенга ука қатори эди, а?

– Вакти келганда буни Худонинг ўзи ажратиб ола-
ди. Сен гапни аччиқ ичакдай чўзмасдан мақсадингни
ўғил болачасига очиқ гапир, бекорга қўнғироқ
қилмагандирсан?

– Мақсадимми? Менинг ҳеч қанақа мақсадим йўқ.
Хонгирей ўладиган куни сени кўп эслаган эди. Ни-
магалигини ўзинг биларсан. Ҳарҳолда сен мендан
қўрқма.

– Шунақами? Хонгирейнинг ўзидан қўрқмаган
одам соясидан чўчир эканми?

– Тилингни тий! Сен бир нарсани унутма: Хон-
гирейнинг ўлими сенинг ғалабанг эмас! Сенинг
Москвадаги қашқирларинг шодланишни жуда эрта
бошлаб юборишиди. Ўрисларнинг «Ғолибларни айб-
ламайдилар» деган мақоли бор, а? Сен ҳам, бу ер-
даги қашқирларинг ҳам ғолиб эмассанлар. Шунинг
учун сенларни айблаш мумкин. Сен, Бек, саломатли-
гингни эҳтиёт кил, яна йўталиб юрганин. Худодан
сўрайсанми ё йўқми, барибир иккаламиз учрашамиз.
Мени «Ўликларнинг қироли» деб атадинг. Оқ сурға
ўралиб, қироллигимга меҳмон бўлиб келишдан олдин
мен билан дўстона равишда, тирик ҳолингда учра-
шишни ният қиласкер.

Шу пўписадан сўнг у томондаги гўшак қўйилди.
Асадбек унга жўяли жавоб беришга ҳам улгурмади.
Бир томондан шундай бўлгани ҳам дуруст эди. Гўшак
қўйилмаса, ўзаро пўписалар давом этаверарди. Теле-

фондаги курук гап билан эса ҳеч қандай ҳақиқат юзага чиқмайди.

Асадбек гүшакни жойига күйиб, ўйга толди. Жамшид «ким экан?» деган саволдан тийилиб, сабр қилди. Уч-тўрт дақиқалик суқутдан сўнг Асадбек унга қараб, сўради:

– Хонгирейнинг кўлида юрганингда «ўликларнинг кироли» ҳақида эшитганмидинг?

– Моргашми? – деб ажабланди Жамшид. – Эшитганман. «Хонгирейнинг ўнг қўлн» дейишарди. Москвадаги ҳамма ўликхоналар шунинг назоратида экан. У ёқда ўликни ювиб, кийинтириб, тобутга солиб бериш ҳам даромадли ишга айланиб қолибди. Ҳозир ўша билан гаплашдингизми?

– Ҳа. Хонгирейнинг ўрнини эгаллаганга ўхшайди.

– Пўписа қиляптими?

– Пўписа дейсанми? Менга пўписа қила оладиган одам ҳали отасининг белида юрибди. Энди бир ўлаксага таъзим қилишимиз қолувди... Тинч яшаб, тинчлик билан ўлиш пешонамга ёзилмаган шекилли. Жамшид, акаларингнинг хатоларини биз такрорламас-литимиз керак. Тарзан билан Сурнинг юриш-туриши қанақа?

– Уларга бемалол ишониш мумкин.

Асадбек «бунақа ҳолатда мен ўзимга ҳам ишонмайман», демоқчи бўлди-ю, аммо фикрини ошкор қилмади. «Ишонганинг яхши», деган маънода бош иргаб қўя қолди.

V б о б

1

Абдураҳмон табиб тунни бедор ўтказди. Озмикўпми илми бор, ҳаёт тажрибалари ҳам етарли бўлсада, бу кечдаги воқеадан аниқ бир хулоса чиқара олмади. Кўнгли бир шумликни сезиб, безовталанарди-ю,

аммо буни шайтон васвасаси деб билиб, хаёлини бошқа томон буришга ҳаракат қиласы. Бомдодни ўқигач, Ўшга тушиб, яқинларини зиёрат этмоқ ахдида тайёргарлик күрди. Зиёрат аслида бир баҳона, асл мақсад ўша томонларда бирон янги гап эшишиш эди. Агар бу атрофларда бир кулфат олови ёқилишга тайёргарлик күрилаётган бўлса, унинг назарида, марказдагилар буни билишлари керак эди. У йўлни тўтири автобус бекатига олмай, қабристон томон бурилди.

Гўрўғли уни кутаётгандай, хужраси ёнида йўлга кўз тикиб туради.

– Ҳа, кечаси пайтавангта қурт тушиб қолдими? Сахармардонда қайга отландинг? – деди у, саломга алик олгач.

– Қадрдонларни бир йўқлаб келай, – деди Абдураҳмон табиб.

– Қайдаги қадрдонларингни айтяпсан: бу ерда ётганларнimi ё бундан наридагиларнimi?

– Ўшдагиларни...

– Ҳар ерда йўқлашга арзидиган қадрдонларнинг бўлгани яхши. Яккамоховликдан Худо асрасин. Ўшнинг йўли бу ердан ўтмайди, мендан сўрайдиган гапинг борми? Дардинг бўлса ёрила қол.

– Кеча Қоравой бир шумлиқдан дарак берди. Ўйлай-ўйлай нималигини билолмадим. Эҳтимол, сиз сезгандирсиз?

– Мен валий эмасман. Ўликларга яқин бўлганим учун кўнглим баъзан бир нималарни сезади. Бошқасини билмайман. Шумқадамнинг қадамидан ёмонликдан бошқа яна нима кутиш мумкин? Кўнглим бир нарсани сезиб турибди: шу икки-уч куннинг ичida валади зино ўлса керак. Унга янги гўр кавламайман. Кўкшапканинг лаҳадини очаман-у суюкларини суриб, шунинг ёнига қўяман. Икки фосиқ биргалашиб ётаверади... Сенам... – Гўрўғли Абдураҳмон табибга синовчан тикилди: – «жаноза ўқиймиз», деб хархаша қилмайсан.

– Мусулмоннинг боласига жаноза ўқиши керак, –
деди Абдураҳмон табиб ишонқирамаган оҳангда.

– Қанақа мусулмонликни айтасан? Ким эди мусулмон? Кўкшапками? Унга ҳам жаноза ўқиган эдиларинг. Қанчадан-қанча иймон эгасини куритди? Ўша ҳам мусулмонмиди?

– Ўтган гапларни, гуноҳларига ўзи жазо олади у дунёда.

– Ўтган гаплар, дейсанми? Гўрга киргач, ҳаммаси унуглидими, тупроқ ҳамма абраҳиликларни кўмиб ташлайдими?

– Китобда «Нажо ал-махфуфун ва ҳалакалмаскулун», дейилган...

– А? Нима дединг?

– «Юки енгиллар нажот топади, гуноҳи оғирлар ҳалок бўлаверади».

– Тушунмадим? Қаерда ҳалок бўлади?

– «Ҳалок бўлаверади» дегани дўзахга тушишини билдиради.

– Бу гапинг тўғри.

– Бу менинг гапим эмас, мен илми йўқ бир одамман...

– Илмим йўқ, деб паст кетма. Ҳар балога ақлинг етади. Домлаларга ҳам баъзан гапинг ўтишини мен билмайманми? Фақат ҳужжатинг йўқ сенинг. Лекин ўша катта домлаларга айт: Кўкшапка тоифасидагиларга жаноза ўқилмаса, унга ўхшаганларнинг кўзлари очиларди. «Менам шу кўйга тушмай», деб гуноҳдан тийилишарди. У дунёдаги жазо қанақа бўлишини ким билиб ўтирибди?! Бу дунёдагисини ҳам кўрсатиб туриш керак. Сен нима десанг деявур, Қоравойга ўзим кўрсатаман. Унинг бу ерга келишига яқин қолди. Аслида унга бу ердан жой бермаслик керак...

«Бу дунёдагисини ҳам кўрсатиб туриш керак...»

Гўрўғлининг қўлидан келганида кўрсатишдан тоймас эди. Афсуски, унинг ўликларни кўмишдан ўзга иши йўқ. Бундан бошқа масалаларда ундан би-

ров маслаҳат ҳам сўрамайди. Кўчада кўрганида саломлашгиси келмайдиган, қўл бериб кўришишдан ҳазар қиласидиган одамлар яқинларидан бири ўлганда қабристонга келиб у билан қадрдонлар каби омонлашади. Кейин дардини айтиб, «қаердан тузукроқ гўр қазиш» бўйича маслаҳат сўрайди. Кўчада назарга илмаганларидан Гўрўғлиниң жаҳли чикмайди, бунга кўникиб кетган. Одамлар майит учун жой танлай бошлишганида ғаши келади. Баъзан дуч келган ери кўрсатиб «Энг яхши жой шу. Ҳудди шоҳ Жамшиднинг кўшкида ётгандай мазза қилиб ётади», деб пи-чинг қиласи. Феъли айниб турган бўлса, «яхши жой талашиш кибрли тириклар орасида – ер тепасида бўлади, ернинг таги бир хил: яхши-ёмон жой йўқ, қаерда ётса ҳам барибир лаҳад қуртлари еб адо қиласи», деб тўнғиллаб кўяди. Бу дунёда кўп ёмонликлар қилиб ўтган одамга гўр кавлагиси ҳам келмайди. «Бунақаларга жаноза ўкиш керакмас», деб фақат Абдураҳмон табибга айтган. Азбаройи юраги қон бўлиб кетгани учун шундай деган. Аслида дунёдаги ғаламисликларга эътибор қилмаса ҳам бўлади. Унга нима! Битта қорнидан бўлак ғами йўқ. Дунёда ким гўрковларнинг подшоси бўлибди-ки, у буни орзу қилса! Қишлоқнинг бир чеккасида, дунё ташвишларидан нари яшаётгандай туюлгани билан бир қавмнинг иккинчи қавмга зулм қилишига бефарқ қараб тура олмасди. Бу зулмга ўзи жазо ҳам ўйлаб топган, бу жазо усули ҳатто Абдураҳмон табибга ҳам сир эди. Майит лаҳадга жойланганда юзи очилиб, боши қиблага мояил қилиб буриб кўйилади. Кўкшапкага ўхшаганлар кўмилаётганда Гўрўғли бу одатга хилоф қиласиди: «Умрини куфрда ўтказгандан кейин ётиши ҳам шундай бўлсин, Каъба томонга қараб ётишга арзимайди» – унинг ҳукми шу эди. Ёмонлар ҳақида гап кетганда бир куни у Абдураҳмон табибга: «бунақаларга лаҳад кавламай факат белдан пастини кўмиш керак, чириб йўқ бўлиб кетгунича одамлар унга тупуриб

ўтсинглар», деганди. Абдураҳмон табибга унинг бу гапи ғоят шафқатсизлик, ҳатто ваҳшийлик бўлиб туюлиб, уни анча койиганди. Аллоҳ томонидан белгилаган қабр азоби ҳақида гапириб, унга танбеҳ берганди. Ҳозир бу гапни айтмаган бўлса-да, ота-болани бирлаҳадга қўймоқчи бўлиши унга малол келди. Ота ёки она қўйилган лаҳадга орадан йиллар ўтиб, фарзандни қўйиш одати бор. Бундан ҳеч ким оғринмайди. Ҳатто баъзилар «отам ётган лаҳадга қўйинглар», деб васият ҳам қиласилар. Аммо Гўрӯғлининг ҳозирги гапидаги оҳангдан жазо ҳукмини англаш мумкин эди. Абдураҳмон табиб малоллангани билан ҳозир баҳслашгиси келмади.

«Демак, Қоравойнинг хавотири бежиз эмас», деб ўйлаган Абдураҳмон табиб бу ҳақда бошқа сўзламай, «Ўшдан сизга нима олиб келай?» деб сўради.

– Мен димогига қурт тушганлардан эмасман, бир чеким яхши нос билан кўнглимни олиш мумкинлигини ўзинг биласан.

Абдураҳмон табибга унинг одати яхши маълум: носдан бўлак ҳар қандай совға-саломни қайтаради. Совғанинг оқибатини миннат деб билади. Мусулмон биродарларнинг бир-бирларига ҳадя қилишлари яхши фазилат эканини айтиб, тушунтиришга ҳаракат қилса ҳам, ўз билганидан қолмайди.

Абдураҳмон табиб автобусда кетаётганида кулогига чалинаётган йўловчиларнинг гапларига дикқат қилди. Хавотирга арзирли сўз эшитмади. Шаҳарга тушиб ҳам атрофни зийраклик билан кузатди. Ҳамма ўз ташвиши билан банд. Чойхоналарда ошхўрларнинг гурунги авжида – зулм олови ёқилишидан дарак йўқ.

Сой бўйидаги чойхонада ҳордиқ чиқаргач, изига қайтаверишни ҳам ўйлади. Бироқ, қўнгил хотиржамликка бегоналигича қолавергач, қиз ўргониницида бир кеча қолишга қарор қилди. Болаликда ялангоёқ кўча чангитган ошналарининг қатори анча сийрак-

лашиб қолган. Ўн тўрт дўсти қишлоқда бўлса, битаси – Мирзаали Ўшда. Аслида унинг бу шаҳарда киладиган юмуши йўқ. Қишлоқда туғилиб улгайган одам танлаган касб шаҳардан бошка ерда бўлмаса, иложсиз. Мирзаали муаллимлигини қишлоқда қилса ҳам бўлаверарди. Аммо у тақдир ипини хотини тақдирига шунчалар қаттиқ боғлаганки, узиб келолмайди. Хотинининг тайин хунари йўқ. Аввал комсомолда ишлаб юриб, сўнг каттами-кичикми амалларни эгаллади. Осмони фалакда учган дамлари ҳам бўлди. Мирзаали ўшанда оддий муаллим эмас, «раҳбар хотиннинг эри» деган мартабада юрди. Яхшики, эсини йўқотмади – таклиф этилган мансабларнинг биронтасини қабул қилмади. «Осмонда учайтган хотинимнинг эрта-индин ерга қўниши бор. Эплаб қўнса – хўп-хўп, патлари юлиниб тушса, менам энамни кўраман. Хотинимга қўшилиб учсан, мен қўнишнинг уддасидан чиқолмайман. Самоворхонага чикқанимда бирор менга чой узатмай ҳам қўяди», деб тўғри ўйлаган экан. Хотини комсомолда ишлаб юрганида бир киз тукъсан эди. Кейин «осмонда учишимга халал беради», дебми туғишдан ўзини асраганди. Ўзининг ҳаётини таҳлил этиб тўғри хулоса чиқара олмаган хотин энди кизини парвозга тайёрларди. Осмондаги қизининг қаноти соясида ҳузурланиб яшашни истарди. Она-боланинг бу ҳаракатларидан энсаси қотган Мирзаали уйда камроқ бўлиш учун ҳам мактабдаги ишини ташламаган эди. Мактабда эр ўқитувчилар деярли қолмагани сабабли бу қариянинг ишдан бўшаб кетмаслиги директор учун муддаонинг ўзи эди. Аввалги директорлар «амалдорнинг эри мансаб курсимни олиб қўймасайди», деган хавотирда юришарди. Энди бундай хавотир ҳам йўқ. Мактаб – Мирзаалининг жони-жаҳони бўлиб қолган. Самоворхонадаги гурунглари эса уни ортиқча ташвишли ўйлардан ихота қилади. Қишлоқдан дўстлари ёки қариндошлари келиб қолган кун – у учун байрам.

Абдурахмон табиб уникига кўпам келмайди.

Келиб-кетиб турадиган ошналари орқали унинг ахволидан хабардор бўлиб турди. Камқатнов дўст меҳмонга келса, бошқаларга нисбатан азизроқ туюлади. Шу туфайли очик эшик остонасида Абдураҳмон табиб кўрингач, Мирзаали шодланиб кетди. Гарчи икки ҳафта илгари қишлоқдаги тўй баҳонасида кўришишган бўлса-да, дўстининг меҳмон мартабасида ўз уйида кўришдан қувонди.

– Кўнглим сезган эди, – деди у фотиҳа ўқилгач. – Бугун имтиҳоннинг охиригача ўтиргим келмади. Имтиҳон деса, энсам қотадиган бўлиб қолган. Ўқувчиларнинг ота-оналарига солик солишган – тоғора-тоғора таом келади. Имтиҳон тугагач, зиёфат бошланади. Бирор рози бўлиб юборади, бирорининг кўнгли оғрийди, бошқаси «еб тўймагурлар, тешиб чиқсин-а!» деб қарғаб қолиши ҳам мумкин. Шуни ўйлаб, томоғимдан бир тишлам нон ҳам ўтмай қолади. Тушликни самоворхонада қиласман, деб келавергандим. Уйга ювениш баҳонасида кирудим, яхшиям кирганим, кўнгил яхши одамнинг тафтини сезади-да! Энди сен жижжа ўтириб турасан, мен дарровла жизбиз қилиб ташлайман. Ё самоворхонага чиқамизми? Ош сузиладиган вақт яқинлашиб қолди. Текинга емаймиз, ҳар куни тўкма бўлишини биласан-ку?

Кейинги таклифни ишончсиз оҳангда айтди. Самоворчининг ҳар куни бирор буорса-буормаса пешинга ўн кишилик палов дамлаб қўйишини, насибаси қўшилганлар таомни еб, ҳақини тўлаб кетишлирини Мирзаали аввал ҳам айтиб, дўстини чорлаган эди. Шундай чорловларнинг бирида Абдураҳмон табиб «Кўй, ўша гийбатхонангни, бир сўрида арокхўру бир сўрида намозхонларнинг ўтириб ошхўрлик қилишларини кўришга тоқатим йўқ», деб кескин рад этган эди. Таклифнинг ишончсиз оҳангда айтилишига сабаб шу. Бу сафар Абдураҳмон табиб нишини санчиб олмади – таклифни бош чайқаб рад этди.

– Сен оёғи куйган товукдай питирлайверма. Кумғонингни қўйиб, чойга сув қайнатсанг бас. Тугун-

ни очгин-чи, иккита чолиинг тушлигига етарли нимадир бордир?

Тугуида икки эмас, ўн кишининг майшатига етиб ортадиган қимиз, қайнатиб пиширилган гүшт, патир, сомса бор эди. Чой дамланиб, бир пиёладан ичиб, сомсага қўл узатишганда кўча эшиги очилиб, дипломат кўтарган гавдали одам кириб келди. Кутилмаган меҳмонга кўзи тушган Мирзаали ўтирган ерида «Ие, Насриддин, ризқли йигитсан-да, кел, келавер», деб унинг яқинлашишини кутди. Эшикни тақиллатмай, киришга изн сўрамай ғўддайиб кириб келаверган бу одамни танимаган киши уни ё безбетликда, ё одобсизликда айблаши мумкин эди. Абдурахмон табиб уни олдиндан билгани, айниқса, касб-коридан хабардор бўлгани учун унинг қилиғидан ғашланмади.

Насриддин ҳамма жойга ҳам бу каби мулозаматсиз кириб келавермасди. Мирзаалининг оиласига кўп йиллик қадрдон бўлгани учун ҳам бу ерни ўз уйидай кўради. У йигитлик чоғида Мирзаалининг хотини билан бирга ишлаб, опа-укадай бўлиб кетганди. Никоҳ тўйига ҳам Мирзаалининг оиласи бош-қош бўлган эди. Кейин ўқишига кетди. Мирзаали олий маълумотли йигит аспирантурада ўқиб, олим бўлиб қайтар, деб ўйлаган эди. Йўқ, ўқиши бошқача экан. Аввал Фрунзеда ишлаб юрди. Кейин хотини билан ажрашиб, Ушга қайтди. Мирзаали бунинг сабабини сўраганда «Пойтахтнинг ҳавоси ёқмади», деб маъюс кулимсираб кўйди. Йигитнинг тақдирига доир саволларга Мирзаалининг хотини «у билан ишингиз бўлмасин», деб тўмтоқ жавоб қайтарди. Мирзаали бирон тайин ерда ишламаётганидан ажабланса ҳам, бошқа сўраб-суриштирмади. Ўша дамларда Насриддин бирон хонадонга камқатнов бўлиб қолганди. Мирзаали билан кутилмаган жойларда учрашиб қолганда ниманидир яширишга урингандай, ҳатто саросима тўрига тушгандай бўларди.

Мирзаали муаллимларнинг йигини баҳонасида Фрунзега борганды Насриддинни ресторанда учратаман, деб ўйламаганди. Бу сафаридан икки кун олдин у Таласга кетаётганини айтиб эди. Насриддиннинг хотини асли таласлик эди. Йигит институтда ўқиб юрган кезлари бу гўзални севиб қолганида унинг эр кўрган жувон эканидан бехабар эди. Билгандан кейин ҳам севгисидан кечмади. Европаликларга ўхшаб, «муҳими қизлик номуси эмас, муҳими – муҳаббат», деган ақидада маҳкам турди. Танлаганининг жувон эканини ҳаммадан яширишга уринди. Ҳатто Мирзаали ҳам бу сирни улар ажрашиб кетишгандан кейин билди. «Мен ўқишидагимда яна биринчи эри билан топишиб қолибди. У бузук эмас, фақат биринчи эрини ҳалиям яхши кўрар экан», – деб уни оқлаганди. Бу гапни ўша ресторандаги учрашувда айтганди. Мирзаали кечки пайт машнат мақсадида эмас, қорин ғамида кирганди бу ресторанга. Рестораннинг бир четида қандайдир таниши билан ўтирган Насриддинни кўриб, ажабланди, аммо олдига бориб сўрашмади. Насриддин ҳам уни кўрди, аммо у ҳам келиб кўришмади. Чиқиб кетаётганида у томон бир қараб кўйиш билан чекланди.

Мирзаали меҳмонхонага қайтиб, ётишга чоғланган пайтда навбатчи аёл эшикни тақиллатиб, ҳовлида бир киши йўқлаётганини билдириди. Бу шаҳарда Мирзаалининг танишлари ҳам бор эди. Шулардан бири келгандир, деган хаёлда ташқарига чиқиб Насриддинни кўрди-ю, таажӯубланганини яширмади. Насриддиннинг таклифи билан кўчанинг нарига бетидаги бокқа ўтишди. Ўриндиқقا ўтиришгач, у қўлтиғидаги газета ўрамини очди. Фижимланган газетани дастурхон ўрнида ёйиб, бир шиша арок, битта пиёла, паррак-паррак қилиб кесилган колбаса ва нонни ўртага кўйди-да, айбдор одамнинг овозида «Хафа бўлмайсиз, ака, бунака ўтиришимиз жуда-а хунуг-у, омма бошқа чорам йўқ», деб кўйди. Мирзаали яхши даврада бўлса оз-оз ичарди. Ҳозир бу аҳволда ичгиси келмаса ҳам,

Насриддиннинг кўнглига қараб, бир-икки ҳўплаган бўлди. Ширакайф ҳолда келган Насриддин эса икки пиёлани тўлдириб ичгач, чулдираш даражасига етиб, арзи ҳолини айта бошлади.

— Сиз мени ҳар жойда кўриб ажабланардингиз. Бутун ҳам ҳайратландингиз. Таласга кетяпман, деб сизга ёлғон гапиргандим. Мен бу ерга бир одамнинг изидан келдим. Ишим шунаقا. Ҳа... — у шундай деб хўрсинди, — ишим шунаقا. Мен номининг ўзиёқ кишини ҳуркитиб юборадиган идоранинг хизматини қиласман. Одамларни пойлайман, одамлардан сир оламан. Менинг бунақа ишда ишлашимни ота-онам ҳам билмайди. Билишга ҳақлари ҳам йўқ. Мен аспирантурада эмас, шуларнинг ўқишида ўқиган эдим. Аълога ўқидим. Лекин менга шу паст ишни беришди. Нимагалигини биласизми? Чунки мен ўз фикрига эга бўлган одамман! Ўз фикрига! Падарига лаънат бунақа мустакил фикрни. Ўз фикрига эга бўлган инсон ўз илдизига ўзи болта уради, — у яна хўрсинди. — Лекин мен бошқача яшай олмайман. Буларга ур деса урадиган, от деса отадиган одам керак. Мен унақа эмасман, ака!

— Унақа бўлмасанг, ишингни ташлай қолмайсанми? — деди Мирзаали соддалик билан.

Насриддин афсус билан бош чайқади. Яна бир оз арзи ҳол қилгач, «жон ака, бу гапларимни бирор билмасин», деб хайрлашган эди.

Орадан уч ҳафта ўтгач, самоворхонада тасодифан учрашиб қолган каби сўрашиб, «ака, ҳар хил жойларга бормай, эҳтиётроқ бўлиб юринг, сизни кузатиш топширилди», деди.

— Ўқитувчини ҳам кузатасанларми? — деб ажабланди Мирзаали.

— Мақсад — опанинг изларига тушиш. Агар сиз сал чакки юриб қўйсангиз, бу ҳам бир баҳона бўлади-да.

Гапини шу тарзда қисқа қилди-ю, кетди. Мирзаалининг «чакки юрмаслиги», тўғрилиги хотинини амал курсисида ушлаб қололмади. Амал курсисига

бировнинг кўзи тушмасин, тушдими, юлиб олмагунча кўймайди.

Ўшандан кейин Насриддин Мирзаалининг уйига аввалгидай серкатнов бўлиб қолди. Куруқ келмасди, ёнида бир шиша ароқми ё конъякми бўларди. «Мендан бўлак бошқа ҳасратдоши йўқ, бечоранинг», деб Мирзаали унинг раъйига қаради. Шундай ўтиришларнинг бирида Абдураҳмон табиб келиб қолиб ғашланганида Мирзаали Насриддиннинг кимлигини, дардини унга айтиб кўйганди.

Ҳозир Насриддиннинг мулозиматсиз кириб келиши шу сабабли ҳам Абдураҳмон табибнинг ғашини келтирмаганди. Уни кўриб, «бир нима бўлса, аввал шулар билади», деб кўйди.

Насриддин «Раҳмон акам келиб қолибдилар-да», деб сўрашганда, дипломатини очиб бир шиша ароқ, икки шиша пиво чиқариб кўйганда аччиқланса ҳам сир бой бермай ўтирди. Насриддинда оз бўлса-да, инсоф, уят бор эди. Аммо шу оз инсоф ва уят уни ичкиликдан тутиб тура олмасди, факат узр сўраб қўйишга кифоя қиласди.

– Раҳмон ака, гуноҳимни кечириб, бу сафар рухсат берасиз-да, – деди.

– Гуноҳни кечирадиган мен эмасман. Буни мен ҳаром қилмаганман, рухсатни ҳам мен бермайман, – деди Абдураҳмон табиб кескин оҳангда.

Нафс қитиклаб тургани учун Насриддин Абдураҳмон табибнинг аччиқланганини сезса ҳам, аҳамият бермади. Унга «дастурхонга марҳамат қилсинлар», деган лутф шарт эмасди. Мирзаали «яна уришиб ҳайдаб солмасин», деган хавотирда дўстига қараб кўйди. Абдураҳмон табибнинг лаблари сал титрагани билан, ўзини хотиржам тутишга интилишини сезгани учун хавотиридан кутулмади.

Насриддин ҳали тоғдан, ҳали боғдан гапириб ўтираверди. Ароқ шишаси яримлаб, бир шиша пиво ичилгач, муштими билан кўкрагига уриб-уриб кўйдиди, Мирзаалига қараб ҳасратини бошлади:

– Ака, мана бу ерим ёниб кетяпти! Офат ёғилиб келаётганини индамай кузатиб туришга энди қурбим етмайди.

Мирзаали бу гапдан сергакланиб:

– Қанақа офат? – деди-да дўстига қараб қўйди.

Кутилмаган бу гап Абдураҳмон табибни ҳам эътиборсиз колдирмади. Иккала чолдаги ўзгаришни сезмаган Насриддин эса ҳасрат оҳангидаги гапларини давом эттириди.

– Жой талашиб тўпланаётганларни эшитмадингизми?

– Тўпланишаётган бўлишса, ижроқўм дардларини эшитар, – деди Мирзаали.

– Эшитмайди, – деди Насриддин алам билан бош чайқаб. – Эшитмайди. Уша тўданинг ичидаги бизнинг одамларимиз бор, уларни ўшалар қўзғаяпти. Буни фитна дейдилар... – Насриддин бошини қуи солиб жим бўлди. Кейин шу алпозда ўтирганича давом этди: – одамлар фитна қаердан чиқишини билишмайди. Қирғин бошлангандан кейин дод-вой қилиб юраверишади. Ҳамза Ҳакимзодани биласиз-ку, диндорлар ўлдирди, деб руҳонийларни қириш бошланган эди. Аслида уни ўзимизнинг азamat чекистларимиз ўлдириб беришганди. Бу чиройли ўюштирилган фитна эди. Бу фитнанинг бошида турган одам кейинчалик қаҳрамон раис бўлиб донг таратди. Аслида у фитна қаҳрамони эди. Сизлар бунақа гапларни билмайсизлар...

– Ер талашишдан фитна чиқаришмоқчими? – деб сўради Абдураҳмон табиб, кизиқишини яшира олмай. – Бундан мақсад нима?

– Мақсадми? Раҳмон ака, сиз телевизор қурасизми, газит-пазит ўқийсизми? – Абдураҳмон табиб «йўқ» деган мазмунда бош чайқади, буни кўриб Насриддин аянчли жилмайди. – Шунақасизлар-да! Дунёни сув олса, тўпикларингизга чиқмайди. Кейин эса вой-войлаб юраверасизлар. Ўрис Европанинг ярми-

ни бўшатиб берди, дарё-дарё кон түккани билан ба-рибир Афғондан айрилди, Болтиқбўйи ҳам қўлдан кетай деб турибди. Кавказ билан Ўрта Осиё қалқиб қолса, шўри қурийди. Кавказда армани билан озарбай-жонни бир-бирига қайраб қўйди. Энди бу ишни бизда ҳам қилиши керак. Бултур Фарғонада катта машқ қилишди. Шу баҳонада Европадан ҳайдалган аскарла-рини биз томонларга олиб келиб жойлади. Булар мас-хара томошаларни қўяверади, биз эса мирикиб томо-ша қиласкеради. Бугун бизга олтинчи июнда сергак бўлиб туриш топширилди. Эҳтимол, яна бир томоша бошланиб қолар...

– Томошада қамоқдан чиқарилганлар қатнашмай-дими?

Бу саволни эшишиб, Насриддин Абдураҳмон та-бибга ажабланиб қаради:

– Буни қаердан билдингиз?

– Газит ўқимасак ҳам, қулоқ эшигади.

Бу гап Насриддиннинг кайфини тарқатгандай бўлди. Сергак тортиб, Абдураҳмон табибга узоқ ти-килди. Кейин шишаларни дипломатига жойлади.

– Бу ҳаром нарсалар сизнида турмасин. Менинг тушлигим тугади, кета қолай, – деб ўрнидан турди.

Абдураҳмон табиб ўзи учун керакли гапни олган эди. Шу боис, кўп ўтирунгани, шаҳарда бошқа ишла-ри ҳам борлигини баҳона қилиб, кетишга чоғланди. Уйига қайтгач, Жўлон қирғизнинг кутиб ўтирганини кўрди.

VI б о б

1

«Сиз бош ўғилсиз, қасос олиш керак!»

Дунё наҳот факат қасосдан иборат? Инсон наҳот кулоғига аzon айтилган дамдан бошлаб, то сўнгги нафасигача қасос учун яشاши керак? Отанинг то-

мирларидан қонгина эмас, касос ўти ҳам фарзандга ўтадими? Сүнг... қон билан кирган – жон билан чиқадими?..

Синглисинг талабидан кейин Абдусамад шу каби саволлар гирдобида қолган эди. Бу гирдоб каршисида у ўзини бир хас каби ҳис этарди. Саволларга жавоб излагани каби гирдоб уни қаърига торта-верарди. Бу гирдобдан қутулиш баъзан унга имконсиз бўлиб туюларди.

«Адамни ёлғиз қўйиш мумкинмас...»

Зайнаб айтмаса ҳам бу ҳақиқатга ақли етади. Тақдир ёзуғи бутамлатиб қўйган отасининг аҳволини билади, дардига шерик бўлиш нима экан, барча ғамандухларини ўзига олмоқликни истайди. Аммо отаси ўзига дардкаш истайдиган тоифадан эмас. Айниқса, «ўзимгагина берилган» деб ҳисоблаб, дардига фарзандининг шерик бўлишини истамайди.

Кўнглида Олмон ўлкасига қайтиб бориш умиди бўлса-да, Абдусамад дилидагини тилга чиқаришга қийналиб юрганида мушкулини отаси осон қилиб берди. Асадбек фарзандларининг чет юртларда баҳт то-пишини истарди. Истаги ҳақиқатга айланашган дамда бошига бу кулфатнинг тушиши уни гангитиб қўйгани билан, умидидан узиб юбора олмади. Абдусамадга ёки келинларига кўзи тушиши билан Абдулҳамидининг гоҳ кулимсираган, гоҳ маъюс чехраси кўринаверарди. Ўғлининг кўзларидан «менинг ўлимимга сиз сабаб-чисиз», деган маломат учқунлари сачрагандай бўлди, бу учқунлар юрагини куйдира-куйдира адо қила бошлади. Шу азобда юрганида доктор Худоёр қўнғироқ қилди...

Асадбек қарорини хотинига маълум килишда ўғли билан келинларнинг ўқишлиарини баҳона қилди. Ишонтириш учун «Ҳамид ҳам айтувди», деб изоҳ берган бўлса-да, ўзининг кўнгли Манзураникidan баттарроқ хижил эди. Манзура «Вой адаси...» деб ҳасратини бошлаётганида «Хоҳлассанг бирга бор»,

деди-ю, «яна гапимга кўнса-я!» деган хавотирда юраги ўйнаб кетди. Хотинининг кўз қарашидан «ўғлимнинг арвоҳини чиркиратиб ташлаб кетаманми?» деган маънени ўқиб, кўнгли хотиржам тортди.

Ўғлининг вафотидан анча илгари тушида Кесакполвоннинг тобут олдида ўйнаб бораётганини кўрган эди. Ўша манзара гарчи тушида кўринган бўлса-да, хотирасига мудҳиш чизгиларини чизиб кўйганди. Кесакполвоннинг «Менга тўй, сенга аза...» деган гапи тушида айтилган бўлса-да, ёдига михланиб қолган эди. Орадан кунлар, ҳафталар ўтаётгани билан хотира ўз кучини ўтказиб, Асадбекнинг юрагини темир тирноқ каби тирнарди.

«Менга тўй, сенга эса аза...»

Кесакполвоннинг ўлиб кетиши балки ўзи учун тўйдир. Тўғри, ўлим олдидан уч-тўрт дақика азоб чеккандир. Аммо йиллар давом этадиган турмуш ташвишларидан, азобларидан кутулиб кетди-ку?! Асадбек эса тирик қолди. Турмушнинг азобли, эҳтимол заҳарли шарбатларидан яна ва яна ичиш учун тирик қолдими? Аста-секин ўлгандан кўра бир неча дақикада ўлиш баҳт эмасми?

Манзура-чи? Қисмати унсиз йиғлашдан иборат бўлган бу муштипар баҳтли эдими? Баҳт ўзи қанақа бўлади?.. Баҳт нималигини билмай туриб, Худога «ҳеч бўлмаса баҳтнинг ушоғини бер», деб муножот қилиши кўп ажабли ҳолдир.

Бу оиласа баҳт тилаш балки ножоиздир. Баҳт тилашдан олдин иймон тиламоқ зарурроқдир. Иймон тилаб қилинган дуо ижобат бўлгач, баҳтнинг ўзи келар?

Иброҳим алайҳиссалом ўғиллари Исмоил алайҳиссаломни курбонлик қилишга буюрилганлари учун фарзандларини қалб фарёди билан тоқка бошлаган эдилар. Асадбекка фарзандларини курбон қилиш буюрилмаган эди. Бу азобни, бу жазони ўзи танлади. Шундай экан, додини кимга айтсан?!

Муҳиддин ота унинг яхши томонга ўзгаришини

умид қилган, аммо бир тоифа одамнинг ҳеч қачон ўзгармаслигини, у фақат тақдирдан қочиб кутулишга ҳаракат қилишини ўйлаб кўрмаган эди.

Ҳар бир одамнинг кўзлари бор. Лекин бир буюмни ҳар одам ҳар турли кўринишда кўради. Бахт буюм эмас. Кўзга кўринмайди. Ажабки, ҳар одамнинг бахт ҳақидаги тушунчаси ҳар хил. Ҳатто энг яқин одамларнинг бахти турлича.

Асадбек отаси учун қасос оладиган дамни ўзи учун бахт чўққиси деб белгилаган эди. Қасос дегани ҳомиладор бўладими экан, янгилари туғилаверди.

Кесакполвон баҳтини бойликда кўрган эди – ҳаммасини ташлаб кетди. Ҳатто кафанлик ҳам насиб этмади. Агар тириклигида бирор «кафанга ўралиб, жаноза ўқилиб, лаҳадда бус-бутун ҳолда чўзилиб ётиш ҳам бахт», деса уни жиннига чиқарган бўларди.

Маҳмуд янги акаларининг бағрига кириб,чувриндилик ҳолидан чиққан дамларда ўзини баҳтли деб хисоблаган эди. Кейинги умрини баҳтми ё кулфат эканини фарқламай кетди.

Бир қориндан тушганларнинг баҳти ҳам ўзга-ўзга эди.

Зайнаб баҳтини отаси юрган кўчалардан излаб топмоқчи...

Абдуҳамид отасининг иймон кўчасига ўтганини кўрганида баҳтли бўлажагини умид қилиб эди. Шу умид билан кетди.

«Адам бунақа ишларга бизларни яқинлаштирамайдилар. Агар аралашибизни истасалар бизларни ўқитмасдилар», деб синглисини қасос йўлидан қайташишга уринган Абдусамад эса баҳтини илм йўлидан топишига ишонарди. Аммо бу йўлда заҳар солишига тайёр турган илонлар борлигини хаёлига ҳам келтирмасди.

У Москвага учеб келишлари билан профессор Зиновьевга учраб кетиши шартлигини отасига билдириди. Асадбек бу одамнинг кимлигини, нима учун учрашиш

шартлигини тушуниб турган бўлса-да, ўғлини аввалги ўқиш жойига боришини истамади. Абдусамад хорижда билим олаётгани билан эски жойидан бутунлай узилмаган, вақти-вақти билан «илмий ҳисобот» бераб туриши шарт эди. Мехмонхонага жойлашишгач, Абдусамад Иликонинг икки йигити ҳамроҳлигига университетга борди. У хорижга кетаётганида профессор Зиновьев декан эди, унинг проректор бўлганини эшлиб, бошқа бино сари юрди. Зиновьев номи «беш дақиқали мажлис» деб аталган тадбир ўтказаётган экан, икки соатга яқин кутишга мажбур бўлди. Мажлис тугагандан кейин ҳам профессор уни дарров қабул қила қолмади. Абдусамаднинг илтимосини етказган котибасига «кетиб қолмасин, кутсин», деб тайинлади. Мажлис ноҳушроқ ўтган шекишли, Абдусамад кирганида «энди менга сенинг дардинг етишмай турувди», дегандай норози қиёфада боқди. Абдусамад таътилга келганини, Абдуҳамидинг вафот этганини айтиб, энди ўқиши давом эттириш учун қайтаётганини билдирганида Зиновьев пешонасини силаб қўйди.

– Хабарим бор, таъзиямни қабул қил, – деб бир оз сукут саклади.

Абдусамад «Кимдан эшитганийкин?» деб ўйлаб, саволига жавоб топишга улгурмай профессор гапини давом қилди:

– Сен билан бафуржга гаплашишга вактим йўқ, ранжима. Мени илмдан юлиб олиб, бу ерга михлаб қўйишиди. Аслида бу олимнинг жойи эмас, биронта Темир одамни ўтқазиб қўйишиша ҳам бўлаверарди. Бу ерда ўтириш учун илм бўлиши шарт ҳам эмас. Сен мени роса кутиб, бу одам стол бандасига айланаб қолибди, деб ўйлагандирсан? Сен ўйламассанг ҳам, бошқалар шу фикрда юришибди. Мен бу ерга бирон чаласавод ўтириб, илмлиларнинг бошини гангитмасин, деб келган эдим. Шу ерга ўтиришим билан илмлилар мендан узоқлашишиди. Энди пушаймон бўлиб ўтирибман... Ҳа, майли, бу сенинг бошингни

қотирадиган масала эмас. Шунчаки айтдим-қўйдим. Вақти келиб, сенга шунақа лавозимни лозим кўришса, яқин кела кўрма. Яхши-яхши дўстларингдан айрилиб қоласан. Сенга бир гапни айтиш учун «кетмай турсин», деган эдим. Сенларнинг бахтингга «қайта қуриш» деган бетартиблик юзага чиқиб, ҳамма дарвозалар очилди. Бўлмаса, Германияни тушингда ҳам кўрмасдинг. Немислар битта мамлакатга бирлашгани билан, «Гарбий Германия» деган тушунча сиёсатчи-ларнинг, айниқса, анави идорамизнинг кун тартибидан олиб ташлангани йўқ. Мен отанг ўртага қўйган одамлар туфайли эмас, ўзларингда қобилият борлиги учун йўлларингни тўсмадим. Энди бир нарсани миянгга қуйиб ол: биология билан физика бир нуқтада бирлашиши мумкин, аммо илм билан сиёсат бир қозонда қайнай олмайди. Тушундингми?

Абдусамад унинг муддаосини англамаган эди, очиқ айтишга хижолат бўлиб «сал-пал тушундим», деб қўйди. Зиновьев унга муғомбирлик билан тикилиб, бош чайқади:

– Ёлғон гапирма, сен ҳали ҳеч нарсани тушунмадинг. «Қайта қуриш, демократия» дегани кўлмакдаги қоғоз кемага ўхшаган бир нарса. Бирпас қалқиб туриб, кейин шалвираб, пачақланиб кетади. Ҳаво ёки сув қатламларини биласан. Бир қатламда кучли оқим бўлади, яна бири сокин туради. Ана шу сокинликка ишонган ёмон. Берлин девори қулагани билан, бу деворни тиклаган ғоя яшаб турибди. Хўп, фалсафани бас қилиб, муддаога кўчай: уч ҳарфли идора сенлар билан қизиқиб турибди. Тўғри, бу фавқулодда ҳодиса эмас, четга чикқанларнинг ҳаммаси уларнинг дикқат марказида туради. Эсингда бўлса, кетишларингдан олдин икковингни огоҳлантирган эдим. Лекин уларнинг кейинги суриштиришлари бошқачароқ бўлди. У ерда кочоқ ҳамюрларинг билан ош-қатиқ бўлиб юрдиларингми?

– «Қочоқ» дедингизми? – Абдусамад ажабланиб елка қисди.

– Ҳа. Уларга «Ватан хоини» ёки «хоин» деган лаънат тамғаси Сталин замонида босилган. Замонлар ўзгарди, хукмдорлар ҳам бошқа, лекин бу тамғани анави идора ҳали олиб ташлагани йўқ, шунга ақлларинг етмадими?

– Биз улар билан ош-қатиқ бўлмадик. Доктор Худоёрни ҳисобга олмагандা...

– Доктор Худоёр бошқа масала. У сиёсатга аралашмайди. Унинг атрофидагилар-чи? Уларнинг пи-чирлаб айтган гапларини ҳам бу идорадагилар яхши эшишиб туришади. Сенлар кимнинг кизларига уйландинглар? Қайнотанг «Туркистон легиони»да хизмат қилмаган бўлса ҳам, уларга хайриҳолар сафида турган. Мен буни қаердан биламан? Ўйлаб кўр-чи? Билиб ол: фашизм қораланаr экан, минг йилдан кейин ҳам «Туркистон легиони» худди власовчиларга ўхшаб лаънатланаверилади.

– Власовчилар жангга кирганлар. «Туркистон легиони» ҳарбий ҳаракатларда қатнашмаган.

– Бу чўпчагингга мен ишонаман, чунки менга барабир. Лекин нариги идорадагиларнинг дунёқараши бошқача. Тарих ўзгаради, тарихчиларнинг фикри ҳам ўзгаради. Лекин улар ўзгаришмайди. Сен мен билан баҳслашмагин-у, агар чинакам олим бўламан десанг, сиёсатдан узокроқ юр. Юртдошларингнинг даврасидан коч. Ўқишини бил, бошқа ҳеч нарса билан ишинг бўлмасин.

Зиновьев «гап тамом!» дегандай ўрнидан турди. Абдусамаднинг «насиҳатингиз учун раҳмат», деб қўл узатишдан ўзга чораси қолмади.

Олмонияга қайтганидан кейин ҳам бу насиҳат хусусида кўп ўйланди. Аслида профессор Зиновьев унга ҳайратомуз янгиликни айтмаган эди. Буларни ўзи ҳам биларди. Ўзларининг доимий кузатувда эканликлари тўғрисида Абдуҳамид билан ҳам кўп гаплашишган. Аммо доктор Худоёр таништирган қизлар кўнгилларига ёқиб қолгач, нима қилишсин? Күёв

бўлишгач, бу хонадонга тез-тез тўпланиб турувчи меҳмонлардан қандай қочишсин?

Кизлар кутиб олишга чиқсан ота-оналари ва бошқа яқинлари билан ажиб бир сабр либосида кўришдилар. Кўзлари ёшга, қалблари зардобга тўла бўлса-да, кулфатларини ошкор қилишдан ўзларини тутдилар. Музаффархон куёвини бағрига босганича, ёноғини ёногига теккизиб «инна лиллаҳи ва инна илайҳи ро-жиун», деб йиғламсираб пичирлаганда Абдусамад кўз ёшларини тия олмади. Коронгу осмонини ёритиб турувчи икки юлдузи – икки қизи билан кўришаётганда Музаффархон ҳам кўз ёшларини тўхтата олмади.

Уша куни Музаффархон «кичик бир эҳсон дастурхони»га юртдошларини таклиф этиб қўйган эди. Абдусамад улар билан кўришаётуб, таъзияларига жавобан «Аллоҳнинг иродаси», деб қўйди. Таомлар тановул қилиниб, Қуръон тиловат этилгач, уларнинг одатий суҳбатлари бошланганида эшикка яқинроқ қўйилган оромкурсида даврага бегонадай бўлиб, жимгина ўтирди. Профессорнинг насиҳатини эслаб ғашланди: буларнинг даврасидан қандай қочиши мумкин? Яна ғашланди: бу давралардаги гаплар Масковдаги идорага қай йўсинда этиб борар экан? Абдусамад саволига жавоб топмоқ ниятида мезбонларга бир-бир тикилди. Уларни яқиндан билмагани учун саволи жавобсиз қолди. Бирон кишини хиёнатда гумон қилишдан тийилди.

Аввалги суҳбатларда бўлгани каби бу сафар ҳам баҳс икки киши орасида бошланди.

Қаҳвани ҳўплаб, хузурланган Саъдуллахон хонадон соҳибиға юзланди:

– Музаффархон, кизлариниз кўзларига боқиб, мен ота юртимни кўрган каби ўлдум. Ўнлар бу уйга ота юрт ҳавосин олиб келмишлар. Чўх ҳавас ила боқиюрман ўnlара. Ҳар тун ўлмаса-да, ҳафта бир душимда қишлоғимни, ички ташқи-бўлима бўлинмиш уйимизни кўрмакдаман. Дарвозамиз олдидин оқиб

ўтаётган катта ариқ сувидин тўйиб-тўйибла ичурмисам. Оқин сув кўпригидин ҳовлимиза ўтилур эрди. Кўча томона қарамиш болохона меҳмонхона вазифасини ўтарди. Отхона, кўйхона, молхона сингари бўлимлари бўлмиш ажиб бир кўриниши ҳовли эрди... Икки айвонли бўлакли хоналар... Сузма учун осиб қўйилмиш оқ ҳалталардин тарс-тарс зардоб томчиларининг жома тушмиш овозин ҳали-ҳали эслаймен... Узумзоримиз куз ойлари жаннатнинг чин манзарасига айланур эди... Қани энди ўнлар? – Саъдуллахон шундай деб хўрсиниб қўйди-да, дераза томонда ўтирган меҳмонга қаради: – Ижоза берсалар, муҳтарам афандимиз Яквалхўжа жанобларидин сўрайдурғон сўровларим вордур.

Давра ахлидан ёшроқ кўринувчи, қотмадан келган, қирра бурунли киши «марҳамат қилингиз, сўрангиз», деган каби жилмайиб қўйди. Абдусамад бу кишини энди кўриши эди, шу сабабли унга қараб қолди. Бошқаларнинг кўзлари «нимани сўрар экан?» деган савол билан Саъдуллахонга тикилган эди.

– Америка Бирлашмиш Давлатларида истиқоматда бўлмиш ватандошлар ила тез-тез қўнишмак ёшимиз ўтгани сайин мушкуллашиб боряпти. Муҳтарам афандимизнинг бу ташрифлари кўзимизга тўтиё бўлиб, бизарни чўх сарфароз айлади. Бу кунларда бир қулогимиз бадбаҳт советлар томонда, бир қулогимиз Америка Бирлашмиш Давлатларинда. Советлар заминида кўтарилаётган куюн оқибатин у томонлар ғоят сергаклик ила кузатаётганидин бир оз бўлса-да, ҳабаримиз вордур. Бизим қалбимиз бутун вужудимиз ила юрт сари талпинмоқдадур. Шубҳа йўқ-ки, уммон ортида ҳам шундайдир?

Яквалхўжа қўлидаги финжонни оқ дастурхон устига қўйиб, юзидағи мулойим жилмайишни йўқотмаган ҳолда гап бошлиди:

– Ўзбак қай мамлакатда яшамасин, дарди ҳам, умиди ҳам бирдир. Сизин баҳтиниз шуки, киндик

қонлариниз Ватанда түкилмишdir. Болалик хотира-лариниз банд этмиш оқин сувлар тушиниза кирадур. Мен кабилара Ватандан узокларда туғилмоқлик насиб этмиш, Ватан ҳавосидин ҳали нафас ололганимиз йўқдур. Тиник сувидин ичмаклик бахти ҳам насиб этмади, аммо Ватан туфроғин кўзга суртмак умиди илия яшамакдамиз. Бу томон сафара чикмоғимдин сал бурун Нью-Йоркда бир издиҳом тартиб берилиб эди. Бўтакўз устозимизинг лутфи ила бир ажиб мусобақа ташкил этилурди. Кимки Абдуллоҳ Қодирий асарларин хўб ифода ила ўқуб берса, унга совға ваъда этдилар. Шукрким, ўшал совға каминага насиб ўлди. Китобнинг бир бобини ёддин ўқиб бердим. Гал Кумушбиибининг мактубларига келиб, «Мактубни Кумушбии эмас, Тупроқбиби ёзди», деганимда аҳли издиҳом кўзларинда ёш кўринди. Ватандин айрилган ҳар бир мардум ўзни «тупроқбиби» аламида кўрди... Менга бир дўппи совға килдилар. Инонинг, афандилар, агарчи менга Нобел совринини берган тақдирларида ҳам, бу даражотда қувонмаган бўлур эрдим. Агарчи, Аллоҳ насиб этиб, Ватанга борсам, туфроғини ўпсам ва ватандошлардан бири «Ватанга хуш келибсиз!» деб бошима бир эски дўппи кийгизиб кўйса, дунёдин армонсиз кетардим.

— Болшевикларнинг тўнтариши йилларидаги аж-додларимиз бизарнинг бундай армон ила яшаяжагимизни хис қила олганларида эди, сўнгги томчи қонлари қолгунича ул бадбаҳтлар билан жанг қилган ўлур эдилармикин? — деди Саъдуллахон ўйчан тарзда.

— Бу тарих, муҳтарам афандим, уни ўзгартиб бўлмайди, — деди Яқвалхўжа. Энди унинг юзидағи мулойим жилмайиш йўқолиб, ўрнини жиддийлик эгаллаган эди.

— Ҳа, тарихни ўзгартириб ўлмас. Аммо тарих ҳақинданғи фикрлар-чи? Бизарнинг туфроқка қорилувимииза кимлар айбдор эди? Ҳалигача ўзимиз бир тўхтама келмадик-ку? Сиз, афандим, унда жаноб

Олуорт сингари чўх донишманд олимлар ила суҳбат курмишсиз. Биз Боймирза жанобларининг битиклари билан ҳам танишмиз. Ҳар нечук, аниқ жавобимиз йўқдир.

Саъдуллахон шундай деб доктор Худоёр томон маъноли қараб қўйди. Доктор Худоёр ўзи томон таъна тоши отилганини билиб, ўрнида бир кимиirlаб қўйди-ю, суҳбат икки киши томонидан олиб борилаётгани учун қўшилишдан ўзини тийди.

– Талотўп йилларнинг ҳар бир куни бир жумбок, шу боис ҳеч ким аниқ жавоб бера олмас. Тўнтариш йиллари кимдир бирор қизиллардин умид қилди, кимдир бирор ардоқли бекларимиз қанотига кирди, – Яквалхўжа ниманидир ўйлаб бир зум жим қолган эди, гапни Саъдуллахон илиб кетди:

– Кимдир бирор дам у томон, дам бу томондин умид қилди.

Бу пичингдан сўнг доктор Худоёр ўзини тута олмади:

– Қалбимдасиз, муҳтарам Саъдуллахон афандим, агар сиз маним амаким мулла Эгамберди аканни назарда тутиб бул гапни айтган бўлсангиз, чўх тўғри сўзладиниз. Талотўпда Эгамберди амакимга ўхшаганлар бир эмас, ўн эмас, минглаб, эҳтимолки ўн минглаб эди. Ҳамонки, суҳбат мароми бу томон бурулмиш экан, маним томонимдин изоҳга ҳожат вордур. Бул хусусда сиз жаноба айтиб эдим, қаноат топмаганингиза гувоҳ бўлиб турибман. Яна шуки, ўтмиш ўшал изоҳимдин инимиз Яквалхўжа жаноблари бехабарлар. Вақти келиб, Нью-Йоркдами ё Хьюстондами, қайда бўлса-бўлсин, мавзу бу томон оғса, билиб қўйганлари жоизмикин? Гап шундаки, муҳтарам Яквалхўжа афандим, каминанинг амакилари ўлмиш мулла Эгамберди ака ғоят элпарвар одам эдилар. Ул зот аввали бекларни курол-яроғ, озиқ-овқат ила таъминлаб турдилар. Бул далилни инкор этгувчилар бул орамизда йўқдир. Сўнг кўрдиларки, бекларда илм

Йўқ, хунар йўқ, сиёsat йўқ, ташкилотчилик йўқ, энг муҳими – аҳиллик йўқ. Айтинг-чи, ўзаро иттифокқа келишмайдиган уч-тўрт бек адади йигирма ёки унданда чўх миллион ўлмиш ҳалқни бирлаштира олурми эди? Бунга жавоб ҳар биримизда вордур, аммо нечукким, тилимиза чиқармасмиз. Ҳолбуки, чиқармоғимиз шартдир, токим, авлодлара ибрат ўлғай. Яна талотўп замонига қайтсак, мулла Эгамберди амаким яна кўрдиларки, ўлдирилаётган чўх одамлар ўз улусимиз. Шу каби номаъкулчиликларни кўргач ва яна ҳурриятталаб бекларнинг большевикларга қарши айтарли бирор иш қила олмаслигига амин ўлгач, улардин кўмак кўлларини тортдилар. Бундан хабар топган большевиклар ўзларича хулоса чиқардилар-у, амакимни ўзлари томон оғдиришни орзу этдилар. Бунда ўтирган мухтарам афандиларим талотўп кунларидин салгина кейин туғилгандирлар. Ул бемазагарчиликларни мен бувимдин эшитганман, сизлар ҳам ота ёки оналарингиздин эшитганингиз вордир. Ул замон қишлоқлар кўзғолончи бекларин зўравонлигидин, қизил аскарларин талон-тарожидин безиб эди. Қишлоқларда қиёмат барпо бўлиб, бир ҳафта беклар ҳукм юргизса, улар қочгач, большевиклар келиб қишлоқларни талашиб эди, шундайми? – доктор Худоёр саволига жавоб талаб қилгандай даврадагиларга бир-бир караб чиқди. Улар маънодор равишда бош иргаб кўйишгач, давом этди: – Яна бир ҳафта ўтгач, бу зулм бошка кўринишида давом этаверган. Ҳар икки талончи ҳам ўтакетган тарбиясиз, беадаб ўлганини эшитган чиқармиз? Большевиклар бекларимизни «босмачи» деган ҳақорат сўзи ила атамиш эдилар, ҳалқ то ҳануз шу шармандали атамага қаноат қилиб келяптиkim, ҳозирга қадар инкор этувчи бирон инсоф эгаси у томонда кўрингани йўқ. Эгамберди амаким большевиклардин қурол ҳам олган, тўғри. Лекин қишлоқни ҳар икки тарбиясиздин шу қурол воситаси ила ҳимоя қилган. Бу ҳам аксиома, яъниким, исбот талаб этилмас бир ҳақиқатдир.

– Аждодларимизин энг катта хатолари ҳам айни шудир, – деди Яквалхўжа. – Ҳар бирлари ўз уйларин, ўз қишлоқларин ҳимоя этдилар. Нариги кишлоқ билан эса ишлари йўқ. Бу бир хасталикдир. Англаюрсизким, рус истилоси бошланган кунларда уч хонлик танга талашган уч нодон гадо каби ўз пайтавасига ўралиб яшайверган. Онг эгалари тарихдан ўрнак олмоқлари шартдир. Қани ўша онг? Азизмонлардан узриманки, мавзу юзага чиқиб қолгани учун яна бир-икки сўз айтмоқни ихтиёр қиляпман.

– Марҳамат қилинг, қалбимдасиз, азизим, – деди доктор Худоёр лутф билан.

– Демакким, уч хон нодонлиги туфайли ғарбий Туркистон туфроғида рус истилоси қарор топди. Миллат ғафлата ўралгандин сўнг истилочилар юрт танасига зулукдек ёпишиб, қонларин сўра бошладиларми? Ҳалқ саросимага тушдими? Истиқлол талаб қилиб кўтарилимиш Мұҳаммадали халифанинг тақдирине бўлгани маълум: ўлигини аввалига ҳожатхонага ташламоқни ихтиёр этдилар, аммо ҳалқ ғазабидин қўркиб, оҳақда куйдириб йўқ қилдилар. Намозполвоннинг тақдирчи? Озодлик талаб қилган ўн мингларча, юз мингларча қўзғолончилар ваҳшийлик илиа ўлдирилганин бугун Ватанда яшамоқда бўлганлар билурларми экан? Ўрта Осиё ҳалқига сўрилишдан бошқа чора қолмади. Истилочилар иштаҳаси эса чўх ва янада чўх очилаверди, талон-тарож бобида дунёдаги ўзга истилочиларни ортда қолдириш мақсадида йил ўн еттида режим ўзгартирмокчи бўлдилар. Бунинг учун рус миллатчилари Ленинни тикладилар. Йўл-йўриқлар кўрсата бошладилар. Энди бу шумлар қонуний ҳаракатлардек эл оламига ўргатиш учун Маркснинг «Капитал»ини, яна бошқа асарларини топдилар. Маркс дунёга танилган файласуф, дунёда кулдорликни йиқитиб, тинчлик қурилишини истаган донишманд эди, Ленин эса бир тоифа қулдорликни йиқиб, янги тоифа қулдорлигин ривожлантириди. Бу

сафар бизим аждодлара қоғозда «озод инсон» қалбаки гувохномаси берилса-да, аслида қул ҳолида тутмишдилар, қулдорлар эса «большевик» лақабли руслар бўлиб қолавермиш. Жамиятларига «коммунизм» деб ном кўйиб олмишлар. Назарияларин эса «марксизм-ленинизм» деб атамишлар. Маркс ва Ленин бир-биридаи бошқа-бошқа одам бўлганидек, идеологийси ҳам бўлак, мақсадлари ҳам бўлакдир. Бири камбағал ишчилар ҳукуқини химоя қилган бўлса, бири янгича қулликни барпо этмиш. Назарияларнинг ўхшаш томони йўқ. Лекин руслар бузиб, назария ўтиргилиги ила асл назарияни бир-бирига алмаштириб, Маркснинг фалсафасидин безбетларча фойдаланмишлар. Сиёсий иқтисодга бағишланган «Капитал»ни сиёсий мақсад ўрнида қўлланма қилиб олмишлар. Шу билан қиёфа ўзгартирилиб, иш услуби ҳам ўзгармишди. Эски тузумларда истилочилар миллатлар танасига зулукдек ёпишиб, сўраётган бўлса, янги тузумда ўнлар оч бўридек талон-тарожликни бошламишлар. Биринчи-си шу бўлдики, дон-дун ўрнига пахта экишга мажбур этдилар. Натижা – сунъий қаҳатчилик барпо этилиб, улуснинг тинкасини қуритмоқ учун ҳаракатлар бошланди. Бойларнинг мол-мулки забт этилиб, улус ташаббускор синфидан маҳрум этилиш. Ер тилини билувчи дехқонлар қулоқ қилиниб, Сибирга жўнатилиб йўқ қилинмиш. Мақсад – сўз соҳибларини ўртадан кўтариш эди. Диний олимларни, руҳонийларни биринкетин териб олиш ила ижтимоий жиҳатдан ҳалқнинг турмуш савиясин туширдилар. Қалам соҳибларини «халқ душмани» деб эълон қилиб, улусни миллий туйғудан ажратиб қўйиш мақсадида ўнларни ўлдирдилар, миллатни қоронғуда колдирап бўлдилар. Мард табиат одамларни «муштумзўрлар», деб эълон қилиб, ўнларни отиб ташлаш йўли ила улусин ичидин ғайратни сугуриб ташлашди. Пичоқ суюкка етди деганларидек, вилоятларда, қишлокларда ҳар томондин ҳалқ қўлида бор қуроли – кетмон, ўроқ, болта кабилар

билан майдонлара тұпланмиш эди. Ҳа, үнларда бошқа курол йүк эди. Бори ҳам милтиққа үхашаш қадимий куроллар, оқ руслар давридаәқ йигиштириб, олиб бўлинган. Руслар эса замонавий қурол ила мунтазам тартибли аскар ташлади. Сизлар «талотүп» деб ата-ётган мудхиш тўқнашувда ўн минглаб эмас, юз минглаб уруш қони тўқилгандир. Кўзғолон бостирилгач, «қўзғолончи душман» номи билан минглаб бечоралар ушланиб, сургун килинди, – Яквалхўжа кейинги гапларни ички бир алам билан айтиб кўлига финжонни олди, лабига олиб борди, аммо ичмади. Тушкунроқ оҳангда «Биз ибрат олишимиз керак бўлган тарих шудир», деб қўйди. Кейин худди ўзига-ўзи гапираётгандай пастроқ ва хастароқ овозда давом этди:

Дарвешонро агар не аз хешонем,
Лек аз дилу жон мўътақиди эшонем.
Дураст, магўй, шоҳи аз дарвеши,
Шоҳем, vale бандаи дарвешонем.

Издиҳомга ҳозир бўлганларнинг айримлари форсийдан хабардор эдилар. Улар тўртликнинг маъносини англаб, «чўҳ маъқул» ишорасида бош иргаб қўйдилар. Яквалхўжа «гапимга сенгина тушунмадинг», дегандай Абдусамадга қараб, изоҳ берди:

– «Дарвешлар, агарчи бизларга якин бўлмасалар ҳам, лекин биз уларга жону дил билан муҳлисмиз. Шоҳликни дарвешликдан узоқ дема, биз шоҳ бўлсан ҳам, дарвешларнинг бандасимиз». Агарчи миллат қаҳрамонларин дарвешлик мартабасинда тасаввур этсан, бизда ўнларин бандасидурмиз.

– Астағфируллоҳ! – деб юборди доктор Худоёр. – Афандим, гарчи сўзларингиз мажозий эрса-да, бундай демаклик ножоиздур, нединким, бизлар Аллоҳнинг бандалари эрумиз. Банда бандага банда ўлурми ҳеч замон? «Ҳалок мекунадаш фурқати ту, доностам, ва-гарна рафтан аз ин шаҳр метавонистам» деганлари-

дек, бек афандиларимиз ўшал замон «сендин айрилиш мени ҳалок қилишини билдим; бўлмаса бу шаҳардан кета олармидим», маъносига кўра, хаста юртни ташлаб кочмасалар эди, авлодлар армоннинг аччиқ суйини ичмас бўлурми эдилар?

— Қочганлари йўқ, ҳижрат қилдилар, холос, — деб изоҳ берди Саъдуллахон.

— Қалбимдасиз, Саъдуллахон афандим, сиз ила қанчалар баҳс юритмайлик, ҳақиқат ҳақиқатлигича колаверажак. Яквалхўжа афандим тарихни-да, сиёsatни-да мендан дуруст билиюрлар, айтсинлар, ажрим қилиб берсинлар-чи: меним ожиз фикрима кўра, миллат қаҳрамонлари ватандин кочмаслар. Ватанда шаҳид ўлмакни аъло кўурулар. Бадбаҳт совет ўзига душман деб билмиш неча юзлар, балки эҳтимол мингларча одамларни, Фарангি ерларидами ё ундан наридами, яширинмиш жойларидин топиб, ўлдируви тарихдан маълумдир. Савенков сингари кишиларни алдаш йўли била Русияга қайтариб ўлдириш мақсадида юзларча кишиларини сафарбар этмадими? Мингларча иғволарни ишга солмадими? Ҳаттоқи Аргентина юртига киши юбориб, Троцкий жонини суғурмадими? Советнинг шундайгина ён биқинидаги Афғонда майшат ила банд ўлмиш Сайийд Олимхон ё бўлак кишиларни ҳатто чибин ҳам чақмамиш экан, бу ажаб бир ҳол эмасми? Нечун совет ўnlара заҳмат етказмади? Чунки ўnlар советлара душман ўлароқ мартабада эмас эрдилар. Ўnlардин советлара хатар йўқ эрди. Тил ила олишувчи ракибга битта ўқ ҳам ҳайф. Советларин роҳатсиз этмаслигидин ўnlар чўх кувониб, афғон подшоҳи томонидин белгиланмиш нафақага қаноат этганлари ҳолда узок умр кўриш орзусинда яшайвермишлар.

Яквалхўжа дарров жавоб қайтarmади. Жавобга иккиланганини ҳам сездирмади. Аксинча, ҳудди қизиқ гап эшитгандай кулимсиради:

— Мухтарам афандилар, бу файзли хонадонга қан-

дай сабаб ила тўпланганимизни унутиб кўяёзимиз. Бу хусусда бошқа вакт, бошқа ҳолатда истаганча фикр олишсак тўғрирок ўлурмикин? Бу он бир оз ўзимиза эрк берувимиз соҳиби хонадон хузурида уятлироқдир, деган истиҳоладаман.

Бу якунга ҳеч ким эътиroz билдиrmади, ҳатто доктор Худоёр ҳам «оре, рост», деб кўйди.

Абдусамад бу мавзудаги сұхбатга илк бор гувоҳ бўлганнда ватандошларининг қалб бойлигига, миллатпарварлик фазилатларига таҳсин айтган эди. Кейинчалик уларнинг гапдан нарига ўтмасликларига амин бўлгач, қизикиши ҳам сўнганди. Ўзи униб-ўсган мухит, хонадони атрофидаги дарду ҳасрат билан бу давранинг армони орасида ақл бовар қилмас тавофут борлигини ҳам билиб турарди. Булар, майли, қуруқ гап билан бўлса-да, миллат тақдирни хусусида қайғуриб ўтирибдилар. Акасининг кетишидан норози бўлган, қасосга даъват этган Зайнабнинг дардичи? Асадбекнинг алами-чи? Бу ердагилар гап билан кифояланадилар, асадбеклар-чи? Абдусамаднинг қалбини хира қилиб, ташвиш чоҳига тортиб турган муаммо ҳам шу эди. Отаси ва синглисининг дарди қуруқ гап эмас, балки қон тўкилишига сабаб бўлувчи ҳарат билан якунланишини у биларди.

Кимнинг юрак қони тўкилади?

Кимнинг кўзларидан қон ёшлари оқади?

Кимнинг умид чироғи сўнади?..

Абдусамад Ғарбий Олмонияга шу ташвиш юки билан келди. Миллат дардини ўйлаб сўзлаётганлар даврасида ҳам шу ташвиш билан ўтирди. Сұхбатнинг чўзилишидан ғашланди, «кичик бир эҳсон»нинг тезроқ поёнига етишини хоҳлади. Баъзан баҳсга киришгани билан, бу каби сұхбатларни ҳушламайдиган доктор Худоёр зарур юмуши борлигини баҳона килиб узр сўрагач, ичida «ҳайрият» деб кўйди. Яквалхўжа узрли эканини билдиргач, бошқалар ҳам турдилар.

Доктор Худоёр оиласи ташвишлар туфайли анча фурсат қўлдан бой берилганини афсус билан таъкидлаб, Абдусамаднинг зиммасига одатдагидан кўпроқ вазифалар юклади. Шу сабабли Абдусамад кўп вақтини кутубхонада ўтказадиган бўлди. Бир жиҳатдан унга шундай бўлгани ҳам маъқул эди. Уйда дарсхонаси бўлгани билан, таомланиш чоғидами ё бошқа ҳолатдами Муштарийга дуч келса, унинг кўзларини тарк этмаётган мунгни кўриб юраги эзилаверарди. Сўнг китоб саҳифаларидан Абдуҳамид қарагандай туюлаверарди.

Қайтганининг иккинчи ҳафтасида кутубхонада узоқ ўтириб чарчади. Қаҳва ичиш мақсадида емакхонага чиқди. Финжондаги каҳвани яримлатмай, ёнига бир малла йигит келиб ўтирди.

— Салом, ҳамشاҳар, ишлар қалай? — деди у такаллуфсизлик билан.

«Ҳамشاҳар» дегани учун унга «бу одамни қаерда кўрган эканман?» деган савол назари билан қаради. Ёши ўттиз бешлардан ошган, қошу кипригига қадар малла бўлган бу одамни илгари ҳеч кўрмаганига ишонч ҳосил қилиб, бosh иргаб «салом» ишорасини килди-ю, аммо лутф кўрсатмади.

— Исмим Валерий, менам тошкентликман, — деб у кўл узатди. Абдусамаднинг кўришишдан ўзга чораси қолмади.

Валерий ўзига қаҳва буюриб, оёқларини чалиштириб ўтириб олди.

— Ҳамшаҳарни мусофири юртда учратиб қолганингиздан хурсандмасмисиз? — деди у Абдусамадга кувлик билан тикилиб.

— Назаримда мен сизни эмас, сиз мени учратиб колдингиз шекилли? — деди Абдусамад.

— Тўғри, лекин сонларнинг ўрни алмашгани билан қиймати ўзгармайди. Шахсан мен хурсандман. Келга-

нимга йигирма кун бўляпти. Бу ерда икки ҳамشاҳрим ўқиётганини эшитиб қувонган эдим. Мен докторлик ишимга қўшимча маълумот тўплаш учун келганман. Мен физикман. Сиз ўрганаётган соҳага сал-пал кўшничилигим бор. Лекин бу бизнинг танишувимиз учун аҳамиятли эмас. Ҳа, айтмоқчи, эшитдим, бошин-гизга кулфат тушибди, таъзиямни қабул қилинг.

Абдусамад «раҳмат» дегандай бош ирғаб, «яна қанақа гапингиз бор?» дегандай савол назари билан унга қаради. Бу қарашнинг маъносини англаган Валерий кулимсиради:

– Бу ер хотиржам гаплашадиган жой эмас, хўп десангиз, кечки пайт турк ошхонасида бирга тамадди қилсак яхши бўларди.

– Бугун эмас, – Абдусмад шундай деди-ю, таклифи рад этишга арзийдиган баҳонани айтмади. Аслида бу оқшомга белгиланган бирон юмуши йўқ эди. Таклифни қабул қилса ҳам бўларди. Лекин кутилмаганда пайдо бўлган бу одамнинг турки ёқмадими, ҳарҳолда у билан яна учрашишни истамади.

– Кутубхонада яна уч-тўрт кунлик ишим бор. Вақтингиз бўлганда бир ишора қилиб қўярсиз, ҳамшаҳарлар билан отамлашишга ҳамиша тайёрман, – Валерий шундай дегач, қаҳвасини охиригача ичмай, ўрнидан турди.

Абдусамад уйга қайтганида Муштарий ҳам, Гулузор бегим ҳам кўринишмади. Музаффархон зарур юмуш билан Парижга кетган эди. Шу боис кечки таом дастурхони атрофида Абдусамад билан Чўлпоной ўзлари ўтиришди. Оврупо одобига ўрганган бу хонадонда барча бир пайтда дастурхон атрофига ўтирас, таомланиш чоғи ўзаро гапирилмасди. Бундай одобга ўрганмаганларнинг сукунат оғушида овқатланишлари осон эмас. Абдусамад, айниқса, Абдуҳамидинг бунга кўнишилари қийин кечган эди. Бугун хонадон соҳиблари бўлишмагани учун Абдусамад ўзини анча эркин тутди.

— Кун бўйи ўтиравериб зерикиб, қон бўлиб кетмадингизми? — деди у ҳазил оҳангидা.

— Асло йўқ, — деди Чўлпоной саволни жиддий қабул қилиб. — Чин доно дўсти бўлмиш инсоннинг зерикмоққа эҳтиёжи йўқдир.

— Чин дўст? — Абдусамад ажабланди. — Ким экан у?

— Бир киши китоб ўқимоқ ила банд эканинда яна бир киши ўнга яқинлашди ва сўради: «Нечун ёлғиз ўтиրмакни ихтиёр этиюрсиз?» Ул киши деди: «Ёлғиз эрмас эрдим, сиз келдингиз-у, ёлғизланиб қолдим», — Чўлпоной шундай деб, эрига маънодор қаради. — Англаюрмисиз, бегим?

— Англаюрман, хоним, — деди Абдусамад унинг шевасига тақлид қилиб.

— Англамагингиз мумкин эмасдир, чунки сизнинг бундайнин чин дўстингиз йўқдур.

Агар Чўлпоной шундай деб кулиб қўйганида Абдусамад буни ҳазил деб тушуниб, жилмайган бўларди. Лекин хотинининг қарашидаги жиддийлик уни бир оз таажжубга солди.

— Нега ундан дейсиз?

— Сиз китобни дўст тутмайсиз. Уйингиза биргина китоб жавони йўқлигин айтиб эдим-а? Мусофири юртлари отлана туриб она тилиниза чоп этилмиш биргина китоб овлолганингиз йўқдир, бегим?

— Кутубхонада кун бўйи китоб ўқишларим-чи? Бу дўстликка кирмайдими? — деди Абдусамад ранжиш оҳангиди.

— Ҳа, айнан кирмас. Ул китоблар дўстиниз эмасдир, балким ишиниздир, таъбир жоиз бўлса, ҳамкасбинниздир.

— Қизиқ... қизиқ... қани, бугунги чин дўстингиз ким бўлди, сир эмасми?

— Нечун сир бўлсин? Тошкентдин олиб келмишам китобин бу оқшом ўқиб, ниҳоясига етказдим. Аммо кўнглим тўлмади.

– Нега? Дүстингиз бемаъни чиқдими?

– Пичинг қылмогиниза асос йўқдир, бегим. Мирзо Бобурдан ҳикоя этувчи билан китоб чўх донодир. Фақат бир ўринда муҳтарам ёзар оғамиз жиндак адашмакка мойил бўлибдилар.

Абдусамад бу китобни ўқимаган эди. Шу сабабли Чўлпонойнинг гапини бўлмай, жим тинглади.

– Эҳтимолки, «Бобурнома»ни мутолаасиндин йироқ бир киши учун билан адашмаклик сезилмиюр. «Бобурнома»да Ҳумоюн Мирзонинг хасталикларин баёнинда ҳазрат дейдиларки: «...ва табиблар ҳар неча дору-дармон бердилар, яхши бўлмади. Мир Абулқосимким, улуғ киши эрди, арзға еткурдимким, ушмундок дардларға дармон будурким, яхши нимарсалардин тасаддуқ қилмоқ керак. Тоинки Тенгри таоло сихҳат бергай. Менинг кўнглумга келдиким, Муҳаммад Ҳумоюннинг мендин ўзга яхшироқ нимарсаси йўқ. Мен ўзум тасаддуқ бўлайин, Худой қабул килсан... уч қатла бошидин ўргулиб, дедимким, мен кўтардим ҳар не дардинг бор. Ушал замон мен оғир бўлдум, ул енгил бўлди. Ул сихҳат бўлуб қўпти, мен нохуш бўлиб йиқилдим...» Англаюрмисиз, бегим? Пир ҳазрат «яхши нимарсаларни тасаддуқ қилмоқ керак», деб айтганларинда қимматбаҳо олмосни назарда тутмиш эмасдилар. Айтинг-чи, дунёдин кечган ошиққа дунё молининг канчалик қадри вордир? Ҳеч қанча!

Абдусамад хотинининг жон куйдириб айтаётган гапларини эшита туриб, кулимсираб кўйди.

– Кулишиниз боиси мени айбситмоклики, бегим? – деди Чўлпоной аразлаш оҳангиди.

– Йўқ, нега айблай? Бир нарса хаёлимга келгани сабабли кулдим.

– Нима нарса, айтиниз? – деди Чўлпоной ўжарлик билан.

– Сиз... китоб ўқийсизми ё ёдлаб оласизми?

– Лозим ерлари нафақат ёдима, ҳаттоки қалбима муҳрланиб қолажак. Айтинг, бегим, Мирзо Бобур

ҳазратларин ўз жонларин фарзанду аржумандларига фидо қилмишларин йиғламай ўкуб бўлурми экан? Айтинг, бу кунларда шундай оталар борми экан?

Бу савол Абдусамаднинг юрагига ўқдай қадалиб, яралади. Ҳатто танасига енгил титрок югурди. Назарида Чўлпоной «Айтинг, адандиз жонларини фидо қилиб, Абдуҳамиднинг жонини сақлаб қола олармидилар?» деб сўрагандай бўлган эди. Зайнаб «Ҳамид акамни адамнинг душманлари ўлдиришган», деганидан бери кўнгли беҳаловат эди. Москвадаги кутилмаган ҳибсга олинув, уйга қайтишгач, Абдуҳамиднинг ғалати хасталаниши... унда шубҳа уйғотган эди. Синглисининг титрок лабларидан учган сўзлар бу шубҳани ҳақиқатга айлантириб, уни аросат водийсига ҳайдаганди. Шу аросатда гангид юрганида хотини бир китоб баҳонасида қалбни яна яраладигина эмас, эскисини титиб, туз ҳам сепиб кўйди.

Чўлпонойнинг омматан берган саволига хоссан қилиб, «Ҳа, бор! Менинг адам шундай қила олган бўлардилар», деб дадил жавоб бериши мумкин эди. Отасининг жон фидо қила олишига ишончи комил эди. Ўз гуноҳлари учун фарзанди жон берганини билиб, қалб азобида яшаш нақадар оғир?! Абду самад алҳол адасининг шу оғир аҳволини ҳис қилиб, ўрнидан беихтиёр туриб кетди. Уни ҳамиша бошқарib келган Манзурага хос маъсумлик тарк этиб, Асадбекка хос қасоскорликнинг бераҳм руҳи эгаллаб олди. Шу оннинг ўзида уйига қайтиб боргиси, Зайнабга «Мен келдим, қани у абллаҳлар, бир-бир бошларини узаман!» деб ҳайқиргиси келди.

Эрининг рангida ҳам ўзгариш зоҳир бўлганини кўрган Чўлпоной чўчиб, ўрнидан турди. Эрига яқинлашиб, елкасига бош кўйиб узрли оҳангда деди:

– Узрлиман, бегим, узрлидирман. Сўзларимда маъни йўқ эди. Бу ҳол энди зинҳор такрор этилмас, тавбададирман, айбимдан ўтиниз...

Тарзан билан Сурни ресторонда кўрган Асадбек «Бир зўр чиқиб, етти-саккизта йигитнинг бошини қовуштирган бўлса, ёмон эмас. Битта Ҳосилнинг ўрнига янгиси келибди. Ҳозир тизгини тортилмаса, эртага бошга чиқиб олади. Кеча ресторанда мени таниб, қочиб қолишидди, эртага тап тортмасдан тўғри устимга бостириб келишади-да, «йўлдан қоч!» дейишадими? Мен-чи? «Охирги нафасим қолганда ҳам сенларни уриб, гарданларингни синдираман!» дейманми? Унда бу қурук гапдан ким чўчийди?!» деб тўғри ўйлаган эди. Сур билан гаплашгач, бунга яна бир карра амин бўлди.

Асадбекнинг хузуридан «Сур» лақаби билан чиқкан Ахтамнинг кайфияти ўзгача эди. Бўлажак шахмат ўйинида ўзига «от» мартабасининг берилиши уни қониқтирмади. То Тарзан тирик экан, бўлажак «шоҳ» мартабасига эриша олмаслигини билгани учун, камида «фарзин» даражасини мўлжалларди. Бек акасининг марҳаматидан ранжимади. У аҳмок эмас, юқори мартабага бирданига чиқиб бўлмаслигини билади. Ҳозирча «пиёда» бўлишга ҳам рози, чунки «пиёда» ақл билан юрса, тезрок «фарзин»га айланади. «От» эса қанчалик кучли юриш қилмасин, «фарзин» бўла олмайди. Нари борса, тирик қолади. Йўқса, «шоҳ»ни асраш мақсадида оддий пиёдага ҳам курбон қилиб юборадилар...

Сур кўчага чиқиб, бир оз пиёда юрди. Эрталаб қибла томондан эсган шамол ҳайдаб келган кўнғир булут тўккан кўз ёшлари билан шаҳар кўчаларини ювиб, ҳавони мусаффо қилиб қўйган эди. Пок кўнгилли одам бундай мусаффоликнинг қадрига етади; сайд қилгиси келади, сұхбатлашиш учун кўнгли пок қалбли дўстни истайди. Ахтам ўзга тоифадан. Табиатнинг фусун-

кор гўзаллиги уни мафтун қилган эмас. Чунки унинг қалби гўзалликни ҳис кила олиш туйғусидан маҳрум эди. Устига устак, Асадбекнинг хузуридан чикқан дамда хаёли бошқа нарса билан банд, табиат чиройидан баҳра оладиган ҳолатда эмасди. Ёмғир яна шивалай бошлаганда эти жунжикиб, пиджагининг ёқасини кўтарди-да, икки қўлини шими чўнтакларига тикиб, қунишиб олди. Беш-ўн кадам юргач, Тарзанга айтадиган гапларини ақли чиғириғидан бир-бир ўтказиб олиб, йўловчи машинага қўл кўтарди.

Анҳор гугурт қутиларида терилган кўп қаватли уйларни ёнлаб ўтиб, битмай қолган бинодан сал нарида ўнгта бурилади. Хусусий ошхоналарга ижозат берилган йили ишнинг кўзини биладиган бир одам шу ерни обод қилган эди. Тарзан билан Ахтам бегона кўзлардан панада бўлган шу жойда вақт ўтказиши ёқтиришарди. Дастреб ошхона хўжайнинг даъво қилмадилар. Очиги, «бу ошхона бирон-бир зўрнинг паноҳидадир», янада аникроғи, «бунақа зўр жойни Ҳайдар ака тинч қўймайди», деган гумонда бўлдилар. Гумонда бўлдилар-у, чўчимадилар. Сичқонни пойлаётган мушук каби сергак бўлиб, кутдилар, кузатдилар. Гумон пуч эканини билгач, ошхонани ўз «паноҳларига олганларини» хўжайнинг маълум қилдилар. Хўжайн Ҳайдар акасига арз қиласагини айтганида «Ҳайдар акани ўртага қўйма. Акахон кимлигингни билмайдилар, ошхона очганингдан ҳам хабарлари йўқ. Номларини сотиб юрганингни қулоқларига етказиб қўйсак, шўринг қурийди», деб бир-икки тепки билан сийлашгач, уларни ўз паноҳкори сифатида қабул этишга мажбур бўлди.

Кесакполвоннинг ўз чойхонаси – қозихонаси борлигини улар билардилар. Унда содир бўлган воқеалардан озми-кўпми хабардор эдилар. Бу ошхонани ана шундай қозихонага айлантиришни ният қилдилар. Ниятлари амалга ошмай туриб, Асадбекнинг назарига тушдилар. Бу улар учун муддаонинг айни ўзи

эди. Мақсад чўққисига айланма сўқмоқ орқали эмас, тикка йўл билан чиқа олиш имкони туғилганидан кувонсалар-да, сергакликни бой бермасликни маъқул кўрдилар.

Улар Бек акаларининг энг ишончли қаноти ҳалокатда жон берганини билардилар-у, аммо бу фожия сабабидан бехабар эдилар. Кесакполвоннинг кесилган боши кафансиз Ҳосилбойваччанинг лаҳадига қўйилгани ҳам уларга маълум эмасди. Шу боис ҳар иккови ҳам Бек акаларининг бу марҳаматлари боисини англай олмай, гаранг эдилар. Бек акалари яратган шайтанат оламига дадил эмас, таваккал қилиб кириб келишдан ўзга чоралари йўқ эди. Сур Бек акасига шахмат ўйинини эслаттани билан, уларнинг тақдири кўпроқ ошиқ ўйинини эслатарди. Ошиқ тепилгандага олчи турадими ё йўқми...

Тарзан ошхонанинг хос хонасида эмас, ўзига хуш ёқадиган соҳилдаги шийпонда ўтиради. Столнинг ўнг томонига қўйилган шахмат тахтасида қора шоҳ билан фарзин, икки катак нарида оқ шоҳ билан бир фарзину тўра қолган эди. Шахмат масалалари ечишга ишқибоз бўлган Тарзан доналарни терган-у, масалани ечишга келганда хуши бўлмай, сувга термулганича ўйга толган эди. Стол ўртасига қўйилган икки шиша пивонинг оғзи очилмаганди. Сур уни кўриб «мени пойлаётган экан», деб ўйлади. Табиатан ичкиликни ёқтирамайдиган Тарзан пивони Сурга илиниб олиб қўймаганди. Сўрамаса ҳам, ошхона хўжайини «Бугун эрталаб Чимкентдан ўзим олиб келдим», деб лутф қилган эди.

Сур индамай келиб, шахмат тахтасидаги доналарга тикилди, ўзича нималарни дир чамалагач, сўради:

– Оқлар бошлайди ва икки юришда мотми?

Тарзан унга қараб қўйди-ю, жавоб бермади. Сур унинг қарашига парво қилмай, доналарни у-бу катакларга суреб, йўл излади. Сўнг бош чайқаб, деди:

– Икки юришда мот қилишнинг иложи йўқ. Уч юришда...

— Мен уч юришлик ўйин ўйнамайман. Мен бир юришда мот килишим керак, — деди Тарзан маънодор оҳангда.

— Бунга ҳали вақт бор, — деди Сур гап тагига яши-ринган маънони англаб. — Қора шоҳни бу туришида мот қилиш осонмас. Уч юришга сабр қилишдан бошқа чора йўқ.

Сур уч юриш қилиб қора шоҳни бир чертиб думалатди-да, Тарзанинг рӯпарасига ўтириб, шишаларнинг оғзини очди; бирини дўсти томон суреб кўйди. Тарзан шишага қараб кўйди-ю, қўлига олмади.

— Қанақа гап топиб келдинг? Катта аканг миянгнинг бўшаб қолган мурватларини бураб кўйдими? — деди унга тикилиб.

Сур жавобга шошилмади. Пивонинг ярмини ичиб, лаззатланганини ошкор қилиб, лабларини чўлпиллатиб кўйди. Кейин яна бир кўтарища шишини бўшатиб, одатини такрорлади.

— Катта аканг меҳмон қилмадими? Юрагинг куйиб кетдими? — деб пичинг қилди Тарзан.

— Сен билан мени меҳмондорчиликка чақирмайди, жони гаровга қўйилса, хизматга чорлайди, шунга ақлинг етмадими? — деди Сур иккинчи шишани ҳам қўлига олиб.

Унинг бу қилиғидан аччиқланган Тарзан шишини тортиб олди. Сурнинг ҳозирги гапи унинг учун янгилик эмасди. Икки кун аввал Асадбек билан гаплашгандаёқ бу мақсадни англаб етганди. Бир неча йигитга бош бўлиб, ҳукмини ўтказа олаётганидан ҳаволанган Тарзан ўзидан зўрроқ одамнинг оёғи остида ўралашиб қолаётганидан ғашланган эди. Эртами ё индинга бу хорлиқдан шараф тожига кўтарила олишига ишончи бўлса-да, ёшлиқ ғурури бугунги тубанликни ҳазм қила олмаётган эди. Сурнинг гапи қалбини кемираётган шу ҳакиқатни тирнаб қўйгани учун ҳам аччиқланди.

Гавҳар бозорида мунчокнинг қиймати, қуёшнинг

хузурида чирокнинг нури бўлмаганидек, баланд ми-
нора ҳам тоғ чўқиси этагида паст кўринади. Тар-
зан буни билади, тушунади. Асадбек хузурига қадам
кўйгач, оғиз маҳкам, кўз ва кулоқ очик бўлиши за-
рурлигини ҳам билади. Ахтам икковини Асадбек
йўқлади. Алоҳида-алоҳида гаплашди. Улар Асад-
бекка қўшилиб, ўз ҳаётларини йўқотдиларми энди?
Тарзанинг фикрича шундай, аслида эса уларнинг ўз
ҳаётлари бўлмаган. Одамийликдан нарида юриш ҳаёт
эмас, ҳайвонийлик эканини уларнинг ожиз онглари
фаҳм эта олмагач, яна қандай хулосага келишсин?

– Ҳов ақлли аҳмок, гапничувалаштирма! – деди
Тарзан, жеркиб.

– Гапничувалаштираётганим йўқ. Сен билан мен-
га ўхшаган ақлли аҳмокларга кунлари қолган бўлса,
Бек акамнинг дўппилари тор келганга ўхшайди.

– Тўғри тушунибсан... – Тарзан шундай деб жим
бўлди. Кейин Ахтамга тикилган ҳолда сўради: – Сен
Худога ишонасанми?

Кутилмаган савол Ахтамни ажаблантириди. У ҳам
шеригига тикилиб қолди.

– Мен Худони кўрмаганман, кўрмаган нарсам-
га ишонмайман. Мен кўзимни очиб, қамоқхонани
кўрганман, милисани кўрганман. Уларнинг борлигига
ишонаман.

– Сен улардан кўрққанинг учун ишонасан.

– Нима дединг? Мен кўрқаманми? Сен ўз уйинг-
га кириб-чикишдан кўрқасанми? Мен ҳам шунақаман.
Қамоқ билан милисадан сен кўрқасан, ана, Бек аканг
ҳам кўрқади. Сен билан менинг фаркимиз шунда.

– Бўпти, майдалашма, Худога ишонасанми ё
йўқми, жавоб бер.

– Ишонмайман, дедим-ку?

– Бекор киласан, ишониш керак: Худо бор. Бўлма-
ганида бизни Бек акамизга рўпара қилмас эди. Нимага
учраштириди? Ўйлаб кўр-чи?

– Ўзинг ўйлаб кўргандирсан, айтавер.

– Жойини олишимиз учун учраштириди.

– Бу фикрингта гап йўқ! Бек аканг таҳтида кўп ўтириб қолди. Ҳатто моғорлаб ҳам кетгандир. Ёшларга бўшатиб берса ҳам бўларди. Бу жой сенга ярашади. Таҳт талашиш иккаламизга ҳам тўтри келмайди. Биз кўринмас темир занжир билан боғланганмиз. Яшасак бирга яшаймиз, ўлсак бирга ўламиз. Ёшим катта бўлса ҳам, мени «ака» дегинг келмайди, ғуруринг йўл кўймайди, сен олий ирқдансан, мен иркит бир мурдаман. Лекин сени «укам» дегим келаверади. Сени яхши кўришим шундан. Гапингни икки қилмаслигимга ҳам шу сабаб. Фақат... баъзида ақлинг жуда-а ошибтошиб кетади, шунисига доғман. Ақлинг тўлишиб кетган пайтда ҳам менинг гапимга кириб турсанг, Бек акангнинг таҳти ҳаппаи ҳалол сеники. Агар шу таҳтга чиқишинг учун менинг бошимни босиб кўтарилишинг шарт бўлса, калласини қўйиб бермаган – номард!

Бу гап Тарзанга хуш ёқиб, мукофот тарзида шиша ни у томон суриб қўйди.

– Сенинг бошинг менга керак, мен оғайнисини қурбон қиласидиган номарлардан эмасман. Таҳтни олсак, бирга оламиз, ололмай ўлсак ҳам бирга ўламиз. Сени кутиб ўтириб шу аҳдга келдим. Бек акамнинг таклифларини ерда қолдирмаймиз. «Қамишдек бел боғлаб» хизматни бошлаб юборамизми? – Тарзан шундай деб истеҳзоли жилмайди.

Сур пиводан бир ҳўплаб қўйиб, шеригига савол назари билан тикилди.

– Хизматни сен бошлаб тура қоласан. Менинг учтўрт кунлик зарур ишим бор.

– Қанақа иш?

– Кейин айтаман... – Сур яна пиво ҳўплади-да, шахмат доналарини бир-бир тера туриб, қўшимча қилди: – Балки айтмасман... Сен билан менинг ўйлаб қўядиган бир ишимиз бор: Бек акамнинг гроссмейстер эканини унутмаслигимиз керак. Ё «от» тепкисидан, ё «фил» ўқидан, агар лаллайсак, ҳатто «пиёда»нинг

аксиришидан ўлиб кетишимиз мумкин. Шунака бўлганидан кейин қанақа ҳимояда ўйин бошлаймиз: сицилиянчами ё кўхна ҳинд ҳимоясидами? Жавобингни айтмасанг ҳам биламан: ҳужумга ишқибозсан. Мен «от»ни сур, десам, пачоғинг чиқишини билсанг ҳам, «фил»ни сургинг келиб туради. Энди бу қилиғингни кўясан, оғайнини. Бек акам ресторонда қармоққа илинадиган лакмалардан эмас!

Тарзан – ақлига бино қўйган, нима деса, нима қилса тўғри эканига ишонадиган йигит, бу гапларнинг ҳақ эканини тан олиши қийин бўлса-да, қамоқхона «академияси»ни битирган шеригининг огохлантиришини қабул қилишга мажбур эди.

Сур тераётган доналарини шарт суриб ташлади-да, ўнгдаги бурчак катакка оқ шоҳни, пастрокқа эса битта кора пиёда билан фарзинни қўйиб:

– Бир юришда мот, – деб иршайди.

Тахта устида кора шоҳ йўқ эди, Тарзан бунга аҳамият бермади, Сурнинг бу масаласини ҳам майнавозчилик деб қабул қилди. Ҳолбуки, Сурнинг бу харакати ўзига кўп маъноларни яширган эди...

2

Бу ёшдагиларнинг бирлари илм оламига кириб бориш, яна бирлари эгаллаган хунарлари билан барчани лол қолдириш умиди билан яшайди. Яна бирлари қўша-қўша ўғиллар кўришни Яратгандан сўрайди. Анҳор соҳилида ўтирган бу икки йигитга эса униси ҳам, буниси ҳам керакмас; иккови бир бўлиб, зулм оламини забт этишни истайди. Аниқроғи, истак ва орзу энди ортда қолган – жонларини гаровга кўйиб, харакатни бошлаганлар. Илм талабидаги киши хайрли келажагини тасаввур қила олади. Тарзан билан Сур келажаклари шарафсиз ўлим эканини билсалар ҳам, буни тан олгилари келмайди.

Ўзни зўр англағани ҳолда, атрофида ўзидан-да зўр

борлигини билиб хавотирда яшашнинг балки лаззати мавжуддир. Ҳосилбойвачча ёки Кесакполвон каби хорланиб ўлишнинг роҳати бордир балки? Биров ити ўлса, ачиниб кўмиб кўяди. Уларга ким ачинди? Ким кафандади? Ким жаноза ўқиди? Ким «Вой отам!» деб нола чекди?!

Вақти келиб, Тарзан билан Сур бир кунда, бир соатда, ҳатто бир дақиқада ажал ўқидан эмас, зулм салтанатига эгалик қилишни истаётган ўзга зўрлар кўлида жон беришларини, кафансиз кетишларини билсалар, бу онда эсларини йиғиб, йўлдан қайтган бўлармидилар?..

Худо билади... танлаган йўлларидан қайтишлари қийин, жуда қийин... камондан ўқ узилиб бўлган...

...нишон эса – ўлим!

Ўлимни ўйламаётган бу йигитлар ўлим шарбатини ичганларидан сўнг «ёш кетдилар-а, бечоралар!» деб уларга ким ачинар экан?

Ҳозир буни ўйлашмайди. Балки ҳеч қачон ўйлашмас...

Сур пивони охиригача ичиб бўлгач, ўз иши билан кетди. Тарзан эса сувнинг ожиз тўлқинларига бокиб ўтираверди.

Шу онда биров келиб, ундан «сен қандай бола эдинг-у, қандай йигит бўлдинг? Энди қандай одам бўлмокчисан?» деб сўраса, нима деб жавоб берарди?

Ўн беш ёш арафасида турганда «Тарзан» лақабидан ҳали узоқда эди, якинлари уни ўз исми билан «Марлен» деб ардоклашарди. Ҳа, уни ҳамма «яхши бола», деб мақтарди, «ўғлим шунга ўхшасин», деб ҳавас қиласарди. Отаси ҳам «ўғлим ўзим истаган йўлдан юриб улғайяпти», деб шодланарди. Йигирма ёшида шахмат оламини лол қолдириб, халқаро гроссмейстер шоҳсупасини эгалламоғига ишончи комил эди. Бу бахтли яқин келажакка ҳатто Марленнинг ўзи ҳам ишонарди.

...Тотли орзулар қанотида сузиш дўстининг ўлимига қадар давом этди.

Дўсти...

Жаҳонгирни шунчаки «дўст» дея олмайди. Назарида Жаҳонгирнинг фазилатлари бир «дўст» доирасига сифмайди.

Жаҳонгир ҳеч маҳал сотқинлик қилмайди...

Жаҳонгир дўстидан жонини ҳам аямайди...

Жаҳонгир дўстининг ҳимоясига ҳамиша тайёр...

Ўн беш яшар йигитчага шу фазилатларнинг ўзи кифоя эди. Улар синфда ёнма-ён ўтиришарди. Уйлари ҳам бир кўчада эди.

Фақат...

Оталарининг мартабалари бир-бирига мос эмасди. Бирининг отаси иккинчисиникига паст назар билан боқар, ўғлининг бу хонадондан нарида юришини истар, бу истагини фарзандидан яширмас ҳам эди. Ота «бу бола билан ўртоқ бўлма», деб тайинлагани сайин ундан ўзга яхшиrok дўст йўклигига ўғилнинг ишончи ортиб борарди.

Кинохона атрофига ин кўйган тўрт-беш зўравон мактабга бораётган болаларнинг йўлини тўсиб, чўнтагини қоқиб оларди. Ёнида пули йўқларга «жарима солинарди» – бугун ўн тийин билан кутулиши мумкин бўлган бола эртага йигирма тийин олиб келишга мажбур эди.

Жаҳонгир ҳам шу кармокқа илиниб, аввалига овқатланиш учун берилган пуллар билан кутулиб юрди. Кейин талаб ошавергач, бувисининг қутисидаги пулдан ола бошлади. Марлен «катта»нинг ўғли бўлгани учун уларнинг чангалига тушмаган, деб ўйлаш хато, бунинг бошқа сабаби мавжуд эди. Жаҳонгир зўрларнинг дастидан дўстига арз қилса, балки, масала осонроқ ҳал этилармиди... Лекин «кўркок» деган лаънат тамғасидан чўчиб, индамади. Зўрлар Жаҳонгирни чақиришганда Марлен уларнинг мақсадларини англарди, лекин ўртоғининг пул узатганини кўрмагани учун «ўзи келишиб оляпти», деб аралашмасди. Жаҳонгир дардини ичига ютадиганлар тои-

фасидан эди. У ўзича чора излади, лекин топа олмади. Отасига айтиши ҳам мумкин эди. Лекин айттолмади. «Э, латта, шуларга кучинг етмайдими, мишиғингни оқизиб юровур...» деганга ўхшаган таъна эшитишни хоҳламади; икки ўт орасида қолди. У ўзини ўғрилиги учун, күрқоклиги учун айблади. Тунлари ухламай, ўша «зўр»лар билан хаёлан олишиб чиқди. «Эрталаб бораман, «Нима қилсанг қил, ўлдирсанг ўлдир, пул йўқ», дейман», – деб қарор қилгани билан, «зўр»ларни кўргач, дами чиққан пуфак ҳолига тушаверди. Борабора бувиси пули йўқолганини билди. Жаҳонгир унинг «ўлимлигимга йигиб қўйган пулим эди-я, қайси бемеҳр олди?» – деган гапларини эшитиб қолди-ю, ўн азоби минг бўлди. Ичга ютилган дард уни кемира бошлади. «Мен олувдим, шунақа воқеа бўлувди», деса – олам гулистон. Ота-онаси ҳам, бувиси ҳам бир оз койиб, сўнг унутишарди. Йўқ, ташкаридан туриб шундай фикрлаш осон. Жаҳонгирнинг гўр ғуури бошқача йўлга ундали. Бир неча сўздан иборат гапни айтишдан кўра ўлимни танламоқлик унга осон туюлди – яrim тунгача рух азобида тўлғониб, ҳовлидаги тут дарахтидан, унинг шохига ўзи ташлаган сиртмоқдан паноҳ топди. Ўз жонига қасд қилгани учун тўнғиз қавмида кетишини, жаноза ўқилмаслигини, қиёматда дўзах азоби кутиб турганини бола бечора билмасди...

Марлен дўстининг осилиб турган ҳолатини кўрмади. Мурдани ўлихонадан олиб келиб, хотинлар уй бурчагига чимилдиқ тутишгач, ўртоқларининг киришига ижозат беришди. Тўй кўрмай жон берган йигит-қизларга ирим қилиб уйда чимилдиқ тутишлари, гассол келгунига қадар мурда шу чимилдиқ ичида бўлишини Марлен ҳам, бошқа ўртоқлари ҳам билишмасди. Гулга кўмилган ўртоқларини кўргач, англашди.

Марлен ўлимнинг сабабини кейинроқ билди. Билди-ю, чорасизлигидан азобланди. Воқеани баён қилиб, отасидан мадад кутди. Ўғлининг Жаҳонгир

билан дўстлашишини истамаган отадан қандай мадад кутиш мумкин? Дастреб «ўйлаб кўрамиз», деб гапни қисқа қилди. Уч-тўрт кун ўтиб, Марлен яна эслатгач, энсаси қотиб:

- Бу мен аралашадиган иш эмас. Ўлган боланинг отаси бор, онаси бор, милисага арз қилсин, – деди.
- Милиса ўша зўравонларни ҳар куни кўради, индамайди-ку? – деди Марлен.
- Тўғри, кўради. Индамаслиги ҳам тўғри. Чунки улардан чўтал олиб туради.
- Жаҳоннинг адаси ўша чўтал оладиган милисага арз килиши керакми?

– Ҳамма нарсага ақлинг етади: тўғри тушунибсан, арз қилишининг фойдаси йўқ. Ўлган ўлиб кетди, каёққа югурса ҳам қайтиб келмайди.

Марлен «ўша зўрлар менга осилса, сиз ҳам ўша милисага арз қиласизми?» демоқчи бўлди-ю, жавобга отасидан яхши гап эшитмаслигини билиб, индамади. Отасидан нафратланиш билан чекланди.

...Марлен «Жаҳонгир ҳеч маҳал сотқинлик қilmайди», деб ишонарди ва унга ҳавас қиларди. Жаҳонгир ҳеч кимни сотмай, сирини гўрига олиб кетди. Энди унга ҳавас қilmайди...

...Марлен «Жаҳонгир дўстидан жонини ҳам аямайди», деб ишонарди. Жонини аямади... Факат... дўстидан эмас, арзимас нарсадан аямади. Энди унга ҳавас қilmайди...

Марлен «Жаҳонгир дўстнинг ҳимоясига ҳамиша тайёр», деб ишонарди, унга ҳавас қиларди. «Мен-чи, мен дўстимни ҳимоя қила оламанми?» деб ўзига-ўзи кўп марталаб савол берган. Назарида ҳимоя қила олар эди. Маълум бўлдики, ўзига бўлган ишончи пуч экан. Дўстини ҳимоя қила олмади... Дўстни ҳимоя қила олувчи дўст эса кетди...

У Прометей ҳақидаги афсонани ўқиган эди. Олимп тоғидан оловни ўғирлаб, Одам зотига ҳадя этгани учун Зевс худоси уни қояга занжирбанд этган экан. Ўттиз

минг йил давомида, то Херакл отиб ўлдиргунига қадар, бир бургут тонгда учиб келиб, кечга қадар Прометейнинг жигарини чўқиб, азоблар экан. Жигар кечаси билан асл ҳолига қайтиб, тонгдан яна янги азоблар бошланар экан...

Афсонавий қаҳрамонга ўхшаш хаёлига ҳам келмаган, ҳали бирорвга тайинли бир яхшилик ҳам қилмаган Марленни хотира бургути ҳар куни жигарини эмас, юрагини чўқилаб азоб берарди. Отасидан нажот кутиб эди, умиди сароб бўлиб чиқди. Унинг халоскори йўқ эди. Зотан, хотира бургутини ташқаридан маҳв эта оловучи куч ҳам йўқ. Отаси кинохона яқинига уя қурган зўравонларнинг тухумини қуритган тақдирда ҳам, Тарзанинг қалб яраси барибир тузалмас эди. Бу ҳақиқатни англашга ожиз ўсмирик онги ҳаётни ўзгача тушунишга мажбур этди.

У ўзи яшаётган оиланинг «бахтли» деб сифатланишига тушунолмай қолди.

Кунлар, ойлар ўтгани сайин ота-бала орасидағи бўшлиқ кенгаяверди. Улар гўё икки бегоналик кутбларига хукм қилингандай, бир-бирларидан узоклашавердилар.

Ўн беш ёшга тўлган кунини ҳайратланарли тарзда нишонлаш режаси тузила бошлагандан қишлоқдан бобоси келди. Бу ташриф отасига ҳам, онасига ҳам ёқмади. Айниқса онаси зиёфатга «нозик меҳмонлар» келишини қайта-қайта писанда қилавергач, нозикфаҳм бобоси бевақт келганини англади. Буклоғлиқ тўнини ўнг қўлтиғига қистириб олган бобосини Марлен кўчада учратди. Аникроғи, бобоси унинг мактабдан қайтишини кутиб турган эди.

– Жоним болам, сафарим қариди, кетяпман, – деди бобоси, унинг пешонасидан ўпиб.

– Туғилган кунимда кетиб қоласизми? – деди Марлен аразли оҳангда.

– Зиёфатларда ўтириш ёшларга ярашади. Бизда қаларга чойхонада ёнбошлаш ёқади. Аччиқ кўк-

чойдан икки ҳўплам ичиб, гурунг қилсак, жаннатнинг роҳатига етгандай бўламиз. «Таралла-бедод ялла» мени ҳоритиб кўяди, жоним болам... Туғилган кунинг уйимда ўтириб, сени дуо қиласман. Сурувдаги йигирмата сара совлиқни сенга атаб кўйганман. Уйлангунинггача бир дунё бўлади.

Кексалар дардларини яширишга уста бўлишади. Уларнинг кўзларига тортилган маъюслик булатуни ҳамма ҳам кўра олмайди. Овозларидағи ҳазинликни ҳамма ҳам сезавермайди. Марлен бобоси қалбини кемираётган дардни сезмаса-да, кетиши сабабини англаб, бошини эгди.

Бобосини кузатиб, автобус кўналғасига қадар бирга борди. Автобусни кутишга тўғри келди. Бобоси унга узоқ тикилди, дилидагини тилига кўчиришни истади: «Шу ёшга етдинг, улғайдинг, Худога шукур. Энди бу ёғига дунёни ўз ақлинг билан тушуниб етишинг керак. Лекин... даданг бунга йўл берармикин? Даданг қайсар... Ақли етарли, аммо керакли нарсаларга сарф қилмайди, шундан куяман. Худо сени берганда кувониб, отамнинг исмини қўймоқчи бўлувдим. «Шербек полvon» деган ном етти иқлимга тарқалганди. Саксон ёшларида ҳам кураклари ерга тегмаганди. Сенам полvon бўлиб, дунёга танилгин, деб умид қилувдим. Даданг гапимни эшитишни ҳам истамади, Маркс билан Ленинга сифиниб, «Марлен» деб қўиди. Қишлоқдагиларга «неварамнинг исми Марлен», дейишга уялдим, «Шербек полvon» деявердим. Шунинг учун қишлоқка борганингда сени кўпчилик «Шербек» деб чақиради. Онанг туғруқхонадан чикқанида кулогингта аzon айтмоқчи бўлувдим, даданг айттирмади. «Билиб қолишса, партиядан ўчирворишади», деди. Уч киши орасидаги сирни ким ҳам биларди? Бу бир баҳона-да! Ё мен парткомига бориб: «неварамнинг қулогига аzon айтдим», деб мақтанармидим? Ўшанда айттирганига кувонган ерим ҳам бўлди. Отингни «Марлен» дейишга Худодан уялдим... Даданг амали-

дан айрилиб қолишидан қўрқди, Худодан қўркмади. Амални боғлаб берибдими, эртами-кечми, кўшқўллаб топширади... Сенга қийин бўлишини билиб турибман, жоним болам. Пайғамбаримиз: «бола беш ёшга тўлгунича у подшоҳу сиз унинг қули макомидасиз, беш ёшидан ўн беш ёшигача сиз подшоҳу у қул мартабасида, ўн беш ёшдан кейин фарзандингиз билан дўст бўлинг», деган эканлар. Даданг буни билмайди, билганида ҳам амал килмасди. Шунаقا кибри бор унинг. У ҳамиша подшоҳ бўлишни истайди. Сенинг ёшингдагилар ҳамиша қул бўлиб қолишини исташмайди. Мен шундан қўрқаман, жоним болам...»

Бу гапларни айтишни жуда-жуда истади, аммо айтотмади. «Қишлоқка борса, бафуржа тушунтираман», деган тўхтамга келди. Индамай кетиши ҳам мумкин эмасди.

– «Инсон» дегани нималигини биласанми? – деб сўраган эди бобоси ўшанда.

Билмас эди, елка қисди.

– «Унутувчи» дегани. Одам боласи кўп яхши нарсаларни унугади, шуниси ёмон. Энг ёмони – ўзининг Одам эканини унугиб қўяди. Сен шундан эҳтиёт бўлгин, жоним болам. Бойлик билан мартаба ақл билан топилади, ақл хира тортса, бир зумда йўқотилади. Бойлик ва мартаба билан ақл топилмайди. Бойлик билан мартаба бевафо, ҳар қандай одамни ташлаб, қақшатиб кетади. Ақл эса эгасига вафодор, жарликка кулашдан асрайди. Ақлни ҳалоскор десак ҳам бўлади. Энди катта йигит бўлиб қолдинг, буларни фарқлашинг керак, тушунишинг керак. Ақлдан узоқлашма, жоним болам.

Бу ҳикматли гапларнинг васият эканини ўша дамда ўйлаб кўрмаган эди. Ўн беш ёшлилар ўзларини улғайган, етуклик чўққисини эгаллаган фаҳмлаб, катталарнинг насиҳатларига беписанд қарайдилар. Насиҳатларни тоқат билан эшитаверадилар-у, аммо дарров унугадилар. Ўз билганларидан қолмайдилар.

Марлен ҳам шуларнинг бири эди. Лекин бобосининг «аклдан узоқлашма» дейиши унга ёқди. Буни ўзига шиор, ҳатто байроқ қилиб олди.

...факат...

Фақат аклни хайрли фазилатлар билан бойитишга уринмади, аксинча, зулм ботқоғининг заҳарли суви билан суғормоқни маъқул кўрди. Бобосининг ранжиб кетиши уни зулм олами томон дастлабки қадам қўйишига сабаб бўлди. Биринчи галда отаси ва онасини жазолашни ўйлади. Жазо усулинни топди ҳам. Унинг режасига кўра, туғилган куни шодиёналиқ эмас, балки ташвиш билан ўтиши керак эди. Ўзгалар тақдирига лоқайдлик ва беписандлик билан қарамоқликнинг бундан ўзга жазоси йўқ эди.

Адашган ақл уни кинохона томон бошлади. Кечагина жазоланишини хоҳлаган йигитлардан нажот истади. Зўрларнинг каттасига бориб, зарур гапи борлигини билдириди. «Зўр» сигаретини лабида ўйнатиб, ёнидагиларга бир ишора қилган эди, улар узоқлашдилар.

— Кичкина болалардан танга йигиши жонингизга тегмадими, гадойга ўхшаб туришдан уялмайсизми? — деди.

Бу дадиллик «Зўр»ни бир неча нафас гангитиб қўйди. Кейин ғазабланиб, унинг кекирдагига қўл юборди:

— Нима деяётганингни биласанми, ҳумса?!

— Биламан, — деди Марлен, хотиржам тарзда. — Мўмайроқ пул ишлаш йўли бор, шуни айтмоқчиман.

«Зўр» киссавурлик қилгани учун икки йил болалар қамоқхонасида ўтириб келгани билан бу олам учун ҳали ғўр эди. Шу сабабли Марленнинг тақлифини мулоҳаза қилиб ўтирмай, унга дарров ишона қолди. «Зўр»нинг режа тузиши шарт эмас, Марлен бу ёғини пишиқлаб қўйган — режани амалга оширувчи ҳам ўзи, бу ёқдагилар эса шунчаки ёрдамчи эди. Режа амалга ошгач, тушган пулнинг ҳаммаси буларга қоларди. Марлен улуш олмасди. «Зўр»га шуниси ёқди.

У Ахтам билан ўшанды танишган эди. «Зўр» режа билан танишгач, ўзидан беш-олти қадам наридаги болага қараб «Мурда!» деб чақирганди. Буни эшилган Марлен «Мурда»нинг лақаб эканини билмай, «шунаقا исм ҳам бўладими, бунча хунук!» деб ўйлаганди.

«Мурда» унинг режасини дикқат билан эшилди-да, дарров ўзгартиш киритди:

– Хар бир уртогингга юз сўмдан талаб қилишинг инсофданмас, уларнинг нархини жуда-а ерга уриб юбординг-ку? – деди норози оҳангда.

– Сиз уларни билмайсиз, аслида сариқ чақага ҳам киммат, – деди Марлен асабийлашиб.

– Сен учун сариқ чақага қиммат. Мен учун умуман қадри йўқ. Менга қолса, ўртоқларингни нима килардим, биласанми? – Мурда савол берди-ю, жавобни кутмади, совуққонлик билан давом этди: – Ўлдирворардим...

Марлен буни ҳукм ўрнида тушуниб, кўркиб кетди:

– Йўқ, йўқ, уларга тегманг, уларни фақат кўркитиш керак, – деди лаблари титраб.

– Гали тўғри, шилта ишни хаёлингта ҳам келтирма, – «Зўр» шундай деб Мурдани туртиб қўйди.

Марленнинг кўркиб кетгани Мурдага ёқди, шеригининг танбеҳига парво ҳам қилмай, янада совуққонлик билан қўшиб қўйди:

– Ўзингни ҳам кўшворардим. Нимагалигини биласанми? – Марленнинг гап айтишга ҳоли қолмаганди, шу сабабли бу сафар ҳам саволига ўзи жавоб қайтарди: – Сенлар ҳамманинг қонини сўрадиган канасанлар. Сенлар, ҳа, сенинг ўзинг ҳам, бизларни ёмон кўрасанлар. «Ўғри» дейсанларми, «йўлтўсар», «талончи», яна нима балолар дейсанларми, ҳарҳолда гўрга киришимизни хоҳлайсанлар. Галимни эшитиб, ичингда «ўзинг канасан», дединг-а?

– Йўқ-йўқ, бунаقا гап калламга келмади, – деди Марлен. У гапнинг бундайчуваланишига ҳайрон, оқибатни билолмай гаранг бўлиб колган эди.

— Ҳозир келмаган бўлса, бирпас туриб келади. Умуман, балки биз ҳам канадирмиз. Лекин фаркимиз бор: биз қонни томчилаб сўрамиз, сенлар чеълаклаб ичасанлар. Биз тўйишимиз мумкин, аммо сенлар тўймайсанлар.

Бу гаплар Марленнинг ҳамиятига тегди, ғуур кўркувни кувди:

— Беш кўл баробар эмас, — деди Мурдага тик қараб.

— Мақолни ҳам билар экансан, калланг жойида, — деди Мурда ишшайиб. Энди бир нарсани ҳал қилиб олайлик: бу гапларни бекорга айтмадим. Мен сенларни ёмон кўраман, ўла-ўлгунимча эзиб-янчишга, уруғларингни қуритиб юборишга ҳаракат қиласман. Сен ҳам мени ёмон кўрасан. Кўлингдан келса, сен ҳам мени янчиб ташлашга интиласан. Лекин ҳозир менга ишинг тушиб турибди. Бир-бирини ёмон кўрадиган иккита одам келишиб олиши керак. Каллангни ишлатчи, кейин нима бўлади?

— Ҳеч нима... сиз пулни оласиз, кейин юзкўрмас бўлиб кетамиз.

— Сен биладиган мақолни мен ҳам биламан: «бир кўрган таниш, икки кўрган билиш», дегани ҳам бор.

— Иккинчи кўришмаймиз, — деди Марлен ўжарлик билан.

— Сен кимлардандир қасос олмоқчисан, билиб турибман. Ўғил болалигинг учун сенга қойил қоляпман. Афсус укам эмассан, сендақа жигарим бўлганида бoshимда кўтариб юрадим.

Марленнинг кўзларида акс этган нафрат учкунни сезгир Мурданинг назаридан четда қолмади:

— Ҳа? — деди у ён томонига «чирт» этиб тупуриб. — Бу гапим ҳам ёқмадими? «Акам бўлмаганингта Худога шукур, сендақа акаларни трамвайнинг тагига ташлаш керак», демоқчимисан? «Ака» демасанг ҳам, трамвайнинг тагига ташлашга шошилма. Мен сенга ҳали кўп керак бўламан. Мен қасоскорларни яхши кўраман. Сен ҳам шу рўйхатга тушдинг...

Ушанда Марлен бу «Мурда»нинг кўп керак бўлишини тасаввурига сифдиролмаган эди. Ўша онда бир фолбин келиб: «тез орада ҳаёт йўлларинг бирлашиб кетади», деса, уни телбага чиқарган бўлармиди...

Мурда, ўзи айтганидай, гапни бекорга чўзмаётган эди. У тажрибали жаллод сингари сиртмок ясаб, бу аклсиз қасоскорнинг бўйнига солаётганди. Сиртмок тайёр бўлгач, муддаога ўтди:

– Ўртокларингнинг ҳар бири учун минг сўмдан талаб қиласиз.

– Бу кўп, жуда кўп, – деди Марлен.

– Оширворма, – деб уни қувватлади «Зўр».

– Кўп эмас, бунақа арзандалар учун кам сўрасанг, ишонишмайди. Бериладиган пулни биз эмас, сен оласан.

Марлен бу гапни эшлиши билан қўрқув талвасасига тушиб, бақириб юборди:

– Қанақасига? Мен фош бўламанми? Мени ўлдиришади!

– Биз бор эканмиз, сени ўлдирадиган одам ҳали туғилмайди, – деди Мурда совуқ оҳангда. – Агар, биз меровлик қилиб қолсагу сенинг бир тола сочинг беҳуда тўкилса, уларнинг ҳаммаси ўлади.

– Йўқ-йўқ, уларни ўлдирманг...

Бу ялиниш оҳангি Мурдага мутлақо таъсир этмади. Совуқ нигохини Марленга тикканича, совуқ оҳангда қўшиб қўйди:

– Уларга қўшилиб ота-оналари ҳам ўлади.

Кейинги ҳукм Марленни тамоман гангитди. Йиглаб юборишига оз қолди. Буни сезган Мурда муддаосига етганидан қониқиб, ҳукмни юмшатди:

– Мен тахминимни айтяпман, қўрқма. Биз одамхўр ҳам эмасмиз, қотил ҳам эмасмиз. Биз бирорнинг бурнини қонатмаймиз. Биз ҳам ўзингга ўхшаган қасоскормиз. Ҳаёт сенларни эркалатган, бизларни озгина хафа қилган. Хафа қилғанларнинг сал-пал адабини берамиз, бошқа ёмонлигимиз йўқ...

Дунёда яшаётган миллиард-миллиард одамлар ўн беш ёшга тўлган кунларини зиёфатсиз, тантанасиз ўтказганлар. Ўн беш ёшга тўлган кунларини бир тишлам нонга зор ҳолда ўтказганлари ҳам бор. Туғилган кунни тантанасиз ўтказиш ҳам мумкин. Бу кундан ўз манфаати йўлида фойдаланиш, кимларданdir нималарнидир ундириб олиш ҳам мумкин. Кўп ҳолларда туғилган кун баҳонасида дастурхон ёзилганда бу хонадон осмонида тама қуёши порлаб туради. Марлен бу куёш нуридан ҳар йили безиллаб турса-да, унинг юзини тўсишни ўйламасди. Аникроғи, тўсиш кўлидан келмаслигини билиб, эзиларди. Бу сафар, бобосининг уйига қайтиб кетиши унинг қалбида исён ўтини ёқди. Ҳамонки, ўт ёқилган экан, кимнингдир кўйиши аниқ...

Марлен энг яқин ўртоқлари билан кундузи қахвахонада катталардан алоҳида давра куриб ўтириш нияти борлигини ота-онасига айтди. Онаси савол назари билан қараб қўйди-ю, индамади. Отаси эса ўртоқлари кимлар экани билан қизиқди. Шундай савол берилишини аввалдан билган Марлен исмлар рўйхати ёзилган қоғозни отасига узатди. Рўйхатдаги болалар зиёфатга чорланган нозик ва мартабали одамларнинг эрка фарзандлари бўлгач, отаси нима дерди?! Зиёфат янада мазмунли ўтажагидан кувониб, ўғлининг аклига таҳсин айтиб, шаҳар марказидаги қахвахонадан жой ҳозирлатиб берди.

Лабига сигарет қистириб олган «Зўр» беш ўсмир йигит ва икки қиз ўтирган тўкин дастурхонли столга аста яқинлашиб, одоб билан саломлашди-да, Марлендан гутурт сўради. Марленнинг режасида «Зўр»нинг бу тарзда яқинлашиши йўқ эди, шу боис бир оз довдиради:

— Гугурт... йўқ... чекмайман...

— Йигитнинг гули чекмаса қизик-ку? — деб «Зўр» бошқа йигитчаларга каради. Уларнинг бири чўнтаgidan ёққич олиб, узатди.

– Бор экансан-ку, йигитнинг гули! – деди «Зўр» жилмайиб. Кейин сигаретини тутатга, ёққичга ҳавас билан қаради: – Зўридан экан, қойилман. – Ёққични эгасига узаттач, изига қайтиш ўрнига Марленнинг ёнидаги бўш стулга ўтирди. Унинг бу килиғидан ажабланган йигитчалар бир-бирларига маънодор қараб олдилар. Қизлар эса «бу сурбетга индамайсанларми?!» дегандай қошларини чимирдилар.

– Братан, лимонад-пимонад қуйиб берайми? – деди ёққич берган йигитча пичинг билан.

– Раҳмат, братишка, мен лимонад ичиш ёшидан ўтиб кетганман. Сенлар ҳам ўтганга ўхшайсанлар-у, лекин бунақа ўтиришларингга беш кетмадим. Сенларнинг ёшларингда товоnlаримиздан ўт сачраб турарди.

– Бизнинг ёшимизда?.. Анча қариб қолибсизда, а? – деди Марлен заҳарли оҳангда.

– Ўтиришимизнинг нимаси ёқмади? – деди ёққич узаттан бола дағаллик билан.

– Айтаверайми, хафа бўлмайсанларми? – «Зўр» шундай деб уларга бир-бир қараб олди.– Сувга тушиб бўккан бўлка нонга ўхшаб ўтирибсанлар. Мазза қилиб яйраб-ўйнамайсанларми?

– Ишингиз бўлмасин, қанақа ўтиришни ўзимиз биламиз, – деди Марлен жеркиб.

– Гап йўқ, братишка, фақат... кичкина таклифим бор, ўйлаб кўрларинг. Ёқса, хизматларингда бўламан. Бир жойда, сенларга ўхшаган яхши болларга атаб кичкинагина видеобар очган эдим. Бугун кечгача бўш, Московдан янги кинолар олганман, агар ҳафсала қилсаларинг анави опангга айтасан, бошлаб боради, – шундай деб дераза томондаги столда ёлғиз ўтирган жувонга қараб қўйди. – Нархини келишамиз, яхши боллардан кўп олмайман.

«Зўр» шундай деб ўсмирлар юрагига қизиқиш ўтини ёққач, қаҳвахонадан чиқиб кетди. Ўтирганлардан айримларининг уйларида видеомагнитофон бўлгани билан ўзлари хоҳлаган кинофильмларни

кўришдан маҳрум эдилар. Шаҳардаги яширин видео-барлардан хабардор бўлғанлари учун ҳам Москва-дан кечагина олинган томошаларни кўришга қизиқиб қолдилар. Бир қиз боришни истамади. Бошқалари эса totли лаҳзалар умидида жувонга эргашиб кетдилар.

«Зўр» уларни алдамаган эди, ўн икки қаватли иморатнинг ертўласида жиҳозланган яширин видеобарда кутиб олди. Видеобар номига яширин ҳисоблансанда, хилватда жойлашмаган, назорат қилувчи керакли одамларга вақтида чўтал тўлаб турилгани учун бу атрофдан ўтган мушукни бирор пишт демас эди. Ахтам доимий мижозлардан бўлгани сабабли бу мишиштхонанинг хўжайинига сўзини ўtkаза оларди. Марленнинг таклифи ва режасини эшигтанда биринчи галда шу жой кўз олдига келди. Хўжайнинг уч кунлик мишишти борлигини билдириб, ҳакқини олдиндан тўлаб қўйди. Хўжайнин мижозларини гангитиб кўймаслик мақсадида эшикка «вақтинча ишламийди» деган эълонни ёпишириб, калитни Ахтамнинг кўлига топширди-да, тўртингчи куни эрталаб хабар олажагини билдириб, хайрлашди.

Ахтам калитни «Зўр»га бериб, ўзи сал наридаги қаҳважонада пайт пойлаб ўтирди. Режага кўра, меҳмонларни, аникроғи, қармоқча илинган лақма балиқчаларни хушнудлик билан кутиб олиб, ухлатиб бериш унинг зиммасида, қолгани эса Ахтамнинг иши эди.

Ярим қоронғи кенг хона бурчагида турган телевизор рўпарасига юмшоқ ўринидиклар қўйилган. Ҳар икки ўриндиқ олдидаги пастак столча усти мишиштага лозим егулик ва ичимлик билан безатилган эди. Меҳмонлар жойлашиб олишгач, «Зўр» битта шампан виносини очиб, қадаҳларга куйиб чиқди.

— Биринчиси менинг ҳисобимдан, таклифимни ерда қолдирмаганинглар учун совға десам ҳам бўлади. Бундан кейин келганларингда ҳам биринчиси мендан бўлади. Қолганларининг ҳисоби бор. Ҳисобли дўст

айрилмайди, дейишади-ку, тұғрими? Бу меҳмонхонада ҳакни олдиндан тұлаб қўйиш одати бор.

– Бу масалада Марикка мурожаат қиласиз. Бугун унинг туғилган куни, роппа-роса ўн бешга тұлди, – даврадаги ягона қыз шундай деди-да, ёнида ўтирган Марленнинг юзини меҳр билан силаб қўйди.

– Ие, зўр-ку! – деди «Зўр» бу «янгилиқ»дан қувонгандай бўлиб, – Унда яна битта шампан мендан. Биринчисини Марикжон укамизнинг соғлиги учун оламиз. Бир юз ўн бешга кирганинг ҳам шу ерда жамоа жам бўлиб майшат қилайлик! – «Зўр» кадаҳга лабини теккизиб, ҳўплагандай бўлди.

Қиздан бошқалари ўринларидан туриб, чўкиштириб ичишди. Оёгини чалиштириб ўтирган қыз ичиб бўлгач, жойига ўтирган Марлен томон чўзишиб, ёноғидан ўпид қўйди.

– Бир юз ўн беш ёшли нишонлаш учун бундан тузукроқ жой танланса ҳам бўларди, – деди лабини нозли равишда буриб қўйиб.

– Жой ёқмадими, сингилжон? – деди «Зўр» унинг қадаҳини тўлдира туриб.

– Ну, бир мартага ничего, – деди қыз беписандлик билан.

– Бир мартага яраган жой иккинчи мартага ҳам бўлаверади, – деди «Зўр» унга суқ билан тикилиб.

Қыз бундай тикилишнинг маънисини англаб, юзини тескари бурди.

– Братан, бўладиган ишни қилинг, лекигин роса эзма экансиз, – деди йигитчаларнинг бири.

– Зўр гап айтдинг! Бўладиган ишнинг бўлгани яхши. Қанақасини қўйиб берай: «Эммануэл»дан бошлайми?

– Между прочем, бунақа эротикани ҳозир боғчада кўрсатишади, – деди қыз қошларини чимириб.

– Ростакамидан қўйинг, – деб уни қувватлади Марлен. – Масковдан янгиси келди, деб мақтанувдингиз-ку?

— Шунақа гапларга беш кетаман-да, — деди «Зўр» телевизор томон юриб. — Ҳакиқий сексни кўрмаган йигит йигитми!

Болалар кутган беҳаё кинофильм қўйилгач, уларни эсноқ тута бошлади. Беш дакиқа ўтмай, шампанга қўшилган дори таъсир қилиб, олдинма-кейин ухлаб қолдилар.

Орадан олти соат ўтгач, бирин-сирин уйғониб, ўзларини ҳожатхонанинг ҳиди келиб турган зах ва коронги хонада, кўл-оёқлари боғланган ҳолда кўриб қўркувга тушдилар. Кўзлари қоронғиликка ўргангач, бир-бирларининг қораларини кўриб, овоз чиқардилар. Кўйлаги тугмалари ечилиб, сийнабанди кўриниб қолган қизнинг аҳволини кўрмадилар, кўрганларида ҳам нима қила олар эдилар? Улар «бизларни ўғирлаб қандайдир ахлатхонага ташлаб кетишли», деб ўйладилар. Ҳолбуки, майшат учун ўтирган жойларининг ёнгинасидаги қаровсиз омборхонага олиб чиқилган эдилар. Ҳаммадан кейин Марлен уйғонди. У ҳам ўзини ажабланган ва қўрқкан кўрсатиб, титроқ овозда: «Нима бўлди?» деб сўради.

— Буни сендан сўраш керак? — деди киз, уни тепишга ҳаракат қилиб.

— Нега мендан сўраркансан? Бу ерга мен зўрлаб олиб келмадим-ку? — деди Марлен ўртокларига нажот нигоҳи билан бокиб.

— Нега дарров ўзингни оқлаяпсан? Бир гап борми? — деди ўнг томонда ўтирган йигитча.

— Оқлаётганим йўқ, Нилуга жавоб беряпман, — деди Марлен саросимали овозда.

— Ҳеч ким ҳеч кимни айбламасин, — деди ўнг томондаги йигитча ҳукм оҳангига. — Ҳаммамиз баравар тўрга илиндик. Ҳароми қаёққа ғойиб бўлди?

Шу гапни пойлаб тургандек, эшик очилиб, юзига аёлларнинг юпқа пайғонини никоб сифатида тортиб олган Ахтам кириб келди.

— «Ҳароми», деганда мени назарда тутдингми? —

деди йигитчага қараб. – Тўғри топдинг. Мен ҳаромдан туғилганман. Ҳозирча шуни билиб турганинг етарли. Қамоқхонада туғилганимни билсанг, қўрққанингдан эсинг тескари бўлиб кетади. Ҳаромдан туғилганим учун ҳеч қанақа ҳаром ишдан қайтмайман. Сенлар ҳам, ота-оналаринг ҳам ҳароми эмас, «олий зот»санлар... – Ахтам «олий зот»га кинояли ургу бериб, аламли жилмайди-да, «ҳароми» деган йигитчанинг пешонасини силамоқ учун қўл узатди. Йигитча бошини тортмоқчи эди, қўл-оёғи боғлангани учун эвини қилолмади. Ахтам унинг пешонасини меҳрибон ота каби силаб, гапини хотиржам равишда давом эттиради: – Лекин ҳаромдан ҳазар қилмайсанлар. Шунақа бўлгандан кейин ҳаммамиз ҳаромимиз, тўғрими? Ҳаромилар жам бўпмиз, бир иш қилайлик: мен сенларга ҳам, ота-оналарингта ҳам ҳаром ҳақида кичкина дарс бериб қўймоқчиман.

Қиз бу овоз эгаси бошқа одам эканини фарқлади.

– Сен кимсан? Бизни бу ёққа олиб келган одам қани?

– Менми? – деди Ахтам калака оҳангиди. – Мен одамхўр махлукман, қорним очиб кетувди, сенларни бошлаб келган ҳаромини икки ямлаб ютиб юбора қолдим. Яхши қилибманми? Шундай ширин болажонларни алдаб, қийнаган ҳаромининг бу дунёда яшашга ҳаққи йўқ!

– Биз билан бунақа майнавозчилик ўйнама, адаларимиз кекирдагингни узиб, кўлингга тутқазиб қўяди, – деди кизнинг чап томонида ўтирган йигитча. Ахтам бу томоша бошланмасидан илгари болаларнинг кимлигини суриштириб билгани учун унинг катта кетишидан ажабланмади. Ажабланмаса-да, адабини бериб қўйишини истаб, у томон уч қадам қўйди-да, томоғига чанг солди:

– Ҳей, хунаса! Мени сенсирадингми?! Қамоқхонада киндигимни сен кесганмидинг! Билиб қўй: сен билан майнавозчилик ўйнаётганим йўқ. Адажонинг осмонга

қўл узатса, қуёшни узиб олиши мумкин, лекин менинг кекирдагимга ифлос қўли етмайди. Бунақа қўлни Худо ҳали яратмаган. Сен менга гапирадиган бўлсанг, ўйлаб ол. Тутқаноқ касалим бор. Ёкимсиз гапингни эшитиб, тутқаноғим тутиб қолмасин, кекирдагингни узиб олиб, «укахон, эт-бетингиз оғримаяптими?» деб ҳол сўрашга мени мажбур қилма!

Ахтам бўғилаёзган йигитни қўйиб юбориб, ўртага туриб олди. Бошқалар гап айтишга журъат қилмадилар. Йигитчалардан бири пиқиллаб йиғлай бошлади.

– Энди гап бундай бўлиб қолди, братишкалар: шу ўтиришларингнинг ўзи Масковдан келган янги кино бўлади. Ўйингдагиларга хабар қилиб қўйдим. Ҳар бирингга минг сўмдан нарх қўйдим, кўрай-чи, ота-оналаринг қимматсирамай сотиб олармикин сенларни. Уч кун вақт бердим. Уч кунгача уч маҳалдан овқат бераман сен текинхўрларга. Кейин оч ўтирасанлар. Тўртинчи куни қўлимга пул тушмаса, биттадан ўлдиришни бошлайман. Ўлдирилган оғайниларингнинг гўштидан шўрва қилиб, ўзларингта ичирман.

– Қўрқитманг, ваҳима қиласидиган ёшдан ўтганмиз, – деди Марленнинг ўнг томонида ўтирган йигит. – Пул керак экан, олдинроқ айтмайсизми, минг сўмни ўзим садақа қилиб юборардим.

– Биринчидан, минг сўм эмас, ҳар бирингдан минг; иккинчидан, мен садақа оладиган гадой эмасман, мен пулни ҳаппа-ҳалол ишлаб оламан. Учинчидан, тилингни тийиб, писта қилиб ўтириб!

Ахтам шундай деди-да, у томон кескин қадам босиб, юзига қаттиқ тарсаки туширди. Йигитча ўнгланмай туриб, бу юзига ҳам тарсаки тушди.

– Агар ўғил бола бўлсанг, биз билан ўғил болачасига гаплаш, – деди қиз овозини баландлатиб. – Қўлоёғи боғлаган одамни урушга ҳажи қизларнинг ҳам қўли бормайди.

Бундай гапни, айниқса, беписандлик билан сенсирашни қиздан кутмаган Ахтам нима дейишини билолмай қолди.

– Бу гапинг ҳам түгри, – деди бүш келиб. – Ҳали тутқаноғим бор, дедим-ку... шу тутиб қолди...

– Тутқаноғинг тутмасин. Үйимиздагиларга хабар берган бўлсанг, кут. Пулни беришади. Фақат... ёлғон гапирмаётганингга бизни ишонтир.

– Қанака ёлғон?

– Үйимиздагиларга қандай хабар қилдинг? Үйимизни қандай топиб бординг? Ё телефон қилдингми? Унда телефон рақамини қаёқдан била қолдинг?

– Сингилжон, сиз аҳмокроқмисиз ё менинг каллам айниб қолганми? Уйларингга битта-битта бориб келишим керакмиди? Ота-оналаринг ҳозир кимницида ўтиришибди? Манави галварсникидами? Ўн бешга кирганини нишонлашяптими? Ҳа... мазза килиб ўтиришувди... Бунга баҳт-саодат тилаштывди, – шундай деб, тотли нарса егандек лабини чўлпиллатиб кўйди. – Агар бу ердан тирик чиқса, баҳтли бўлиши ҳам мумкин. Мен уларга кувончли хабар етказдим. Энди улар нима қилишади? Минг сўм-минг сўмдан тўплаб менга етказишадими? Ақллари бўлганда шундай қилишарди. Дунёдаги барча аҳмоклар сингари улар биринчи галда милисага арз қилишади. Йў-ўқ... шу ерга келганда ақлсиз каллам яна адашди. Ахир ота-оналаринг оддий аҳмоклардан эмас-ку?! Улар милисага арз қилишмайди. Милисанинг катталарига теллон килиб, буюришади. У бечоралар оёғи куйган товукдай типирчилашни бошлашади. Биринчи галда сенлар ўтирган қаъвахонанинг тит-питини чиқаришади. Бир-иккитасини одам ўғирлашда гумон қилиб, қамаб ҳам қўйишади. Ўшаларга ачинаман, емаган сомсага пул тўлаб, то сенларнинг тиригинг ё ўликларинг чиқмагунча калтак еб ўтиради. Ҳа, майли, кейин бир вақт топиб кўнгилларини оларман. Сенлар ҳам ота-ларингнинг кучига ишоняпсанлар. Майли, ишониб

ўтираверларинг. Муддат тугагач, биринчи бўлиб, сени сўйиб бераман. Ухлаёттанингда у ер-бу ерингни ушлаб кўрувдим, бикқигина экансан. Қизларнинг гўштидан зўр чучвара бўлади-да!

– Ҳайвон! Ифлос!! – Қиз ғазаб билан бақириб, Ахтам томон тупурди.

– «Ҳайвон» деганинг балки тўғридир, одамманми ё ҳайвонманми, билолмай ўзим ҳам баъзида адашман, – деди Ахтам гап оҳангини ўзгартирмай. – Лекин «ифлос» дейишинг тухмат. Чунки мен озода боламан. Чақалоқлигимда қамоқхонада ҳафтада бир марта албатта чўмилтиришаркан. Мен шунақа озодаликка ўрганганман. Бутун чўмиладиган куним эди, сени татиб кўрганимдан кейин опок бола бўлиб олдим.

– Ҳақиқий ҳароми экансан! – Марлен шундай деб бақириб, у ҳам тупурди.

– Ие, бу жонондан сен ҳам умидвормидинг? Тушингни сувга айт! Бу жонон сени калишига патак ҳам қилмайди. Бунга йигитларнинг хўррози керак! Сен кимсан? Бир сўтаксан. Чумчук ҳам сендан тузукрок босади.

– Братаң, бўлди! Сенга гап йўқ, ҳаммамизни аҳмоқ қилдинг. Энди ё овозингни ўчир, ё чиқиб кет, – деди қаҳвахонада ёққич узатган йигитча, ғазабли нигоҳини унга қадаб.

– Униси ҳам, буниси ҳам мумкинмас. Мен сенларни зериктирмай олиб ўтиришга аҳд қилганман.

Марлен қасос кўчасини танлаб, аста қадам босганида ишнинг бу қадар мураккаб ва шафқатсиз бўлишини кутмаган эди. Мурданинг қилиқлари, пичингли гаплари унинг сабр косасини тўлдириб, тошириб юборди. Газабдан кўзларигача қизариб кетди:

– Ўғил бола бўлсанг, чиқиб кет! – деб бақириб юборди.

Ахтам унинг ҳолатини сезди. Йигитчага яқинлашиб, кўзларига тикилди. Кейин жимжилогининг ўсиқ тирноғини ёноғига ботириб, кичик айланана чиз-

гандай бўлди. Марлен унинг мақсадини англамай, кўзлари ола-кула бўлиб, талвасага тушай деди.

— Сен ҳали менинг ўғил бола эканимга ишонмадингми?

Ахтам заҳарли оҳангда шундай деб, унинг ёноғига мушт туширди. Зарба қаттиқ бўлгани учун Марлен ҳушини йўқотди.

— Кўзи омон қолди, шунинг ўзи катта баҳт, — деди Ахтам хотиржам оҳангда. Кейин аввал қизга, сўнг катта кетган йигитчага қаради: — энди икковинг бошқа хонага чиқсанлар.

— Йўқ, охиригача бирга бўламиз, — деб эътиroz билдириди йигитча.

— Сен менга шарт қўйма, нима қилишни ўзим биламан. Сенларнинг оталаринг буларникидан баландда. Шунинг учун сенларга «люкс» хона керак. Оталаринг бу йил икковингни қовуштироқчи шекилли, а? Отангдан олдин мен қовуштириб қўя колай, нима дейсан?

— Керакмас... илтимос, братан... — йигитча Ахтамга энди ялиниш нигоҳи билан боқди.

— Нега керакмас, дейсан, керак! Хоҳласанг ҳам, ҳоҳламасанг ҳам шу жононга уйланасан. Уйланмасанг, отангнинг оёғи осмондан бўлиб кетади. Уйлансанг, ўзинг ҳам баланд осмонларда учиб юрасан, уйланмасанг пачафинг чиқади, бола! Булар билан ўйнашма! Агар бу тавия кечаси кўзингга алвасти бўлиб куринса, сен кўркма, битта чиройли жононни ўйнаш килиб олгин-у, даврингни суравер. Сен бундан кўркма, бу ҳам ҳар ҳафтада бир ўйнаш алмаштириб, сенга даъво қилмайди. Энг муҳими — сен бунинг ишига аралашма. Эммунэлни биларкансан-ку, ўшанақасига яшайверасан. Қани турларинг!

Ахтам икковининг оёқларини бўшатди-да, ўринларидан турғазиб, бўйниларига чанг соганича итара-итара бошқа хонага олиб чиқди. Ҳали мушт зарбидан ўзига келолмай ўтирган Марлен кўзларини мўлтиллатганича қолаверди.

Хона чиндан ҳам ажабтовур эди. Бунда майшат учун барча шароит мұхайё этилганди. Ахтам бу сағар қадағларга шампан әмас, конъяк қуйиб икковига зүрлаб ичиригач, беҳаे фильмни қўйди. Яна бир қадаҳдан конъяк ичиргандан сўнг уларнинг қўлларини ҳам ечди.

— Мен айтганини бажарадиган ўғил боламан. Шу уй сенларники! — деди-да, кизга ишрат кўзи билан қараб олгач, чиқиб кетди.

Бу ўйин режада йўқ эди, кейин пайдо бўлди.

Ҳамма ухлаб қолгач «Зўр» қизнинг тугмаларини ечиб, у ер-бу ерини силаб, кучоқлаб нафсини қондираётганида Ахтам кириб келди.

— Қиз бола бўлмаганда маза қилиб олардим, — деди афсус билан.

— Қиз боламас, нимадан кўрқасан? — деди Ахтам.

— Қиз боламаслигини қаёқдан билдинг? — деди «Зўр» ажабланиб.

— Башараси айтиб турибди. Синаб берайми?

— Тегма! Қиз бола бўлса, «ўғрилар оламига иснод келтиридиларинг», деб оғалар бизни тинч кўйишмайди.

— Яхши, мен тегмайман, лекин исбот қилиб бераман, — деди Ахтам ўжарлик билан.

Икковлари бўлажак ўлжанинг teng ярмини тикиб гаров боғлашди. Режага бу қалтис ўзгартириш шундан кейин киритилди.

Майшат учун мосланган хос хонанинг сирини факат оз одамларгина билишарди. Бирор лақма каттароққа тушиши керак бўлса, шу хонага киритилиб, қилиқлари суратга олинарди. Суратга олиш учун мўлжалланган дарча ичкаридан сезилмасди. Қиз билан йигитчани ёлғиз қолдириб чикқан Ахтам сураткаш ўтирадиган тор хонага кирди. Бу ерда «Зўр» дарчага ёпишиб олганича ичкаридаги томошадан кўз узмай ўтиради.

Гаровда Ахтам ютди. Ичкаридаги йигитча «Шала-ва экансан! Сенга икки дунёда ҳам уйланмайман!» —

деб ғалва бошлагач, Ахтам кириб, унинг қўлларини боғлаб, жойига олиб чиқиб кўйди-да, хос хонага иккинчи йигитчани киритди. Кейин учинчисини...

Куркувдан титраб ўтирган йигитчалар тиззалири қалтираганича хос хонага кириб, кетма-кет икки қадаҳ конъяқ ичишгач, шерга айланишарди... Қизга бу ўйин ёқиб қолганмиди ё такдирига тан берганмиди, ҳархолда Ахтамга ғазаб билан тикилмас, ғалва ҳам қилмас эди.

Эртасига Ахтам бир даста фото суратни кўтариб кириб келди. Тепадаги дарчани очган эди, хона сал ёришди.

– Кеча маза қилдиларингми? Кўрасанларми?

Шундай деб суратларни кўрсата бошлади. Йигитчалар ҳам уят, ҳам қўркув билан аввал суратга, кейин бир-бирларига қараб олишди.

– Бу милиса тилида нима дейилади, биласанларми? Бу ашёвий далил! «Вояга етмаган бокира қизни тўда бўлиб зўрлаш», дейилади. Ҳар биринг камида ўн йилдан олиб, Магадангами, ундан наригами жўнаб қоласанлар. Зўрлаш билан қамалганларнинг у ёқдаги аҳволини эшитганмисанлар? Мен ўзим кўрганман: қамоқдан чиққунларинггача хотининн соғинганларга хотинлик қиласанлар. Сенларни фақат мен саклаб қолишим мумкин: агар бу ердан тирик чиқадиган бўлсаларинг ким қандай савол берса, «билмайман, эсимда йўқ», деб жавоб қайтарасанлар. Мени тушларингда ҳам кўрмагансанлар. Буларни, – суратларни баланд кўтарди, – Масковдаги прокуратурага жўнатаман. У ёққа адаларингнинг қўллари етмайди. Етса ҳам, синиб тушади. Мабодо, бир палакат бўлиб, қамалиб қолсан, менга бало ҳам урмайди, қамоқ ўзимнинг уйим. Лекин шерикларим... – шундай деб йигитчаларга айёrona бокди, – қўрқмаларинг, ўлдиришмайди, ўлиб осон кутулмайсанлар, сенларни битта-биттадан тутиб, териларингни шилиб, туз сепиб кўйишади. Хўп, энди бўладиган гапга ўтаман: аданг

билан гаплашдим, – ёккіч берган бола унга умид билан бокди, – аданг менга тан берди, милисадан умидини узибди. Менга шунақа деди, пулни ҳам тайёрлаб күйибди. Лекин гапига ишонмайман. Пул бераман, деб күлга туширмоқчи. Мен икки ёшимда қамоқда шунақа ўйинлар ўйнардим. Майли, лақыллатдим, деб кувона турсин. Пул олгани мен чиқмайман. Пулни манави ошналаринг олади.

– Нега мен? Мен... бормайман... – деб бакирди Марлен.

– Чийиллама, сұтак! Мен шундай қарор қилдим. Пул адангда. Аданғдан олиб, менга берасан. Агар бу сұтак сотқынлик қылса, ҳамманг ўласан. Қоринларинг очгандир, бугун хотин гүштидан чучвара ейишга тайёрланиб турларинг.

Ахтам қатый оқанғда шундай дегач, шарт ўғирилиб чиқиб кетди. Ичкаридагилар бакир-чакир қылғанларича қолавердилар. Ахтам бу кеч мишишатхонани эгасига топшириши керак зди. Шу сабабли шошилди, таваккал қилди.

Марлен отаси билан метро бекатида учрашди. Күчоклашиш, күп гаплашиб туриш мумкинмаслиги телефонда айттылған зди. Ҳам құрқув, ҳам уят исеканжасидаги Марлен отасининг күзига қарай олмади. Ўғлининг ёноғи күкарғани, озиб, күzlари киртайганини күрган отанинг юрагида санчиқ турди. Құлудаги түгунчани отиб юбориб, ўғлини бу азоб түридан күтқарғиси келди. Чорасизлигидан эзилди. Азоб түридан қутқазышнинг бирдан бир йўли – пулни бериб, сўнг кутиш балосига мубтало бўлиш зди. Атрофда милиция борлигини билади. Лекин уларнинг асосий нияти бу болани ҳимоя қилиш эмас, жиноятчини ушлаш эканини ҳам билади...

Пул берилди.

Чорасиз ота кўзларини ёшлаб, унинг изидан тикилди...

Марлен худди телба каби ҳали у, ҳали бу поездга

чиқаверди. Унинг изидан тушган милиция ходимларининг ҳам силласи куриди. «Бу бола ё жинни, ё бизни лакиллатяпти», деган тұхтамга келишганды Марлен үзини тиқин вагонга урди. У қачон, қайси вагонда, кимга учрашишини билмасди. Шу тиқинда Ахтам орқа томондан кулоғига шивирлади:

– Пулни бергин-у, ўгирилмай жим туравер, охири гача бориб, кейин уйингга жўна. Бир соатда оғайніларинг ҳам уйларида бўлишади.

Бу ноҳуш воқеа бўйича жиноий иш кўзгалган эди, сўрок-терговлар узоқ давом этди. «Ҳамма нарсани эсларидан чиқарган» йигитчалар, ҳатто қиз ҳам орадан ҳафталар ўтса-да, тайинли бир маълумот бера олишмади. Шундай кунларнинг бирида Ахтам Марленнинг йўлини пойлаб, уни учратди:

– Кечир мени, сал ошириб юбордим, шундай килмасам бўлмасди, – деб кўл узатди.

Марлен узатилган кўлни олмади:

– Бошқа кўришмаймиз, дегандим-ку? Пулни олдинг, ҳеч ким ҳеч нарса дегани йўқ.

Ахтам унинг дангал сенсирашидан ғашланса-да, сездирмай жилмайди:

– Урислар «дунё тор, учрашмасликнинг иложи йўқ», дейишади. Ишимиз ҳали охирига етгани йўқ. Сен эртага терговчига бориб, «ўша куни бошим оғриб турувди, пулни «Зўр» олгани эсимга тушди», – дейсан. Оғайниларинг гапингни тасдиқлаб беришади.

– Нега?

– Шундай қилиш керак. Ўртадаги битта аҳмок йўқолса, икки ақлли бирлашиб, зўр ишларни қилиб ташлаши мумкин.

Марлен бу мавхум гапга тушунмади: «хўп, битта аҳмоқ ўша «Зўр»дир, иккита ақлли-чи? Биттаси ўзими? Иккинчиси-чи?» Иккинчиси ўзи эканини ўша дамда тасаввур ҳам қила олмаган эди. «Рафиқу сумма тарик» – «аввал дўст танла, ундан сўнг йўл» ҳикматига зид ўлароқ, Марлен аввал йўлни танлаб, шу

йўлга яраша дўстга рўпара бўлди. Кўнгли оз муддат
ғашланди, лекин тақдирдан нолимади.

Шайтанат дунёсига кириш учун остона ҳатлаган
Ахтам ўзи билан Марленни олиб киришни истади.

Бу истакнинг сабаби бор эди...

Отаси чизиб, қатъий чегаралаб кўйган ҳудудни
бузиб чиқиб, эркин ҳолда яшашни истаган Марленни
кўлидан ушлаб, бу олам сари тортиш қийин бўлмади.

«Зўр»ни осонлик билан йўлдан олиб ташлашди.
Орадан йиллар ўтиб, Марлен «Тарзан» лақабини олди.
Иккинчи ҳалокатдан сўнг омон қолганда касалхонага
йўқлаб борган Ахтам унга шу лақабни берди. Мана
энди йўлларида асосий зўр турибди. Уни битта чакув
билан олиб ташлаш мумкин эмас.

Ахтам кетгач, анҳор бўйида ўтирган Тарзан шу-
ларни эслади. Кейин шахмат тахтасига қаради:

«Бир юришда мот», дедими? Айтишга осон...» –
деб оқ шоҳни жимжилоги билан йикитди-да, ўрнидан
туриб, керишди.

4

«Жоним болам, эсингда турсин, сен билан мени
бебаҳт қилган одамни улғайганингда топасан! Бу
хўрликларимиз учун ўч ол! Унинг оти...»

Онасидан қолган ёдгор сўзларни қандай унутсин?

Онаси нима деб эркаларди?

Эсламайди. Бирор «бўталоғим», дейди, яна бирор
«баҳтим чечаги» дейди. Онаси нима деб эркалаган-
ди? Қамоқда ўтириб, қамоқхонанинг муҳр босилган
эски чойшабидан бошқа либосни кўрмаган боласини
бағрига босиб «баҳтим чечаги» дейиши мумкинмиди?

Эркаламасликнинг иложи йўқ. Ҳар қандай шаро-
итда ҳам, ҳатто дўзах лабига келиб қолганда ҳам она
қалбидаги сўнгти меҳр томчиларини боласига атай-
ди. Ҳатто сўнгти нафасини ҳам боласини эркалаш-
га сарфлайди. Афсуски, бу меҳр нурини бола эслаб

қололмайди. Ҳаётнинг турли түфөнлари унинг хотирасидаги энг гўзал кўринишларни ҳам ўборга кўмиб юборади. Ахтам бундан мустасно эмас. Димоғига онасининг кўкрак ҳиди эмас, қамоқхонанинг қуланса, бад бўйи ўрнашиб қолган...

Бадбахтнинг исмини айтган эди.

Уч ёшга тўлган куни у эркинликдаги болалар уйига юборилди. Онаси хайрлашув чоғида бу исмни уч марта такрорлади. Уч яшар боланинг хотирасига муҳрлаб қўйиш учун шундай қилди. Сўнг... дили вайронлигича оҳ тортиб қолаверди. У Қиёматда боласи билан учрашажагини билмасди, билганда эди, умид билан қоларди, боласини дуо киларди. Дуо қилишни ҳам билмасди у бечора, ҳеч ким ўргатмаганди...

Ахтам эслаб қолди.

Исмни ҳам, уч олишга даъватни ҳам...

Онасининг жилмайганини, кўзлари кулганини эслолмайди. Ҳар кўришганида онаси йигларди...

Кўз ёшлари маржон-маржон онани унугиб бўларканми?!

Дардли хотира билан улғайди.

Кичиклигига қасос нималигига ақли етмасди, лекин қасос олиши шартлигини биларди.

Шу аҳд билан улғайди.

Болалар уйида улғайиб, чиройли ҳаётга учирма бўладиган вақтда ўғирлик қилиб, қамалиб қолди. Ўртоқлари яхши ўқишлоналарда ўқидилар. Қамоқхона боғчасида тарбия олган Ахтам улғайгач, қамоқхонада жиноят оламининг ўзига хос мактабида ўқиди. Қамоқдан чиққанидан сўнг онасини суриштирди. Озодлик ҳавосидан нафас олишга улгурмай вафот этганини билиб, дунёга сиғмай қолди. Бутун дунёни остин-устун қилиб юборгиси келди.

Вақт суви алам ўтини аста совутгач, онасининг кариндошларини излади.

Ажаб!

Бобоси ҳам, бувиси ҳам, тоғалари, холалари ҳам

бор экан. Аммо улар қамоқда туғилған болани танимадилар, танишни истамадилар. Бобо билан буви қизидан, тоғалар билан холалар сингилларидан аллақачон воз кечишиган экан. Ахтамнинг онаси буни биларди, шунга қарамай, ўғли уч ёшга яқинлашганда отасига хатлар ёзиб, «боламни олиб кетинг» деб илтижо күлгән эди. Бобо билан буви қизни кечиришмади, түккан боласини «ҳароми» санаб, бағрига олишни исташмади.

Булардан бекебар Ахтам уларни истаб топган эди...

Ахтам урф-одат, иснод, одамлар орасида бош күтариб юролмаслик нима эканини билмас эди. Шуннинг учун қариндошларининг юз ўтиришлари унга ғалати түюлди. Уйларида яшашга ҳам, уларнинг бокишиларига ҳам муҳтож эмасди. Ўғрилар оламига тобе йигит күчада хор бўлармиди!

Марленнинг режаси амалга ошиб, қўлига пул тушгач, айниқса, «Зўр» йўлдан олиниб, барча пулга эга бўлгач, бобосини йўқлаб борди:

— Сиз мени тан олмасангиз ҳам, онамнинг отаси бўлиб қолаверасиз. Қидириб келганимда мендан бир бурда нонингизни кизғандингиз. Уйлаб қарасам, сиз ваҳший экансиз. Ваҳшийни ўлдириш керак. Лекин сизни ўлдириш мумкинмас. Онам «бобонгдан хабар олиб тур», деган, мана, хабар олгани келдим, — деб бир даста пулни ташлади-да, хайр ҳам демай, изига қайтди. У ўз кўнглида бераҳмлардан шундай қасос олган эди.

Савдо соҳасида ишлаган онаси катта миқдордаги маблағни ўзлаштириб олгани учун қамалган эди. Ахтам буни ҳам суриштириб, ҳакиқатнинг тагига етди.

Онаси савдода бирга ишловчи хушрўй йигитга кўнгил қўйиб, ота-она розилигисиз, никоҳсиз тегиб олган эди. Дўкондаги пулни ҳам ўша йигит ҳазм қилиб юборганди. «Корнингдаги боланг етим қолмасин, сенга раҳм қилишади, ҳомиладорларни қамашмайди»,

деб аврагани учун айбни бўйнига олган эди. Йигит номардлик қилиб ғойиб бўлди...

Ахтам ўшани... ўз отасини топди.

Қасос йўлларини ўйлаб юрганида у номарднинг ўғлига ҳам дуч келди.

Марлен ўша бадбаҳтнинг ўғли эди...

Бу баҳтли тасодифдан Ахтамнинг боши осмонга етди. Марленни қўлдан чиқармасликка аҳд қилди ва бунга эришди ҳам. Бу янгилик кашф килинганда ўн тўрт ёшли Марлен кинохона ёнидаги зўрларнинг бири ўзининг ўтай акаси эканидан бехабар эди. Ахтам уни тинмай кузатарди. Дастлаб йўлини тўсиб, дўппосламоқчи бўлди. Бу қасос эмас, ноchorликнинг бир белгиси эканини тез англаб, қароридан дарров воз кечди. У ўгай укасига: «Мен етимликнинг заҳарли ошини ичib шу ёшга етдим, сен эркатойликнинг асал чойи билан талтайдинг. Мени ҳар қадамда «ҳароми» деб таҳқирладилар, ҳатто бобом билан бувим ҳам шундай дейишди. Хўп, никоҳиз туғилган болани «ҳароми» дейишаркан, ҳаромдан топилган нонни еб катта бўлган бола-чи? Уни нима дейиш керак? Иккаламиз бир пуштикамардан бўлганмиз. Нега мен хорман-у, сен роҳатдасан? Тенглашсак бўлмайдими?» – дегиси келарди. Лекин бу гапларнинг бефойдалигига фаҳми етиб, тилини тиярди. Жаҳонгир ва унга ўхшаш ўнлаб ношудлар йўлини тўсиб, пулини қокиб олаётган зўрларнинг Марленга тегмаслигига сабабчи Ахтам эди. Марленнинг отаси катта ишда ишлагани учун эмас, балки Ахтам «Бу бола менга тегишли», деб қўйгани учун эркин юрди.

Марлен билан тақдир ипларини боғлагани билан қасосдан воз кечмади, пайт пойлади.

Ахтам Асадбекни, унинг атрофидагиларни яхши биларди, унинг оламига киришни орзу қиласарди. Мақсади унга хизмат қилиш эмас, балки у бошқараётган оламга эгалик қилиш эди. Омадини қарангки, Асадбек у танда қўйган ресторонга кутилмаганда келиб қолди.

Кутилмаганда унга кўзи тушди. Кутилмаганда уни кўз остига олиб кўйди.

Анҳор бўйидаги ошхонада Тарзанга «хизматни сен бошлаб тура қоласан. Менинг уч-тўрт кунлик зарур ишим бор», деб хайрлашгач, кўп йиллар давомида пишиб, етилиб қолган қасос режасини амалга оширишга киришди.

У болалар уйида эканида ҳам озода ва ораста кийинишни яхши кўрарди. Қамоққа тушганида бошқа болаларга ўхшамади, танасига игнада сурат солдирмади. У баданига турли суратлар солдирган, лабидан сигарет тушмайдиган, ароқдан ўзга дарди бўлмаган тоифадан эмасди. Ҳар бир олам вақти-вақти билан янгиланиб тургани сингари жиноят олами ҳам Ахтамга ўхшаш ёшлар билан янгилана бошлаганди. Ўттизинчи йиллардаги очарчилик даврида Самара томонлардан ёпирилиб келган ўғрилар билан, уруш ва урушдан кейин ўзини дунё ҳокими ҳисоблаган ўғрилар дунёқараши, иш услублари, ваҳшийликлари орасида катта фарқ бўлганидек, энди остона ҳатлаган ўғриларнинг онги бошқача, фикрлашлари, ўзларини тутишлари ўзгача эди. Ахтам вазиятга қараб турлана олишни ўрганган эди. У керакли жойда одоб билан, бошқа ўринда киноя билан, зарурат туғилса ўғрилар тилида одобсиз тарзда сўзлай оларди. Бу қилигини кузатган Тарзан «аслида сен артистликка ўқишинг керак экан», деганида Ахтам «Бу дунёда ҳамма артист, битта мен тўғри яшай қолай», деб маҳзун жилмайганди. Тарзан ўшанда унинг гапини майнавозчиликка йўйиб, ахволини англамаган эди.

Тунни онасидан қолган хира хотиралар билан бедор ўтказган Ахтам тонгда чўмилиб, энг сўнгги русумдаги чиройли кийимларини кийди. Режасини яна фикр чиғириғидан ўтказиб, бадбахт отасининг ҳузурига отланди. Бу кунни узок йиллар куттан эди. Назаридага пичоқни қиндан чиқариб, у малъуннинг юрагини сугуриб олиш осондай туюлган эди. Остона ҳатлаб

күчага чиққанида юраги сал увишди, бу ваҳшийликка журъати етишмагандай бўлди. Ҳатто қадамини секинлатди. Кейин ўз ҳаётининг энг тубан кўринишларидан бир нечасини эслаб, ғазаб оловига мой қўйди. Журъатсизлиги чекинди, аксинча, қасосга ундовчи қудрат бош кўтарди. Шунда ҳам пешинга қадар кўчада тентираб юрди. Пешинда ресторанга кирди. Далда бўлар, деб юз грамм ароқ буюрди, лекин ичмади. Ўзи яхши кўрган қовурма лағмон ҳам томоғидан ўтмади. Ресторандаги телефон гўшагини кўтариб, телевидение муҳаррири номидан кўнғироқ қилди-да, бадбаҳт отасининг мажлисдан соат тўртда бўшашини билди. Шу вактда у ишлайдиган идорага яқинлашиб, кутди. У соат бешга яқин келди. Сутранг «Волга»дан викор билан тушиб, викор билан юриб, идорасига кириб кетди. Озгина сабр қилиб, Ахтам ўша томон юрди.

Қабулхонада попукдек гўзал қиз лабини бўяб ўтирган экан. Нима учун бу онда лаб бўялаётганини фаҳмлаган Ахтам «ҳозиргина хўжайнингга қандай ўптирганингни мен яхши биламан», дегандай маънодор жилмайиб, салом берди. Қиз унга бир қараб қўйди-ю, «билсанг ундан нарига, мен уладиганлардан эмасман», дегандай ишини давом эттириди. Ахтам кулимсираганича унга яқинлашиб, дипломатини очдида, фақат Москва томонларда учрайдиган камёб шоколадни олиб, ёзув машинкаси ёнига қўйди:

- Сизни шу ерда учратишимни сезиб, олволган эдим, юрагим алдамабди, – деди қизга сук билан тикилиб.
- Қанақасига сезасиз, мени танирмидингиз?
- Танийман, сиз – Латофатхонсиз.
- Тушингизни сувга айтинг, мен Мастираман, – деди қиз шоколадга қараб олиб.
- Йўқ, сиз Латофатсиз, латофатли қизларнинг исми фақат Латофат бўлиши керак. Исм қўйишда адангиз адашганлар.
- Бўлди, шилқимлик қилманг, нега келдингиз?

Хўжайинда нима ишингиз бор? Айтиб қўйай, бугун қабул қилмайдилар.

— Кириб айтинг, «асли шу ерлик, лекин Красноярда ишлайдиган», йўқ, яхшиси «ёғоч билан шуғулланадиган бир одам зўр бир фойдали таклиф билан келибди», денг.

Киз шоколадни тортмасига солиб қўйиб, эринибгина ўрнидан турди-да, хўжайнинг хонасига кирди. Ярим дақиқада чиқиб:

— Бу масалада ўринбосарларига учрар экансиз, — деди.

— Гапим сал чалароқ бўлибди: «Бу иш ўринбосар билан битмас экан, Асадбек ака шундай маслаҳат берибдилар», денг.

Котиба яна қайтиб кирайми-кирмайми, деб иккиланиб тургач, Ахтамнинг ўткир нигоҳига дош беролмай орқасига бурилди. Бу сафар янада тезроқ чиқиб, жилмайтанича «Киринг», деб таклиф қилди.

— Мен сизни олиб қочаман, сиз Краснояр маликаси бўласиз, — деб қизга шилқимлик қилган Ахтам остона ҳатлаши билан жиддий қиёфага кирди.

Хона соҳиби, Асадбекнинг номи тилга олинган бўлса-да, ўтирган ерида қўл учини бериб кўришди. Бу ҳаракати билан ўзининг юкори мавқенини таъкидламоқчи бўлди. Ахтам унинг кўзларига боқиб, «Мен Асадбекингдан қўрқмайман, ҳурмати юзасидан сени қабул қилдим», деган маънони укиб, кулимсиради.

— Қабул қилганингиз учун раҳмат, — деди у хона соҳиби кўрсатган жойга ўтириб. — Ҳар ҳолда... катта фойдани ўринбосар билан тақсимлаш ақлли одамнинг иши эмас.

— Кирмасингиздан катта фойдадан гапиряпсиз, кимсиз ўзингиз? — деди хона соҳиби қошларини чимириб.

— Мен Краснояр ўлкасидаги ўрмонларнинг эртанги хўжайниман, — деди Ахтам маънодор оҳангда.

— Эртанги хўжайн? Бугун-чи?

- Бугун тахминан чорагига эга чиқиб бўлдик.
- «Чиқиб бўлдик»? Ким чиқиб бўлди?
- Биз, яъни мен ва яна икки шеригим. Улар ҳам ўзбеклар. Комсомол йўлланмаси билан бориб, ўша ерда қолиб кетдик. Кичкина кооперативдан иш бошлаб, катта йўлга чиқиб олдик. Катта миқдорда ва арzon нарҳдаги ёғочларни бу ёққа олиб келмоқчимиз.

Ахтам «катта миқдорда ва арzon нарҳда» деган сўзларга алоҳида ургу бериб хона соҳибидан жавоб кутди. Катта миқдордаги ва арzon нарҳдаги ёғоч уни кизиқтирган бўлса-да, бу нотаниш йигитга ишонгиси келмади.

- Бу хом гап, – деди қўл силтаб.
- Албатта хом гап, – деб унинг фикрини тасдиқлади Ахтам. – Хужжатсиз гап албатта хом бўлади. Мен ўғил бола гапни пишитиш учун келганман. Асадбек акамга биз белгилаган нарх маъқул, чўнтакка коладигани ҳам ҳисобга олинган.
- Асадбек акангиз сотиб оладиларми бу ёғочларни? – деди хона соҳиби пичинг оҳангиди.
- Йўқ, акахонга қимматли маслаҳатлари учун чўтал берамиз. Келишсак, сиз сотиб оласиз, келишмасак, бошқа харидор чиқиб қолар.
- Утган куни кўришганимизда Асадбек акангиз менга ҳеч нима демагандилар? – деб Ахтамга синовчан тикилди.
- Утган куни мен йўлда эдим. Бугун эрталаб гаплашдим.
- Қаерда уйларидами?
- Уйларига бормаганман. Шаҳар марказида уч қаватли уйнинг пастида зўр бир офислари бор, ўша ерда гаплашдик. Оддин келганимда Ҳайдар акам, раҳматли Маҳмуд акам билан ўтириб гаплашувдик. Маҳмуд акам гапга тез тушунадиган ақлли одам эди, бекор нобуд бўлди.
- Асадбек акангизнинг кайфиятлари қанақа?

Ахтам бу саволларнинг синаш учун берилаётганини фаҳмлаб, афсус билан бош чайқади:

– Очигини айтсан, кайфиятлари менга ёқмади. Ўзларини анча олдириб қўйибдилар. Боланинг ўлими отага жабр-да. Мана, сизнинг биттагина ўғлингиз бор, шу тўппа-тўсатдан ўлиб қолса, нима қиласдингиз?

Бу гапни эшигтан хона соҳиби, юзига совук сув сепилгандай, сесканиб кетди.

– Совук нафас қилманг-е! – деди овозини кўтариб.

– Энди бу бир гап-да! Ё ўғлингиз иккитами? – деди Ахтам меровсираб.

– Қанақа одамсиз?! Эсингиз жойидами?

– Эсим жойида, – деди Ахтам оҳангини ўзгартирмай, – сиздай йигитнинг гули қўлидан қанча ноzанинлар ўтгандир, наҳот яна битта ўғил пайдо бўлмаган? Подшоларнинг йигирма-ўттизтадан ўғли бўлган-ку?

Хона соҳиби кафти билан стол устини уриб-уреб қўйиб, Ахтамга ғазаб билан тикилди.

– Менга бунақа қараманг. Мехрибонлик билан қаранг: кимга ўхшатяпсиз? Эсланг... ўзингизнинг ёшлигингизга эмасми? Эски танишларингиз менга шундай дейишиди, сизга ўхшармишман. Айниқса, қора қошларим... Олтмиш иккинчи йилни эсланг, Рихсияни унутмагандирсиз? Ҳа... Унутмагансан...

Учрашувнинг масхарабозлик қисми тугаб, ҳакикат томонига ўтиш, қасос дарвазаларини очиш фурсати етган эди. Ахтам сенсирашга ўтиб, хона соҳибига энди ғазабли нигоҳини қадади:

– Бунақа чиройли қизни бошқа учратмагандирсан. Ўша чиройли қизга эсадалик қолдирган экансан, мана, мен ўша ёдгорлигингман. Билмаганмидинг? Билардинг сен абллаҳ! Қамоқхонада туғилган ўғлинг борлигини билардинг. Ўша ёқларда ўлиб кетар, деб умид қилдингми? Худо ҳаммани ҳам ўлдириб юборавермайди. Сени ўлдириши керак бўлган биттасини

олиб қолади. Худога мен маъкул келибман, мени олиб қолди.

— Сен бу ерда товламачилик қилма, ҳозир милица чиқарман.

— Чакирмайсан, чакирсанг, ўзинг шарманда бўласан. Менда сендақалардан ўнтасининг пачагини чиқариб юборадиган ҳужжатлар бор.

— Сурбет экансан!

— Тўғри топдинг. Асадбек акам ҳам шунаقا дедилар. «Қамоқхонада шунаقا туғилганман, иложим канча», дедим.

— Орага Бек акангни тиқаверма, мақсадингни айт.

— Орага Бек акамни тикаётганим йўқ. Мен Бек акамнинг яқинлариданман. Бугун кўришганим ҳам рост. Сени осонгина ўлдириб кетишим мумкинлиги ҳам рост. Лекин ўлдирмайман. Сен номард бўлсанг, мен мардман! Сен мендай ўғлинг борлиги билан фахрланиб узоқ яшайсан. Фақат озгина олди-бердимиз бор: мен сенга ғалати ҳужжатларни бераман, сен мен хоҳлаган нарсани берасан.

— Қанақа ҳужжат, олдин мен билишим керак.

— Биттасини айтаман: ўғлинг ўн беш ёшга тўлган куни нима бўлган эди, эсингдами? Ўша ишни ўғлинг ўюштирган эди, мен ёрдам бергандим.

— Ёлғон! Бунақа иш Марленнинг қўлидан келмайди. У бўшашган, бир латта!

Ахтам дипломатини очиб, сурат чиқариб узатди. Катта хўжайнининг қизи билан майшат килаётган ўғлини кўриб, хона соҳибининг кўзлари олайиб кетсада, таслим бўлгиси келмади.

— Бу сурат қалбаки, — деди титроқ овозда.

— Лекин қиз тирик. Никоҳининг эртасига шарманда бўлгани ҳам ҳақиқат. Ўғлинг нимага уйланмаяпти, биласанми? Шу қиз «никоҳинг куни келиб пачагингни чиқараман», деб кўйган, шундан кўрқади.

— Шартингни айт, — деди хона соҳиби тақдирга тан бергандай чукур хўрсиниб. — Фақат... Рихсияга

тегишли масалада сен ноҳақсан... сен кўп нарсаларга тушунмайсан... Биз бир-бировимизни ростакамига севардик. Орага бошқалар ҳам аралашишган...

– Кимлар?

– Улар... ўлиб кетишган... билишингнинг ҳожати йўқ.

– Билишим шарт! Гўридан суюкларини чиқартириб ёқаман!

Бу аҳд шу даражада ишончли жарангладики, сувяклар шу онда, шу жойда ёқиладигандай туюлиб, кўркувдан хона соҳибининг лаблари гезарип кетди.

– Йўқ, йўқ... Бундай қилма. Рихсиянинг ўғли... бундай ваҳшийлик қilmайди.

– Мен ваҳшийлик қилиш учун туғилганман, бошқа хунарим йўқ. Рихсиянинг ўғли ваҳшийлик қilmайди, деганинг тўғри. Лекин мен сенинг ўғлингман! Фарқимиз шуки, сен маданийчасига, яширинчасига ваҳшийлик қиласан. Менини очиқчасига! Айт, ўша одамларни!

– Айттолмайман...

– Сенга бир ой мухлат. Бир ойда Красноярдаги ёғочлар ҳам тайёр бўлиб қолади. Ўрислар тахтадан зўр тобут ясашади. Бизда тобутсиз кўмилгани чаток. Кенгроқ қилиб ясаттирадим, маза қилиб ётардинг.

Ахтам бу сұхбатдан кейин бадбаҳт отасини алдаб олиб чиқиб, овлоқ жойга олиб бориши, ўша ерда жазосини бериши керак эди. «Орага бошқалар ҳам аралашишган»ини билгач, жазо муддатини чўзишга қарор қилди. Қабулхонага чиқиб, котибани ресторонга таклиф этди. Нозли оҳангдаги рад жавобини эшитиб, таслим бўлгандай қўлини кўтарди:

– Таклифимни қабул этмагунингизча очлик эълон қиламан, шаҳардаги ҳамма ресторанларни тақа-тақ беркитиб ташлайман, – деб бир сукли жилмайиш ҳадя этди-да, чиқиб кетди. Бу хушрўй, ширинсўз йигитнинг нариги хонада хўжайинини боплаб тузлаб чиққанини

бilmagan котиба унинг орқасидан умидли нигоҳини қадаб қолаверди.

«Бугун тегмаганим яхши бўлди, – деб ўйлади Ахтам кўчага чиққач. – Илоннинг думини яхшилаб босиб эздим, чақадиган тишини суғуриб олдим. Энди типирчилаб юраверсин. Юраги сиқилиб, қўркувдан ўлиб қолса, яна ҳам яхши. Йў-ўқ... бунақасига ўлмайди, унда сиқиладиган юрак йўқ...»

Тарзанни учратиш мақсадида анҳор ёқасидаги ошхонага келди. Уларнинг шийпони бўш, стол устида шахмат доналарининг сочилиб ётиши Тарзанинг яқингинада кетганидан дарак берарди. Қорни таталай бошлагани учун пиво билан овқат буюриб, дивана ёнбошлади. Суҳбат жараёнини яна бир кўз олдига келтириб, қилган ишидан мамнун бўлди. Ошхона хўжайинидан «Марлен акасининг кечроқ келишини» билгач, кутишга қарор қилди. Шом қоронғисида Тарзан эмас, Жамшид кўринганда ажабланиб ўрнидан турди.

– Ҳа, зўравон, зерикмаяпсанми? – деди Жамшид унинг саломига алик олиб. – Юр, кетдик.

– Қаёқقا?

– Боргандা биласан.

– Ҳозир билсам бўлмайдими?

– Бўлмайди, етиб боргунингча қўркқанингдан юрагинг ёрилиб ўлиб қолишинг мумкин.

– Менда ёриладиган юрак бор эканми? Ким айтди сизга?

– Минғирламай, тезроқ юр.

Жамшид шундай деб елкасига енгилгина муштuriб кўйди. Ахтам шундан билдики, чақирув шошқич бўлгани билан масала у қадар жиддий эмас.

Машина Кесакполвоннинг қозихонаси жойлашган чойхона олдида тўхтаганда «Ҳайдар акам нега чақиртиридийкин?» деб ажабланди. Ҳайдар акасининг тақдиридан бехабар Ахтамга бу кутилмаган чорлов ҳатто енгил ташвиш ҳам туғдирди. Чунки Асадбекка нисбатан Ҳайдар акасининг шафқатсизроқ экани унга

маълум эди. Агар Бек акаси воқеадан хабар топиб, ма-салани ҳал қилишни бу одамга топширса-ю, бу одам газаб отига минган бўлса, осонлик билан кутулиши қийинлигига ақли етиб турарди. Ичкари кириб тўрда Асадбекнинг ёлғиз ўтирганини кўргач, таажжуби яна-да ортди. Бу хонадаги кенг ва узун стол усти ҳамиша тўкин бўлар, қорин ва нафс ғалвасини босиш учун за-тур ҳамма нарса топилади. Энди эса гулли клеёнка тепадан тушаётган чирок нурида ялтиллаб турибди.

Ахтам бадбаҳт отаси ҳузурида Асадбекнинг но-мини тилга олгандаёқ хожасига рўпара бўлишини билган, аммо шу бугуннинг ўзида шошкич равища чақирилишини кутмаган эди. Хожасига кўзи тушди-ю, «ёмон талваса босибди-ю, бечорани, дарров Бек ака-сидан нажот сўрабди-да», деб ўйлади. Асадбек унинг саломига алик олмай, тикилди. Утиришга таклиф этилмагани сабабли, Ахтам айбдор бола сингари тик тураверди.

– Жамшид, кап-катта одамларга нима бўлган ўзи? – Асадбек Жамшидга мурожаат қилгани билан Ахтам-дан нигоҳини узмади: – Шу жинқарчадан кўрқиб, иш-тонини хўл қилибди-я! Овутиб келмаганингда баттар бўлармиди... Ҳа, зўр, кимларни қўрқитиб юрибсан, биласанми?

– Биламан, – деди Ахтам дангал.

– Нега қўрқитдинг?

– Керак бўлгани учун...

– Керак бўлгани учун? Мени нега аралаштирдинг?

Нега ёлғон гапирдинг?

– Машинадан тушиб, керилиб юриши менга ёқмади, шаҳарнинг хўжайини ким эканлигини эслатиб кўйгим келди.

– Кейин-чи? Товламачилигингни бошладингми?

Қанча сўрадинг?

– Бунаقا гап бўлмади. Сиз билан учрашмасимдан анча илгари бир одам уни топиб, у-бу деб қўйишимни сўраган эди.

– Ким экан, ўша одам?

– Кимлигини ҳеч қачон, ҳеч кимга айтмайман. Илтимосини ҳам албатта бажараман. Сизга учрашмай туриб қилишим керак эди, улгуролмадим.

– Улдирасанми?

– Йўқ. Ўзига яраша жазо бор.

– Менга тегишли одам бўлса-чи?

– Барибир... Сизга тегишли бўлса, кейин сиз мени жазолайсиз.

– Ростгўйлигинг менга ёқади, лекин дунёда ўлаётган ҳар уч одамнинг бири ростгўй эмиш, ўтириб, – деди Асадбек рўпарасидаги стулга ишора қилиб.

– Бу бултурги маълумот, – деди Ахтам ўтириб, – бу йилгисига қараганда ўлаётган ҳар олти одамнинг биттаси ростгўй.

– Нега? – деб ажабланди Асадбек.

– Дунёда ростгўй камайиб кетган, – деди Ахтам қувлик билан.

Асадбекка унинг топқирлиги хуш ёкиб, Жамшиидга қараб жилмайиб қўйди.

– Красноярдаги ёғоч ҳакида нима дединг, лақиллатдингми?

– Шунаقا деса ҳам бўлади. Лекин Красноярдан ёғоч олиб келиш мумкин.

– Қанақасига?

– Мен Маганданда туғилиб, Красноярда катта бўлганман. Онам ҳам... ўша ерда ўлганлар. Бир-иккита танишларим бор.

– Онанг... Красноярдами? Ўлғиз ўзи ётибдими?

Ахтам Асадбекнинг бу саволидан ажабланиб, паст овозда «ҳа», деб қўйди-да Жамшиидга қараб олди. Хожасининг ҳолини тушунган Жамшиид индамай тураверди.

– Менинг адам ҳам ўша ерда эдилар. Қирқ тўққизинчи йил, ўттиз биринчи декабрда тухмат билан олиб кетишган эди, – деди Асадбек синиқ овозда.

– Менинг онамни ҳам тухмат билан қамашган...

Асадбек унинг гапини эшишмагандек, давом этди:

– Ўттиз етти йилдан кейин олиб келиб, хилхона-мизга кўйдим. Сенам ёлгиз қолдирма, хилхонангта олиб келиб кўй.

– Хилхона? Нима у? – деб ажабланди Ахтам.

Асадбек «шуни ҳам билмайсанми?» дегандай бош чайқади:

– Яқин қариндошлар ёнма-ён қўйиладиган жой. Онангнинг юртида бордир, шунаقا жой?

Ахтам буни билмаса-да «ҳа, бор», деб кўйди. «Хилхонаси бўлмаса ҳам қишлоқда мозор бор-ку? Ўша ерга олиб келиб кўмиб, қора мармартош қўйдирман. Беоқибат қариндошлари кўриб қўйсин!» деб ўйлади.

– Бу ўзбошимчалигингни кечираман. Ҳеч қаерда, ҳеч қачон, ҳеч қандай шароитда менинг номимни тилга олмайсан. Тилга олсанг, тилинг кесилади. Анави сўтакка яқинлашма, унинг менга керакли томонлари бор. Мен сенга гапиряпман, бунча алантгайсан? Биринчи келишингми, ёқиб қолдими?

– Бир-икки келиб ишни пишириб кетганман.

– Демак, бу ерда иш қанақа пиширилишини биларкансан. Сенга берайми шу жойни?

– Керакмас. Ўзимнинг жойим бор. Бунақа жой ҳам, бунақа иш пишириш ҳам энди эскирди.

Бу гап Асадбекка «сенлар эскириб бўлдиларинг», дегандай таъсир қилиб, гашланди, қошларини чимирди.

– Эскиси ёқмаётган бўлса... янгиси қанақа, айт-чи?

– Янгисини бугун эшишибсиз-ку? Бу ёққа олиб келмадим, ўзим бордим.

– Янги йўлдан юраман, деб жарга юмалаб тушмагин. Жарга йикиласанг, сени тортиб оладиган аҳмок йўқ. Ириб-чириб ётаверасан.

– Бек ака, айтувдим-ку, бир марта ўлиб бўлганман, энди ўлмайман.

Сурбетлик чегарадан чиқа бошлаган эди, Асадбек

жиловни тортишни зарур деб билиб, овозини баландлатди:

— Тур ўрнингдан, жұна!

Ахтам чикиб кетгач, Асадбек Жамшидга «Қани, нима дейсан энди?» деган маңнода қаради.

— Ҳали ғұрлиги бор... күчанинг боласи-да, тарбия күрмаган, күп нарсага тушунмайды, — деди Жамшид айбдор одамнинг овозида.

— Ғұрликка ғүр, пишгунича бошимизни анча гангитади, ҳар бир қадамини кузат. Айниқса, сүтакни әхтиёт қыл, мен унга вайда бердим. Каратәчи тренерларини нима қилдинг?

— Милиса зотини биласиз-ку, «Қонун бүйича мүмкін эмас», дегани «Чүтални вактида түлаб тур» дегани. Эртага чиқарып оламан.

— Арапашма. Ұzlари эплашсын. Сурдан күнглим түк. Ушлаган ерини узиб олади. Тренерга тайинла, Тарзанингга күпроқ қарасын, калласи яхши ишлагани билан билаги анча бүш.

Уйға қайтаётиб Ахтамнинг гапларини, сурбетлигини ўйлади: «Нега адабини бермадим? Нега бир мишиқи менга сурлик қила олади? Кучдан қолганимни сезганми? Шу мишиқилар эрта-индин менинг ўрнимни олишадими? Жамшид нимага индамай қараб турди?»

— Сурбетлигини күрдингми? — деб сүради машина рулини бошқараётган Жамшиддан.

— Күрдим, — деди Жамшид, йўлдан кўз узмай.

— Ҳайдар аканг бўлганида бир сакраб жағига тепарди-ю, ахлатхонага чиқартириб ташларди. Сен сүтакка ўхшаб қараб турибсан.

— Гаплашаётганингизда жаҳлингиз чиқмади. Ғазаблансангиз мен ҳам уришга тайёр эдим.

— Барибир Ҳайдар акангнинг қадри ўтяпти. Болларни Ҳайдар акангта ўхшаб ушла, бўш кўйма. Бизнинг кимлигимизни ҳар нафасларида билиб туришсин.

Буқрот ҳаким илми ҳикматда равнақ топғач, узлатни ихтиёр этибдилар. Бир куни подшох хасталашиб, ул зотни ҳузурига чақириби. Буқрот ҳаким подшоҳнинг даъватини қабул қилмабдилар. Шунда ул зотнинг ҳузурига вазирнинг ўзи келиби. Қарасаки, Буқрот ҳакимнинг емишлари турли гиёхлар экан. Вазир подшоҳнинг амрини айтиб, ялинса ҳам, ҳаким кўнмабдилар. Шунда вазир аччикланиб дебди-ки:

– Подшоҳларнинг хизматини қилишни ўрганганингда бунақа гиёҳ еб ўтирмас эдинг.

Бу дашномни эшигтан ҳаким кулибдилар ва дебдилар-ки:

– Агар сен гиёҳ еб яшашга қаноат қилишни ўрганганингда жонингни хатарга қўйиб, подшоҳ хизматини қилмас эдинг.

«Ла кулли шайъин садоун ва садоу нурил-қалби аш-шабаъу» – «ҳар бир нарсада занглаш бор, қалб нурининг занглиги тўқлиқдир», ҳикматини кўпчилик қаторида Манзура ҳам билмайди. У хонадондаги тўкинлик эвазига жонини хатарга қўйиб яшади. Кунлари Худога илтижо билан ўтди: «Худойим, фарзандларимни Ўзинг паноҳингда асра!...» Қалбидаги барча муножотлари шу бир неча сўзларга жо бўларди. Худо хатарлардан асраб келди, фарзандлари эмин-эркин вояга етдилар.

Камолларини, роҳатларини кўриш вақти етганда бу кўргуликлар...

Афруза билан танишгунига қадар қўлига тушган бир китобда оятлар маъносини ўқиб таъсирланган, «худди бизга хитоб қилинганга ўхшайди», деган фикрга бориб, қайта-қайта ўқийвергани учун хаёлига муҳрланиб қолган эди: «Эй мўъминлар, билингларки, дунёning тириклиги ўйин-кулгудир ва зеб-зийнатдир,

бир-бирларингиз билан фахрланишdir, молларингиз ва фарзандларингизни кўпайтиришдан иборатdir. Бунинг мисли шунга ўхшайди-ки, осмондан ёмғир ёғиб, ерлардан гиёҳ кўкарса, дехқонлар, қувонадилар ва «кўп ҳосил оламиз», деб умид қиладилар. Кейин бир совуқ шамол келса, барчасини қуритса, бас, барглари сарғайиб қурий бошлаганини кўрасан, кейин ҳаммаси синиб, майдаланиб, сомонга айланади. Дунёнинг нашъу намоси ана шулардан иборатdir. Аммо охиратдаги аҳвол икки ҳолатдан ташқари эмас. Бири қаттиқ азоб ва иккинчиси Аллоҳнинг мағфирати ва розилигидир. Дунё ҳаёти одамни алдайдиган лаззатдан бошқа нарса эмас...»

...ўйин-кулги ва зийнатларни ҳам кўргани рост...

...моллари кўпайгандан кўпайди...

...кимга керак экан бунча кўп мол?..

...кейин совуқ шамол ҳам келди...

...каттиқ азобни ҳам кўрди...

...дунё ҳаётига алданганлари ҳам рост...

Афсус шуки, алдамчи дунёдан юз ўгиришни ўйлаётганлари йўқ...

Қаердадир ўқиган эди:

«Алдамчи дунёнинг ширин тиллари

Ақлсиз ақлимнинг ақлини олди

ва... кула-кула лаҳадга қузатиб қолди...»

Наҳот унинг қархисида шундан ўзга йўл йўқ бўлса?

Дарвоза яқинида умид билан икки кун кутган Фазлия ғам-аламларини тўкаётганда Манзура ўз дардига банди бўлиб ўтирди.

Манзура Европанинг машҳур файласуфи, узлатга чекиниб, умрини бочкада ўтқазган Диогенни билмайди, ҳатто номини ҳам эшитмаган. Ўша файласуфдан бир одамнинг бойми ёки камбағал эканлигини сўраганларида «Билмайман, унинг пули кўплигидан хабарим бор», деган экан. «Пули кўп бўлса, демак, бой экан-да?» деб ажабланиб, яна сўрашибди. Шунда

файласуф: «Кўп пулга эга бўлиш ва бой бўлиш – бир нарса эмас. Борига қаноат қилган одамгина чинакам бойдир. Ўзида бор нарсадан кўпроқ бойлик орттиришга ҳаракат қилган одам, оз бўлса-да, борига қаноат қилган одамдан камбағалроқдир», деган экан.

Бошқалар бой деб ўйлаган хонадон сохибаси билан камбағалликда умр кечирган аёлнинг дардлари ўхаш, даволари эса бир эди. Икковидан хам сабр талаб этиларди. Донолар деганлар-ки: «Модомики, ер остида қабр азоби ҳақ экан, ер устида ўша азобнинг муқобили сифатида сабр азоби ҳам мавжуд. Банда-га ё униси, ё буниси». Бу икки муштипар айнан шу сабр азобини аъло кўра оладиларми ё йўқми – ҳали номаълум, атрофдан тиланган дуолардаги чиройли сабр уларга насиб этадими ё йўқми – вакт кўрсатади. Сабр учун ўзларида иймон қувватини тўплай олсалар Куръони Каримда ваъда қилинган ажрга этадилар: «...уларнинг ҳузурларига ҳар эшикдан фаришталар ки-риб: «Сабр қилганингиз учун сизларга салом бўлсин! Бу оқибат диёри қандай яхши, дерлар». Афсуски иккови ҳам бу оятдан бехабар. Ҳазрат Навоийнинг: «Сабр бор ерда айрилик ўтида куйганларга ғам йўқ, иштиёқ эгаларига ҳажр ўтида куйишдан алам йўқ», деган ҳикматларини ҳам эшитмаганлар. Шундай экан, бошлари узра турган мусибат булатини ҳайдаши ло-зим бўлган сабр қудрати ҳақида бир-бирларини нима десинлар, бир-бирларини нима деб овутсишлар?

Фазлия Манзуранинг дарду аламини эшитган, «Аллоҳнинг иродаси, бандалик экан, энди сизга сабр берсин», дейишдан нарига ўтолмайди. Унинг дарди-га шерик бўлолмайди, чунки ўзиники ошиб-тошган... У ҳам фарзандлари дардида келган бу ерга. Манзуранинг ўғли қайтмас бўлиб кетган... У болаларининг ти-рик эканидан умидвор, ҳар ҳолда шундай хабар эшитган. Лекин тирик болаларини бағрига боса оладими ё йўқми – билмайди.

Фазлиянинг дарди адогига етмай, дарвоза очилди.

Эрининг машинасини кўрган Манзура меҳмондан узр сўради-да, чакқон ўрнидан турди.

Асадбек айвонда ўтирган аёлга бир қараб қўйиб, уйга кирди. Унинг кайфияти бузукроқ эди. Диванга ўтириди. Манзура эрининг ёнига аста чўкиб, елкасими силади. Фарзанд жудолигидан кейин Асадбекнинг жеркишлари камайиб, эр-хотин бир-бирига суюниб қолган эди. Олдинги даврлар бўлгандан, Манзура шу меҳрибонлигини қилганида «Суйкалма!» деган дағал сўзни эшитиб, қилмишидан пушаймон бўлиб, тошдек қотарди. Бу сафар Асадбек елкасими силаётган қўлга кафтини қўйди-да, «уф» тортди. Шу «уф» билан кишининг дарди чиқиб кетиб, енгил тортадигандай туюлади. Афсуски, кўча-кўйда, одамлар орасида эр одамнинг «уф» дейиши иснод саналади. Эрнинг дардига фақат меҳрибон хотингина шерик бўла олади. Эрининг авзойи бузилгандан Манзура «Нима бўлди?» дейишдан кўркарди. Бу сафар ҳам шундай бўлди. Асадбекнинг гап бошлишини кутди.

— Қизингникига борувдим, — деди Асадбек, — жуда ўжар, жуда ўжар-да, шу қизинг. Ҳайронман, кимга ўхшаган экан...

Бу саволга нима деб жавоб берсин, у бечора? Қиз ўжарлик бобида кимга ўхшаши мумкин? Ҳозир «Сизга ўхшайди-да, адаси», дегудай бўлса, балога қолиши аниқ. Шу сабабли жимгина кулоқ солгани маъқул. Асадбек саволни жавоб талаб килувчи оҳангда бермagan эди. Хотинининг жим ўтиришидан ғашланмай, у томон ўгирилди:

— Тилингнинг учида турган гапингни айтавер: «аҳмоқликда қизингиз ўзингиздан қолишмайди, ўжарлиги ҳам сиздан», демокчисан, билиб турибман.

— Вой, адаси, унақа гап хаёлимга ҳам келмади-я! — деди Манзура сири ошкор бўлган одам сингари довдираб.

— Хаёлинга келмайди-ю, юрагингнинг тўрида туради. Бир марта Ҳайдар ҳам айтувди... — Асадбек

Кесакполвоннинг гапини эсламоқчи бўлгандай сукут қилди. Аслида эслашга уринишнинг ҳожати йўқ, «Мардонани ўз қўли билан ўлдирди, ўч олмоқчи эди, мен ёрдам бердим», деган гапларни унтиш мумкин эканми? Асадбек бошини эгиб, ўзига ўзи гапиргандай деди: – «У сенга ўхшайди, ақлли, кўркмас, қасоскор... у сенинг йўлингдан бормоқчи...» деганди.

Бу гапни эшитган Манзура сесканиб, қўлини тортиб олди:

– Унақа деманг, адаси... Зайнаб унақа эмас... – деди титроқ овозда.

– Ҳайдар аҳмоқ гапларни кўп айтарди... эътибор қилма. Менга ўхшаганидайди... эрини аллақачон бўғиб ўлдиради...

– Адаси... унақа деманг...

– Қиз бола отасига ўхшамагани тузук, – деди Асадбек енгил хўрсиниб. – Сенга ўхшайверсин. Сен... яхши хотинсан, – шундай деб вазиятни юмшатиш учунми, кувлик билан жилмайди, – Жалил айтди: эри рози бўлган хотин жаннатга тушаркан. Жалил билмаган нарсасини гапирмайди. Сен жаннатга лойик хотинсан. Бир марта Маҳмуд: «сизга чидаб келаётган кеннийимга орден бериш керак», девди. Манзур, орденни нима қиласан, сенга жаннат нақд бўлиб турибди. Лекин Зайнабга қаттиқ турмаяпсан, бу айбинг ҳам бор. Қизинг кўчиб келмаса бўлмайди, шуни тушунасанми? Кўз олдимиизда турса, икковимиз ҳам хотиржам яшаймиз.

– Шуни доим айтипман, инсофга кириб қолар, адаси, яна озгина сабр килайлик.

– Ўзи инсофга кирап-у, эри кўнмайди. Аҳмоқ қизинг эрининг раъийга қарайди. «Эшигингнинг тагида қоровулларнинг туриши ғашингни келтирмаяптими?» десам, «Қоровулингиз керакмас, бизни бўри ермиди», дейди. Сен қизингнинг кўнглига карасанг, қарайвер, мен галга солавермайман, шарт йигитларни юбораман, кўч-кўронини кўтариб келаверишади. Куё-

вингни жияниникига олиб бориб ташлашади. Шундай қилсам, түгри бўладими?

Ялиниш, тушунтиришга уриниш Асадбекка хос эмас. Унинг услуби – айнан «шарт йигитларни юбориб кўч-кўронини кўтартириб» кўчириб келтириш. Буни яхши билувчи Манзура «тўғри бўлмайди», дея олармиди? Шу боис «қайдам», деб лабини тишлаганича муте ҳолида бошини эгди.

– Айвонда ким билан ўтиргандинг? Танимаган одамни нега уйга бошлаб кирдинг?

Мавзунинг бу томон бурилишини кутгани учун Манзура довдирамади:

– Бир бечора хотин нажот истаб келибди.

– Сенга қолса, бу дунёдаги ҳамма хотинлар «бечора»! Менинг уйим бечоралар нажот қидириб келадиган жойга айланиб қолганми?

– Бечора яқинда қамоқдан чиқибди.

– Ҳа... айтмоқчи-я, менинг уйим қамоқдан чиқсан «бечоралар»га карvonсарой бўлиб қолгани эсимда ҳам йўқ...

– Унақа деманг, адаси, у бечоранинг эри қиморбоз бўлган экан...

Манзуранинг «эри қиморбоз бўлган экан», деган гали Асадбекни кейинги пичинглардан қайтарди. Манзура «бечора хотин»нинг тарихини сўзлаб, тугатмагунча гапини бўлмай эшилди.

Манзура «бор гап шу» дегандай жимгина қараб қолгандан кейин ҳам ундан кўзини узмай тикилиб тураверди. Эрининг бундай қараши яхшилик аломати эмаслигини билган Манзура аёлнинг ғоят бечора эканини таъкидлаш учун яна нимадир дегиси келди-ю, лекин гап тополмай, мўлтиллаб тураверди.

– Хўп, энди мен нима қилишим керак? – деди Асадбек. – Эрини тирилтириб берайми? Ё бошқа эр топиб берайми?

Манзура «Эрини атай ўлдирмаган, тасодифан бўлган...» – деб Фазлияни оқламоқчи бўлди.

— Атайми ё тасодифанми, энди буни аниқлашнинг фойдаси йўқ, сен гапни бурма, даллолликни бошладингми, охиригача қил.

— Бечора болаларини қидиряпти...

— Ақли жойида бўлса, қидириши керак.

— Болаларини қиморбозлар олиб кетишган экан.

Қаёқдалиги номаълум эмиш.

— Ўша ваҳший қиморбоз мендирман балки? — Асадбек пичингни бас қилиб, энди зардали оҳангда гапирди. — У ёқ-бу ёкни қараб чик-чи, болаларини ертулага олиб тушиб оёғидан осиб қўйган бўлсам, топлиб бера қол.

— Вой... унақа деманг, адаси... Сизнинг яхшиликларингизни кўп эшишган экан...

— Бўлди, бу ёғига ўзинг тўқима. Булар менинг қайси яхшилигимни эшитишибди? Гапни олиб қочмагин-да, дангалига ўт: «дунёдаги ҳамма қиморбозлар сизнинг оғайнингиз, шу хотиннинг болаларини ўғирлаганларига айтинг», дегин, — Манзура эътирозга оғиз жуфтлаган эди, Асадбек гапиртирмади. — Тушундим, бўлди. Айтаман, суриштиришади, лекин катта ваъда бериб юборма. Орадан анча вақт ўтибди, нима бўлган, Худо билади. Агар ўлдирворишмаган бўлишса, топилади.

— Худо асрасин, норасидаларни ҳам ўлдиришадими?

— Қиморда ютқизганни Худо ҳам асрай олмайди. Умри жойнамознинг устида ўтса ҳам асримайди... Худонинг хўжайинчилиги қиморбозларга ўтмайди.

Манзура эрининг нимага шама қилаётганини англаб, келинлик даврида тунни жойнамоз устида ўтқизганини эслади-ю, юраги бир қалқиб:

— Худога шукур, сиз унақа эмассиз, — деди.

— Ҳа, унақа эмасман... — Асадбек шундай деб енгил хўрсинди. Кутилмагандага устозини эслади:

«Устозим ўлар олдида менга «Хотининими ё синглисиними қиморга тикиш аҳмоқлик, болаларини ти-

киш ҳайвонлик», деб васият қилган эди. «Ҳайвонлик» деб адашганди, чунки ҳайвон ақллироқ, боласини қиморга тикмайди. Бироннинг боласини қиморда ютиб олган одамни нима дейиш керак унда? Болаларни ўлдиришмагандир. Бошқа бир ўйинда тикиб, бошқа ҳайвонларга ютқизишгандир. Болалар қулма-қўл бўлиб юришгандир...»

Асадбек бу гапларни хотинига айтгиси келмай, ҳазил оҳангига кўчди:

– Хотинини қиморга тикмаган битта аҳмоқ қиморбоз мен эдим...

– Унақа деманг, адаси, сиз аҳмоқмассиз...

– Шунча йил бирга яшаб, аҳмоқ эмаслигимни энди тан олдингми, а? Гапингни тугатдингми ё чаласи борми?

– Ўзингиз бир-икки айтувдингиз... «хизматчи олайлик», девдингиз... Шу хотинни олсак-чи?

Асадбек хотинининг жавдираган кўзларига тикилди: «Ачингани учун олиб қолмоқчи. Нотаниш, синалмаган хотинни хизматга олмоқчи. Аслида хизматчига муҳтож эмас. Уй ишларини ўзи қилса кўпроқ овуди. Лекин... ёлғиз. Ўлғизлиги энди сезиляпти... Фам юрагини кемириб адо қилмасидан аввал унга дардкаш топиб беришим шарт эди. Бу хотин кўнглига ёкиб қолган бўлса, мен нима дейин?»

– Кўнглинга ўтирган бўлса, ўзинг биласан. Факат... аввал синаб кўр.

Манзура эрига миннатдорлик билдириб, унинг ёнбошига ёстиқ кўйди-да, меҳмон ҳузурига қайтди.

Эртасига Жамшид келгандада Асадбек уни савол билан кутиб олди:

– Ҳовли супуриб юрган хотинни кўрдингми?

– Кўрдим, – деди Жамшид саволдан мақсад нима эканини англамай.

– Қанақа экан?

Жамшид шунчаки бир қараб ўтган эди, хожасига

жавоб қайтаришга иккиланиб, «нима дердим, оддий бир хотин-да», дегандай елка қисди.

– Қанақа одамсан? Уйимда нотаниш одам пайдо бўлибди, «ким экан, нима қиляпти?» деб ўйламайсанми? Кириб келишингга қараб ўтирувдим. Маҳмуд аканг бўлганида, тўхтаб, ўша хотин билан саломлашарди, бир нималар деб гаплашарди, кимлигини, қанақалигини билишга уринарди. Маҳмуд сени чала ўқитиб кетибди. Энди гап бундай: кеннайингнинг гапига караганда, бу дунёдаги энг бечора хотин экан. Қанақа бечоралигини ипидан-игнасигача аниқла. Эри болаларини қиморда ютқизган экан. Сур билан Тарзанга тайинла, суриштиришсин, болаларни топишсин. Болалар тирик бўлишса, отаси ютқизган ҳақни бериб, кейин олларинг, зўрлик қилмаларинг.

– Ўлдирворган бўлишса-чи?

– Нима қиласардинг? Уларнинг ҳаки... индамай қўя қоласанлар. Бу ишда биз қози эмасмиз... – Асадбек ниманидир эслагандай пешонасини силаб қўйди-да, афсусли оҳангда гапини давом этди: – Ҳайдар аканг Садир қиморбозни бекорга жувонмарг қилиб юборувди. Мен «танобини тортиб қўй», дегандим, «ўлдир» демагандим. Бу кесак калла гапнинг фарқига бормасди. Сурга тайинлаб қўй: мен тирик эканман, ҳеч қайси қиморбозни ўлдиришга ҳеч кимнинг ҳаққи йўқ.

Асадбек шошилмаётган эди, шу сабабли Жамшидга «ўтири», деб қарисидаги жойни кўрсатди. Жамшид ўзига чой қуиди, хожасининг пиёласидаги совуб қолган чойни тўкиб юбориб, янгилади. Асадбек чойдан бир ҳўплаб, пиёлани дастурхон устига қўйди-да, Жамшидга тикилди:

– Хабаринг бўлмадими, йўқолган отарчи болани топишибдими?

– Қидиришяпти, изи чиқмаётган эмиш.

– Демак, қотилни ҳам топишмаган. Ҳар ҳолда, йўқолган боладан гумонсираётган бўлишса керак?

– Шунақа экан...

– Бу ерда бошқа гап борга ўхшайди. Отарчи болани ким ўлдирган бўлса ҳам, усталик қилган, гувабошлар буни ўйлашмайди. Йўқолгани тирик бўлса, қотилликни бўйнига кўйишади-ю, юмалок-ёстик қилиб қамоқقا тикворишади. Ҳарҳолда у бола тирикмасдир, қайси бир ўрада куртларга ем бўлиб ётгандир... Элчинни ҳам сўрок қилишибди... Мени нима учун ўшанда прокуратурага чақиришди, кейин ҳеч ўйлаб кўрдингми?

– Терговчи бола ёшлиқ қилиб, адашган...

– Сен прокурор ёрдамчисининг гапини гапиряпсан.

У каззоб сени ишонтирибди-да? Атрофингта қараб қўй: ҳамма нарса ўзгаряпти. «Сизнинг керилиб юрган давру давронингиз ўтди, хоҳласак, шу ерга олиб кириб, гарданингизни синдириб кўйишимиз мумкин», демоқчи бўлишган. Шундай қила олишадими?

Савол қатъий, жавобталаб эди. Жамшид ишончсиз тарзда:

– Кўлларидан келмаса керак, – деб қўйди.

– Калта ўйлама, атрофингни зийраклик билан кузатгин, дедим. Ҳар қадамда Ҳайдар акангнинг ўрни билиниб турганини сенга минг мартараб айтдим. Лекин кесакполвонларнинг даври ўтиб кетаётгани билан ҳисоблашмасам, нодоннинг ўлими билан ўлиб кетаман. Ўлимдан-ку қўрқмайман, лекин лакма одамга ўхшаб жонни икки қўллаб топшириб кетиш алам қиласди. Сур янгича ишламоқчими, майли, ишласин, лекин милиса билан прокуратурага бориб қадаладиган қиликлардан ўзини тийсин, шунга кўз-қулоқ бўлиб тур. Анави сўтакни астойдил жазоламоқчи, ўлдириб мурдасини милисаҳона остонасига ташлаб кетишдан ҳам қайтмайди, у тентак. Нимага шунақа қиласди, биласанми?

– «Мен ҳеч нарсадан қўрқмайман, кўлингдан келса, мени қидириб топ», деганими бу?

– Ҳа, шунақа. У ўзича омону фалакда. Лекин милиса аҳмоқ эмас, буни тушунади, арқонни узун ташлай-

ди. Милиса билан мушук-сичқон ўйнашнинг оқибати қопқон бўлади. Осмондаги күшни ерда туриб овлашади, тўғрими?

Жамшид хожасининг мақсадини англаб, «тўғри гапиряпсиз», дегандай бош иргаб қўйди.

Асадбек прокуратурадаги ўша нохуш воқеадан сўнг бу чақирувнинг тагига етиш мақсадида кўп фикр юритди. Маҳмуд тирик бўлганида ўша ёрдамчи-ни бир сикувга олиб ёки чўнтагини тўлдириб қўйиб, ҳамма сирни билиб берарди. Жамшид бундай қила олмайди. Ҳар ҳолда чақирувнинг салкам ҳибсга олув кўринишида бўлиши бежиз эмаслигига Асадбекнинг ишончи бор.

Суликонинг бобоси «Қароргоҳларинг чўкажагини билмайсанларми?» деган эди-я... Ҳа, набиралари чатоқ бўлгани билан ўзи доно эди. Ўшанда айтган ҳикмати Асадбекнинг хотирасига ўрнашиб қолган: «Ҳазрат Ийсо дейдики: «Денгиз тўлқини устига ким уй кура олади? Бу дунё ҳаёти шунинг ўзидир. Уни абадий қароргоҳ қиласман, деб ўйламанг». Асадбек ҳозир шу ҳикматни эслаб Жамшидга айтгиси, «қароргоҳимизни чўқтиришга уринишлар бўлаётганини билмай ғафлатда ётиш бизга ярашмайди. Чўқтиromoқчи бўлганларнинг ўзларини чўқтиришимиз керак», демоқчи бўлди-ю, «бунака гапларга тушунармикин?» деган мулоҳазага бориб, индамай қўя қолди.

Қадимги эртакларда ҳакиқат излаган Кенжаботир рўпарасидан уч йўл чиқарди: бири – «борса келмас», иккинчиси – «борса ё келар ё келмас», учинчиси – «борса келар». Шайтанат оламига муҳаббат қўйган Асадбекнинг рўпарасида факат биттагина – «борса келмас» йўли бор эди. У буни биларди. Москвадаги сўнгги учрашувда Илико «Орқада фақат ўлим бор», деганида у ўйчан тарзда: «Олдинда ҳам ўлим бор», деб бежиз таъкидламаган эди. Буни тан олиш қанчалик нохуш ва оғир бўлмасин, ҳакиқатдан кўз юмишнинг фойдаси йўқ эди. Илико ҳам тан олган эди: «Истай-

мизми, истамаймизми, энди икки ўлим оралиғида «лезгинка»га ўйнайверамиз...»

2

Асадбекнинг таънали гапларидан кейин Манзура эртасига ёқ қизиникига йўл олди. Гап фақат қизининг ўжарлигига бўлса, бунчалик шошилмас эди. Унинг тинчини олган нарса: ҳамонки, Асадбекда хавотир уйғонибдими, бу бежиз эмас! Худонинг ўзи асрасин-у, аммо қандайдир фалокатнинг шарпаси сезилганга ўхшайди.

Элчиннинг уйига яқинлашганда дараҳт соясида турган машинага, унда ўтирган икки таниш йигитга кўзи тушиб, хавотири сал нари бўлди. Дарвоза эшиги одатдагидай очик эди.

Манзура қизи билан кўришаётib айвонда бўш турган аравачага эътибор қилди:

– Қанилар? Ёлғиз ўтирибсанми? – деб сўради ажабланиб.

– Куёвингизни ўртоқлари дўхтирга олиб кетишиди. Яна бир даволансалар, дард кўрмагандай бўлиб кетарканлар. Олдинига дўхтирлар роса ваҳима қилишган эди-я, қаранг, Худо хоҳласа, ҳар қанақа касал ҳам тузалиб кетаркан-ку?

– Илоҳим шифосини берсин, – Манзура шундай деб қизининг пешонаси билан икки кўзини меҳр билан ўпди-да, умидли оҳангда қўшиб кўйди: – Худо сизларга фарзанд берсин, боласини ўзи эркалаб кўтариб юрадиган бўлсин. Ўзинг қанақасан?

– Яхшиман, ойижон.

Айвондаги думалоқ стол атрофидан жой олгач, Манзура муддаога ўта қолди:

– Аданг яна гапиряптилар, ўжарлик қилмай бизни кига кўчиб борсанглар яхши бўларди.

– Вой, ойижон, ўжарлик қилиш менга зарурми? Бу киши... ичкуёвликдан иснод қилаётганга ўхшайдилар.

— Агар иккала аканг билан кеннаиларинг бағримизда яшашганида, уялса арзирди. Энди сизлардан бошқа кимимиз бор? Ўзинг секин тушунтиранг бўларди. Аданг гапирсалар малол олиши мумкин.

Зайнаб онасига ачиниш кўзи билан қаради. Ёлғизлик отасига нисбатан шу муштипар онасини кўпроқ забтига олишини у билмайдими? Билади! Аммо икки ўт орасида изтироб чекаётган бу киз бечора нима қилсин? Онасининг дардини енгиллата олмаётган Зайнаб ҳозир Кесакполвон айтган «Асадбекнинг қизи» кўринишида эмас, ҳар қандай дардни сабр билан енга олувчи маъсума қиёфасида эди. У нигоҳини онасидан олиб қочиб синик овозда:

— Хўп, ҳали келгандаридан яна маслаҳат айтиб кўрарман, — деди.

— Ҳеч бўлмаса ўзинг бориб турсанг ҳам майли эди, — деди Манзура иложсиз одамнинг ялиниш овозида.

— Қизиқсиз-а... — Зайнаб онасига ялт этиб қаради: — битта ўзларини бу аҳволда ташлаб кета оламанми?

— Билиб турибман. Бу ерда сенга қийин, у ёқда бизга оғир...

— Уйга бориб тураман, десам, куёвингиз йўқ демайдилар. «Яна касалхонага ётсам, сен уйингга бориб турасан», деяётувдилар. Бир-икки кун сабр килиб туринг.

Сабрдан ўзга яна чораси борми? Манзура қизини ғам кўлмагига ботириб кетмаслик учун дардини ичига ютиб, бу мавзуда бошқа гапирмади.

Икки дардли юрак бир-бирини авайлаган тақдирда ҳам, қайси бир сўз ўки барибир қалб ярасини тилиб ўтиши табиий. Шу сабабли Манзура узоқ гаплашиб ўтиришни истамади. Куёвингиз қайтишини кутмай, изига қайтди.

Элчинни шифокорга олиб кетган дўстлари яхши хабар билан қайтишди. Бундан кўнгли равшанлашган Зайнаб онасининг келганини айтиб, саломини эрига

етказиши билан чекланди. Күчиш хақида эр хотин аввал узил-кесил гаплашиб олишгани учун Манзуранинг муддаосини билдирмай кўя қолди.

Элчин толиқкан бўлса-да, ётишни истамади. Шифокор яқин орада ҳаракат ҳам, овоз ҳам тўла қайтишига ишонтириб, уни руҳлантирган, хозирнинг ўзида тўлиб-тўлиб кўшиқ айтгиси келаётган эди. У торни стол устига олиб қўйишни хотинидан илтимос қилиб, аравачаси билан сурилди. Зайнаб унинг илтимосини бажаргач, пешинга таом тайёрлаш мақсадида ошхона томон юрди. Пиёзларни арчиб, музлатгичдан гўштни олаётганида айвондан Элчиннинг овози эшилтилди. Элчин Зайнабни ҳайратга солиб, кўшиқ хиргойи қила бошлаган эди:

Қайда у кунларим, қайда у висол?
Қайда кувончимга қоришган жаҳон?
Сени мен йўқотдим йўловчи мисол,
Қолди қароқчига талангандарвон.

Эгасига бўйсунгиси келмаётган бармоклар торни заифгина чертади, жаранглаши лозим бўлган тор ожиз инграйди. Жаранглаши зарур бўлган овоз эгасининг амрини бажармайди, хасталик чегарасини босиб ўтолмайди. Хаста юракда туғилган кўшиқ аслида жаранглаши шарт ҳам эмасди. Кўшиқ Элчиннинг ўзига эриш туюлгани билан ошхонада дикқат билан тинглаётган Зайнабга ёқаётган, эрининг дардли қўшиғи уни ўз чодирига буркай бошлаган эди.

Сенсиз умр ярим ва дунё бир кам,
Нетай, ўқтин-ўқтин зиркирар қалбим.
Ўчоги бор-ку ярк этган чўғнинг ҳам,
Қолдим уйи куйган мусулмон каби.

Зайнаб кўшиқ сўзларига дикқат қилди: кимга аталган бу кўшиқ?

«Сени мен йўқотдим йўловчи мисол...»

«Сенсиз умр ярим ва дунё бир кам...»

«Ҳарҳолда биринчи хотинига аталган, – деб ўйлади Зайнаб. – Уни унугомайди... Мен бу кишини кечирдим, лекин у ўзини кечира олмай, юрак яраси билан яшаяпти. Ҳатто менинг меҳрим ҳам бу ярага малҳам бўла олмаяпти. Бу яра... умуман тузалмаса керак... Одам ўзини ўзи кечира олмаса, қийин, жуда қийин... Ёш ўлиб кетган бўлса ҳам, ўша хотин мендан баҳтлироқ экан. Чинакамига севадигани бор экан. Ўлимидан куйиб-куйиб инграйдигани бор экан. Менинг кимим бор? Мени ким севади? Ӯлсам, ким ингрраб тўлғонади? Ҳеч ким...»

Дўл урган даладек паришон бу дил,
Афсус-надоматлар ёндирап бўғзим.
Менга лаънатлар айт, карға муттасил,
Берсин жазоимни Худойим ўзи.

«Ким қарғаши керак? Гўрда ётган хотиними?! –
Хаёлига келган бу фикрдан ўзи чўчиб тушди. – Тавба, тавба!! Худойим ўзинг кечир! Тирик одам қарғаса,
қарғишини қайтиб олиши мумкин. Ўликларнинг
қарғиши нима бўлади? Балки бошига тушаётган
кўргиликлар шунаقا қарғишларнинг оқибатидир?
Қачонгача қарғайди? Қачонгача азоб чекади бу киши?
Худойим, меҳрибонсан-ку, Ўзинг кечира қолгин...»

Ёнган уй тикланар, бутланар карвон,
Дўл урган дала ҳам яшнайди қайтиб.
Бироқ, йўқолмайди кўксимда армон,
Бироқ, сен йиглайсан, лаънатлар айтиб...

«Сен йиглайсан, лаънатлар айтиб?»

«Буни менга айтмаяптими? Ҳа, мен йиглайман,
лекин лаънат айтмай қўйганман. Лаънатдан энди Худойим асрасин. Нима бўлганда ҳам эрим... Мен орзу

қилган отабеклар йўқ... Кумушни ўзим ўлдирдим...
Ўлдиришим керак ҳам эди...»

Зайнаб кўзларини намлаган ёшни артиб, эшик томон қадам босди-да, эри ўтирган хона томон қаради. Торни худди чақалоқ сингари қучоқлаб олган Элчин бошини қуи эгиб, ҳаракатсиз ўтиради. Баданида енгил титроқ туриб, торни тушириб юборди. Зайнаб кўлидаги пичоқни стол устига отди-ю, эри томон шошилди.

Элчин ҳушидан кетмаган, кўлида титроқ тургани учун торни тушириб юборган эди. Зайнаб югуриб келиб елкасидан кучгач, унинг қўлларини силаб:

– Кўрқитиб юбордимми? – деди айбдор одамнинг овози билан. – Тор сал оғирлик қилди. Бармоқларим ўргана олмаяпти.

– Албатта оғирлик қиласи-да, – деди Зайнаб. – Соғ одам кўтара олмайди-ку... Яна озгина чиданг, шошилманг.

– Анварнинг акаси ташлаб кетган шеърларни куйга солувдим... Ичимга сифмади...

– Эшитдим, зўр чиқибди.

– Илёсбекнинг айтишига мўлжалловдим, насиб килмабди. Қизиғ-а, Зайнаб, эшитганмисан, дунёнинг тузилиши спирал шаклда экан. Шунинг учун айрим тақдирлар маълум нуқталарда туташар экан. Шу шеърни қарагин, ёзган одам ўзини ўлдирди, ашгула ни айтиши керак бўлган йигитни ўлдириб кетишиди... Куйга солган одамнинг аҳволи бу...

– Дунёнинг спирал шакли – олимларнинг тахмини. Сиз айтган тақдирлар туташуви тасодиф...

Зайнаб шундай деб эрининг елкасини силаган бўлди. Кейин гилам устида юзтубан ётган торни олиб, стол устига авайлаб қўйди.

– Илёсбек билан Козимбекдан умидим зўр эди. Иккови бир оламга татийдиган бўлиб камолга этиш ятувди. Охирги келганлари эсингдами? «Дўсти, дўсти, нараха»ни жўровозда айтиб беришганда, ҳин-

дийчани тушунмасам ҳам, йиғлаб юборай дегандим. Ҳиндларнинг ўзи ҳам бунақа таъсирли айтишолмаган, тўғрими? Тузалсам, иккови билан бирга сахнага чиқсан, деб орзу килувдим. Бизда журовозда айтувчилар деярли йўқ...

— Худо хоҳласа тузаласиз, сахнага ҳам чиқасиз.

— Гапларимдан кулма. Санъаткор ҳалки шунақа шуҳратпараст бўлади. Даври даврони ўтганини билиб турса ҳам, сахнага чиқсан, одамлар қарсаклар чалиб олқишлиашса, деб орзу килаверади.

— Давру давронингиз ўтгани йўқ. Одамлар ашула-ларингиз ёзилган кассеталарни пулга сотиб олишяпти-ку, сахнада ўрнингиз борлигини шунинг ўзи исбот эт-маяптими?

— Ёзувни эшитиш бошқа, сахна бошқа. Сахнада узоқ туриш қийин, ёшларнинг оқими сел каби ёпи-рилиб, ҳар қандай машхур санъаткорни суриб таш-лайди. Мен ўла-ўлгунимча ашула айтиб юраверишим мумкин, эски муҳлисларим мазза қилиб эшитишлари ҳам мумкин, лекин илгариги Элчиннинг аллақачон ўлиб кетганини тан олмасам, куним шармандаликка қолади.

— Қўйинг, совуқ нафас қилманг. Ана, французларнинг Шарл Азнаури шу ёшидаям дунёни лол қолдириб юрибди-ку?

— Сен иродали аёлсан, шу иродангнинг ярми менда бўлганидами? — Элчин шундай деб маъюсгина жил-майди. — Илёсбекнинг «иш»и нима бўлдийкин? Тер-говчи яна келмокчиди, жимиб кетди. Қотилни топ-ганмикин?

— Топиш осон эканми? Келувди ўша терговчингиз, уйга киритмадим.

— Нега? Бахонада у-бу янгиликни билиб олардик.

— Терговчи сизга янгилик айтарканми? Бошингизни айлантиришдан бошқа нияти йўқ унинг. Аслида, биринчи келганида киритмаслигим керак эди. Битта-си ўлдирилган бўлса, яна биттаси йўқолса, сизнинг

нима даҳлингиз бор? Адамният олиб бориб сўрок қилишибди.

Бу янгилик Элчинни чинакамига таажжубга солди:

– Ие, нега?

– Негалигини ўзлари билишади. Қанақа қилиб бўлсаям адамдан кир топишлари керак-ку?

– Лекин... аданг уларни ҳатто билмасдилар. Янги чиқаётган ашулачиларни ёқтиргасдилар.

– Буни ўша терговчиларга тушунтириш керак. Эрталаб қарасам, сизни сўрок қилган одам тўппа-тўғри кириб келяпти, «тўхтанг, отангизнинг уйими бу, индамай кириб келадиган», десам, «мен томошаталаб одаммасман, хизмат юзасидан келдим», деб олифтагарчилик қилувди, «Хизмат юзасидан бўлса, прокурорнинг рухсатини қўрсатинг», дедим. Бизнинг одамлар милисани кўрдими, тамом, айби бўлса-бўлмаса, тиззаси қалтирайди. Рухсатнома сўрамайди. Булар шунга ўрганиб, «нима қилсан ўзимнинг ишим», деб керилиб юраверишади. Хоҳлаган уйга бостириб кираверади, истаган одамини турмасига тикиб қўяверади.

– Ўзбекчилик-да, – деди Элчин қулимсираб, – бўларни ҳам меҳмондай кутиб олаверамиз. Меҳмоннинг кўкрагидан итариш одати бизда йўқ. Ҳар ҳолда киритаверганинг маъқул эди.

– Фашимга тегмай одамга ўхшаб гапирса, киритардим...

– Нима деди?

– Қўяверинг, ўзи нима-ю, гапи нима бўларди...

Зайнаб шундай деб, ошхонага қайтди. Рухсатнома талаб қилганида терговчи осмондан келиб: «Биз билан ўйнашманг, Асадбекнинг қизи бўлсангиз ўзингизга, катта кетманг», деди. Отасининг номи ўринисиз ҳолатда тилга олиниши Зайнабнинг жаҳлини қўзғади. Кесакполвон «Сен Асадбекнинг қизисан!» деганда ҳақли эди. Зайнаб ғазабланганида қўзлари катта-катта очилиб, гўё ёна бошлагандай қизариб кетарди. Бундай ҳолатда нафрат учқунларини фақат Асадбекнинг

кўзларида кўриш мумкин эди. Терговчи томонидан нодонлик билан айтилган гапдан кейин Зайнабнинг кўзларидан ана шундай учқунлар сачради. «Мен бу ерда Асадбекнинг кизи эмасман, Элчинбекнинг хотиниман. Мен билан ҳам ўйнашманг», деб кўкрагидан итаргудай бўлиб остонаягача кузатиб кўйди. Ҳозир Зайнаб гап бошлади-ю, лекин эрига бу машмаша тафсилотини айтгиси келмади.

Элчин яраланиб, неча бор ҳушидан кетиб, ўзига келган онларида ҳаммадан кўпроқ Анварни эслади. Нима учун шундай бўлаёттанини ўзи ҳам билмади. «Агар ўлмай, тузалиб чиксан, Анварнинг хотирасига туркум қўшиклар атайман. У ўзини шоир деб ҳисобламасди. Лекин унча-бунча шоир зотини орқада қолдириб кетадиган шеърлари бор эди. Ҳалқ уни тириклигига танимади. Ўлимидан кейин номини эъзозласин. Шеърлари газетада чиқсани билан бирор ўқийди, бошқаси бехабар қолади. Шоирни ашула машхур қиласди», деган аҳдни қалби тўрида асралди. Анварнинг ўлмас шеърлари билан Илёсбекни янада баландроқ мартабага кўтармоқчи эди...

Илёсбек... кимнинг қасди бор экан бу йигитда...

Козимбек... Наҳот у?

Йўқ... Улар чинакамига дўст эди. Ҳасадсиз санъаткор бўлмайди. Улар орасида ҳам ҳасад бўлган, лекин ғаразга айланмаган, ҳар ҳолда шундай эканига Элчиннинг ишончи бор эди. Дўстини ўлдириб ёки ўлдиририб, қочиб юриш Козимбекка хос эмаслигига эса имони комил.

Ошхонага қайтган Зайнабнинг хаёли ҳам икки ёш қўшикчининг аянчли тақдири билан банд эди. Эрини йўқлаб турувчилар орасида бу иккиси чинданам бошқача эди. Қошлири қалин, кўзлари кулиб турувчи бу йигитларнинг овози, гапириш оҳангига ҳам ширали эди. «Шаҳарнинг энг гўзаллари талаш қилиб юборса керак бу хушрўй йигитларни», деб ўйлаган эди Зайнаб. Охирги келишларида ҳиндча кинодаги ашулани

хиргойи қилиб беришувди. Кейин ғалати гап айтишган эди...

Уша гапни эслаган Зайнабнинг юраги ғалати бўлиб кетди. Пичоқ ушлаган қўли қотди.

«Кинода икки дўст бир гўзални севиб қолади, бизнинг ҳаётимиизда бир гўзалга уч ошиқ... Гўзал эса ҳудди эртаклардаги маликага ўхшаб шарт қўйган: кўрик-танловда ким биринчи бўлса, ўшанга тегармиш. Шахсан мен бунақасига рози эмасман. Бунақа савдо билан ҳаёт чиройли бўлмайди. Шунинг учун четга чиқажакман... Гўзалдан юз ўгириб, халқимга, ижодимга қайтажакман!»

Бу гапларни Козимбек айтган эди. Жиддий эмас, ҳазил оҳангода айтганди. Лекин бир гўзал уч йигит орасида талаш бўлса... ҳамма нарсани кутиш мумкин. Демак... қотил учинчи дўстми?

Зайнабга бу фикр ҳақиқат бўлиб туюлиб, эти бир жимиirlашиди. Яна бир оз ўйланиб тургач, эрининг ёнига қайтди. Элчин чолғуга қўлини чўзиб, кўрсаткич бармоғи билан торни заифгина чертиб ўтиради. Зайнабнинг паришон ҳолда кириб келишидан ажабланди. Зайнаб унинг рўпарасига ўтирди, хаёлига келган фикрни айтишга иккиласди. Элчин «Тинчликми, Зайнаб?» дегач, тилга кирди:

— Калаванинг учини топганга ўхшайман... Сиз ҳақсиз, Козимбекдан шубҳа қилиш керакмас. Охирги келишларини эсланг, ашулани айтиб бўлишгандан кейин Козимбек «бир гўзалга уч ошиқ» деган эди. Гўзалнинг шартини айтиб, четга чиққанини билдирганди. Қанақа кўрик-танлов эди, сиз биларсиз?

— Битта мен эмас, ҳамма билади. Бокуда ёш хонадаларнинг халқаро кўрик-танлови бўлади... «Бўлади», эмас, назаримда ўтиб бўлди. Даъвогарлар орасида Илёсбек, Козимбек ҳам бор эди.

— Яна биттаси бўлиши керак эмасми?

— Битта эмас, бир нечта эди даъвогар. Лекин арзидигани шу иккаласи эди. Ҳа, Толиб ҳам бор эди.

- Уччаласи дўст эдими?
- Билмадим... Лекин учовиям бир жойда ўқиган.
- Гўзал ҳақида ҳам гапиравди, танийсизми ўша қизни?
 - Йўқ, тўғриси... ўша кунги гапни мен ҳазил деб тушунувдим. Булар қиз талашадиган йигитлар эмас, буларни қизлар талашишса керак?
 - Қиздан ташқари халқаро кўрик-танлов ҳам бор. Козимбек ҳазиллашмаган бўлса, у даъвогарликдан воз кечган. Демак, икки киши қолган. Йлёсбек ўлдирилгач, Толиб бордими?
 - Ҳа, шунаقا бўлибди.
 - Ютибдими?
 - Йўқ, рағбатлантирувчи мукофот олибди. Бунақа мукофотни борганларнинг ҳаммасига беришади.
 - Унда гўзал қизнинг шарти бажарилмабди-да? Илёсбек ўлдирилди, Козимбек изсиз йўқолган, Толиб Бокудан куруқ қайтган... Гўзалинг тақдири нима бўлади энди? Толибга тегишдан бошқа чораси қолмаганми? Толиб эришадиган асосий мукофот ўша гўзалми? Шу мукофотни деб икки йигит жувонмарг бўлиб кетаверадими?
- Элчин куйиниб гапираётган хотинига қараб кулимсиради.
 - Куладиган жиннича гап гапирдимми? – деди Зайнаб зардали оҳангда. У воқеани таҳлил қилиб, худди отаси каби мантиқий хulosалар чиқара бошлаган эди. Эрининг кулимсираши масхара бўлиб туюлиб, отаси каби бирданига ёнди.
 - Кулганим йўқ, Зайнаб, – деди Элчин узр оҳангида. – Фақат... терговчига ўхшаб мени саволга кўмиб ташладинг. Ўйлаб жавоб беришга ултурмай қолдим. Гапларингда жон бор... Лекин... терговчилар эшишибмагани маъқул. Толибни яхши билмайман. Эҳтимол, юрагида ёвузлиги бордир. Лекин санъаткорнинг қалбидаги нафосат билан ёвузликнинг бирга яшаси мумкинлигига ишонгим келмайди.

– Нега ишонмайсиз? Моцарт фожиасидан кейии Сольерига ўхшаганлар бутунлай қирилиб кетишгани? Үзингизнинг ашулангизда бор эди: «Дўстга зор бўлган куним дўст мени хор айлади...» Шогирдларингизни бегона одам ўлдирмаган.

– Козимбекни ҳам ўлдига чиқаряпсанми?

– Агар мантиққа суюниса, бошқача холоса бўлиши мумкинмас.

– Агар терговчи бўлганингда...

– Ҳеч қачон терговчи бўлолмайман.

– Нега энди?

– Мен ҳар воқеадан мантиқ излайман, терговчининг мантиқ ҳакида ўйлашга вақти йўқ. У ҳужжатларни тезгина юмалок-ёстиқ қилиб, ишни судга ошириши керак. Ундан ҳеч ким мантиқ талаб этмайди.

– Гапинг тўғри, лекин ҳар қалай...

Зайнаб ўрнидан туриб, эрига норози қиёфада боқди:

– Гапингиз ичингизда қолмасин, айтаверинг.

– Ранжимагин-у, анча шафқатсиз терговчи бўларкансан.

– «Шафқатсиз» дейсизми? Йўқ, мен эмас, ҳаёт шафқатсиз...

Ҳаётнинг ҳар турли шафқатсиз дўллари остида қолиб, ҳаётдан тўйган Элчин хотинига эътиroz билдира олмас эди. Эр-хотин ҳаётнинг шафқатсиз эканини эътироф этишса-да, шафқатсизлик хусусидаги қарашлари бир хил эмасди. Улар гўё «ҳаёт шафқатсизлиги» деб аталмиш азм дарёning икки қирғоғида кезаётган икки дарбадар каби эдилар. «Ҳа, ҳаёт бениҳоя шафқатсиздир!» деган ҳақиқатда бирлашган эр-хотин «Ҳаётнинг нимаси шафқатсиз?» деган савол ўртага кўйилса, бир-бирларидан узоклаша бошлаган бўлардилар. Ҳозир ҳаётнинг қанақасига шафқатсиз экани исбот талаб этилмади, Зайнабнинг дардли қалбдан сизиб чикқан сўзлари кифоя қилди.

Эрини касалхонадан олиб чиқиб, акасининг тўйига бормаганлиги Асадбекка аввалига нодонлик бўлиб туюлган эди. Кейинроқ ўжарликка йўйди. Сўнгрок эса қизининг феълига умуман тушунмай қолди. Абдуҳамиднинг ўлимидан кейин, айниқса, Абдусамад ўкишга қайтганидан сўнг ёнида қизи бўлишини жуда-жуда истаган эди. Ота истагига кўра қизнинг қайсарлиги устун бўлса, нима қилсин у бечора!

Асадбек «қизинг эрининг раъйига қарайди», деган гапни Манзурага ҳатъий ишонч билан айтмаган эди. Элчиннинг бу хонадонга кўчиб келишга кўнмаслигини билар ва унинг бу ҳолатига тушунгани учун зўрлашдан ўзини тиярди, Зайнабнинг ўжарликлариға ҳам чидаб келаётганди.

Лекин...

Зайнабнинг ота уйига кўчиб келмаслигига жиддийроқ сабаб ҳам бор эдики, буни Асадбек ҳам, Манзура ҳам билишса-да, сиртга чиқаришмасди.

Зайнаб бу уйга кўчиб келгач, Жамшид билан ҳар куни, турли ҳолатда кўришиб туришдан чўчиётган эди. Гарчи Жамшид уни «синглим» деб атаса-да, дардни умид билан енгишга уринган Зайнаб руҳидаги Кумушбибини беражмларча ўлдирган бўлса-да, орадаги шайтон ҳали тирик ва ҳатто сергак эди!

Зайнаб келин аяси Муштариининг бир гапини кўп эслайди: «Румонни мутолаа этувим жараёнинда Кумуш қандай қиз экан, деб чўх ўйга толурдим. Сизни кўрдим ва дедимки: ана, Кумуш!»

Қизлик сурури билан яшаётган кунларида бу таъриф берилса, унга ғоят хуш ёқсан бўларди. Балки бу мақтov қанотида муҳаббат осмонида парвозлар қиласмиди... Энди у осмон йўқ, парвоз қилувчи қанотлар қиркилган... Шу боис келин аясининг пок кўнгил ила билдирган лутфини қабул қила олмай, синик овозда: «Кумуш ўлган...» деб кўйган эди. Яхшики, Муштарий қайинсинглисининг бошига ёғилган мусибат дўлидан бехабар. Зайнабнинг гапини китобдаги

Кумушнинг заҳарланиб ўлиши, деб тушуниб, эътиroz билдириб эди: «Кумушбиби жисман ўлмишлар. Би-бийимиз муҳаббатлари тирикдир, ўлмасдир. Унинг туйғулари сиз ила бизда яшар...»

...унинг туйғулари сиз ила бизда яшар...

Зайнаб шу гапни кўп ўйлади. У қалбидаги туйғуни ўлдирганига ишонарди. Айниқса, Ҳайдар амакисига қўшилиб Мардонани ўлдиргани борганида бунга амин эди. Кейинчалик, келин аялари билан суҳбатларда муҳаббат туйғусини ўлдириш мумкин-маслигига ишона бошлади.

Отаси уйга кўчиб ўтиш ҳакида сўз очганида у ўша туйғунинг тирилиб қолишидан кўркарди.

Жуда-жуда кўркарди...

3

«Кар эшитганини, кўр ушлаганини қўймас», деганларидек, Фазлияни санчқи ушлаган ҳолда кўрганларнинг гувоҳлиги асос бўлиб, аёл эрининг қотили сифатида қамалган эди. Адвокат «юқори маҳкамага шикоят қилиб, бу суднинг ҳукмини бузамиз», деганда ҳам унамаган, бирорга хасрат дафтарини очмаган Фазлия дардларини бу бегона аёлга қандай айтишни билмай, қийналди.

Фазлия йиллар бўйи банди бўлган кулфат гардларидан кутулиш, юрагини темир тирноклар исканжасида тутиб турган аламлардан холи бўлиш учун ўзига дардкаш изларди. Лекин фаровонлик тахтида ўтирган Манзура унга дардкаш бўла олармикин? Бу хонадонга нажот олиҳасини излаб келгани билан, Манзурани фаровонлик тахтида ўтирган дардсиз хотин деб ўйларди. Манзуранинг ичи дардлардан дўл ғалвир қилиб юборган чорасиз барг сингари илма-тешик бўлиб кетганини қайдан ҳам билсин?

Манзура бу маъсуманинг синиқ овоз билан баён этган арзи ҳолини эшитиб, титраб кетди. «Муштипар-

нинг юраги шунча ғам-аламга қандай чидади экан?» – деб ўйлаб, унинг қалб ярасига малҳам бўла олувчи сўз излади. «Адамизга айтаман, болаларингизни топишга ёрдам берадилар» деб овутмоқчи бўлди. Манзуранинг бу гапларидан кейин аёлнинг мунгли кўзларида умид учқунлари кўринди. Аммо кейинги таклифини эшитиб, бошини эгди. Бу ерга келишдан мақсади болаларини топишга ёрдам сўраш эди. Тўғри, қишлоқдаги уйида яшашга юраги бетламай қолганди. Қамоқдан чиқиб борди. Кўни-қўшнилар йўқлашди, ош-овқатдан ками йўқ эди. Бир ойми ё ундан кўпми, оқибатли кўшнилар паноҳида муҳтоҷлик нималигини билмай яшаши мумкин эди.

Энди бу бегона хонадонда яшаш?

Манзура «хизматкорлик қиласиз», деб очиқ айтмади. «Шу ерда яшаб туринг, у-бу ишларимга қарашиб турарсиз», деди. Фазлия бошини эгиб жимиб қолга, «ҳеч бўлмаса, болаларингиз топилгунича яшаб туринг», деб кўшиб кўйди.

Фазлия бир хонадонга хизматкор бўлишни тасаввур қила олмасди. Гап ишдан қочишда эмас, қишлоқда ўсиб, эрлар билан теппа-тенг ишлаган аёл меҳнатдан кўрқармиди? Қишлоқда тонг отгач, қуёш аста бош кўтариб қарайди-ю, ўзидан аввал уйғониб, аллақанча ишларни қилиб ташлаган аёллардан уялганиданми, баъзан кизариб кетади. Қуёшда ор бор, аммо яrim кечага қадар қайси бир тўйда ёки гап-гаштакда бўкиб ичиб, кун ёйилгунча уйкуни урадиган эрларда виждон йўқ. Субҳдан илгари туриб, сигир соғиб, ҳовли супурриб, кир ювиб, яна томорқадаги сабзини ўтоқ қилиб қўйишга улгурган хотинига қараб: «ҳалиям чойинг қайнамадими?» деб бўкиришга овоз бор. Аммо шу овозга монанд ғайрат, мардлик йўқ.

Барча афсус шунда.

Аммо... Аёллар афсусланишмайди, виждонсиз, ғайратсиз, такасалтанг бўлса ҳам майли, эрнинг борига шукр қилишади.

Фазлия ҳам шуларнинг бири.

Хизматкорликни таклиф қилаётган аёл эса ундей эмас, у бошқа олам. Фазлия унинг тирноқлари бўялмаган бармокларига қараб, нозанин, эгилмас, сатанг бойвуччалардан эмаслигини сезди. Асадбек хотининг истагини эшишиб, «синалмаган хотин»ни олиб қолмоқчи бўлаётганидан ғашланганди. Фазлия эса синалмаган уй бекасининг қандай хизматларини бажаришини тасаввур эта олмай ғашланди. Қишлоқда иш оғир, иш ҳақи эса оз бўлгани билан эркин юра олади. Бу ерда қишлоқдагичалик иш бўлмайди, берадиганлари ҳам кўпдир. Лекин... бирорларнинг қош-қовоғига қараб, мутелик билан кун кўриш... Фазлия шундан қисилиб, жавобга қийналаётган эди. «Ҳеч бўлмаса, болаларингиз топилгунича яшаб туринг», дейилиши мушкулини осон этди. Чехраси ёришиб, Манзурага миннатдор кўзлари билан қаради:

– Майли, опажон, – деди енгил хўрсиниб, – фақат... уйга бориб келай, бу бозорда сотадиган нарсаларим бор.

– Нималарни сотмоқчисиз? – деди Манзура ажабланиб, кейин саволига аниқлик киритди: – Нега сотмоқчисиз?

– Мен у ёқдалигимда... барака топгур қўшниларим мол-ҳолга қараб, анча кўпайтириб қўйишибди. Одамлардан қарзларимиз бор... ўлган одамнинг қарзи тўланмаса, гўрда қийналиб ётаркан. Молни сотиб, дадамизни гўр азобидан кутқаришим керак.

Бу гапни эшишиб Манзура бир сесканди. Тирик болаларининг ғамида юрган муштипарнинг қабр азобидаги эрини ўйлаши уни ларзага солди. Қарғишларга лойик эрнинг нариги дунёдаги аҳволига ачиниш унга ғалати туюлиб, айтишга гап тополмай қолди. Сўнг... унга яна бир яхшилик қилгиси келди.

– Молларингизни сотманг, болаларингизнинг тўйларига атаб қўйинг. Қарзларингизни тўлашга ета-

диган пулни мен берайин. Молларни бокиб туришгани учун күшниларингизга ҳам ҳақларини берайлик...

— Нима деяпсиз? — деди Фазлия унга ҳайрат билан қараб: — Кўни-кўшничиликда бунақаси йўқ. Нима килинса, холисаниллоҳ бўлади. Агар «ҳақ олинглар», десам, кейин бетимга қарамай қўйишади. Қарзларни ҳам баъзи бирорлар кечиб юборишибди. Биттала-ри: «Эринг қиморвоз, арокхўр бўлгани билан яхши одам эди. Жанозасида тобутининг тепасида туриб қарзлардан воз кечганман. Яна бир-икки киши кечди, эринг у дунёга бўйнидаги қарздан кутулиб кетди, сен хотиржам бўлавер», дедилар. Раҳмат айтдим-у, лекин кўнглимдаги хиалик кетмади. «Тўлаб қўй», деб ва-сият қилган эдилар, кечишган бўлишса ҳам тўлашим керак... Опажон, ранжиманг, қарзларни ўз молимдан тўлашим шарт. Йўқ бўлганда, ўзим сўрардим...

— Молларни болаларнинг тўйларига атаб қўйинг, деяпман.

— Худойим болаларимга яна ризқ берар...

Подшоҳ саройидаги мажлис ахлидан: «Ҳамма нарсадан оғирроқ, қаттиқроқ нарса нима?» деб сўраганида, донишмандларидан бири: «Қарилик, танглик, йўқчилик», — деди. Иккинчиси: «Касаллик ва ғам-андух», — деди. Учинчиси подшоҳга маъкул гапни айтди:

— Ҳамма нарсадан оғирроқ ва қаттиқроқ нарса — ажалнинг яқинлашиб қолиши ва ҳётда яхшилик қилмай, ёмон номга эга бўлиб вафот қилиш...

Манзура қайсиdir издиҳомда отин ойидан эшигган бу ҳикматни эслаб қолган эди. Үғлининг ўлимидан кейин бу ҳикматнинг ўзгача қурдатини ҳис этди. У яхшилик қилишдан ҳеч қачон бўйин товламаган. Ёмонликдан ҳазар қилган. Ҳозир ҳам бу муштипарга яхшилик қилмоқчи, лекин бечора бўлишига қарамай у кўлини қайтаряпти. Кўп одамлар муҳтож бўлишмасада, бу хонадондан бир нималар кутишади, арзимаган

нарса учун пой-патақ бўлишдан ҳам қайтишмайди. Бу бечора эса...

Пул бойлиги бўлмаган аёлнинг ғуур бойлиги қандай бўлишини Манзура энди кўрди. Кўрди-ю, барча бойлигини ҳадя этган тақдирда ҳам бу бечора даражасида бой бўла олмаслигига акли етиб, руҳи эзилди. Фазлия уйига кетганидан кейин ҳам Манзуранинг хаёли унинг гаплари билан банд бўлди. Манзура шоҳона хонадонда туғилмаган, болалигига тўкинилик лаззатини кўпам тотмаган эди. Аксинча, муҳтожлик қанака бўлишини билиб улғайганди. Асадбекка текканидан кейин ҳам дарров бойлик шоҳсупасига кўтарилмаганди.

Ўша онларда унда Фазлияники каби ғуур бойлиги бормиди?

Бор бўлса, уни қачон йўқотди?

Йўқотганини қайта топа оладими?

Бу каби саволлар қайнаб чиқаверди, жавобга эса ожизлик қилди. Ўзгача бўлиши ҳам мумкин эмас. Бу каби саволларга иймон билан кувватланган ақлгина тўғри жавоб берга олади.

Бозор куни ҳам ўтди, Фазлиядан дарак бўлмади. «Келмайди, чўриликни ор деб билди...» деган ҳаёлда Манзура ундан умидини уза бошлади. Жамшид келиб, хожасини олиб кетгач, уйга сигмай қолди. Ошхонада ғимирлаб, ўзини чалғитмоқчи бўлди. Юраги барибир сиқилавергач, отин ойи ҳузурига бориб, кўнглига таскин топиш учун йўлга ҳозирланди.

Манзура очик эшикни аста тақиллатиб, ичкарига қараганда Афруза дераза ойнакларини юваётган эди. Меҳмонни кўриб, тезгина пастга тушди-да, қўлларини сочиққа артди. Манзура bemavrid келганидан хижолат бўлиб, айвонга чиққиси келмади. Унинг хижолатини сезган Афруза дарахт соясидаги думалоқ стол томон бошлади. Ўтириб, дуо қилингач, мезбон кулимсираганича:

— «Ишингга солиб «акримиз-зайфа» нур, ту-

туб маръи ойинни «хайрул-умур», деганлар Навоий ҳазратлари. Шу тарзда шоир бобомиз бизга «акримиз зайфа» – «Меҳмонни хурмат қил!» деб амр этилганини эслатяптилар. Чунки бу амрга итоат этишимиз «хайрул-умур», яъни ишларнинг яхшиси экан, – деб таомилга кўра, дастурхон ёзмоқ мақсадида ўрнидан турмокчи эди, Манзура унамади:

– Бир масалани ечолмай, бошим қотиб келдим.
Икки оғиз гапингизни эшитаман-у, қайтаман, – деди.

– Икки оғиз гап бир пиёла чой устида айтилса, яна ҳам чиройли бўлади, – деди Афруза жилмайиб, – Аллоҳ таоло «үйингизга меҳмон келмай қолса, «аузу биллаҳи минаш-шайтонир рожийм», денглар», деб ўргатган. Шайтон ин қўйган уйга меҳмон яқинлашмайди. Уйимга меҳмон юборган Аллоҳимга шукр, меҳмон остона ҳатлаганидан кейин изни қисман мезбон ихтиёрига ўтади.

Гарчи «бир пиёла чой» дейилган бўлса-да, дастурхон ёзилди, Аллоҳнинг неъматларидан насиба қўйилди. Бу жараёнда меҳмоннинг хижолати ошаверди. Айниқса, Афрузанинг «шайтон ин қўйган уйга меҳмон яқинлашмайди», дейиши вужудини жимираштириб юборди. Меҳмон келмай қўйгани учун шайтоннинг ёмонлигидан Аллоҳдан паноҳ сўралса, у қанчалар илтижо этмоғи зарур экан? Эшиги олдида қоровул, яқинлашишга бегона одамнинг юраги бетламайди. Фазлияга ўхшаш ҳожатталаблар соатлаб, балки кунлар йўл пойлашса... Ҳовлига қўйиладиганлар ҳам самимий, холис меҳмонлар эмас, қайси бир ишни битириш учун келганлар... Меҳмон кириб келганда қувониб кетиш, хайрлашиш чоғида дийдорига тўймаганидан афсусланиш... Бундай туйгулар камдан кам ҳолларда уйғонади. Манзура меҳмон кутишни яхши кўради, меҳмонни соғинади. Аммо... меҳмондан безувчининг раъийга қараб яшашга мажбур.

Ваъда қилинган бир пиёла чой ичилгач, Манзура ечолмаётган масаласини баён қилишга ўтди:

— Одамларга яхшилик қилиш шартлигини биламиз, саховатли бўлиш ҳакида ҳам кўп эшитамиз. Лекин бир одам мухтожроқ одамга яхшилик қилгиси келса-ю, у мухтож одам олмаса-чи?

Манзура мақсадини охиригача очик баён этишдан тортинди. Афруза буни сезди, яна гапирап, деган ўйда бир оз кутди. Кейин шогирдига масаланинг ечимини тушунтираётган устоз оҳангидагап бошлади:

— «Яхшиликни раҳмдил, меҳрибон умматларимдан кутинглар», — деганлар пайғамбаримиз алайхиссалом. — «Шунда сизлар улардан умид қилган марҳаматларга эришасизлар. Тошбағир, қаттиққўл, беражум умматларимдан зинҳор яхшилик кутманглар, зеро, уларга Аллоҳ таолонинг лаънати ёғилиб туради. Эй Али!» — деб хитоб қилганлар. — «Аллоҳ таоло яхшиликни яратганда унинг ўз ахлини ҳам алоҳида яратган ва уларга яхшилик ва хайрли ишларни яхши кўрсатиб кўйган. Шунинг учун улардан ким яхшилик кутса, албатта мақсадга эришаверади. Бунинг мисоли чанқоқ бўз ерга сув кўйиб юборилса, у ер қанчалик яшнаб эгаларини сероб қилгани каби яхшилик ахли ҳам одамларга шунчалик манфаат ва баҳра етказур. Бу дунёдаги энг яхши кишилар охиратда ҳам яхшилар қаторида тургайлар». Ўнлаб шарафли ҳадисларда, Куръони Карим оятларида одам зоти фақат яхшилик қилишга буюрилган. Мен сизга фақат биттасини айтдим. Куръонда бу оят ҳам бор: «Улар енгилликда ҳам, оғирликда ҳам нафақа қиласиганлар, ғазабини ютадиганлар ва одамларни афв қиласиганлар. Аллоҳ яхшилик қиласиганларни ёқтиради». У одамлар яхшилик қилишда собитқадамдирлар. Ҳаётлари енгиллашиб, ҳамма нарсалари сероб бўлиб кетса ҳам, ҳовлиқиб, ҳаддиларидан ошиб, фиску фасодга берилиб кетмайдилар. Балки ўзларини босиб, хайр-эҳсон, нафақа қилишда бардавом бўладилар. Шунингдек, бошларига оғирлик кунлари тушса ҳам, сиқилиб, ўзларини

нокулай сезиб, баҳиллик йўлига ўтиб олмайдилар. Балки нафақа қилишда бардавом бўлаверадилар.

— Ҳар бир одам ўз яхшиликларидан ўзи сарой қуриши керак, буни «охират саройи» деб атасак ҳам бўлади. Бу борада отаси куриб қўйган саройда яшай олмайди. Ундаги қулайликлар ва имтиёзлардан фойдалана олмайди. Қиёматда кимсанинг «Отам намозхон эди, ҳимматли эди», деган даъвосига қулоқ солинмайди. «Ўзинг қандай яхшиликлар қилгансан?» деб сўралади. Бу дунёда кўркам яхшилик саройи бунёд этган бўлса, фоний дунёда ҳам жаннат саройларида яшар инша Аллоҳ! Агар қилган яхшиликлари ғарибина кулба каби бўлса... Шунисидан Аллоҳ асрарин!

— «Аҳсин камо аҳсаналлоҳу илайка», дейилганинг маъноси — «Аллоҳ сенга яхшилик қилгандек, сен бошқаларга яхшилик қил». Бу фикрни сал соддарок тушунтиrsам: бу дунёда ҳам, у дунёда ҳам Одам болаларининг бошларига саодат соябони бўлувчи фазилат — яхшиликдир. Бу соябонни сотиб олиш мумкин эмас. Бошқа одам ҳам ясад бера олмайди. Ҳар бир киши уни ўз амаллари билан ўзи ясайди. Саодат соябонининг ҳажми ва гўзаллиги қилинган яхши амалларнинг даражасига боғлиқ. Одам кишиларга қилган яхшилиги қадар яхши одамдир. Саодат ва фароғатга ёмонлик аталмиш ботқоқлик орқали етаман, деган инсон нодондир, бадбахтдир.

Афруза ўзи билмаган ҳолда ҳакикат сўзларининг ўқларини Манзура қалбига қадаётган эди. Бу ҳакикатни Манзуранинг ўзи ҳам билади. Лекин ўзгалар тилидан эшитиш оғир ботаркан. У маломат тошини кўтара олмай, бошини эгди. Афруза гаплари таъсир этаётганини сезиб, давом этаверди:

— Тўгри, яхшилик туфайли бунёд бўлувчи бу соябонни ясашни кимсага ўзгалар ўргатиши мумкин. Демак, яхшиликнинг микдори ва миқёси, холислиги устознинг таълимига ҳам боғлиқ экан. Риё ва миннат

кўлмагидан сув ичувчи яхшилик яхши соябон бўла олмайди. Бировга қилинган яхшилик учун сира надомат чекмаслик керак. Аллоҳ таоло ризолиги учун яхшилик килиб кўйиб, сал фурсат ўтмай надоматга берилса, бу иллати кишини ёмонликка элтиб, яхшиликдаги савобнинг йўқолишига сабаб бўлади. Кимгадир хизмат қилиш лозим бўлиб қолган бир пайдада нафл, яъни қўшимча ихтиёрий ибодатлари, яъни: нафл намози, нафл рўзаси, нафл зикри... тарк этилиши мумкин. Чунки нафл ибодати инсоннинг ўзигагина фойда етказади. Бирок, бошқа бир кишига хизмат қилиш – жамиятга хизмат қилишdir. Бунинг савоби кўпроқdir. Иброҳим алайхиссалом Каъбани қайта бунёд қилғанларида тўрт бурчагининг ҳар бир бурчагида минг ракаатдан намоз ўқиб: «Раббим, шундай ибодат қилдим, сенга маъкулми, мақбулми? Сенга янада яхшироқ, мақбулроқ ибодат борми?» деб сўрадилар. Ваҳий келдики: «Ҳа, ё Иброҳим, бир факир камбағалга бир луқма нон бериш...»

Кўряпсизми, опажон, бирон бир кимсага яхшилик қилинса, сизнинг саховатингиздан у одам беҳад шод бўлиши баробаринда ўзингиз ҳам бу ҳимматингиздан шунчалик завқ ола билишингиз керак. Бундай завқ факат беминнат ва холислик илиа яхшилик қилувчиларга насиб этади. «Яхшилик қил – дарёга сол, балиқ билур. Балиқ билмаса – Ҳолиқ билур», деб бежиз айтилмаган. Ҳазрати шайх Суфёни Саврий дедилар: «Кимки ихлос билан бир амални қилса-ю, кейин ўша амалга мақтаниб, «мен фалон ишни килдим», деса, қабул бўлган ўша амали яхшилик рўйхатидан ўчирилиб, риё рўйхатига ёзилур».

Бир ривоят бор: Бағдод шаҳрига ёнгин тушибди. Бир хожанинг икки ўғли олов ичида қолди. Ота-онаси фарёд уриб, чора топа олмабдилар. Ҳазрати Абул Ҳусайн Нурий деган шайх у ердан ўтаётган эканлар. Дарҳол ўт ичига қирибдилар-да, болакайларни олиб чиқибдилар. Олов у кишини куйдирмабди, балки ул

муборак зот учун гулистон бўлибди. Болаларнинг отаси ҳазратга миннатдорлик билдириб, бир коса тўла тилла тутибди. Шунда шайх ҳазратлари:

– Нурий тилла олса, оловдан болаларни чиқара олмас! – деб жавоб берган эканлар.

Бу гапларни айтишимдан мурод шулки, холис яхшиликка Аллоҳ таоло ажр беради. «Лан танолул-бирра ҳатто тунфиқу миммо тухиббуң» – яхши кургандарсаларингиздан сарфламас экансиз, яхшиликка эриша олмайсизлар, дейилиши бежиз эмас...

Афруза «бирон нимага тушундингизми, энди сўзлаш навбати сизга», дегандай Манзурага қараб қолди. Бир неча нафаслик сукутдан сўнг Манзурга бoshини кўтарди:

– Эшитмаган гапларимни эшитдим, яхшиям келибман, – деди у паст овозда. Гарчи гўзал ҳикматлар баён этилган бўлса-да, саволига жавоб олмаган эди, шу боис яна мавзуга қайтди: – Лекин ҳали айтганим... қилинмоқчи бўлган яхшилик холис эди, дилдан чиқарилган эди...

– Опажон, сезиб турибман, дардингизни очиқ айта олмаяпсиз. Учинчи шахс тилидан гапирмай, воқеани тўлиқ баён қилиб бераверинг, икковимиз ақллашиб бир хulosага келармиз.

Манзура бир оз иккилангач, Фазлия билан бўлган сұхбатларини айтиб берди. Афруза жимгина тинглади, сўзни бўлмади, орада савол ҳам бермади. Унинг учун ҳаммаси тушунарли эди.

Манзура сўздан тўхтагач, «у синглимиз нотўғри иш қилибдилар», деган ҳукмни кутди. Лекин унинг кўнглидаги жавоб бўлмади:

– Сизни қийнаган масаланинг ечими унчалик қийин эмас. Пайғамбаримиз алайҳиссалом «бир-бirlарингизга ҳадя қилинглар», деб ўргатганлар. Ҳадяни олмай, қўлни қайтариш одобдан эмас. Ҳатто камбағал одам кўнглидан чиқариб битта майизни ҳадя қилса ҳам, бой одам олиб, дуо қилиши керак. Олмаса такаб-

бурлик бўлади. Фазлияхоннинг ҳаракатида сиз шунаقا ғуурур кўрибсиз. Лекин, ақлим адаштирмаётган бўлса, ундан эмас. Фазлияхон қарзларни тўламоқчилар. Қарзларни тўлаш учун моллари етарли. Ҳалол молдан тўламоқчи бўлганлари яхши фазилат. Агар уйларида ҳеч нималари бўлмай туриб, сизнинг яхшилигингизни инкор этганларида таассуфли иш қилган бўлардилар.

— Мен ўша молларини болаларининг тўйига атаб қўйишиларини хоҳлаган эдим, — деди Манзура афсус билан.

— Аллоҳ фарзандни ризки билан қўшиб беради. Тўйларига аталгани ҳам бордир. Лекин... сиз кўпам куйинманг, яхшиликнинг дарвозалари кўп. Агар бир неча йил у ёқда ўтирган бўлсалар, уйлари тўкилиб қолгандир. Кўшнилари молларига қарашган, уйда одам яшамаса, тез нурайди. Болалар топилгунига қадар сиз уйларини чиройли қилиб беринг. Оғилхоналарини ҳам янгилаб, иккита буқача боктириб қўйсангиз, олам — гулистон-да!

Афруза шундай деб жилмайди. Худди уйлар таъмирланиб, оғилхоналар янгиланиб, буқачалар бокилаётганидан кувонгандай жилмайди. Бу жилмайиш Манзуранинг кўнглини илиқ нур билан ёритди. Хайрлашиш учун ўрнидан қўзғалди-ю, дилини хира қилиб турган яна бир саволга ойдинлик киритишини истади:

— У синглилизни камашган, бу дунёдаги жазони олганларини тушундим. У дунёда нима бўлади?

Зоҳиран енгил туюлган саволнинг жавоби Афрузани бир оз кийнади. «Буни Аллоҳнинг Ўзи билади», деб осон қутулишни истамади. Кафтларини очиб, юқори кўтарди-да:

— «Байизаллоҳу таоло авроқа жаройимиҳо» — Аллоҳ таоло унинг гуноҳлари ёзилган варажаларни оқ қиссин, кечирсисн, — деган дуо билан сұхбатларига якун ясади.

Кечки пайт эри келганида Афрузадан эшитганларини ўзининг шахсий таклифи сифатида баён қилди. Асадбек толиккан эди, хотинининг ҳаяжон билан айтган гапларини эътиборсиз тинглади. Битта уй билан оғилхонани янгилаш, икки эмас, йигирмата буқачани боктириб қўйиш унинг учун арзимаган иш эди. Жамшидга ёки бошқа бир аъёнига имо қилиб қўйса бас, бир ҳафтага етмай ишлар қойилмақом қилиб қўйиларди. Лекин Асадбек, хотинидан фарқли ўлароқ, кимга яхшилик килаётганини олдиндан билиши керак эди. Кеча кўз ёши тўкиб келган хотин бунчалик яхшиликларга арзийдими ё йўқми? Асадбек аввал шу саволга жавоб олиши лозим эди. Жамшидга «кенна-йингнинг гапига қараганда, бу дунёдаги энг бечора хотин экан, қанақа бечоралигини ипидан-игнасиғача аниқла», деб топширган эди, топшириқ натижасини билмагунича Манзуранинг ҳозирги таклифлариға таинли жавоб беришни истамади. Шунинг учун гапни қисқа қилиб:

– Аввал болалари топилсин-чи... – деб қўйди.

– Сиз ёрдам беряпсиз, Худо хоҳласа албатта топилади, – деди Манзура ишонч билан. – Бу ёгини ҳам бошлаб турсак савоб кўпаяркан. Яхшилик қилишга шошилиш керак экан...

«Ажал етиб келгунича кўпроқ яхшилик қилишга шошилиш керак», деб тўлиқ айтмоқликка Манзуранинг тили бормади. Ажалнинг тилга олиниши эрига ёмон таъсир қилишини билгани учун хикматни яримлатиб айта қолди. Шунга қарамасдан, умид билан айтилган бу гап Асадбекнинг ғашини келтириб, қошларини чимирди.

– Шунақами? Яхшилик қилишга шошилиш керак эканми? Шошилмаса нима бўларкан? Ажалидан беш кун аввал ўлиб қоларканми?

– Вой, адаси, унақа деманг...

– Сен гапни айлантирма. Мен яхшилик қилишдан қочмайман. Лекин худойинг ваъдасини бажаряпти-

ми? Яхшиликларимга яраша мукофотини беряптими? Кани ўша мукофотлари?! Гуноҳларимни кўриб, жазосини нақд қилиб кўйди. Агар «ҳисобли дунё» дейдиган бўлсанг, худойинг билан ҳисоб-китобни қилиб олишим керак.

Бу гапларни эшитган Манзуранинг вужудини титроқ босди. Кўзларини катта-катта очганича тили гапга айланмай қолди.

Манзура ўғлининг жанозасидан кейин эри айтган шайтоний гапларни эшитмаган, эшитгандаи эди...

Ўшанда Мухиддин ота «Аллоҳга таваккул қилинг, Аллоҳдан нажот сўранг», деб далда бермоқчи бўлганида иситма оташидаги Асадбек «Ҳадеб Аллоҳ, Аллоҳ дейсиз... Аллоҳга сўзингиз ўтса, айтинг, ўғлимни қайтарсин!» деган эди. Бу гапдан ларзага тушган Мухиддин ота ҳам, Жалил ҳам «астағ-фируллоҳ!» деб, уни тавбага ундашганда у ўжарлик билан: «Ота, менинг Худо билан шартномам бор: энди мен унинг уйига қадам босмайман, у меникига кирмайди», деб дилларни вайрон қилганди. Гарчи иситмаси тушиб, Мухиддин ота билан Жалилнинг гапларидан кейин тилида тавба қилгани бўлса-да, иймон дарвозасидан узоқда қолаверган эди.

Иймон дарвозасидан узоқ шу одамнинг ҳозирги гапи аввалгидаи муртадона даражада бўлмаса ҳам, куфрнинг айни ўзи эди. Аввалгисида Жалил шапалоқ тортиб юборган, елкасидан силкиб: «Тавба қил, ахмоқ! Дарров тавба кил!» деб хайқирган эди. Манзуранинг бундай қилишга ҳоли ҳам қолмади, журъати ҳам йўқ эди. «Тавба! Тавба!..» деб пичирлаганича тураверди. Кўзларидан ёғилган ёш киприкларига илиниб парда ҳосил қилди, эри кўринмай қолди...

Кўзи илингандаги кулоғи остида майин, ширали овоз тиловат кила бошлади. Овоз эгасини таниди – Афруза! Куръон тиловати тугагач, маънодор оҳангда сўз бошлади:

– Опажон, куръон ўқилганда шунчаки роҳатланиш

билан кифояланмаслик керак. Оятларнинг маъносини тушуниш ва унга амал қилиш муҳимроқ. Ҳеч нарсага тушунмаган одам нимага амал қиласди? Мана хозир сел бўлиб эшитдингиз, маъносини эса билмайсиз. Қаранг, Аллоҳ таборак ва таоло «Шу оятларни кўргандан кейин ҳам дилларингизга таъсир қилмади», деяпти. Яна деяптики: «Дилларингиз мисли тошдек қаттиқ, балки ундан ҳам қаттикроқдир. Чунки баъзи тошлар орасидан чашмалар чиқиб, анҳорлар жорий бўлади. Тошлардан баъзилари ёрилиб, орасидан сувлар чиқади ва баъзи тошлар Парвардигоридан кўркқанидан пораланиб, майда-майда бўлиб кетади. Аммо сизларнинг дилларингиз ҳаргиз таъсирланмайди. Шуни билингларки, Аллоҳ таоло сизларнинг амалларингиздан ғофил эмасдир...»

Манзура кўзларини очди. Уйғонганидан кейин ҳам Афрузанинг сўзлари қулоги остида акс садо бериб турди:

...дилларингиз мисли тошдек қаттиқ, балки ундан ҳам қаттикроқдир...

...баъзи тошлар Парвардигоридан кўркқанидан пораланиб, майда-майда бўлиб кетади. Аммо сизларнинг дилларингиз ҳаргиз таъсирланмайди...

Манзура «тош қалбларга назар солинмайди», деган ҳақикатни эшитган эди. «Эримнинг қалби тошими?» деган фикрнинг ўзиёқ уни гўё ўтмас пичоқда қийма-қийма қилиб юборарди.

...дилларингиз мисли тошдек қаттиқ, балки ундан ҳам қаттикроқдир...

Агар бу эрига ҳам таалуқли бўлса, оқибатда уларни яна нималар кутади?

Манзура тунни шундай талваса билан ўтказди. Эрининг дилини юмшатиш чораларини излади. Асадбек Абдураҳмон табибдан жисмидаги дардга шифо топиб келганида руҳида ҳам ўзгариш сезилганди. Лекин ўғлининг вафотидан кейин яна аслига қайтди. «Балки руҳ шифосини ҳам Абдураҳмон табибдан топиш мум-

кинди? Жалил ака ҳам кўп нарсаларни биладиларку, лекин адамизга сўзлари ўтмайди. Табибга яна бир олиб боришлари керак...»

Манзура нажот йўлини топгандай суюниб, кўнгли бир оз хотиржам бўлди.

IX 606

1

Тиникиб ухлаш нималигини унуган Асадбек учун бу тун ҳам азобли бўлди.

Назарида ухламаган эди. Ташқаридаги тик этган товушни ҳам эшиштаётган эди. Бу овоз эса унинг хонадони сукунатини бузиб, титратиб юборди. Овоз эгасини таниди – узоқ йиллар муқаддам, Кесакполвон билан кирган эдилар унинг хонадонига. Қиласар ишларини килиб, кейин унуган эдилар. Йиллар ўтиб, Асадбек икки ўғлини Москвадаги ҳибсҳонадан чиқариш учун кетаётганида ўша воқеани бирдан эслаган, бу овоз Москвадаги меҳмонхонада ётганида яна бир таъкиб этганича кейин холи қўйган эди. Қора кечада бағрини ёриб, ўша овоз энди ҳовлисига кириб келди:

– Сизлар номардлик қилдинглар, мен сўраган пулларингни бериб келаётган эдим, – деди аламли овоз. – Мени ҳимоялаш ўрнига тириклайн гўрга тиқдиларинг!

Асадбек «сен Шониёз шолча билан тил бириктириб, тиллаларингни биздан яширган эдинг», деб эътиroz билдиримоқчи эди, овози чиқмади. Бу онда аёлнинг фарёди ҳаммаёқни ларзага солди:

– Қизимга тегманглар! Қизимга тегманглар!!

Ҳа, Кесакполвон «буқачаларни қўйиб юбораман», дегач, кўшни хонадан чиқсан эди бу чорасиз ҳайкирик. Энди эса Асадбекнинг қулоқлари остида жаранглади:

– Худодан қайтсин, илойим! Ҳали Худодан қайтади!!!

Асадбек нолани эшитмаслик учун кулокларини беркитмоқчи эди, құллари үзига бўйсунмади. Аламли овоз эгаларини кўра олганида эди, бир амаллаб ҳайдашга уринарди. Улар ўрнига тепасида Собитхон кўринди.

– Ҳа, Бек ака, қарғишдан қўрқяпсизми? – деди у чўғдай порлаётган кўзларини Асадбекка қадаб.

– Қарғишдан ким қўрқмайди? Бу хотин қарғаганида қизим ҳали туғилмаган ҳам эди.

– Қарғишининг қачон ва қайси пайтда ушлашини Худонинг ўзи билади.

– У қизга мен тегмаган эдим.

– Лекин уйга биргаликда бостириб кирган эдингиз? Зулмкорларга қаршилик ҳам қилмадингиз. Агар ризолигингиз бўлмаганида улар зулмга журъат эта олишмас эди.

– Буни қаердан биласиз?

– Менга аён...

– Энди нима бўлади?

– Билмайман. Бек ака... яхшилаб ўйлаб қаралса, бу дунё ҳаётидан тубанроқ нарса йўқ. Сизнинг дунёйингиз йиқилишга юз тутган деворга ўхшайди.

– Яна шу гапингизни айтдингиз-а...

– Ҳа. Гапим эсингизда экан-у, лекин магзини шу пайтгача чақмабсиз.

– Мен шу деворга суюньяпманми?

– Ҳа... Йўлингиз ҳам сирпанчик. Бу сирпанчиқда ҳеч кимнинг оёғи событ турмайди. Сирпара-сирпара сўнгти зиёратгоҳига қараб бораверади. Сўнгти зиёратгоҳ эса қабр. Ажални унутишда одамлар бир-бирларини ортда қолдириб кетадилар.

– Айтмасангиз ҳам биламан: мени ўлим кутяпти... касаллик ололмаган эди. Энди кимнинг тигидан ё ўқидан кетаман?

Собитхон унинг бу гапини эшитиб, «баттар бўл!»

дегандай кулимсираб қўйди-ю, саволига жавоб бермади.

— Сизга кўп нарса аён бўлар экан. Айтинг, айтинг! Мен билиб қўйяй. Шармандали ўлим билан кетмай бу дунёдан. Орқамдагилар масхаралаб қолишмасин...

Собитхон энди қаҳ-қаҳ отиб кулганича чекина бошлади. Асадбек қўлларидан ушлаб қолмоқлик мақсадида қувди, қува-кува етолмагач, ҳайқирди:

— Тўхтанг! Тўхтанг!..

— Адаси! Адаси...

Манзура тер босган эрини уйғотди:

— Вой, яна босинқирайпсиз-а, бир ўқитиб юборсак яхши бўларди.

Асадбек қаддини кўтариб ўтириди-да, кимнидир излагандай атрофига аланглади. Кейин кафти билан пешонасидағи терни артиб, беихтиёр уф тортди. Манзура унинг елқасини силай бошлади. Бу Асадбекка ёқмай, хотинининг қўлини олди:

— Ўқитамиз, тўғри айтдинг... ўқитамиз. Сен... ёта-вер...

Шундай деганича ўрнидан туриб, ташқарига чиқди. Очик кўкрагига урилган енгил шабада хуш ёкиб, чукур нафас олди. У авваллари ҳам туш таъбирига ишонмасди. Кейинги пайтда бунданда баттар туңлар кўравергани учун «Бу нимани англатади, энди нима бўларкин?» деган саволлар билан ўзини қийнамай қўйган эди. Туш таъсирида хира тортган кўнгли бир оздан кейин ўз-ўзидан равшанлашарди. Бу сафар ғашлик тез тарқамади. Хотиннинг фарёди қулоғи остида акс-садо бериб тураверди. Шу онда телефон жиринглаб, Асадбекни бу нохушликдан куткарди. Гўшакни кўтариб, болохона томон қаради. Бир неча нафасдан кейин болохонадаги йигит тушиб, Томскдан сўрашаётганини айтгач, гўшакни хавотир билан кўтариб, «Ҳа, эшитяпман», деди. Овозининг хириллаши ғашини келтириб, енгил йўталди.

— Салом, Бек, тундаги оромингни буздим, ранжи-майсан...

Балабуханинг овозини таниб, хавотири яна ошди. «Нима қилиб серрайиб турибсан!» дегандай йигитга норози қиёфада боқди. Йигит бу қарашнинг маъносини тушуниб, тезгина изига қайтди. Шошилинч топшириқ бўлиб қолиши эҳтимоли борлигини билгани сабабли, болохонага чиқмай, зина ёнида тұхтади.

— Салом, тинчликми? Нима бўлди? — деди Асадбек бу сафар дадилроқ овозда.

— Козловни ўлдириб кетишибди. Йигитларининг ҳам анчаси қирилган. Кимлигини тахмин қилаёт-гандирсан?

Асадбек бир оз ўйланди.

— Ўликларнинг қиролими? — деди ўз тахминига ишонқирамай.

— Моргашни яхши билармидинг?

— Унчалик эмас. Нега ғафлатда қолдиларинг?

— Мен Хонгирейнинг ўрнини Маматбей эгаллашини кутувдим. Ҳамма режаларим шунга мосланган эди. Ахир бу ҳайвонга нисбатан Хонгирейга Маматбей яқинроқ эди-ку? Ўғрилар оламида ҳам обрўи бор эди. Кавказликлар нега бу ўлимтикка йўл бериб қўйишиди, тушунолмадим. Сен унинг тахтга ўтирганини эшитганимидинг?

— Ҳа. Менга қўнғироқ қилувди.

— Осмондан келдими? Қўрқитдими?

— Йўқ... Довдир-совдир гапларни айтди.

— Бу ёмон... жуда ёмон бўлибди. Сергакроқ бўлиб юр.

— Ҳаммамизга уруш очганими бу?

— Йўқ... Мен билан тинч-тотув яшамоқчи. Сулҳ таклиф қилди. Лекин бу таклифи ўлим хабари билан тенг. Бек, Илико билан тез боғлан, сени ҳимоя қилсин.

— Маслаҳатинг учун раҳмат. Иликонинг ўзига яраша ташвишлари бор. Мен ўзимни ўзим ҳимоя қила

оламан. Сен унга ортиқча баҳо бериб юборяпсан. Уликхонадан чиққан одам охири ўликхонада ириб-чирийди.

– Яхши гап айтдинг. Лекин бу ҳозирча сенинг орзунг, халос. Хонгирей аblaҳ бўлгани билан ақли эди. Бу маҳлуқда зигирча ҳам ақл йўқ. Ақлли душманни енгиш осон, буни ўзинг биласан, Бек.

Шундай деб, Балабуха хайрлашди. Асадбек гўшакни жойига кўйиб ўйга толди. Кейин бир қарорга келиб, болохона томон юрди. Зина ёнида турган йигит хожасига пешвоз чиқиб, икки-уч қадам ташлади. Асадбек машинага яқинлашганида «үй кийимида бир ёққа бормоқчимилар?» деб ажабланиб қараб қолди. Асадбек эшикни ўзи очиб унга: «Ўтирмайсанми?! Нимага лалляясан?!» деб тўнғиллади. Йигит шошилганича ҳайдовчи ўрнига ўтирди. Бу орада болохонадаги иккинчи йигит чакқон тушиб, дарвозани очди.

– Қизимникига ҳайда, – деди Асадбек катта кўчага чиқишгач.

Зайнабнинг кўчасига бурилгач, дарвоза яқинидаги таниш машинани кўриб, кўнгли сал тинчиди. Шундай бўлса ҳам, «Чирокни ўчир, ўша машинага овоз чиқармай тақаб бор», деб буюрди. Машина тўхтагач, йигитга «сен ўтиравер», деган ишорани қилиб, аста тушди. Пойлокчи йигитларнинг иккови ҳам ухлаб ўтирган эди. Асадбек ҳайдовчи томондаги эшикни шашт билан очди. Эшикка суюниб ухлаётган йигит ўзини тута олмай оға бошлади. Кўзларини очишга ҳам улгурмай, зарб билан ёпилаётган эшик бошига урилиб ҳушини йўқотди. Ўн томондаги йигит уйғониб, қарши ҳужумга шайланди-ю, уй кийимидағи хожасини кўриб, кўзларини катта-катта очганича тўхтаб қолди. Асадбек эса унга яқинлашиб, қорнига тепди. Кейин Элчиннинг дарвозаси томон юрди. Тутқични ушлаб тортди, берклигига ишонч ҳосил қилгач, изига қайтди.

– Бу ёкка туш, Жамшид аканг келгунича қимирламай турасан.

Йигит түшгач, ўзи ҳайдовчи ўрнига ўтирди.

Дарвозани очиб, Асадбекни кузатиб қолган йигит ўша заҳоти кўнгироқ қилиб, хожасининг бирданига нимадандир ташвишланиб, сирли равишда шошиб қолганини Жамшидга етказиб ултурган эди.

Эрининг шошилиб чиқиб кетганидан ташвишга тушган Манзура айвонда унинг қайтишига кўз тикиб турган эди. Асадбекнинг машина ҳайдаб кирганини кўргач, хавотири баттар ошиб унга пешвоз чикди:

– Тинчликми, адаси?

– Тинчлик... кечкуунги шаҳарнинг чиройини кўргим келиб қолди. Сени олволсам бўлар экан... Кучада биронта ҳам одамбашара хотин кўринмади...

Асадбек хотинини ташвишдан кутқариш учун пи-чинг аралаш ҳазил қилган эди. Бироқ, ўзининг хавотирини овози ошкор қилиб қўйди. Манзура буни сезса ҳам, дардини ичига ютиб, эрининг ҳазилига ишонгандай бўлди.

– Илоҳим тинчлик бўлсин, бизга қасд қилганлар паст бўлсин, – деб пичирлаганича, уйга кирди.

Дам ўтмай Жамшид етиб келди. «Тинчликми, Бек ака?» дейишига ҳам ултурмай, хожасининг ғазаб ўқларига дуч бўлди:

– Зайнабнинг кўчасига қанақа хунасаларни қўйгансан?!

Хожасидан «нима бўлди?» деб сўраш ортиқчалигини билган Жамшид бош этганича жим тураверди. Асадбек сўка-сўка хуморидан чиқиб, ғазаби бир оз бо-силгач, амр оҳангига ўтди:

– Йўқот, икковиниям! Думларини туғиб юбор! Тузукроқ йигитларинг борми, ё ҳаммаси шунақа меровми?!

Асадбек гапни кўпайтирмай, бурилди-да, уй томон юрди. Ҳеч нарсага тушунмаган Жамшид Зайнабнинг кўчасига боргач, воқеадан огоҳ бўлди-да, хожасидан

эшиттан сўкишлари ҳақига пойлоқчи йигитларни бирикки тепиб, «думларини туғиб» юбора қолди.

Жамшиднинг ҳовлида эканини билса ҳам, Асадбек уни нонуштага таклиф қилмади. Нонуштадан кейин кийиниб, ҳовлига чиққанида «Буйругимни ба-жардингми?» деб ҳам сўрамади. Хожасининг уюлган қовокларига қараб олган Жамшид мутелик билан:

– Ҳаммаси жойида, Элчин акамдан хабар олдим, яхшилар, – деди.

Зайнабнинг номини тилга олишдан чўчиди. Айтмаса ҳам Асадбек тушунди. Аммо аъёнининг хизматига баҳо бермади, индамай юриб бориб, машинага ўтирди. Шаҳар марказига боргунларига қадар ҳам гапирмади. Балабуханинг кўнғироқ қилганини, хавотири сабабини айтиб ўтирмади. Фақат манзилга етиб боргандарида:

– Ҳозир лаллайиб, ғафлатда яшайдиган замон эмас. Лаллайган одамни ажалнинг ўқи кутиб турибди, шунга қараб фикр кил, – деб қўйди.

Қароргоҳи жойлашган уч қаватли бино яқинидаги турган Ҳалимжонга кўзи тушиб, «сен чақиртирдингми?» деган маънода Жамшидга қаради. Жамшид «хабарим йўқ», деган маънода елка қисди. Ҳалимжон улар томон икки қадам ташлади-ю, Асадбекнинг зинага қараб бурилганини кўриб, тўхтади.

Ичкари кирган Асадбек пешвоз чиқиб кутиб олишга кечиккани учун довдираб қолган Қорақошининг саломига алик олмай, сўради:

– Ташқарида турган одамни танийсанми?
– Сал-пал...
– Қанчадан бери кутяпти?
– Анчадан бери?
– «Анча» деганинг қанча? Ўн йилми ё юз йилдан берими?

– Бек ака... соат саккизда караганимда турувди, демак... олдинроқ келган.

– Шунақами? Ақлингга қойилман! – Асадбек шун-

дай дегач, ўгирилиб, пичинг ўқини энди Жамшид-га қаратди: – Эла-эла қилиб роса ақллиларни тўп-лагансан-а? Чакир уни.

Жамшид норози қиёфада имлаши билан Қорақош тезгина чиқиб, Ҳалимжонни бошлаб кирди.

Асадбек Ҳалимжоннинг саломига ҳам алик олмади.

– Нега турувдинг, менда гапинг борми?

– «Дам олгин», девдингиз, дам олиб бўлдим. Хизматга келувдим.

– Хизматгами? – Асадбек унга ўткир нигоҳини қадади. Бундай қарашга кўпчилик чидай олмас эди. Ҳатто айбсиз одам ҳам кўзларини олиб қочарди. Ҳалимжон эса «тўйиб-тўйиб тикилиб олинг», дегандай парвосиз тураверди.

«Бу безбет ким ўзи? – деб ўйлади Асадбек. – Милисанинг одами эканига далилим оз, менга содиклигига эса шубҳам кўпроқ. Фош бўлганини ўзи сезмайдими? Шунчалар бефаҳмми?»

Асадбек стол тортмасини очиб, қўлига карта олди. Ҳалимжонга тикилганича, киприк қоқмаган ҳолда чийлади. Ўтиришга таклиф этмай, «берирок кел», деб чакирди. Ҳалимжон столга якинлашгач:

– Сенам эркаксан, ҳеч бўлмаса «йигирма бир»ни биларсан? – деб сўради.

– Биламан, – деди Ҳалимжон, ишонч билан.

– Билсанг яхши... уч қўл мен ўйнайман, уч қўл сен ташлайсан.

Асадбек шундай деб у томон битта картани очиб ташлади. Кейин ўзиникини ҳам очди. Сўнг Ҳалимжонга яна бир картани очди. Ўйин шу тарзда очиқ бўлди. Ҳалимжонга икки ўнлик, Асадбекка эса уч еттилик чиқди.

– Буни қиморбозлар «очко» дейишади, Худодан ҳамиша шу «очко»ни тилашади, – Асадбек шундай деб картани қайта чийлаб, яна очиқласига ташлади. Бу сафар ҳам Ҳалимжонга икки ўнлик чиқди. Асадбекка

эса икки олти-ю бир түккиз чиқди. Ҳалимжон индамай кузатиб тураверди. Асадбек картага қарамас, кўзлари йигитда, бармоқлари эса ўзи билган ҳаракатлар билан банд эди. Эндинисида Ҳалимжонга яна икки ўнлик, Асадбекка эса икки еттилик билан бир олтилик чиқди.

– Бунисини «банкирнинг очкоси» дейишади. Кўрдингми, укахон, мен «туз»сиз ўйнадим. Майда карталар билан ютдим. Энг мухими – очиқчасига ўйнадим. Энди сен тарқат. Беркитиб ўйнайвер.

Ҳалимжон картани олиб, ишончсизлик билан чийлаб тарқатди. У Асадбекнинг мақсадини билолмай гаранг эди. Уч марта тарқатиб, уччаласида ҳам ютқизди. Асадбек картани олиб, хона бурчагидаги елим тўрчелакка ташлади.

– Унақасига ҳам, бунақасига ҳам ютқиздинг. Кўнга нима тикилган эди, билармидинг? Жонинг тикилган эди. Мен сенга «жонингни тик», демаганман. Маҳмуд аканг биринчи марта шу хонага бошлаб кирганида ўзинг тиккан эдинг, эсингдами? Энди нима бўлади?

– Нима бўларди? Жоним сизнинг кўлингизда, – деди Ҳалимжон хотиржам равища.

– Жонинг менинг қўлимда эмас... Бу бармоқлар карта чийлашга уста эди... кекирдақни узиб оладиган бармоқлар бошқа. Ҳайдар аканг сени аллақачоноқ фош қилиб, жонингни бу акахонингга топшириб кўйган. Мен милиса билан нари-бери бўлишни истамайман, шунинг учун «дамингни олавер», деган эдим, яна нега оёғим остида ўралашиб қолдинг?

– Ҳайдар акам адашганлар, хоин эмасман.

– Хоинмисан ё йўқми, билмайман-у, лекин жуда безбет экансан. Мен ҳақимда хўжайнларингга етарли маълумот бермаганинг учун яна келдингми? Оддин нима топдинг-у, энди қайси тирноқнинг ичидан яна қанақа кир изламоқчисан? Кўй, ука, жонингни ўзингга совға қилганинг «раҳмат» демасанг ҳам, яшаб юравер. Фош бўлганинг учун хўжайнларинг бошингни силашмайди, биламан, сенга ҳам қийин. Орден олол-

майсан, погонингдаги юлдузлар ҳам кўпаймайди, лекин бу фожиа эмас, буларсиз ҳам яшаш мумкин. Қани, яшаб кўр-чи, бу ёғи бир гап бўлар...

«Изо заҳара ал-ҳаққу лам ябқа мааҳу ғайруҳу» – ҳақиқат равшан бўлган вақтда бошқа нарсаларга ўрин қолмайди, дейилганидек, энди ортиқча гапга ҳожат йўқ эди. Асадбек шундай деб «чиқариб ташла бу ахлатни», дегандай Жамшидга имлади. Ҳалимжон эътиroz билдиримоқчи эди, Жамшид уни елкасидан ушлаб, ташқарига бошлади.

Жамшид «сургун»дан қайтгач, Асадбекнинг ами билан улардан «нарироқ юрган» кезлари Кесакполвон уйига келган, «сени ўлимдан мен асраб қолдим» деган маънода бир-икки гап қилиб, Ҳалимжонни кузатиб юришни топширган эди. Ҳалимжонни кузатиб чиқаётган Жамшид кичик хожасининг «Илон бўлиб кўйнига кириб ол, «чак!» дейишим билан чақиб ўлдирасан», деган буйругини эслади. Ушанда Кесакполвон бир ўқ билан икки қуённи уришни мўлжаллаган эди. Бири шуки, Жамшид топшириқни бажаргудай бўлса, Ҳалимжон йўқотилади. Лалайса, эплай олмаса, ўзи гумдон бўлади. Ҳар икки ҳолатда ҳам ютуқ Кесакполвонда кетиши керак эди. Бирок, нияти амалга ошмай, ютуқ бу икки йигитда қолди: Жамшидга «чак» дейишга улгурмай кетди. Жамшид бу одамнинг қўйнига илон бўлиб киришга астойдил уринмади, унинг ўзи ўзини фош қилиб қўиди. Хоиннинг жазоси аниқ бўлгани ҳолда унга марҳамат эшиклиарининг очилиши Жамшид учун сир эди. Хожасининг нима сабабдан арқонни узун ташлаганига ақли етмагани учун ҳам Ҳалимжонга қўполлик қилмай, яхшилик билан кузатиб қўиди.

2

Тарзан Жамшиднинг топшириғини оддий вазифа сифатида қабул қилди. Ахтам эса ғашланди-ю, сир

бой бермади. «Болаларни топларинг-у, қиморбозларга тегмаларинг», дейилиши унга ёқмади. Гуноҳкорларни жазолашни хуш кўрадиган йигит вазифанинг бу тарзда қўйилишини нотуғри деб билди. Қиморга уй, машина, хотин ёки сингилнинг тикилиши унга янгилик эмас. Болаларнинг тикилишини ҳам эшитган, лекин бунаقا ходисага юзма-юз дуч келмаган эди. «Фалончи пистончини бола-чақаси билан ютиб олибди» деган гапни эшитганда ғазабдан бир ютиниб олган. Болаларини тиккан одамни ҳам, ютганни ҳам аёвсиз калтаклаги-си келган. Лекин қачондир шундайларни жазолаши мумкин ҳолатида ҳатто черта олмаслиги хаёлига ҳам келмаган эди. Жазолашдан лаззат олуви одамнинг барча имкониятлари бўла туриб, тийилишга мажбури-лиги ўзини ўзи оғир жазога мубтало қилмоқлиkdir. Жамшиднинг қатъий топшириғидан сўнг Ахтам ўзини шу жазога учраганини ҳис қилди. Лекин ҳукм ҳамиша ижро этилавермагани каби, топширикни ба-жармаслиги мумкинлигини ҳам биларди. Бек акаси, таги қиморбоз бўлгани учун, қиморбозларни аяган. Лекин болалик бахтидан бебаҳра улгайган йигит болалик бахтини топтаганларни аяши мумкин эмас эди. Жамшид буни сездими, барча ҳаракатларга Тарзан-нинг бош эканини таъкидлади. Бу таъкид ҳам Ахтамга ёқмади, қошларини чимириб:

— Хотиржам бўлинг, акахон, мен Тарзанга кул бўлиб яшаш учун дунёга келганман. Унинг чизган чизигидан чиқсан куним — ўлган куним, — деди пи-чинг билан.

Жамшид унинг пичингини тушунса-да, жиддийлик билан танбех берди:

— Озгина адашдинг. Чизикни Тарзан эмас, Бек акам чизадилар. Бек акамнинг чизигидан ким чиқса, асфа-ласофилинга жўнайверади.

— Буни биламиз, — деди Ахтам. — Шахсан мен «асфаласофилин» деган курортга яқин орада жўна-майман.

Жамшид кетгач, йўл ҳозирлигини кўраётганларида
Ахтам Тарзани огоҳлантириди:

— Марик, сен мендан ақллироқсан, лекин қиморбозларни топганимизда, менга кўпам ақл ўргатма. Бир ҳайвонсифат одам тошга қоқилиб ўлиб қолса, айб биздамас-ку, тўғрими?

Ахтам Марленга «Тарзан» деб лақаб кўйган бўлса ҳам, баъзи-баъзида ўзининг ундан устунроқ эканини таъкидлаш учун ўсмирлик кезлари гаровга олинган кунни эслатиш мақсадида «Марик» деб мурожат қиларди. Тарзан бунга кўникиб қолган эди. Ҳозир ҳам Жамшиднинг «Тарзан бу ишда бошлиқ» деган топшириғи Ахтам томонидан бекор қилинганини англади. «Бек акамнинг топшириғи билан ҳазиллашма», демоқчи бўлди-ю, «аввал уларни топайлик-чи, вазиятга қараб иш тутарман», деган фикрда, «маъқул» ишорасини қилиб, шеригини тинчлантириди.

Улар кишлоққа етиб боришганда Фазлия кечаги бозорда сотган молларнинг пулини тарқата бошлаган эди. «Жаноза куни қарздан воз кечганмиз», деганларга ҳам пулни қайтариб, кўнгли анча равшанлашди.

Эри ўлимидан олдин «Шунқорбойваччадан йигрма беш сўм олдим, тўлаб кўй», деган эди. Фазлия биринчи бўлиб шу одамга учраб, пулни узатди. Орадан йиллар ўтган бўлса-да, Шунқорбойвачча қарзни унумаган экан. «Аслида шу йигрма беш сўмга муҳтоҷ эмасман-у, лекин Қиёматгача қарздан қийналиб, гўрида азобланмаслиги учун оляпман», деди. «Охират учун шу қарздан кечдим», демади.

Фазлия қайноғасидан қарз олинганини биларди, лекин эрининг «қарздан қутулганман», дегани ҳам ёдида эди. Орада қарз борми ё йўқми, бор бўлса, жанозада қайноғаси кечганми ё йўқми – буни аниқ билмасди. Шунга қарамай, пулни олиб қайноғасни икига борди. Қайноғаси кеча бозордан қайтган буқасини ҳовли ўртасидаги ўрик дарахтига боғлаб кўйиб қассобга мақтаётган экан. Уни кўриб, саломига бош иргаб алик

олган бўлди-ю, савдосини давом эттирди. Фазлия «бирор кимса кутиб олармикин» деган умидда атрофга боқди, кейин «овсиним уйда йўқ шекилли», деб ўйлаб, айвон зинасига бориб ўтириб, қайноғасининг бўшашини кутди. Бири молни мақтаб, иккинчиси ерга уравериб, охири савдо жанжалга айланди. Бир қишлоқда туғилиб, бирга яшовчи икки одам озгина фойда илинжида бир-бирини ҳакоратлашдан қайтмади. Бир-биrlарини ҳакоратлаш билан тийила қолишса кошки эди, ўлиб кетган оналари-ю, катта эналари ҳам тилга олингач, мушт ишга тушай деганда, Фазлия ўрнидан туриб, уларни ажратди.

Қассоб чиқиб кетганидан кейин ҳам қайноғаси сўкишдан тўхтамади. Ўзинингadolатли, яхши инсон эканини шу сўкишлар орқали исбот этгандай бўлиб тинчиди-да, чуқур хўрсиниб:

– Бола-чақа боқиш шунака қийин бўлиб қолган, – деди. – Талашсам, болаларимнинг ризқи учун талашман, бу текинтомоқ мендан юлиб олмоқчи бўлади.

«Бола-чақа боқиш шунака қийин»...

Қайноғаси бу гапи билан «қарзларингни қачон тўлайсанлар?» демоқчи бўлдими ё қариндошлар етимларни олиб кетишаётганида ўзини четга тортганини шу қийинчилик билан оқламоқчи эдими, Фазлия англамади. Бу гапни мулоҳаза килишни ҳам истамай, муддаога кўчди:

– Дадамиз сиздан қарз олганмидилар?
– Минг марта олган, нима билмасмидингиз?
– Мингтасидан хабарим йўқ, биттасини билардим, олиб келдим.

Қайноғаси «Қаердан олдингиз? Қамоқда пул берарканми?» дегандай ажабланиб қараб қолди.

«Шунча фожиадан кейин ҳам қарзни эсладингизми, келин? У қарзлар унутилиб кетган, энди болаларингизни, ўзингизни ўйланг!»

Фазлия қайноғасидан бундай олижаноблик кутмаган эди, бундай ҳиммат юз очмагани учун ажаблан-

мади ҳам. Молини сотолмагани учун аламдан титраб турган қайноға күзлари энди шодликдан чақнади:

– Ҳа, Худога шукур, пулдан қийналиб турувдик, ўзи етказди, – деб кўл чўзди.

Фазлия пул ўрамини берди:

– Санаб кўринг, тўғримикин?

Қайноғаси бармоғини тез-тез лабига теккизиб, ҳўллаб, пулларни эринмай санади.

– Охиргиси шунча эди, олдингилари эсимда йўқ, – деди, кўнгилхушлик билан.

– Эсингизга тушса, айтарсиз, қочиб кетганим йўқ...

Фазлия шундай деб изига қайтди. Уйига яқинлашганди омонат эшик олдида нотаниш икки йигит турганини кўриб, юрагига хавотир оралади. Қадамини секинлатди.

«Болаларимни ўғирлаганлар шулар!»

Хаёлига урилган дастлабки фикр шу бўлди.

«Одамларни ёрдамга чақирайми ё тўппа-тўғри бориб башарасини юлайми?»

Бир қарорга келолмай атрофга нажот излаб бокди. Нажот кўринмади. Йигитлардан бирининг у томон жилмайиб қараб турганини кўриб «улар эмасдир», деб ўйлади. Шунга қарамай, ҳам кўркув, ҳам нафрат исканжасида битта-битта қадам босиб уларга яқинлашди. Жилмайиб турган йигит – Тарзан унинг ҳолатини сезди:

– Кўрқмай келаверинг опажон, сизни кутиб турибмиз, – деди мулоимлик билан.

– Кимсиз, нега мени кутасиз? – деди Фазлия. Унинг сал титраган овози хавотирини ошкор қилди.

– «Кутулганлар жамияти»данмиз, – деди иккинчи йигит – Ахтам, унга тикилиб.

Жамиятнинг номи Фазлияни ажаблантирди:

– Қанақа жамият? Нимадан кутулади?

– Нимадан кутуларди, қамоқдан кутулади-да!
Эшитмаганмисиз?

Фазлия жавоб қайтаришга улгурмай, жилмайиб турган йигит мулойимлик билан тушунтириди:

— Яқинда шунақа жамият тузилган. Баъзилар қамоқдан чиқиб, кўчада сарсон-саргардон бўлиб юради, баъзилар тирикчиликка қийналади. Бу жамият шунақаларга ёрдам беради.

Фазлия бу гапга бир ишониб, бир ишонмай, йигитларга қараб олиб:

— Менга ёрдам керакмас, — деди.

— Эшийтдик, ҳатто эрингизнинг қарзларини тўлаётган эмишсиз, — деди Ахтам киноя оҳангидা.

— Кимдан эшийтдингиз?

— Қишлоқда девор йўқ-ку, кичкина янгилик ҳам у тешик кулоқдан бу тешик кулоққа бир зумда етиб боради. Узоқдан келғанмиз, бир пиёладан совуқ чой берсангиз, савобга қолардингиз, — деди Тарзан.

Фазлияниң хаёлига «эркаги йўқ уйга сизларни таклиф қила олмайман», деган гап келмади. Чунки қишлоқда бунақа одат йўқ, уйда эр борми ё йўкми, бошқа одам кириб келаверарди. Шу боис Фазлия чакирилмаган меҳмонларни итоат билан ичкарига бошлади. Мулойим йигитдан ҳадиксирамади-ю, аммо кўзларини чақчайтирганидан сал қўрқди. Меҳмонлар айвонда қолишмай, ичкари уйга кириб келаверишди. Кўзи чақчайгани қўлларини белига қўйганича уйга разм солиб олгач, кутилмагандан:

— Эрингизни ўлдириб тўғри килган экансиз, — деди.

Фазлияниң кўнглини кўтаришни истаганларнинг кўпи шундай дерди. Бирок, бегона йигитнинг тўсатдан бундай ҳукм чиқариши уни довдиратиб қўйди.

— Унақа деманг... Бунақа дейишга ҳаққингиз йўқ! Нима тўғрилигини Худонинг ўзи билади! — деди титроқ овозда.

— Худодан хабарим йўқ, лекин мен аниқ биламан: эрингиз майда, ҳатто пачоқ қиморбоз бўлган

экан. Унинг майдалигини уйингиз айтиб турибди. Зўр қиморбозлардан бўлиб, боласини тикса кечириш мумкин эди. Сариқ чақани деб боласини тикадиганларни шартта ўлдирвориш керак.

Бу гапдан титроққа тушиб, ҳатто муштини туккан Фазлия мулойим йигитга қараб, баланд овозда:

– Ким бу?! Нега бунақа безбетлик қиласди? – деди.

– Бу оғайнимиз сал бефаросатроқ, опажон, парво қилманг.

– Тўхта, Марик, сен гапни айлантираверма. Опажонинг билан мен гаплашиб олай: «Кутулганлар жамияти»га ишондингизми? Аҳмоқ экансиз! Ким тузади бунақа жамиятни! Қамоқдан чиққан одам ўладими ё қоладими, кимнинг иши бор? Мана, сиз олижаноблик қилиб эрингизнинг қарзларини тўлаб юрган экансиз. Эрингиз биздан ҳам қарздор эди. Бизникини ҳам тўлаб қўйинг. Аввал сизни тиккан эди. Марик, эсингдами? «Бу ландавурнинг хотинини бошимга ураманми, хотини ҳам ўзига ўхшаган қуртлаган туршакдир», дегандим. Янглишмаган эканманми?

Ҳар қандай аёл, шодлик чоғидами ё дунё кўзига қоронғу кўринадиган қайғули дақиқаларидами, чиройи ва шаънига доф туширувчи сўзни эшитса, ҳамма нарсани унугади. Фазлия алҳол «ириган қоки»га ўхшатилгач, аввалги ғазабини унуди:

– Турқинг қурсин сенинг, ўзинг қанақа туршаксан?!

– Мен ўтган замондаги гапни эсладим. Сизни ютиб олганимда бошимга урармидим, мана вакти келди, пулни оламан.

– Балони оласан! Танимайман сени!

– «Эримнинг қарзларини тўлайман», деган хотин охиригача мард бўлиши керак.

Фазлия хонтахта устида турган чойнакни олиб отмоқчи эди, мулойим йигит чақонлик қилиб, кўлини ушлаб қолди-да, кейин шеригига «чиқиб тур», деган ишора қилди.

Фазлия дарров ўзига кела олмади. Мулойим йигит чойнакдан чой қуиб, узатди. Фазлия титроқ қули билан пиёлани ушлаганича жим тураверди.

– Оғайним, сал оширворди, сизни синамокчи бўлди. Аслида эрингизнинг қарзи йўқ. Уни кўрмаганмиз. Болаларингизни қидиришини сўраган экансиз, шунга келдик.

Бу гапни эшитиб, Фазлия кувониш ўрнига негадир чўчи迪, кўлидаги пиёлани тушириб юборди.

– Олдинги гапларимизда ёлғон бор эди, ҳозиргиси рост. Саволларимни эшитиб, шошилмай жавоб бе-ринг, баъзи нарсаларни аниқ эслашга ҳаракат қилинг. Эрингиз қимор ўйнагани кетганда узоги билан неча кунга кетарди? Қайси жойларга борганини айтармиди? Биронта қиморбознинг номини тилга олармиди? Айниқса, охирги ўйиндан кейин бирорни тилга олганмиди?

Расмий тергов тарзида бошланган савол-жавоб узоқ давом этмади. Аввалига ишонкирамай жавоб бера бошлаган Фазлияди, шу қисқа муддат давомида болаларининг топилишига умид уйғонди.

Умиднинг уйғониши қийин эмас, унинг хайрли оқибатига етмоқ мушкул. Фазлия буни билади. Умиди куладиган кунга қадар сабр қилиши зарурлигини ҳам англайди. Уша фожия кунидан бери сабр ўтида куйяпти. Фарзандларининг дийдорига тўйиш учун, уларнинг кулгиларини эшитиш учун яна шунча, эҳтимол унданда кўпроқ куйишга тайёр. Аммо кўп қатори у бир ҳикматдан бекабар: «Ал-иймону нисфони-нисфуҳу сабрун ва нисфуҳу шукрун» – «иймон икки бўлимдан иборат: ярми сабрdir, ярми шукр» шарафли ҳадиси унинг кулоғига етмаган. Алҳол бирон илм эгаси келиб айтган тақдирда ҳам англаши қийин бўларди. Сабр лозимлигидан хабари бор, бунга амал қиласи, чунки бундан ўзга чораси йўқ. Лекин нима учун шукр қилиши керак? Иймони заифларга бу муаммони англатиш осон эмас.

Остонада қолган Фазлия, уйдан узоқлашаётган икки йигит зоҳирان икки олам бўлиб кўрингани билан иймон заифлиги томонидан уларда яқинлик мавжуд эди. Факат бу аёл сабрни бўйнига олган, икки йигит, айниқса Ахтам эса бундан бебахра. Шукр бўйича эса ҳар иккала томон бир йўлда эди. Тарзанга, айниқса Ахтамга бирор «шукур қил» демаган, дегандами... бу дунёнинг имтиҳон дунёси эканидан бехабар йигитлардан қандай жавоб эшитиши маълум...

Тарзан Жамшиддан вазифани олган пайтдаёқ, Ахтамнинг таъбири билан айтганда, «бош оғриқ» ишга рўпара қилинганини фаҳмлаган эди. Фазлияning мавхум жавобларидан кейин топшириқнинг нақадар мушкуллигини тўлароқ англади. Жамшид дастлабки учрашувда хожасининг улар билан қизиқаётганини билдира туриб, «Бек акам «нимага?» деган саволни ёқтирамайдилар, «хўп бўлади»ни яхши кўрадилар», деб огоҳлантирмаганида «бу болаларни топиш нима учун шарт экан?» деб сўраган бўларди. Сабаб айтилмадими, демак, сўрашнинг ҳам ҳожати йўқ.

Сабабни аниқ билишнинг Ахтам учун ҳам ҳожати йўқ. Унга гуноҳкорни, балки гуноҳкорларни топиб боплаб жазосини бериш муҳимроқ. У шундан лаззат олар экан, Жамшиднинг тақиқи ҳам муҳим эмас. Эгасиз ҳовлининг аянчли аҳволини кузатиб, ғаши келаётган Ахтам гуноҳкор топилгач, шу ерга олиб келиб жазолашни кўнглига тушиб кўйди.

«Шу айвоннинг остонасига кўмиб қўяман, – деб ўйлади у. – Бу хотин ҳам, болалари ҳам унинг ўлиги устидан неча минг марта ўтади. Бир кунмас бир кун келиб, «сенларни балогардон қилган аглаҳ оёқларинг остида ётибди», десам қанақа аҳволга тушишаркин?»

Бу фикр оз фурсатда умрини яшаб тутатди: «Йўқ, – деб ўзини ўзи инкор этди, – яширин ўлдириб, билдирмай кўмиб қўйишнинг нима фойдаси бор? Бунақа аглаҳлик жазосиз қолмаслигини ҳамма билиб қўйиши

шарт! Милиса оғайниларимиз ҳам идораларида пашша қўриб ўтирмай, бир ахлат титкилашсин...»

Аллоҳ таоло Ўзининг элчисига «Ё Довуду, инно жаъалнока халифатан фил-арзи, фахкум байнан-носи бил-ҳаққи», – «Эй Довуд, Биз сени Ер юзига халифа қилдик, энди сен одамлар орасида ҳақ билан ҳукм юрит», деб марҳамат қилган, аммо Ахтамга ҳеч ким бирор устидан ҳукм юритиш ҳуқуқини бермаганди. Худди Асадбек каби Ахтам ҳам бу ҳуқуқни ўзига ўзи берган ва буни дунёдаги энг адолатли ҳолат деб ҳисоблар эди. Ҳақ билан ҳукм юритишни билмайдиган, ҳатто тасаввур қилолмайдиган одамдан нималарни кутиш мумкин?

Тарзан ҳовлига чикиб, кўча томон юрди. Ахтам уй остонасида тўхтаган Фазлияга қараб олиб, шеригига сўзсиз эргашди. Машинани бир кўча наридаги қайрағоч соясига кўйган эдилар. Фазлияни кутиб, сұхбатлашиб қайтгунларича қуёш тик келиб, офтобда қолган машина қизиб кетган эди.

– Бу хотин билан гаплашишнинг фойдаси йўқ, демаганмидим? – деди Тарзан эшик ойнагини тушираётib. – Куруқ кириб, куруқ чикдингми?

– Унчалик эмас, – деди Ахтам.

– Нималарни билдинг?

– Сенинг гапинг тўғрилигини тушундим: бу хотиннинг эри ростданам пачоқ қиморбоз бўлган. Бу атрофда тикилган болаларни ютиб оладиган тузукроқ қиморбоз бўлмаса керак. Бунака қилиқ, катта шаҳарларда, катта ўйинларда бўлади. У «пачоқ» қайси шаҳарга борган бўлиши мумкин?

– Бунакалар шаҳарга боришини орзу қилиши мумкин-у... йўқ, юраги дов бермайди. Балки... шаҳарда тепки еганлардан биронтаси бу томонларга келиб, лақмаларни шилиб кетган бўлса-чи?

– «Балки» билан ош пишириб бўлмайди. Биз тезроқ топиб, ишни тезроқ юмалоқ-ёстиқ қилишимиз керак.

— Ана, энди ўзингта келдинг, эркак! — Ахтам шундай деб Тарзани туртиб қўйди. — Бек акамизнинг топшириқларини қоқ иккига бўламиш: сен топасан, мен юмалоқ-ёстиқ қиласман!

Ўзининг гапи ўзига хуш ёқиб, Ахтам роҳатланиб кулди. Тарзан эса ўзини масхараланган ҳис этиб, пешонасини тириштириди-ю, лекин қарши гап айтмади.

— Сариккум деган шаҳарчани эшитганмисан? — деди йўлдан кўз узмай.

— Эрталаб ўтиб келдик шекилли?

— Ҳа. Охирги ўйин ўша жойда бўлган экан. Шоди шилта деганини топсак, болаларнинг изига тушармиз.

Шаҳарчага кираверишдаги биринчи самоворхонадаёқ Шоди шилтанинг уйи қаерда эканини айтиб беришди. Самоворчи «Шоди аканинг уйи қаерда?» деган саволни эшитиб, йигитларга бошдан-оёқ синовчан назар солди-да:

— Бу атрофда Шодивойлардан учтаси бор, қай бири керак? — деб сўради.

— «Шоди шилта»си, — деди Ахтам қўпол оҳангда.

Самоворчи «ўзинг ҳам шилталарданмисан?» дегандай унга қайта разм солди-да:

— У сизга нима учун керак бўлиб қолди? — деб сўради.

— Биз ҳукумат идорасиданмиз. Шоди ака тўрт йил олдин уч етимни боқиб олган эканлар. Шу болаларнинг аҳволидан хабар олгани келдик, — деди Ахтам.

— Шилта етим боқиб олган эканми?

Самоворчи шундай деб «кимни лақиллатяпсан?» дегандай бош чайқади. «Агар ҳукумат одами бўлсаларинг ижроқўмга бормай, самоворхонадан суриштирасанларми?» деб маломат қилиб ўтирмай, учинчи кўчадан чапга бурилиш кераклигини айтиш билан чекланди.

Пастки қисми чириб, қийшайиб қолган дарвозага қараб Ахтам:

– Бунинг ҳам пачоклардан экан-ку? – деб түнгиллаб қўйди-да дарвозани тақиллатди.

Иигирма ёшлардаги нимжон йигит чиқиб, нотаниш одамларга қараганича жим қолди. Бу хонадонга нотаниш кишилар кўп келиб, айримлари зулм ўтказиб, кўркитиб қўйганлигини Тарзан йигитнинг жавдираган кўзларига қараб сезди.

– Соқовмисан? – деди Ахтам унга яқинлашиб.

– Йў-ўқ, – деди йигит довдираб.

– Аданг саломлашишни ўргатмаганми? – деди тик караб.

Йигит бундан саросимага тушиб, тисарилди:

– Сизга ким керак?

– Шоди ака уйдамилар? – деди Тарзан. У мулоимлиги билан йигитни саросимадан қутқармоқчи эди, Ахтам бунга йўл қўймади:

– Оғайнилари «Шоди шилта», дейишади, тўғрими?

Йигит Ахтамга қўрқув билан қараб олиб, кейин Тарзандан нажот куттандай унга тикилди. Жавобга тили айланмади.

– Шоди акадан сўрайдиган гапимиз бор, уйда бўлсалар чакириб чиқ.

– Йўқлар, – деди йигит титрок овозда.

– Қаердалар? – деб сўради Тарзан.

– Ўйинга кетганми? Қачон келади? – деб қўшимча қилди Ахтам.

– Йўқлар... – деди йигит яна.

– Буни тушундик, сен бизга қаердаликларини айт, – деди Тарзан.

– Адам... ўлганлар...

Ахтам билан Тарзан бир-бирига қараб олишди. Бирининг қарашида «Бунисига нима дейсан?» деган пичингли савол, иккинчисиникида «Сен энди бир пас жим тур», деган маъно бор эди.

– Адангни Худо раҳмат қилсин, биз эшитмаган эканмиз, қачон ўтдилар? – деб сўради Тарзан.

– Икки йил бўлиб қолди.

— Аданг ўзи ўлдими ё ўлдириб кетишдими? — деди Ахтам.

Йигит бу саволдан кейин ўзини ичкари олди. Қийшиқ дарвозани ёпиб, ўзини ҳимоя қила олмади, Ахтам унинг изндан ҳовлига қадам қўйиб, билагидан тутди:

— Сен бола, биздан қўрқма, жонингни суғуриб олмаймиз. Аданг каттага тушган, бу харобангни сотиб ҳам кутула олмайсан. Агар саволимизга жавоб берсанг, қарздан кечишимиз мумкин.

Тарзан уй томон қараб, дераза ортида бир аёлга кўзи тушди. Ахтамни четга суриб, йигитнинг билагини бўшатди.

— Кўрқма, аканг шунаقا тўмтоқ ҳазил қиласди. Тўрт йил олдин аданг учта етим болани боқиб олган экан, улар ҳозир қаерда?

— Билмайман...

— Сен эслаб кўр.

— Эсимда йўқ.

— Ҳозир эсингта тушириб кўяман! — Ахтам Тарзани нари суриб, йигитни бўғиб олди. Шу онда дераза томондан «Боламга тегманглар!» деган фарёд эшитилди. Дам ўтмай аёл югуриб келиб, Ахтамнинг билагига ёпишди.

— Боламга тегманглар! Мана, мени олиб кетинглар!

Бу ноладан кейин кутилмаган меҳмонлар бир-бирларига савол назари билан қараб қолишиди. Ахтам йигитни қўйиб юбориб, «энди ўзинг гаплашавер», дегандай тисарилди. Шоди шилтанинг ўз ажали билан ўлмагани, вафотидан кейин ҳам бу уйга чакирилмаган меҳмонлар келиб тургани аён бўлган эди. Ахтам тисарилгач, аёл ўғлини қалқон каби тўсиб олди.

— Кўркманг, опа, — деди Тарзан. — Сизларга тегмаймиз. Агар саволимга тўғри жавоб берсангиз, бундан кейин уйингизга бирор бостириб келмайди. Эрингиз тўрт йил аввал қиморда учта болани ютиб олганмиди?

– Йўқ, – деди аёл ютиниб. – Дадаси пул ютиб келардилар... бола ютмаганлар.

– Сиз шошилмай, ўйлаб жавоб беринг. Бир ўғил, икки киз. Уйингизга бошлаб келганини одамлар кўришган. Самоворхонадагилар ҳам айтишди.

Тарзан таваккал қилиб ёлғон ишлатган эди, керакли самара берди:

– Самоворхонадаги ғийбатчи ўлгурларга шундан бошқа гап қолмабдими?! Дадасидан бир танишлари илтимос қилган экан, икки ҳафта уйимизда қараб ўтирдик. Бояқишлиарни кўзлари гўрда чиригур ўша қиморбоз ютган. Дадаси ўша ўйинда озгина ютқизган эканлар, «болаларга қараб турсанг, қарздан кечаман», дебди.

– Ким эди ўша танишлари?

– Шаҳарлик экан...

– Отини айтинг.

– Эсимда йўқ...

– Агар айтмасанг, ўша болаларнинг ўрнига ўғлингни олиб кетамиз!

Четроқда турган Ахтам шундай деб улар томон бир қадам босди. Бундан даҳшатга тушган аёл ўғлини қучоқлаб олди. Тарзан «бир пас жим турсанг-чи!» дегандай шеригига ковок уйиб қараб қўйди.

– Эсингизда бор, бизни алдаманг. Болаларнинг икки ҳафта тургани ҳам ёлғон. Болаларни олиб кетишмагунча эрингиз билан минг марта уришгансиз, ўша одамни ҳам яхши танийсиз. Эрингиз билан ичib ўтирганида заҳарламоқчи ҳам бўлгансиз...

Аёл эътиroz билдиrmоқчи бўлди-ю, гап тополмай, «буларни қаердан биласиз?» дегандай оғзини очганича қараб тураверди. Тарзан бу сафар ҳам тахминини айтган эди. Эри уйга уч нотаниш болани бошлаб келса, қайси аёл бефарқ қараб туради-ки, бу индамаса? Болаларнинг каттасини гапга солиб, фожиадан хабар топгач, эри билан талашиб-тортишгани-чи? Бу фожиага сабабчи одам уйига келганда қалбида уни

зақарлаш истаги туғилгани-чи? Тұғри, ароққа ёки таомга зақар солмагандир, ҳатто зақар топишга уриниб ҳам күрмагандир, бирок, истаги бўлгани аник. Тарзан шу мантикий хulosалар асосидаги гапи билан аёлни гангитиб қўйган эди.

– «Жамолбек» дегандай бўлувдилар... – деди аёл титроқ овозда.

– Энди қаерда туришини ҳам айтинг.

Аёл айтди.

– Энди сизларга ким дўқ-пўписа қилаётганини ҳам айтинг, биз ваъдамизда турмиз. Бунақаларнинг танобини тортиб қўямиз.

Аёл буни ҳам айтди. Тарзан «Эрингизни ўшалар ўлдиришганми?» деб сўрамоқчи эди, кўркувдан титраётган аёл барибир тўғри жавоб бермаслигини фаҳмлаб, бошқачароқ тарзда сўради:

– Кўп ютқизган эканми?

Аёл Тарзанга жавдираганича қараб турди-да, мужмал жавоб берди:

– Энди... қарзни секин-секин тўляяпмиз, озгинаси қолди.

Бегоналарга яна нима деб жавоб қайтарсин у бечора! Кечаси келиб, эрини арқонда бўғиб ўлдиригандарини қандай айтсан?! «Ўғлингнинг жони гаровда, ғинг деб оғиз очсанг – ўлади!» деганларга бу иккаласининг кучи етармикин? Танобини тортиб қўйиш ҳақидаги гапи чин эканига ишониш мумкинми? Йўқ... «Эрим қиморда кўп ютқизиб қўйган экан, иснодга чидолмай ўзини осди», деган гапида туравериши керак. Бу гапга милиса ишониб, ҳақиқатни титкиламадими, демак, жим юравергани дуруст. Улган ўлиб кетди, тўғри гапни айтгани билан тирилиб, қайтиб келмайди...

Кўркув исканжасида титраётган аёлга иккови ҳам ачинмади.

– Кириб, ширин чой ичворинглар, титроқни босади.

Тарзан шундай деб бурилди. Ахтам «бизларни унутманглар» дегандай уларга ўқрайиб тикилди-ю, сўнг шеригига эргаши.

– Бек акамиз қаторларига олганларида зўр-зўр ишларни қотириб ташлаймиз, деб ўйлабман мен аҳмок. Майда-чўйда шилталарни изидан юришга менинг тоқатим йўқ, – деди у машинага ўтиргач. – Жамолбек акахонингникига қараб суримизми ё шилтанинг оиласини балолардан асроймизми? Жуда катта ваъда бериб юбординг-ку?

– Ваъда бердим, демак, бажаришим шарт.

– Аҳмоқсан, бир-бирларини гўштларини еб юравермайдими? Норбой деган хунасани шилта хунаса шўрини қуритибди, шилтани бошқаси, бошқасини яна бошқаси... Сен бу занжирни узиб, тинчитмоқчимисан?

– Мен ваъда бердим. Иш учун керак, – деб Тарзан гапни қисқа қилди. Аёл айтган манзилни топиб боришигач, Ахтамга юзланди: – Тушиб, чакириб чик, ўша хунасани.

Бу буйруқ Ахтамга малол келди:

– Чакириб чиқмайман, уйида тинчита қоламан, – деди машина эшигини очиб.

– Чакириб чик. «Садир қиморбознинг жияни сўраяпти», десанг етарли. Ўзинг дарвоза ёнида тур, – деди Тарзан катъий оҳангда.

– Сен катта кетаверма, бола! – Ахтам жаҳл билан эшикни ёпди. Ғазабланса-да, шеригининг буйруғига итоат этди. Уй эгасини илтифот билан таклиф этмай, сўқиб, туртиб олиб чиқди. Қирқ ўшлардаги калкиши машина томон юра туриб, икки марта орқасига ўгирилиб қаради. Исми Ҳожимурод бўлган бу одамнинг сочи йигитлик давридаёқ тўкилиб кетгани учун барча «Калҳожи» дейишга ўрганиб қолганини Шоди шилтанинг хотини айтган эди. Тарзан ўрнидан қимирламай, уни ғазабли нигоҳи билан қаршилади.

– Садир қиморбоз дегани эшигтганмисан?

Калҳожи ўзидан анча ёш йигитнинг саломлашиш

ўрнига сенсираб гапиришидан ғаши келса-да, бир нима деб эътиroz билдиришга журъат этмади. Ичкарида Садир қиморбознинг номи тилга олинганидаёқ унинг ичидан киринди ўтган эди. Гарчи фожиадан сўнг кўп йиллар ўтган, айrim тафсилотлар унутилган бўлса-да, бу атрофдагилар бечора қиморбознинг тақдирини эслаб туришарди. Ахир унча-бунчага бўйин эгмайдиган қиморбознинг ким томонидан жазоланганини унутиш мумкин эканми? Ҳамонки, бу йигит ҳе йўқ-бе йўқ гапни Садир қиморбоздан бошладими, демак, бу томонларга бекорга келмаган.

– Гарангмисан, гапимни эшитмадингми? – деди Тарзан овозини баландлатиб.

– Эшитганман...

– Шоди шилтани ҳам эшитгансан-а?

– Ҳа.

– Сендан қарзими迪?

– Ҳа.

– Қарзини жони билан тўлабди-ку, яна нима дейсан?

Калҳожи нажот излагандай атрофга жавдираб қараб олди.

– Уни... ўлдириш ниятимиз йўқ эди. Бўйнига арқон солиб қўрқитмоқчи эдик... бўғмасимиздан олдин ўлиб қолди. Юраги чатоқ экан...

Чиндан ҳам Шоди шилтани қўрқитмоқчи эди... Бир пайтлар лақма қиморбозларнинг чўнтақларини куритишда яқин шериги бўлган одамни ўлдиришга кўли борармиди? Шерикчилик қилиб юрган йиллари икковининг ҳам ошиғи олчи эди. Пулни тақсимлашда икковининг нафси шаталоқ отди-ю, дўстлик ипла-ри шарт узила қолди. Қиморбозлар оламининг зўрларидан бўлишмаса ҳам, ризқларини териб юришиб эди. Ўша охирги ўйинда Шоди шилта катта кетиб, унга рўпара келди. Иккови туни билан ташлаши. Пул уюми дам у томон, дам бу томон сурилавериб, чўталчининг ҳамёни тўлгандан тўлди. Тонг-

отарга бориб Шоди шилта томондаги пулларнинг баракаси учиб кетди. Қарзга ботди. Калҳожи «қарзга ўйнамайман», дегач, машинани тикиб, уни ҳам ютқизди. Гал уйга келганда Шоди шилта ракибининг гирром ҳаракатини пайқаб қолди. Пайқади-ю, исбот қилиб бера олмади. Шундай бўлса-да, қарзини тўлашдан воз кечди. Ўйиннинг эртасига қарзни ундириш мақсадида кўркитиш учун келишганди... Шоди шилтанинг ўлимидан кейин Калҳожи уч ойгача кўчага чикмай, уйда ўтирди. У милициянинг қотилликда айблашидан эмас, ўзи мансуб бўлган оламнинг ҳукмидан кўркарди. Милиция нари борса, қамайди. Қиморбозлар Шоди шилта ноҳақ ўлдирилган, деган хуносага келишса, уни аяб ўтиришмайди. Орадан вакт ўтиб, тинчлана бошлагач, шилтанинг хонадонига яна борган эди. Ҳозир нотаниш йигит ҳовлисига бостириб кириб, Садир қиморбознинг номини тилга олгач, шу ишидан пушаймон килди. Машинада ўтириб сўрокқа тутаётган йигит рўпарасида саросимага тушиб, ўзини оқламоқчи эди, «Нега талвасага тушасан? Садир қиморбозни гум қилишга Ҳайдар aka келгандилар, булар ким ўзи? Мишики болалар-ку?!» деган фикр уйғониб, гапни чўзмади.

Калҳожининг қисқа тушунтириши Тарзанинни кизиқтирмади. У томон тупуриб, гапни қисқа қилди:

– Унинг қарзи йўқ сендан. Хотинидан олганларингни икки кун ичидагайтариб бер. Ўша томонларга қадам боссанг, Садир аканг билан ачомлашиб ётасан, тушундингми?

Калҳожи «тушундим», дегандай бош иргади.

- Жўна энди, Мурдани айтиб юбор, келаверсин.
- Кимни? – деб ажабланди Калҳожи.
- Дарвозангнинг ёнида турган одамнинг оти Мурда. Сен уни яхшилаб таниб ол, балки яна учрашарсан.
- Калҳожи буйруқни бажаргач, улар узоклашгунларига қадар дарвозаси ёнидан жилмади.

– Хунасанг иштонини хўл қилиб кўйди, – деб кулади Тарзан ўз ишидан мамнун бўлиб. Шеригининг бу гали тагида «Қойил қилдимми! Мендан ўрган!» деган маъно яширинганини Ахтам англаб, пешонасини тириштириди.

– У сенданам, менданам қўрқмади. Қўрқкан одами бошқа, – деди беписандлик билан.

– Бек акамдан қўрқди, демоқчимисан, акахоннинг номларини тилга ҳам олмадим-ку?

– Бу ерларнинг додахўжаси аҳмоқ эмас. Садир қиморбозни сен гум қилганингда сендан қўрқкан бўларди. Орқангда ким турганини битта гапингдан билган. Менга алам қиласидигани ҳам шу.

– Тушунмадим? Нега алам қиласиди?

– Шер ўлжа тутиб, бўғзини чайнаётганда атрофида қашкирларми, ўлаксахўрларми изғиб пайт пойлашади. Сен билан мен ҳозир ўшаларга ўхшаймиз.

– Шошилма, биз шундай шер бўлайлик-ки...

– Бир ўқирсак, дунё титраб кетадими? – деди Ахтам пичинг қилиб. Кейин ҳорғин овозда қўшиб кўйди: – Шер бўламан, десанг, аввал шерни йўқотишинг керак.

– Бунинг ҳам вақти келади. Фақат... унгача бизни «қашкир» дема, «шербачча» деганинг яхши.

– Отангга қарасам, сени «шербачча» дейишга тилим бормайди.

– Адамга осилма. Адамнинг абллаҳликлари бор, лекин у менинг адам!

– Дунёнинг нотўғрилиги ҳам шунда. Ўгилга отани танлаш имконияти берилганида адангга ит ҳам қарамаган бўларди.

– Яна илтимос қиласман: адамга осилаверма!

Тарзан «илтимос қиласман», дегани билан овозида қаҳрли амр оҳанги зоҳир эди. Ахтамнинг бундай қитмирилиги янгилик эмас. Лекин Тарзан «илтимос қиласверади», у эса сурбетлигини қўймайди. Шеригининг ишларидан кўнгли тўлмай ғашлананаётган Ахтам

шу гаплари билан хумордан чиқмоқ мақсадида фикри-ни давом эттириди:

— Менга мазза: отам йўқ. Бирор «падарингта лаънат!» деб сўкса, жаҳлим чиқмайди, аксинча, кувониб, «раҳмат!» дейман. Қидираётган учта итваччани то-пиб, «отангнинг ҳайвондан фарқи йўқ эди», десанг, қилган хизматингнинг мукофотига башарангта тупуришади. Шилтанинг ўғли ҳам ўлса ўлиб кетади-ки, лекин отасининг шаънига доғ туширтирмайди. Бу калнинг болалари эҳтимол, сени бўғиб ўлдиришлари мумкин. Бу масалада ўғиллар бир-бирига ўхшайди. Оталаринг-чи? Сенинг отанг ўша шилтадан яхшироқми? «Қиморбознинг омади келиб, роса пул ютди» дейишади, нотўғри гап бу. Қиморбоз ютмайди, пулни ҳалол меҳнати билан ишлаб топади. Адангта ўхшаганлар-чи?

— Агар бўлди қилмасанг...

— Нима, Бек аканга чақиб берасанми?

Ахтам шундай деб хаҳолаб кулди.

— Сени нега яхши кўраман, биласанми? — деди кул-гидан тўхтамай. — Юз марта гап талашсак, тўқсон сак-кизтасида фикрларимиз бошқа-бошқа бўлиб чиқади. Агар бир одамнинг атрофига тўпланганлар унинг ҳамма гапини маъқуллайверишига, уларни нима деб аташ керак, биласанми? Аҳмоқлар! Ҳа, аҳмоқлар! Чунки уларнинг ўз фикрлари йўқ. Мана, Бек аканг аввал сени чақирди, сени ақлли деб ўйлаган бўлса керак. Бек акангнинг бағрига киргунингча ақлли эдинг. Энди сен ҳам бошқаларга ўхшаб аҳмоқликни бўйнингга олдинг. Жамшид аканг нима деб ўқитди? Бек акамиз «нимага?»ни ёмон кўрадилар, «хўп бўлади»ни яхши кўрадилар. Сен бу қоидани гарданингга олганинг учун шу томонларда юрибсан. Мен ҳам аҳмоқман, лекин «хўп бўлади», дейдиган аҳмоқлардан эмасман. Менинг аҳмоқлигим — «хўп бўлади»га тоқатим йўқлигига. Бек аканг бора-бора сени яхши кўриб қолади, менинг эса шўримни куритишга уринади.

– Ўлдирворишидан қўрқяпсанми?
– Менми? Сенга минг марта айтганман: ўлишдан қўрқмайман. Аслида мен тирик одам эмасман, қайси бир зўрнинг арвоҳиман. Арвоҳни ким ўлдира олади? Бек акангми ё сенми? Менга ўлим ҳақида гапирма. Менга ўлдириш ҳақида гапир.

Тарзанга бу гаплар ёқмаса ҳам, ҳазилга буриш учун кулимсираб қаради:

– Ҳар куни жон оладиган одамхўрга ўхшаб гапирасан-а? Шуларни бояги калнинг олдида айтганингда бечоранинг юраги ёрилиб кетарди.

– Ақлинг кўп-у, лекин одамнинг ичини билмайсан. Ўйин пайтида жонини ҳам тикворадиган одамнинг юраги унча-бунчага ёрилмайди. Айниқса, сендақа мишиқининг битта гапига иштонини ҳўл қилмайди.

Ахтам шундай пичинг қилиб, унинг гарданига уриб кўйди. Бундан Тарзан бир силкиниб, шеригига ғазаб билан ўқрайди:

– Гарданимга кўл теккизма, демаганмидим?!

Ахтам «кимга бақираётганингни биляпсанми, еган калтакларинг эсингдан чиқдими? Кўл теккизиш мумкин бўлмаган ипак йигитчамасмисан?» дейишига тилини қайради-ю, лекин «шунча жигига текканим етар», деган қарорда унга киприк қоқмай тикилди-ю, жавоб қайтармади.

«Шамол эккан – бўронни йиғишириб олади», деганларидек, Тарзанинг эккани шу ёвуз нигоҳли Сур эди. Энди охини кимга айтсин, додини ким эшитади-ю, ким ярасига малҳам қўяди...

Зоҳид шифохонадан қайтган Саид Қодировни йўқлайман, деб турганида унинг ўзи бир қўлида қаҳва тўла финжонни кўтарганича кириб келди. Салом-алик, ҳол сўрашдан сўнг Саид Қодиров финжонни Зоҳидга узатди:

– Бу сизга, азизим, ҳовурининг чиройлилигини қаранг, чойдан бунақа ҳовур кўтарилемайди. Ҳиди-чи! Бир самовор чой дамласангиз ҳам бунақа хузурбахш ҳид таралмайди.

– Ўзингиз-чи? – деди Зоҳид унинг дабдабали мақтовларидан кулиб.

– Ох, ўзимми? Ярамга туз сепдингиз-а? Икки ҳафта давомида дўхтирлар менга нимани кашф қилиб беришди, айтами? Қаҳва юрагимга зарар экан, босимни оширап экан. Қаҳва ичиб ўтирган эдим, дўхтир кириб қолди. «Нима қиляпсиз?» – деди. Ранги-рўйини кўрсангиз эди: қошлар чимирилган, гўё у талабчан муаллим-у, мен кулоқсиз шумтака ўқувчиман. Мениям шумлигим тутиб, «қаҳва ичяпман», дедим. «Нега ичяпсиз, мумкинмас-ку, унугдингизми?» деди. «Гапингиз эсимда. «Зараарли» девдингиз, нимаси заарарли эканини синааб кўраётган эдим», дедим. «Синашингиз шарт эмас, олимлар исбот қилиб беришган, қаҳвани тўкиб юборинг, бўлмаса босимингиз яна ошади», деди. «Қаҳва ичмасам ҳам ошяпти-ку, ундан кўра ичиб ҳузурланганимда ошгани яхшимасми?» дедим. Хуллас, дўхтир жаноблари тиббий маърифат дарсини ўтиб айтдиларки, Худо яраттан неъматларини турли жойларга сочиб юборган, қайси неъмат қаерда етиширилса, ўша ерда истеъмол қилинса фойдали экан. Тушуняпсизми, қаҳвани Бразилияга ё Мексикага бориб ичсак, зарари йўқ экан. Мен «хўп, унда помидор билан картошкани нима қиласиз?» дедим.

– Жавоб топдими саволингизга? – деди Зоҳид кулимсираганича қаҳвадан ҳўплаб.

– Жавоб эмас, ҳукм топди: «Прокурорларга гап тушунтириб бўлмайди!» деди. Кеча қайтар маҳалим уларга эсларидан чиқмайдиган зўр совға бердим. Битта қаҳва, олтига финжон, битта қаҳва дамлайдиган чойнак, бир қути шоколад олиб дўхтирларнинг хонасига кирдим. Совғадан қувонишганда, «ана, энди ўзинглар ҳам қаҳвага ўрганиб, мендай бечораларни сиқувга олмайсизлар», дедим. Сиз совутмастан ичинг. Мен эрталабки насибамни ичволдим. Кўнглимга яқин одамга қаҳва дамлаб бериб, мактov эшитсан, баҳридилим яйраб кетади. Қаҳвани ёқтирмасангиз ҳам мақтаб қўяверинг.

– Ақлни пешлайдиган даражада зўр бўлибди, Бразилия маликаси ҳам бундай totли қилиб дамлай олмаса керак.

– «Дамлай олмаса керак», деганинг нимаси! Бу аниқ ҳақиқат. Малика хоним олиялари қаҳва дамлайдилар, кун ёйилиб, ноз уйқудан уйғонганларида канизак тайёрини тутади, момик тўшакларидан нозик қадларини кўтартмай туриб, ғунча лабларини чўлпиллатиб, ҳўплаб-ҳўплаб ичадилар.

Сайд Қодиров худди гўзал маликанинг сарвқоматини кўриб mast бўлгандек, кўзларини хиёл юмганича хузурланиб гапирди. Кейин чўчиб уйғонган одам сингари хаёл дунёсидан аччиқ ҳаёт оламига қайтди:

– Жиноятчиларимизнинг ахволлари нечук?

– Афсуски, ҳаммалари соғ-саломатлар, – ҳазил оҳангидаги саволга Зоҳид айни шу оҳангда жавоб қайтарди.

– Узингизнинг кайфиятингиз қандай?

– Ёмон эмас, чидаса бўладиган.

– Демак, сизда ўсиш бор. Денгизчидан «ахвол қанақа?» деб сўрашганда: «Кайфиятлар аъло, чўкяпмиз!» деганимиди? Ҳамонки, чўкмаётган эканмиз, ҳамонки, қаҳвани ичиб ақлимизни пешлаб олган экан-

миз, энди ишдан гаплашсак ҳам бўлади. Ашулачи йигитни отиб кетишганини эшитгандирсиз?

– Эшитдим... – Зоҳид «бу ҳақда бекорга гап очмаётгандирсиз?» деган маънода унга савол назари билан қаради.

– Тахминан... нималарни эшитдингиз?

– Тахминан эмас, бу иш билан шаҳардагилар шуғулланишаётганини аниқ эшитдим.

– Шунинг ўзими? Асадбегингизни сўроққа чақиришганини эшитмадингизми?

– Менинг Асадбекимними? – Зоҳид истеҳзо билан жилмайди. – Ашулачига нима алоқаси бор экан?

– Марҳум ҳам, кочиб юрган гумондаги йигит ҳам куёванинг шогирдлари эмиш. Калаванинг бир учи Бегингизга бориб тақалмасмикин?

– Сўроққа чақиришибди-ку, бир нима дегандир?

– Нима дейиши маълум-ку?

– Чакирмаслик керак эди.

– Ҳа, нодонлик қилишибди. Ўғлининг ўлимидан сўнг Асадбекни тушуниш қийин. Ё ҳаддан ташқари эҳтиёткор, ё нима қилаётганини ўзи ҳам билмайдиган бўлиб қолган.

– Эси оғибди, демоқчимисиз? – Зоҳид бош чайқади. – Бунақа одамлар дард олдида тиз чўкмайди.

– Одамлик туйғуси йўқ, демокчимисиз?

– Ачиниш туйғуси бўлса, виждон қийналарди. Ачиниш туйғуси йўқ вужудда виждон нима қилсин? Виждон бераҳм қалбга яқинлаша олмайди. Демак, бундай қалб эгасининг руҳий касалликка чалиниши эҳтимолдан узок.

– Ўҳ-ҳў! Ҳукмингиз бераҳмларча бўлди-ку, азизим!

– Бу менинг ҳукмим эмас, «ҳақиқат» деган одил ҳакам бор.

– Ҳўп, фалсафа бобида тортишувларимизнинг чеки йўқ. Ҳозир мени икки нарса ўйлантиряпти: би-

ринчиси – Асадбек одамимизни ўзидан четлатди, сирдан огох бўла туриб нега жазоламади?

– Ўзингиз айтдингиз: эҳтиёткор бўлиб қолган. Асадбек хоинни кечирмайди, лекин жазони ҳам тезлаштирмайди. Агар ўзининг одами бўлганида аллақачон қуритворарди. Одамимизни жазоласа, бизга қарши уруш очган ҳисобланади. Ҳозир ҳам, кейин ҳам биз билан ўчакишиш қандай ачинарли оқибатга олиб келишини у яхши англайди.

– Мени ишонтира олдингиз, деб ҳисоблаймиз. Одамимизнинг хабарига кўра, Асадбекнинг энг яқин шериги изсиз кетган. «Чувринди» сирли фожиа натижасида ўлди, «Кесакполвон» дегани эса ғойиб бўлган... Фалати ҳолат эмасми?

– Олдинги маълумотда Асадбекнинг барча ишларни шу шеригига оширгани айтилган эди. Ўзи тинчитган, деб ўйлайсизми?

– Менинг аниқ хulosам йўқ. Гумонлар бир қоп бўлиб, тўлиб-тошиб кетди. Кесакполвоннинг ғойиб бўлиши сабабини мен ўрганаман. Сиз шаҳардаги дўстларга ёрдам беришингиз керак.

– Ашулачи масаласидами?

– Ҳа.

– Калаванинг учини Асадбек томондан кидиришда маъно йўқ бўлса керак.

– Сиз қармоқни куёвига ташланг. Элчин жабрланаувчини ҳам, котилни ҳам яхши билган, лекин терговчи билан гаплашишни истамабди.

– Мен билан гаплашар эканми?

– Сиз Элчиннинг марҳум дўстини билгансиз, демак, танишлигингиз бор.

– Ҳа, танишмиз, афсуски, дўст эмасмиз. Бундай ҳолатда дўстгина ёрдам бериши мумкин.

– Илтимос, дўстлашишга ҳаракат қилиб кўринг.

Сайд Қодировнинг буйруқ тарзида эмас, ялиниш оҳангига гапириши Зоҳидга малол келди. Истеҳзо би-

лан жилмайиб, финжонни унга узатиб миннатдорчилик билдириди-да, қүшиб қўйди:

— Ажойиб қаҳванинг ҳақи-хурмати учун илтимо-
сингизни бажаришга уриниб кўраман. Шу баҳонада
балки яна бир дўст ортиарман.

Сайд Қодировга Зоҳиднинг пичингли ҳазили хуш ёқиб, кулиб юборди:

— Ана кўрдингизми! Одамлар қаҳвани менсишмайди, ахир унинг кучи билан дунёни ўзгартириб юбориши мумкин-а! Ажойиб қаҳванинг кучи кирқилмасдан бурун ашулачи билан учрашувга шошила қолинг. Биламан, раҳбариятнинг бошқа топшириғи бор. Буни ўйламанг, зиммангиздан соқит қилинган, деб ҳисоблайверинг. Бунақа майда ишларни бажарадиган майда одамларимиз етарли, — Саид Қодиров шундай деб, айёrona кўз қисиб қўйди. Хонасига қайтмоқ ниятида эшикни очди-ю, остоnага оёқ босиб тўхтади. Айтилмай қолган зарур гапини эслагандай Зоҳидга ўгирилди.

«Виждон бераҳм қалбга яқинлаша олмайды», деб чиройли гапирдингиз. Мен эсам сизни бераҳмликда айбладим. Биламан, жиноятчиларни ёктиримайсиз. Уларни ҳамма ёмон күрганда бизнинг раҳмдил бўлишимиз кулгили ҳол, албатта. Бу ёғини суриштирсангиз... бу тоифани кўрага кўзим йўқ. Лекин на илож, улар билан юзма-юз бўлишга мажбурмиз. Ҳақиқатни юзага чиқариш учун баъзан муроса қилармиз, баъзан кўнглини овлаш учун мақтартармиз ҳам... Афсуски, уларни ҳамма одам қиёфасида кўради. Менга улар бошқача кўринишда кўринадилар. Улар серқатнов йўл бўйида яккам-дуккам ўсиб ётган тиканакларга ўхшайди. Улар ҳеч қачон далани ёппасига эгаллай олмайди. Факат ақл кўзи юмуқ биринки одамга зиён етказадилар. Сўнг сувсизликдан қовжираидилар. Улар ёқиб юборилади, аммо алангалири фойда бермайди, аксинча, салгина алангалири

га олади-ю, нафсиз ўчади. Кулини шамол учиради. Тамом-вассалом!

Сайд Қодиров «хикматга мойил гапим маъқулми?» дегандай маънодор қаради. Зоҳид эса ундан нигоҳини узиб, дераза оша ташқарига қаради. Худди ўзига ўзи гапираётгандай деди:

– Осонгина «тамом-вассалом» бўлганида кошки эди. Бу «тамом-вассалом»га қадар қанча қонлар тўкилади, қанча диллар вайрон бўлади. «Тамом-вассалом»ни тезлатиш, жонларни саклаб қолиш, афуски, кўлимиздан келмайди. Фалсафангизни инкор этмайман, озгина кўшими чилимани: бирорлар ҳаёт гулшанидан умри давомида гул тўплайди. Бирорлар эса чирик хазонларни тўплай-тўплай ўзидан ўзи ажабланади: «Мен нима учун яшадим-у, нима мақсадда бу чиркин баргларни тўпладим?»

– Яхши фалсафа, лекин сиз айтаётган хазонфурушларнинг ҳаммаси ҳам бундай инсофга келавермайди. Хазон тўплаганидан фахрланиб ўлиб кетадиганлари ҳам бор. Бу фикрни мен сизга текинга сотдим, фалсафа дафтарингизнинг бир чекасига қистириб қўйинг.

Сайд Қодиров шундай деб жилмайди.

Зоҳид бу фикрни инкор этолмаслигини билдириб, «енгилдим» дегандай кўлларини кўтарди. Бошлиғи чиқиб кетгач, жойига ўтириб, жиноят тафсилотлари битилган қоғозларни қўлига олди. Бир-икки сатр ўқигач, хаёлга берилиб, қоғозларни жойига кўйди.

«Жиноят оламидаги тахтлар ҳеч қачон бўш қолмайди, – деб ўйлади у. – Тахт учун олишув ҳеч қачон тўхтамайди. Даъвогарларнинг бири кетади, иккинчиси келади. Ёқаси кирланган кўйлакни алмаштирган каби... Қотил топилиб қамалгани билан нима ўзгаради? Бу жазо марҳум ўрнини тўлдирмайди-ку? Ҳа, ҳеч нарса ўзгармайди. Бирор, одамлар адолатга бўлган ишончларини ўлдирмасликлари учун ҳам жиноятчини топиб, албатта жазолаш керак...»

Кун оқшомга оғди. Зоҳид бошлигининг топширигини бажаришга отланиб, оғринибгина ўрнидан турди. Бу ишга аралашувидан наф йўқлигини билгани учун Элчин билан кўришишни истамаётган эди. Элчиннинг кўчасига бурилиши билан дарвоза яқинида турган оқ «Жигули» дикқатини тортиб, Асадбекнинг эҳтиёткор бўлиб қолганлиги ҳақидаги гапни эслади. Дарвоза олдида тўхтаганида машинадан бир йигит чакқонлик билан тушиб, унга яқинлашди.

– Акахон, сизга ким керак? – деб сўради у, Зоҳидга бошдан-оёқ разм солиб.

– Элчин аканг керак, – деди Зоҳид, унга тик қараб.

– Ишингиз борми?

– Ҳа, бор.

– Қанақа иш? Менга айтаверинг.

– Үзига айтадиган иш. Агар сенда ишим бўлганида сенга айттардим.

– Менга айтаверинг, биз бу ерда пашша қўриб ўтирганимиз йўқ.

– Шунақами? Ҳофиз акангни тўйга айтгани келдим.

– Ҳофиз акам тўйга боролмайдилар.

– Нега?

– Негалигини билишингиз шарт эмас. Акахон, яхши гапга кўнинг-у, изингизга қайтаверинг. Ҳаво исиб кетяпти, яна у ер-бу ерингизга чанг тегмасин.

Зоҳид «у ер-бу еримни чангга булайдиган азамат сенмисан?» дегандай унга бошдан оёқ разм солди-да, гувоҳномасини чиқариб, ўзини танитди.

– Шуни бошида айтавермайсизми? – деди йигит норози оҳангда тўнғиллаб. Кейин «Бирпас кутинг», деб, ичкари кираётанида Зоҳид: «Анвар акамнинг танишлари келибди», десанг мени танийди», деб қолди. Уч-тўрт дақиқадан сўнг йигит чиқиб, Зоҳидга инда-

май ўтди-да, машинасига бориб ўтириди. Дарвозахона-да Зайнаб кўриниб, саломлашди.

– Сал мазалари йўқроқ, ишингиз зарурмиди? – деб сўради у синиқ овозда.

– Касалликларини биламан, маслаҳатлашадиган гапим унча безовта қилмаса керак.

Зоҳид шундай деб қулупнай ва нон солинган қоғоз халтани унга узатди. Зайнаб «Овора бўлиб нима қилардингиз», деган манзират билан тортиқни ийманнибина олди-да, ичкарига таклиф қилди:

– Кира қолинг, фақат кўп гаплашманг, айниқса... асабни бузадиган гапларни айтманг. Анвар ўртоқларини эслатмасангиз ҳам майли...

Зайнаб шундай деб, ичкарига йўл бошлади. Кимсан, Асадбекнинг қизини маҳзуи ҳолда кўриш Зоҳидга ғалати туюлди. Кибр йўқ, ғазаб йўқ, кўзларидан зулм учқунлари чақнамайди... Зоҳиднинг назарида аксинча бўлиши керак эди. Чунки у Зайнабнинг отасидан кўра онасига кўпроқ ўхашини билмас эди.

Элчин аравачасини ғилдиратиб келиб, Зоҳидни айвон остонасида кутиб олди. Салом-алиқдан сўнг уни айвон ўртасидаги стол томон бошлади. Зоҳид меҳмон келганда аёлларнинг шошилиб қолишларига, уйни тез-тез йигиштиришларига, кўрпача тўшаб, дастурхон тузаб, қанд-курс, мева-чеваларни бир-бир олиб чиқиб тузашларига ўрганиб қолган. Бу ерда бесаранжомлик бўлмади. Зайнаб ота уйида ўргангани учун дастурхонни меҳмон кутишга ҳамиша шай тутарди. Эрининг меҳмонларини яхши танимаса, салом бериб, чой дамлаб келгач, уларни холи қолдиради. Бу сафар ҳам шундай бўлди.

– Қайси шамол учирди, кўришмаганимизга ҳам кўп бўлди, а? – деди Элчин, меҳмоннинг ташрифидан мамнунлигини билдириб.

– Ҳа... Анвар вафот этган куннинг эртасига учрашган эдик, шекилли? Уйингизга отланганимда окибатсизлигимдан хижолат бўлдим. Йўклайман, деб

нече бор ният килдим-у, лекин ҳар турли баҳоналар билан «эртага, эртага» деб орқага сувавердим. Охири «ҳам зиёрат, ҳам тижорат» деганларидаи... – Зоҳид шундай деб, айбдор одам сингари узрли кўринишда жилмайди. – Очифини айтсам... шогирдларингизнинг ташвишли шамоли учирив келди мени.

– Навбатдаги очилмайдиган ишга киришайпсизми? – деди Элчин киноя либосида кулимсираб.

Зоҳид «ишлар очилмаётган бўлса, жиноятчилар қамоққа ўз хоҳишиларича кириб ўтирияптиларми?» деб кинояга истеҳзо билан жавоб қайтармоқчи бўлди-ю, «бу ўзи ким-у, мен нега унга ҳисоб берайн, нега ўзимни оқлайин», деган фикрга келиб индамай қўя қолди. Элчин буни «сукут – ризолик аломати» ўрнида кабул қилиб, давом этди:

– Анварнинг ўлими билан ҳатто кизиқиб ҳам кўрмадинглар. «Ўз жонига суиқасд» – чиройли хуласа! «Ёш олим йигит нега ўзини осди, балки у бўйнига аркон солаётганида исён қилмоқчи бўлгандир», деб сиз ҳам ўйламагандирсиз.

– Тушунмадим, қанақа исён? Жанозадан кейин учрашганимизда «бандалик эмас, аҳмоқлик» деган эдингиз. Энди «исён» деяпсиз?

– Фикрим ўзгармади. Фақат аниқлик киритдим. Исёнининг сабабини аниқладим. Ўшандаги гапларим эсингиздадир? Саволни яна такрорлайман: ҳаёт ўрнига ўлимни афзал билишига уни кимлар мажбур қилди? Сиз у лаънатиларни қамай олмайсиз, чунки сиртмоқда уларнинг бармоқ излари йўқ. Сизга фақат экспертиза хуносаси керак. «Руҳий сикув» деган нарсани экспертиза аниқлаб беролмайди. Тўғри, кодексингизда «ўлимга мажбур қилиш» деган банд бор. Лекин, бу банднинг пачагини чиқариб юборадиган ёлғончи гувоҳлар атрофда тикилиб ётиби, – Элчин шундай деб хўрсинди, нигоҳини Зоҳиддан олиб, худди ўзига ўзи гапираётгандай овозини пасайтириб, дардли оҳангда давом этди: – Виждон – дунёning энг

олий маҳкамаси экан. Тергаш жараёни бошланганида ёлғончи гувоҳлар, мунофикаларга бу маҳкамада ўрин бўлмайди. Энг асосийси – виждан маҳкамасининг ҳаками порахўр бўлмайди. Юкори идоралардан бўладиган қўнғироклар олдида бўйин эгмайди. Хукм эса одилона бўлади. Афсуски, вижданни мавҳум тушунча деб, бу ҳақиқатни англамайдиганлар дўл каби бошимиз устига тўхтовсиз ёғилиб турибдилар. Бу адолатсизлик дўли мен айтган одил ҳакам – вижданни омон қолдирганмикин? Масала шунда!

Элчин «сиз шу масалани ечиб бера оласизми?» дегандай Зоҳидга қараб, жавоб кутди. Зоҳид бу фалсафий мушоҳадалар орасига сиқилиб киришни хоҳламай, сукут сақлади. Алхол, Элчиннинг кўнгил оғриғи кўзғаб, кўз олдига умидсизлик пардасини тортиб, дунёни кўзига тор ва қоронги қилиб кўрсатаётган эди. Дарахтларни яшнатиб турган баҳор гулларининг жонини аямажуз суғуриб олса, унга қайта жон атаб бўлмайди. Қора совук ўтиб кетади, қуриган боғлар эса мунғайиб қолаверади. Уни қайта тиклашга ким ҳафсала қиласи? Тиклашга уринувчилардан кўра бе-парволар кўп экан, боғнинг аҳволи нима бўлади? Ҳаёт экинзорига лоқайдлик, бераҳмлик уруғи қадалиб, масъулиятсизлик суви билан сугорилса, қанака ҳосил олинади? Умидсизлик денгизизда кўпдан бери сарсон сузиб, муддао соҳилига етолмай қийналаётган одам бу саволларга қандай жавоб топиши мумкин?

– Худо Ер юзини яхшилик учун яратган экан, лекин нодонлар уни омонсиз олишув майдонига айлантириб олдилар. Ер триллион-триллионлаб жасадларни бағрига сиғдирди. Ҳозир яшаётган тўрт ярим миллиард одам ҳам бирин-сирин уларнинг сафига ўтади. Ўлганларнинг ўрнини туғилганлар эгаллайдилар, кейин олиша-олиша гўрларни тўлдираверадилар. Бир-бирини севмаган иккита одам Ер юзига сиғмаса, айб кимда?

Элчин енгил хўрсинди. Иложсиз одамнинг ҳасрати билан бошини эгди. Ўзининг саволларига ўзида жавоб бўлмаса, ўзга кимсадан нимани кутсин?

Уша фожиали куни жанозадан қайттач, «бир-икки кун ойингга қарашиб», деб Зайнабни уйига юборди. Назарида ёлғизлик кўнглига таскин берадигандай эди. Бундай бўлмади – кўнгилга ёлғизлик овунчоқ бўла олмади, айрилик исканжаси қалбини баттар эзди. Таскин топмок мақсадида конъякни кўлига олди. Қопқоғини очди, лекин қадаҳга қўймади, ичгиси келмади. Эси оғиб қолган телба одам сингари ярим тунга қадар у хонадан бу хонага мақсадсиз кириб-чиқаверди. Тун оқканда ҳолсизланиб, оромкурсига чўқди. Оёғини баралла узатиб ўтириди. Кўзига уйқу илинди. Қалб оғригини муолажа қилиши лозим бўлган қуш уйкуси вазифасини удда килолмади – уйқу ташвишлари юзига парда торта олмади. У қисқа фурсат орасида туш кўрдими ё дўстининг руҳи уйига кириб келдими, билолмади. Лекин аниқ кўрди: Анвар оппоқ либосда кириб келди. Кейин маймунбашара бир одам кўринди. Анвар у томонга қўлини бигиз қилди: «Менниг қотилим шу, устознинг қотили ҳам шу... Қасос олмайсанми? Ноила учун қасос олмоқчи эдинг. Менчи? Арзимайманми?..» Анвар бундан кейин ҳам бир неча марта кўринди. Ҳатто қасалхонада хушсиз ётганида ҳам кўриниб, қасосга даъват этди. Ҳозир бу прокурорга шуларни айтиши керакми? Бировнинг аччик тақдиридан қўймайдиган бу одам унинг дардига тушинармикин?

Шуларни хаёлидан ўтказган Элчин ҳазин оҳангни тарқ этиб, энди қатъйрок тарзда давом этди:

– Холидий деган одамсифат маҳлук яна қанча одамни қуриптганини сиз билмайсиз. Даъво ҳам қилолмайсиз. Мен у бадбахтни бугун ўлдирсам, ўйлаб ҳам ўтирмай, эртагаёқ мени отасиз. Мантиқан қаралгандা, уни ўлдирганим учун мени мукофотлашингиз керак. Чунки уни ўлдирсам, қанча одамлар-

нинг ҳаётини саклаб қолган бўламан. Яширмайман, у маҳлукни ўша жиннихонанинг ўша ҳожатхонасига осмоқчи ҳам эдим. Бунаقا бўлиб қолиш бошимга тушмаганида қиласдим шу ишни! Тузалишдан умидим бор... Ўзимнинг кучим етмаса, бирорни ёллайман. Ҳозир Россияядаги киллерлар иш қидириб юришганиш. Битта қўнгироқ қилсан, бас... бугун бўлмаса, эртага Холидийнинг ўлигини ҳожатхонадан топиб, янги «Иш» очасиз. Сизга яна бир бошоғриқ ортирганим учун ҳозирдан узр сўраб қўяйми?

– Шу одамни оссангиз дунё чиройлироқ бўлиб қоладими? Анварнинг исёндан мақсади шу эдими?

– Анвар аҳмоқлик килди. Исён қиладиган одам ҳеч бўлмаса битта маҳлукнинг тухумини қуритиб кетиши керак.

– Шу гапларни сиз гапиряпсизми?

– Менга нима қилибди?

– Ишонмайман...

– Нимага?

– Холидийни осишингизга ишонмайман. Юрагида муҳаббат бор одам бундай қила олмайди. Тўғри, қасос олишни жуда-жуда хоҳлайди. Фикру ўйи шу одамни ўлдиришда бўлади, лекин қўли бормайди.

– Менинг муҳаббатим қамоқхоналарнинг сассик баракларида бўғилиб ўлган. Осишимга ишонаверинг. Осишдан олдин тилини суғуриб, кўзларини ўйиб олишимни ҳали айтмадим...

– Сиз ўзингизни ўзингиз алдаяпсиз.

– Балки шунакадир... – деди Элчин, аввалги шаштидан сал пастроқ тушиб. – Эшитгандирсиз, қадимги Хитойда ҳақоратланган ёки зулм курган одам қасос олишни истаса, ўша зулмкорнинг остонасига келиб, ўзини ўзи осаркан ё сўйиб, ичак-чавоғини ағдариб ташларкан. Шундан сўнг зулмкорга нисбатан атрофдагиларнинг нафрати ошар экан-у, у бадбаҳт бегона юртларга кўчиб кетаркан. Сизга балки жазонинг шу тури маъкулдир?

– Виждон ҳамма нарсадан устун қўйиладиган жамиятда бу жазонинг таъсири бўлар. Лекин...

– Ҳа, ана энди ўзингизга келдингиз. Ҳамма гап ўша «лекин...»да! Қамоқдан қайтсан, Анвар жиннихонада ётган экан. Борсам, «дунё формуласини топдим», дейди. Сиз аввал илмга берилган экансиз. Пифагору Эйнштейн назарияларини сув қилиб ичиб юборгансиз. Катет, гипотенузаларингизни четга қўйиб, айтинг-чи, дунё формуласида ҳакиқат нимага баробар?

– Мен математикага қизиқардим, ҳозирги саволингизга файласуф жавоб бериши керак.

– Ҳар бир одам ўзича файласуф эмасми? Наҳотки, дунё зиддиятлари билан қизиқмагансиз? Саволимга жавоб берманг, майли, чунки фақат сиз эмас, ҳаммамиз дунёда ҳакиқат деган тушунча борлигини унутиб яшаймиз. Анвар эса унутмаган. У кашф килган ўша формулани: «ҳакиқат»нинг нимага баробар эканини топиш учун «хиёнат»ни «риё»га кўшамиз, «ҳасад» билан «очкўзлик» қавс ичидаги қўшилади. «Адоват», «ғийбат», «нифок», «шуҳратпарастлик», «манрабарастлик» эса илдиз остида қўшилади. Буларнинг ҳосиласидан «виждон», «иймон», «ҳаё»нинг қўшилмасини айрсак – баробар нол! Анвар дунё формуласидаги «ҳакиқат – нол!» деган хотимага қарши исён қилган эди. Дунё формуласини ким, тўғрироғи, кимлар бунақа хато ечимга олиб келади? Сизлар буларни ўйламайсизлар. Ҳолбуки, бошингизни қотираётган барча жиноятлар шу хато ечимдан туғилган. Ёш ҳофизнинг ўлими сабабини қидириб, жавобни қайнотамдан олмоқчи бўлибсизлар. Кулгили эмасми?

– Кулгили эмас... ачинарли... Бундай қилмасликлари керак эди, – деди Зоҳид, баҳсда енгилган одамнинг афсусли оҳанги билан. Сўнг мақсадини тушуниришга ўтди: – Сиздан ҳам, қайнотангиздан ҳам гумонимиз йўқ. Жаҳлингиз чиқмасин. Ўша икки санъаткор қандай йигитлар эди, сиздан шуни

былмокчимиз. Буни бизнинг тилимизда «шахсини аниқлаш» дейилади. Қотил топилганда кўнглингиз оз бўлса-да, тинчмайдими?

— Тинчмайди! Қотилни беш-олти йилга қамаб, уч йилдан кейин амнистия билан чиқариб юборганингиз учун сизларга олам-олам раҳматлар айтишим керакми?

— Марҳум яхши санъаткор эдими? Мен унинг ашуласини эшитмаган эканман.

— «Яхши» дедингизми? Тенгсиз эди! Унинг авжи ҳозир қўзиқориндай чиқаётганларнинг ҳеч бирида йўқ эди. Ҳозиргилар туғилиши билан киндигини ўзи кесиб, микрофонга улашяпти-ю, пилдираганича катта саҳнага чиқиб, ўзини «юлдуз» деб эълон қиляпти. Тасқараларнинг биронтасида авж йўқ. Авжини ололмаган ашулачининг қадри сариқ чака!

— Демак, марҳумнинг келажаги порлок бўлган. Истеъод бобида тенгсиз ёшларнинг ўзига яраша ҳasadчилари бўлади. Атрофида дўстга ўхшаб юришади-ю, лекин пайт пойлаб туриб, чалиб юоришади. Шунчаки чалишса майли, бунақа ҳолат...

— Қотилни энди дўстлари орасидан қидирмоқчимисиз? Биринчи гумонингиз Козимбекда, шундайми?

— Ҳа.

— Бу сизларнинг ўзгармас услубингиз. Жиноятчини биринчи галда жабрланувчининг яқинлари орасидан қидирасиз. Козимбекни қотил сифатида эмас, жабрланувчи сифатида қидирганингиз маъкул.

— Охирги учрашганимизда «Жамшид ўлдирилганини аниқ биласизми, ўзи?» деб тагли гап айтган эдингиз. Чиндан ҳам ўлдирилмаган экан, ўшанда кўнглингиз сезганмиди?

— Тилдан учган шунчаки бир гап эди. Мен фолбин эмасман. У гапни бекорга эсламагандирсиз, а? «Шоғирдларингизнинг тақдири тўғрисида кўнглингизга келган гапларни айтинг», демоқчига ўхшайсиз? Шоғирдимнинг бири ўлган, гумонга ўрин йўқ.

– Икинчиси эса тирик... ёки... тирикмикин?

– Билмайман... ярамга туз сепманг...

Зоҳид Элчиннинг илтимосига парво килмай гапини давом эттирди:

– Ҳарҳолда, жуда қизик: ўқ бор, кичик калибрли милтиқдан отилган, гилза эса йўқ. Ўқ пешонага теккан, мурданинг ёнида тишланган олма... Олмани марҳум тишлаган, чайнаб ютишга улгурмаган. Олма ейишига қараганда, у ҳеч нимадан хавотирланмаган. Қочишига ёки ўзини ҳимоя қилишга уринмаган. Яна ҳам қизиги: баллистик экспертиза хulosасига қараганда, у тўхтаб, деворга суюниб турган.

Элчин Зоҳиднинг бу хulosасини маъқулламади ҳам, инкор ҳам этмади. Зайнабнинг гумонларини айтишга чоғланди-ю, лекин тилини тийди. У гарчи ўғрилар оламига тобе бўлмаса-да, милиция ёки прокуратура билан ҳамкорлик қилишни ўзи учун ор деб биларди. Қамоқда орттирган бу одатига хилоф иш қилгиси келмади.

Алҳол, кўшни хонада Зайнаб уларнинг гаплари-га қулоқ солиб ўтиради. Мехмон оддий терговчи бўлганида, уни уйга қўймаслиги аниқ эди. Анварнинг номини тилга олиб келган бу одамга эшикни очганидан энди афсусланди. Чунки дастлаб келган терговчининг ҳам, бунисининг ҳам мақсади бир, худди Элчин шогирдини уйига яширгандай атрофга олазарак қаравади. Элчин икки қўлини кўтарса-ю, «ҳид олишингизга қойилман, дўстини отиб ўлдирган Ко-зимбекни мен яшириб қўйган эдим», деб қотилнинг қўлларига кишан солиб берса! Уларга шу керак! «Элчин акамда гумони бўлмаса, нимага ҳадеб қелаверади?!» Зайнабни шу савол темир тирноклари билан исканжага олиб, ғазабини оширди. Худди отаси каби у ҳам Кесакполвонни ёдга олди. «Сафарлари бунча чўзилиб кетди? Агар шу ерда бўлганларида булар оstonamizga ўйлаб яқинлашишарди. Ҳайдар амаким

сафарда бўлсалар, адам шу ердалар-ку? Адамни менсимай қўйишганми? Нега ҳадларидан ошишяпти?»

Зайнабни «Асадбекнинг асл қизи» деб эркалаган Кесакполвоннинг қадри ўтаётган эди. «Асадбекнинг қизи йиғламаслиги керак!» Акасининг ўлимидан кейин йиғламай қўйган. Кўз ёшлари тугаб, ўрнини қасос чўғлари эгаллаган. Бир ғалтак ип қандай ўралган бўлса, кейинги йиллар мобайнида ёғилган дарду аламлар гўё ип бўлиб, унинг юрагини чирмаб ташлаган эди.

Абдусамад хорижга кетар олдида уни овутмоқчи, Жамшид эса: «Бу эркакларнинг иши, мен ўлсам, менинг ўрнимга сен келасан!» деб ишонтирмоқчи бўлди. Қасос оладиган эркаклар қани? Нега индамай юришибди? Нимани кутишяпти? «Акамнинг хунини олиш хукукини Худо менга берган, эркакларнинг бошқа ишлари бор. Уларга ишонсанам, қасос ололмай ўлиб кетаман...» Қасос олишга аҳди қатъий эди, бироқ, ишни нимадан бошлаб, нима билан тугатишни билмасди. Бунинг учун унга бир маслаҳатгўй, суюнадиган бир қоя керак эди. Ўша маслаҳатгўйни, ўша қояни ҳар куни кутади. Худди бахтини кутаётган бахтсиз одам каби кутади. Кутаётган одамининг тақдиридан бехабар. Орзу қилгани – қасос Қиёматга қолганини ҳам билмайди.

Қасос шарбатидан ичиб ҳузурланиш ҳатто отасига насиб этмагани ҳам унга номаълум. Хонгирейнинг ўлимидан кейин ўч шамширини кимга санчишини билмай руҳ азобида тўлғанаётган ота қизига дардини айтармиди?..

Орзу-умид икки тоифа бўлади. Хайрли орзу-умид сабр ва ишонч булоғининг мусаффо сувидан ичиб, хаёлдан ҳақиқатлар оламига кўчгач, саодат охиратини беради. Разиллик балчиғидан қувват оловчи орзу-умид ҳам бор, афсусларким, бу ҳам ҳақиқатлар дунёсига кўчиб, бандани самум меваси билан тақдирлайди. Қайси орзу-умидни танлаш кишининг онгига

ва бу онгни тұғрилиқка йүллаб турувчи иймон нурига боғлиқ. Зайнаб бир вактлар пок орзулари офтобида ҳузурланиб яшарди. Буни саодат офтоби деб билиб, осмондаги күш янглығ абадий нур сочишига ишонарди. Ҳаётнинг хунук қора булутлари борлигини ўйлаб ҳам күрмаган эди. Энди саодат охиратидан умид йўқми? Руҳини эзиб турган оғир дард ўзининг залвори билан умид ва сабр чиннисини мажақлаб ташла-масмикин?

Нажот йўлига умид билан қарашиб икки хил бўлади. Шайтон кўзи билан қарашнинг охиривой! Иймон кўзи билан қарашиб Аллоҳнинг ажри билан тақдирланади. Не афсуски, емоқ-ичмоқ, киймоқ ва яшамоқнинг барча зийнатларидан баҳраманд бўлган Зайнаб бу тушунча бобида ғоят ғарип эди.

Айвонда ўтирганлардан бири жиноят тутунларини ечмоқ мақсадида бош қотиради.

Үйдаги Зайнаб эса қасос қонини ичмоқ истайди...

Зоҳид гапни чўзишдан фойда йўқлигини билиб, мезбонга раҳмат айтди-да ўрнидан кўзғалди. Зайнаб шошилиб чиқиб, уни кузатди. Хайрлашар чоғида кўз-кўзга тушиб, Зоҳид ҳайратланди: Зайнаб энди у тасаввур килган аёлга, Асадбекнинг қизига айланган эди.

Зоҳид бу хонадонга умидсиз келган эди, куруқ қайтди.

XI б о б

1

Абдусамад Чўлпонойни маҳзун ҳолатда кўриб, ҳам ажабланди, ҳам хавотирланди.

Бахтиёрлик қаноти билан ота юртга учиб бориб, Абдулҳамидинг ўлими туфайли бу қанотлари киркилган ҳолда айрилиқ чашмасига қайтган ёшларнинг кўзларига дард булути тез-тез соя ташлайдиган

бўлиб қолган эди. Муштариининг кўзларида қувонч чўғлари бутунлай сўнганига, Гулузор бегимнинг эса қизи ҳасратида куйишига улар бефақ қараб туришолмас эди. Муштарий билан Гулузор бегим даврасида ўтиришганда ҳузурланиб кулиш ёки кишига қувонч берувчи гапларни гапиришдан тийилишга мажбур эдилар. Бундай мотамсаролик барчанинг рухини эзид турарди. Бугун Чўлпоной онаси билан ёлғиз қолганида «ҳаётни мотам тиконзорига айлантиromoқлик дуруст эмаслигини» айтиб, танбеҳ эшилди. Табиатан меҳрибон бўлган Гулузорбегимга бу ҳақиқат аён эди, бироқ, беваликнинг заҳарли шарбатидан азоб чекаётган қизини мотам саҳросидан ҳаётнинг нурли боғига қандай килиб тортиб олишни билолмай қийналаётган эди. Чўлпонойнинг гапини инкор қилолмагани баробаринда фикрининг тўғри эканини тан олиши шу боис ҳам мушкул эди. У қизини қийнаётган айрилиқ дардининг ҳомиласига таъсир этишидан ҳам кўрқарди. Чўлпоной синглисига ҳамдард бўла олмаётгандай туюлиб, ғазаб оташида унга бир-икки аччик гап айтишдан ўзини тута олмади, ҳатто «бирга яшамоқлик ҳасрати дилингни эзаётган ўлса, ҳасрат дўлидан қутулмок учун айри уйда яшамоқлик истагинг ўлса, ихтиёргингдир», деб юборишдан тилини тия олмади.

Ҳеч бир она ҳеч қачон фарзандига ёмонликнираво курмайди. Ҳатто, онанинг беихтиёр айтиб юборган қарғиши ҳам ўтмайди, дейдилар. Қайси она суюклисини бағридан чиқариб юборгиси келади. Жонини боғлаб турган икки қаноти ота юртга учганда Гулузор бегимнинг юраги ҳувиллаб қолмаганми эди?! Бу ҳувиллаган юрак соғинчнинг аччик суви билан тўлмаганмиди? Фарзандлари кемтик баҳт билан қайтдилар. Соғинч тарқ этди-ю, аммо қизининг мунгли кўзлари ҳаловатини олди. Чўлпоной буни ҳис этмайдими? Онаси билан синглисисининг дардлари унга бегонами?

«Ҳажр аро бу давр нетай мен жонни, жон нетсун мени, Ким эрур ҳар лаҳза мендин жон, мен жондин малул», дейилганидек, мотам кунлари сонсиз ҳасрат чодирига беркинган синглисини овутиш мақсадида қайсиdir китобда ўқигани: «Бугун катта бир дардинг бўлса, Раббингга юзланиб: «Эй Раббим, менинг оғир бир дардим бор», демагил, балки, дардингга юзланиб: «Эй дард, менинг Буюк Раббим бор!» дегил», – насиҳатини айтиб, бу дард абадий эмас, ўткинчилигини, ўрнини қувончга бўшатиб беришини таъкидлаган эди. Синглисига айтди, бироқ, «Тангри халқ этмиш мани гўё маломат чеккали», деб юрган онасига ақл ўргатишдан истиҳола қилди.

Онасининг бу гапи...

Дардкаш бўлиш ўрнига дарддан қочувчи шафқатсизми у? Бошқа уйга кўчиб ўтишдан осони йўқ. Лекин бераҳмлик тамғаси билан яшаш осонми? Бу юрт туб аҳолисининг одатига кўра, ота-онадан айри яшаш маъқул кўрилса-да, Чўлпоной бу урфни ҳеч маъқулламаган, бошқа уйга чикиб кетиш хаёлига ҳам келмаган эди. Айниқса, синглисини ҳасрат денгизи пўртанаасига ташлаб кетиш... «Бир қориндан туғилмоқ бор-у, бирга яшамоқ йўқ», деган гапнинг ҳаётга кўчишини ҳеч қачон истамаган.

Онаси...

...заҳарли ўққа айланган бу сўзлар унинг лабларидан беихтиёр учдими?..

Аллоҳ! Аллоҳ! Она қалбини бу телба ҳақиқатдан Ўзинг асрар!

«Шафқатсиз опа» деган шарманда рўмолини елкасига ташлаб чиқиб кетиш...

Чўлпонойни онасининг гапи маҳзун этмади, балки ҳаёлинни тўзитиб юборган шу гапларнинг ҳаётга кўчиши мумкинлиги ҳақидаги нохуш ҳақиқат даҳшатга солган эди.

Абдусамаднинг «сизга нима бўлди, хоним?» деган ширин саволига аччик жавобни энди қандай айт-

син? Эри бу саволни яна бир такрорлаганида йиғлаб юбормоғи аниқ эди. Бахтига эшик очилиб, онаси күринди. Гулузор бегим күёвини күриб, бевакт кира-ёттанидан хижолат бўлди. Унга бир кулимсираб, ортига қайтмоқни ихтиёр қилди-ю, бу иши янада нокулай бўлишини англаб, ичкарига қадам босди.

– Оқшомингиз хайрли бўлсин, – деди Абдусамад енгил таъзим қилиб.

– Хайрли акшамлар, – Гулузор бегим шундай деб күёвига қўл узатди.

Тошкентдан қайтишганда Чўлпоной онасига: «ул юрт урфида күёв ўғилга қўл узатиб кўришмак уят саналмиш экан», деб танбеҳ берган эди. Бу танбеҳни унугтган кезлари ўз одатига хилоф қилмай, кўришмок учун қўл узатарди. Ҳозир ҳам шундай бўлди. Қайнонаси билан қўл учидаги сўрашгач, Абдусамад қўлидаги китоб-қоғозларини кўйиб чиқиш баҳонасида хонасига йўл олди. Гулузор бегим ҳеч бир сўз айтмай, кизига яқинлашиб, уни кучоқлади. Сўз айтмаса ҳам, Чўлпоной онасининг узр сўрамоқчи эканини англади.

– Бийр данагинем! – деб пичирлади ҳасрат инган титроқ лаблар.

– Биз иккимиз... – деб пичирлади маъсума.

Муштарий туғилмасидан аввал Гулузор бегим тўнғичини турқ оналарига хос бўлган меҳр билан «бир данагинам» деб эркаларди. Бу одатни иккинчи кизи туғилганидан кейин ҳам давом эттиради. Унисини ҳам, бунисини ҳам шундай деб сўярди. Чўлпоной улғайганида онасига «Мен бир доне эмас, биз икидурмиз, анне», деб танбеҳ берганди. Тўйдан кейин, келинлик либосидаги қизларининг пешонасидан ўпиб, «бийр данагинем», деганида Чўлпоной: «Энди биз дўрт ўлдуқ, анне, қалбинийз дўрт парчаси», деб кулган эди.

Гулузор бегим қизини бағрига маҳкам босганича жим эди.

«Бир киши ўлгани билан хаёт тұхтамаслигини мен билмайманми? Аммо қайғу пўртанасидаги қизимни тортиб олишдан ожизман», – дейди меҳрталаб юрак.

«Буюк Аллоҳ иймон келтирғанлар ва сабрлилар билан биргадир. Бизга бир шарафли ҳадисни ўқиб бериб эдингиз: «Пайғамбаримиз алайҳиссалом ўғиллари Иброҳимнинг ўлими арафасида муборак кўзларидан бир неча томчи ёш тўкилди. У зот шундай марҳамат қилдилар: «Кўз йиғлар, қалб маҳзун бўлар, яъни бу табиий, башарий бир нарсадир. Иброҳимдан айрилганимиз учун биз чиндан ҳам қайғудамиз. Аммо Раббининг розилигига тескари бир оғиз сўз айтмаймиз». Бу шарафли ҳадисни ардокли синглимга ўзингиз яна бир эслатинг... Ҳасрат пўртанасидан уни биз тортиб ололмасмиз, сабр ва шукрдан қувват олган иймон кучи билан ўзи кутулиб чиқажак, инша Аллоҳ!» – дейди дардкаш юрак.

Узроҳлик унсиз тарзда яқунига етгач, Гулузор бегим қизининг пешонасидан бир ўпиб, бағридан бўшатди. Шундан сўнг онани ҳам, қизни ҳам нокулай аҳволга соловчи ғалати сукут уйғонди. Худди айтиладиган сўз йўқдек, бир-бирларига жимгина тикилиб қолдилар. Сўз бор эди, бироқ, Гулузор бегим гапира бошласа, титроқ лаблари йиғини тўсишдан ожиз қолуви мумкин эди. Чўлпоной буни англаб, ўзи сўз бошлади:

– Ойижон, бу тонг сабаҳ намозин ўқигач, мутолаага эҳтиёж сездим. – Чўлпоной эрининг уйига борганды қайнонасини «ойижон» деб ўрганган эди. Бу ёққа қайтгач, онасини дам тошкентчасига «ойижон», дам туркчасига «анне» дейдиган бўлди. Бунга айтарли аҳамият бермаган Гулузор бегим ҳозир ҳам эътибор қилмади. – Таnlамоқ ихтиёридан воз кечиб, қўлима илинмиш китобни олиб, варакладим. Не ажабки, сиз биза ўкуб берган Румайса ибратига кўзум тушти.

– Хаёлим паришон, бийр данагинем, қай бир ибратни айтурсан?

— Саҳобия Румайсанинг ҳикояси-да, эслиюрсиз, дедиларки: «Болам оғир бемор эрди. Бабаси сўкокда эркан чоғи, бола жон верди. Уни уй турыйа ётқуздум. Акшам намазидин сўнгра кўжам келгач, «ўғлимнинг аҳволи нечук», дея сўради. «Аллоҳа шукурлар», дедим-у, хушнут кўринмак чорасин килдим. Суҳбатлашиб ўлтуар эканмиз, «Кўшнимиз хўп ажабда», дедим. «Нечук?» дедилар. «Мендин бир омонат олиб эрди, бу оқшом қайтаришни сўраб эрдим, нушикурлик ила йиғламокка тушти», дедим. Эш: «Бу иши ножоиздур», дедилар. Шунда дедимки: «Бабаси, Аллоҳ биза чўх гўзал бир неъматин омонат бериб эрди, бу акшам қайтариб олмишдир», дедим. «Инна лиллаҳи ва инна илайҳи рожиуън», дедилар кўжам». Анне, пайғамбаримиз алайҳиссалом буюк сабр ва шукур соҳибаси ўлмиш Румайсан жаннатда кўрганларини марҳамат қилганлар-а?

— Оре, рост, — деди Гулузор бегим бошини эгиб. — Сабр ниҳоясиз бир неъмат ўлур... Мен бийр режани ихтиёр эттим: бабанг Париж сафарини якунлаб, бағримиза қайтганлариндин сўнгра Тошкандаги аннанг ила бабангга даъват таклифи юборурмиз, иншааллоҳ, лутфлари ила бизни сарфароз этажаклар. Уларнинг ташрифи Муштарийни ҳасрат пўртанасидин халос этгусидир. Ойижонинг, — Гулузор бегим бу лутфга урғу берив, кулимсиради, — бунда эканлар, Аллоҳ беражак набира неъматидан биргаликда кувонажакмиз. Манзура бегим жўжукни йўргаклаб, адажонинг, — Гулузор бегим кулимсираганича Тошкент шевасидаги бу сўзга ҳам алоҳида урғу берди: — кулоғига аzon айтиурини Аллоҳдан сўрайпман.

Бу янгилик Чўлпонойни эзаётган маҳзунликни ҳайдаб, кўзларида кувонч чироқларини ёқди:

— Инша Аллоҳ! Инша Аллоҳ! — деди у онасини кучоклаб. — Чўх гўзал ўлур, чўх гўзал!

Кувониш баробаринда қайнотасининг набира кулоғига аzon айтиб қўйиши пуч умид экани уни афсус-

лантириди. Афсуси қайнотасининг бенамоз эканидаги-на эмас, балки бу ҳақиқатни онасиға айта олмаслигига ҳам эди. Гулузор бегим набираси қулоғига қудасининг аzon айтмоғини ният килган экан, Аллоҳ бу ниятни күтлүғ ва муборак этиб, ўзи берган набира неъмати шарофатидан унинг бобосига ҳам ҳидоят берса не ажаб?

Бу он Чўлпонойнинг қалбида шу умид туғилди.

2

Қайнонасидан изн теккач, хонасиға кирган Абду-самад қўлидагиларни стол устига ташлаб, ўзи ором-курсига чўкди. Ҳозир уни она-боланинг сухбати қизиқтирмас, балки ўзини «Валерий» деб танитган малла йигитнинг гаплари хаёлини банд этган эди. Кутубхонадаги биринчи учрашувни тасодиф деб ўйлаган эди. Кейингилари... тасодиф эмас. Айниқса, бугунги-си... «Шу ердан ўтаётгіб сизни кўрдим-у, тўхтатдим», дейиши ёлғон. Қарашида макр зоҳир бўлган бу йи-гитнинг мақсадига Абдусамад кейинроқ тушунди.

Тўй ва Тошкент сафари сабабли билим олишда доктор Худоёрнинг танбехига лойик даражада оқсаётган Абдусамад дарсдан кейин яна кутубхонага бормоқликни ихтиёр этган эди. Йўлда Валерийга дуч келиши режасини бузди.

— Ҳамشاҳар, ўзимизнинг тошканчасига бир чойхўрлик қилиб отамлашмаймизми? — деди Валерий.

Абдусамад учрашувдан хурсанд эмаслигини яширмай, қошларини чимириди. Ундан тезроқ қутулиш мақсадида: «Тошканча чойхўрлик Тошкентда бўлади, бу ерда Бавария пивосини ичиб отамлашадилар», — деб йўлида давом этди. Валерий гўё унинг истагини англамагандай эргашди:

— Бу ҳам яхши таклиф, — деди кувлик билан, — Бавария пивоси ҳаммага ҳам насиб этавермайди.

— Мен таклиф этмадим. Пиво ҳам ичмайман.

— Биламан, сизларнинг «танимаганни сийламас», деган гапларинг бор. Лекин нотаниш одамга нисбатан уйғонган дастлабки нохушлик алдамчи бўлиши ҳам мумкин.

— Мен кутубхонага шошяпман, дарсларим кўп, — деди Абдусамад, энди узр оҳангидা.

— Менинг дарсларим сизнидан ҳам кўп. Лекин кутубхонага бораверишдаги турк қаҳвахонасига кириб чиқсан, икковимизга ҳам фойдали бўлади, ишонинг.

— Фойда? — деб ажабланди Абдусамад.

— Ҳа, моддий эмас, икки илм одамининг сухбатидан ҳосил бўладиган маърифий фойдани назарда тутяпман.

Бу гапдан кейин Абдусамад унинг таклифини қабул қилишга мажбур бўлди. Немислар одатига хос равишда соатига қараб олди-да, «майли, аммо ўттиз дақиқа вакт ажратаман», деб унга эргашди.

Ойнаванд қаҳвахонада одам сийрак эди. Валерийнинг таклифи билан улар дераза томондан эмас, ўйғонлиги бир қулоч келадиган думалок устуннинг панасидаги столдан жой олишди. Хизматчи яқинлашиб, «хуш келдингиз, муҳтарам афандим», деб лутф килгач, Валерий мезбон мартабасини эгаллаб:

— Битта пиво ва битта қаҳва, — деб буюрди.

— Бизда пиво бўлмайди, афандим, — деди хизматчи узрли оҳангда.

— Қизиқ... қизиқ... бренди ҳам йўқдир?

— Афандим, бизда маст қилувчи ичимликларнинг ҳеч бири йўқ.

Абдусамад турк қаҳвахонаси йўл устида бўлгани учун шу ерга таклиф қилди, деб ўйлаган эди. Валерийнинг ичкарига кириб, бир назар ташлашдаёқ пана жойни танлаганидан бу ер унга яхши танишлигини сезди. Қаҳвахонада ичкилик ичилмаслигини билгани ҳолда буюртма бериши уни янада сергаклантирди.

— Мен нима дейишни билмай қолдим, сиз буюра колинг, — деди Валерий.

— Пўртахўл шарбатидан иккимизга биттадан, — деди Абдусамад гапни қисқа қилиб.

— Пўртахўл... пўртахўл... — деди Валерий ниманидир эслашга ҳаракат қилгандай, — Ҳа, демак, апельсин. Гўё апельсин шарбатини ичгандай бўламиз. Ажабланяпсизми? Шарбат пўртахўлники эканига ишонасизми? Дунёда неча юз минг қаҳвахона бор? Уларда неча миллиард одам пўртахўл шарбатини ичиб ўтирибди? Миллион-миллион литр шарбат чиқариш учун неча миллиард тонна апельсин керак бўлади, ҳисоблаб кўрганмисиз?

— Бу мени қизиқтирумайди.

— Нега? Ошқозонингизни аямайсизми? Ахир бу «шарбат» деганингиз кимёвий моддалардан иборат эканини биласиз-ку?

— Мен шарбатхўр эмасман. Бўкиб ичганимда ошқозонимга жабр бўларди.

— Шарбатхўр эмассиз, пивохўр ҳам эмассиз, — деб кулди Валерий, — демак, фариштасиз!

— Илмий сұхбатингиз шуми? — деди Абдусамад энсаси қотганини яширмай.

— Одамларни алдаб, қонини кимёвий моддаларга тўйдиришнинг имгла даҳли йўқ, деб ҳисоблайсизми? Ҳа, майли, унда буни сұхбатимизнинг кириш қисми, деб кўя қоламиз. Сизни сұхбатга чорлашимнинг сабаби — бу ерда юрагим тарс ёриладиган даражада сикилиб кетди. Аслида илмий ишимни ўзимизда килаверсам ҳам бўларди. Оғир ионлар физикасими билан немислардан эмас, немислар биздан ўрганса, адолатлироқ иш килинган бўларди. Мен Кембридж университетига боришни истаган эдим. У ердаги электронларни тезлаштириш лабораторияси бизницидан яхшироқ, ниманидир ўрганиш мумкин. Лекин Москвадаги амалпарастларнинг ҳисоботида «ёш физик олимлар малака ошириш учун Германияга юборилди», деган катакча бор. Биз ўша катакчаларни тўлдирувчи жонсиз тошчалармиз. Бир нарса билан сира-сира му-

роса қила олмайман: биз буларни урушда енгган эдик. Ер юзидан суреб ташлашимизга оз қолувди. Қирқ беш йил тарих учун бир зарра. Шу зарра оралиғида биз паст кетиб, улардан ўрганишимиз керакми?

Савол Абдусамадга берилган бўлса-да, Валерий шарбат келтириб қўйган хизматчига каради. Абдусамаднинг шарбат ичгиси йўқ эди, шу сабабли ёқимсиз ҳамсуҳбатининг кўнгли учун бир ҳўплаб қўйди-да:

– Бу сизнинг дунёқарашингиз, мен бошқача фикрдаман, – деди. У гарчи кутилмаган сұхбат учун яrim соат вақт ажратган бўлса-да, Валерийнинг гапларидан безиб, тезрок туриб кетишни истаётган эди.

– Тўғри, улар урушдан олдин биздан салгина олдинда эди. Масалан, аэродинамикада. Тарелка кўринишидаги учувчи жисмни бошқариш қийинлигини биздаги баъзи довдирлар ҳалигача тан олишни исташмаяпти. Гравитация нималигини билмайдиган олимлар қайси осмондан ёғилган, билмайман. Ҳа, айтмоқчи, урушдан олдин Германияда аэродинамика бўйича яширин ишлар олиб борилган, уруш пайтида ҳам тўхтамаган. Тадқиқотлар олиб борилган жойга «янги Берлин» деган ном берилгани маълум, Гитлернинг аҳволи танглашганда минглаб асиrlар, олимлар қаергадир кўчирилган. Аникроғи, улар изсиз йўқолган. Одамлар ҳам йўқ, тадқиқот натижалари ҳам йўқ. Нега шундай?

– Буни тарихчилардан сўранг.

– Улардан сўрашнинг фойдаси йўқ. Чунки тарих ўзгаради, тарихчиларнинг фикри ҳам ўзгаради. Лекин биз ўзгармаймиз...

Бу гапни эшитиб енгил сесканди. Бир неча ҳафта илгари Москвада профессор Зиновьев унга айнан шундай деган эди:

«Тарих ўзгаради, тарихчиларнинг фикри ҳам ўзгаради. Лекин улар ўзгаришмайди. Сен мен билан баҳслашмагин-у, агар чинакам олим бўламан десанг, сиёsatдан узоқроқ юр. Юртдошларингнинг давраси-

дан қоч. Ўқиши бил, бошқа ҳеч нарса билан ишинг бўлмасин...»

«Сиёсатдан узок юр, юртдошларинг даврасидан қоч», деб масалаҳат бериш осон. Сиёсатга ўзининг ҳам тоқати йўқ, қанча узоклашса, ўзи шунча роҳатланади. Юртдошлар даврасидан узоклашишга ҳаракат қилиши ҳам мумкин, лекин мана бу одамнинг шилқимлик билан ёпишиб олишидан қандай қутулсин? Абдусамад шарт ўрнидан туриб кета олмади, бундан фойдаланган Валерий гапини давом эттирди:

– Сиз бу ерга анча ўрганиб қолдингиз. Ҳатто иккинчи ватанингизга айланиб ҳам қолгандир?

– Ватан иккита бўлмайди.

– Олқишлийман, сизни, фақат олқишлийман. Лекин кишининг атрофида ватандошларининг кўплиги ҳам аҳамиятли. Германияда тўрт миллионнинг нариберисида турклар яшайди, биларсиз?

– Мен турк эмасман. Германияда руслар, украинлар, белоруслар ҳам кўп.

– Ха кўп, лекин улар бизни одам ўрнида кўрмайдилар. Масалан, уларнинг ҳеч бири мени күёв қилмади, – Валерий шундай деб муғомбirona кулди. – Доктор Худоёрдай устозим ҳам йўқ. Профессор Строгановни эшигандирсиз? Бултур физика соҳасида Нобель мукофотига қўйилган эди. Шу одам урушда онасига қўшиб бу мамлакатга ҳайдаб олиб келинган. Онаси немисларга чўрилик қилди. Ўзи бу мартабага эришди. Мен кўришмоқчи эдим, қабул қилмади. Менинг нима айбим бор? Урушни мен бошладимми? Отасини жангда мен ўлдирдимми? Онасини кулликка мен ҳайдадимми?

Абдусамад унга тикилиб, «нега норозиликларини менга дастурхон қилиб ёяпти?» деган саволга жавоб излади. Кейин «мақсадсиз гаплар», деган тўхтамга келиб, туришга чоғлангандай қимирлаб қўйди:

– Суҳбатимизни якунласак ҳам бўлар, мен шошяпман, – деди соатига қараб олиб.

Валерий ҳам соатига қаради:

— Ярим соатга ваъдашганмиз, — деди айёrona қўз кисиб. — Мен доктор Худоёрнинг ишлари билан танишиб чиқдим, устоз масаласида Худо омадингизни берибди.

— Доктор Худоёр — биофизик, англашимча, сиз ядро физикасига яқинсиз, устознинг ишлари нимага керак бўлиб қолди? — деб сўради Абдусамад сергакланниб.

— Тўғрисини айтайми? — Валерийнинг қараши кескин ўзгарди, кўзларидаги қувлик ўрнини зулм учқунлари эгаллади, энди у ўзининг асл қиёфасига кирган эди. — Доктор Худоёрнинг ишлари нейтрон бомбага алоқадор, деб йўлабман.

— Хўш, аникладингизми, алоқадор эканми?

— Буни кутубхонада ўтириб аниклаб бўлар эканми?

— Унда нима учун китоб титдингиз?

— Менга қизикувчанлик касали ёпишиб қолган, шундан ҳеч кутула олмаяпман. Яқинда сиз Штатдан келган профессор Яквалхўжа билан учрашибсиз, жуда омадли одамсиз-да!

— Омадим нимадан иборат экан? — деди Абдусамад, асабийлаша бошлаганининг ишораси сифатида қошлирини чимириб.

Ҳамсуҳбатида асабийлик алматининг пайдо бўлиши Валерийни кувонтириди.

— Худди билмагандай гапирасиз: агар Штатда ўнта улуғ физик бўлса, биттаси ватандошингиз доктор Яквалхўжа, иккита бўлса, биттаси шу одам. У билан яқин танишлигингизнинг ўзи бир баҳт.

— Мен у одам билан таниш эмасман.

— Камтарлик қилманг... Бундай одамлар билан танишиш менинг орзум. Орзуимни амалга оширишга ёрдам бера олмайсизми? Ўзбек бўлмасам ҳам, ҳамشاҳарлик ҳурматим бордир? Мен у зотнинг бошини кўп қотирмайман. Оғир ионларни тезлаштиришга доир бир-икки масалани сўрайман халос. Агар саво-

лим ҳарбий ёки давлат сирига алоқадор бўлса, жавоб бермасалар ҳам майли...

Абдусамадга энди унинг мақсади очикроқ аён бўлган эди. Бу ердан тезроқ кетишни истаб, ўрнидан турди:

– Мен у одамни бир марта кўрганман, саломалигим йўқ.

– Лекин қайнотангиз билан алоқаси яхши. Қайнотангиз Париждан қайтганларидан кейин уларни бир финжон қаҳвага таклиф этмоқчиман, – деди Валерий унга эргашиб.

– Қаҳва ичгани Америкадан келиб-кетадими? – деди Абдусамад қўпол оҳангда.

– Бу муҳтарам зот ҳозир шу ерда. Мюнхендан юз чакиримча нарида сиз билан мен яқинлаша олмайдиган бир илмий даргоҳ бор. Қайнотангизнинг биргина қўнғироқлари кифоя...

– Хайр, илмий сұхбатимиз унча қовушмади.

Абдусамад шундай деб кўча томон шошилди.

– Ўйлаб кўринг, менинг илтимосимни ерда қолдирғанлар кейин афсуслатаб юришган.

Абдусамад профессор Зиновьевнинг бекорга огохлантирганини эндиengladi. Валерийнинг кейинги гапи таҳдид оҳангидаги эди. Ҳамонки, таҳдид қилишдан қайтмадими, энди ундан қутулишнинг иложи йўқ...

Ўйга қайтиб, ёлғиз ўтирган Абдусамад малла йигитнинг ҳар бир гапини қайта-қайта эслаб, таҳлил қилиб, хулоса чиқара бошлади. Унинг кимлиги маълум, мақсади ҳам аниқ...

«Ғарбий Германия Совет учун душман эди, эшиклар тақа-тақ берк эди. Муносабатларни юмшатишдан сабаб ўз одамларини кўпроқ ишга солишимди? Бизнинг бу ёкка келишимизга ҳам жиддий тўсиқ бўлмовди. Шу мақсад билан йўлимизни очишганмиди? Энди жосуслик қилишим керакми?»

Абдусамад боши узра янги бало булутлари тўп-

ланаетганини сезиб, нима қиларини билмай, ганги қолди. Москвадаги устози: «Энди бир нарсани миянгга күйиб ол: биология билан физика бир нуктада бирлашиши мумкин, аммо илм билан сиёсат бир қозонда қайнай олмайды, тушундингми?» – деб таъкидлаган эди. Тушунишга-ку, тушунади. Сиёсат қозонида қайнатиб, куйдиришни истайдиган кучлар бор бўлса, у нима қилсин? Куйиб, ўлишдан бошқа чорани кўрмаяпти-ку?..

Эртасига кутубхонага боргиси келмади, малла йигитта дуч келишдан чўчиди. Индинига ҳам бормади. Кейинги куни уни доктор Худоёр йўклади. Кайфияти яхши бўлса, доктор Худоёр кулимсираб: «қани, биофизика гулшанинда қандай чечакни кашф этдинг?» деб кутиб оларди. Бу сафар кўнгли ғаш бўлгани учун шогирдини ўйчан қиёфада қарши олди. Рўпарасига ўтирган йигитга савол назари билан тикилди-да:

– Кимлар ила шарбатхўрлик қилиб юурсан, билиюрмисан? – деб сўради. Бу саволни эшитиб гангиб қолган Абдусамад жавоб беришга улгурмай, яна сўради:

– «Аифклерунгс» деган идорани билюрмисан?

Абдусамад ўзини нотаниш қопқонга тушиб қолгандай ҳис этиб, жавоб бериш ўрнига устозига «мени кутқаринг», дегандай нажот назари билан қаради.

XII б о б

1

Асадбек янги қанотларининг дастлабки парвози ҳақидаги қисқа баённи Жамшиддан эшитиб, ўйланиб қолди. Бир вактлар жавлон урган оламидан у анча узоқлашган, баъзи-баъзида қозиликка доир муаммо туғилса, Ҳайдарнинг зиммасига юклаб кўярди. Ҳозир

Жамшиддан эшитганлари энсасини қотириб, пешонасины тириштириди.

— Жуда-а майдалашиб кетишибди-ку, — деди у афсусли оҳангда.

Жамшид буни йигитларига берилган баҳо деб ўйлаб, ёнларини олмоқчи бўлди:

— Менам шунаقا дедим. Тарзанни анча уришдим...

— Думбулвойларингни айтмаяпман. Йигитларинг ғўрликка ғўр. Уларинг одам бўлгунича анча қовун пишиғи бор. Ҳозирги қиморбозлар майдалашиб кетишибди, шунга ғашим келди. Тикадигани беш-үн сўм пул-у дабдабаси оламни бузади. Керилишидан ит ҳуркади-ю, лекин зўрлиги кўринмайди. Калҳожининг килиғини Ҳайдар аканг билмаган эканми?

— Эшитмагандирлар?

— Бу тахмининг тўғри, Ҳайдар эшитиб қолганида буларинг оналарини кўрарди. Эҳтимол Маҳмуд аканг билгандир, нима дейсан?

— Балки...

— «Балки» эмас, аниқ! Эшитган-у, «битта ўлик етарли», деб босди-босди қилган, тўгрими? Яна нима демоқчисан?

— Калҳожи келибди, сизга арзи бор шекилли?

— Шунаقا дегин... — Асадбек Жамшидга синовчан тикилди: — Арзини эшитайми?

— Эшитсангиз, талтайиб, эртага чориғи билан тўрга чиқиб ўтирадиган бўлиб қолади.

— Шунақамикин? — хожасининг овозидаги киноя оҳангни Жамшиднинг бошини эгди. — Балки Тарзан ошириб юборгандир, узр сўрашим керакдир? — Жамшид бошини хам қилганича тек тураверди. Мутеларининг айбдор ҳолатини хуш кўрувчи хожа эса энди ғазабли оҳантга кўчди: — Ўзинг ҳам ғўрлик қиляпсан, бола! Ҳайдар аканг бунақалар шаҳарда кўриниши билан келган жойига кирғизворарди, менинг бошимни қотирмасди.

— Сурга айтаман...

– Сен бундай қил: умид билан келибдими, Ҳайдар акангнинг қозихонасига борсин. Қозихонада... майли, Сур билан отамлашсин. Сурга тайнинла, ўлдирмасин. Лекин шундай киңисинки, менинг одамларимдан шикоят қилиш бошқа бирон бир калланинг тушига ҳам кирмасин.

Жамшид «вазифани англадим», деган маънода қўлини кўксига қўйди, аммо жойидан жилмади. Асадбек унинг яна гапи борлигини фаҳмлаб, «Яна дардинг борми?» деб сўради.

– Жамолбек акани шу ерга олиб келайми, ўзингиз гаплашасизми?

Асадбек аъёнига савол назари билан тикилди. Жамшид «яна қовун туширдим шекилли», деган ҳадикда нигохини олиб қочди. Тарзан қиморда ютқизилган болаларнинг изи топилганини айтиб, Жамолбекнинг номини тилга олганда «Ҳозирча унга яқинлашмай турларинг, Бек акамнинг олдиларидан ўтайлик», деган эди. Жамолбек етти иқлимга машхур қиморбоз бўлмасада, катта-кичик давраларда эсланиб туриларди. Жамшид уни кўрмаган, лекин Ҳайдар акаси билан Маҳмуд акасининг суҳбатларида бир неча марта унинг номини эшитганди. Айниқса, Садир қиморбоз изсиз йўқолган кезлари Ҳайдар акасининг «Жамол сичқоннинг инини ижарага олиб, тухум босиб ётибди», дегани ёдида. Акалари яхши билган қиморбозга хожасининг муносабати қандай экан, буниси Жамшидга қоронғи эди. Шу боис, йигитларни тўхтатиб, саволни ҳам эҳтиётлик билан берганди.

– «Жамолбек» дегин? У тўққиз қайтган энди «бек» бўлиб қолибдими? Ваъдасида турмайдиган тутуруқсиз бўлгани учун ҳамма уни «тўққиз қайтган», деб, одам ўрнида кўрмасди. Бир ошнам пайтавасини унинг бошига дурра килиб ўраб, «Тановор»га ўйнатган эди. Шу хотинчалишни сен «бек ака» дединг-а?

Бу воқеалардан бехабар Жамшид энди нима де-

син? Бошини эгиб тураверди. Ҳамонки, эгилган бошни қилич кесмас экан, Асадбек ҳам унга раҳм қилди:

– Ҳайдар акангнинг ўрни билингти, – деб сукут қилди. Жамшид бу гап шунчаки тасодиф билан такрорландими ё унинг замирида армон бормиди, англай олмади. Асадбек эса давом этди: – Беклик қанақа бўлишини курсатиб қўйиш керак. Ўлдиришмасин-у, тавбасига таянтиришсинг.

Бу гапдан кейин Жамшид хожасига савол назари билан қаради.

– Гапимга тушунмадингми? – деди Асадбек бу қарашнинг маъносини англаб.

– Тушундим-у... фақат...

– Ланжлик қилма, хотинчалишлик сенга ярашмайди.

– «Ўлдирмасин», дедингиз... Улар шу пайтгача та-лашган, алдашган, уриб-тепишган-у, ўлдиришмаган. Бу томондан кўнглингиз тўқ бўлсин.

– Ўзингнинг кўнглинг тўқми?

– Ҳар ҳолда... шунақа гап очганимда Тарзан «одамнинг қонидан ҳазар қиласман», деганди. Мен унга ишонаман.

– Одамнинг қонидан ҳамма ҳазар қиласди, – деди Асадбек ўйчан. – Ҳайдар аканг ҳам ҳазар киларди. Ўз қўли билан бирорни ўлдиришмаган... Лекин баъзи бирорвлар Азроилни кўрса кўркмасди-ю, Ҳайдар акангга рўпара келса, жони чиқиб кета қоларди. Шу пайтгача бу думбулвойларинг қондан ҳазар қилган бўлса, энди ўзини курсатиш учун бир-икки каллани узиб ташлашдан тоймайди. Агар шуни ҳисобга олмасак, иккаламиз ҳам қамоқда чириб кетамиз. Сен бундай қиласан: Сур қиморга уста, деганимидинг?

– Ҳа... бозорда бир машина картошканинг пулини яrim соатда шилиб олганини кўрувдим.

– Тўққиз қайтганинг даъвоси осмонда бўлгани билан уста қиморбознинг тупугини ялашдан бошқага ярамайди. Лекин шу туришида ҳам бозордаги лақма-

лардан дурустроқ эканини ҳисобдан чиқарма. Болалар масаласида сиқувга олишдан аввал, қўлидан келса, Сур уни қиморда бир эзид қўйсин. Чоғи қелмаса, ўйинни чўзмасин. Сен менга Жамолни эслатмадинг, мен уни танимайман, тушундингми?

Жамшид бу амри Тарзанга етказганида Ахтам зиммасига ёқимли вазифа юкланганини билиб, мамнунлик билан тиржайди. Айниқса, Жамолбекнинг бошига бир пайтлар пайтава ўралганини эшитганида роҳатланиб кулди.

Ўша куни сўраб-сuriштириб, Сайрамда катта ўйинга тадорик борлигини аниқлашди.

– Радиони эшитиб туринг: «Сайрамга чоригини судраб борган Ахтам уйига «Ахтам бой» бўлиб қайтдид», деган хабарни эшитсангиз, юрагингиз ёрилиб кетмасин, – деди у.

– Катта кетма. Жамолбек аканг картошка бозорида сенга лакқа тушадиган овсарлардан эмас, бунақа ишларнинг пири бўлиб кетган, ўрисча қилиб айтганда, «қиморбозликда кўп итларнинг гўштини еб юборган».

– Бунақа гапни эшитганман, «кўп итларнинг гўштини еб», керилган қиморбоз охирида итдай хор бўлишини билмайсизми?

– Ёнларингга яна уч-тўрт одам олларинг. Ўйин катта бўлса, кўнга кўп жонлар ҳам тикилиши мумкин.

– Керак эмас...

– Керак! – Жамшид худди хожаси каби қатъий тарзда унинг гапини узди. – Маҳмаданалик қилма! Ўйин пайтида ҳам, кейин ҳам гапни чувалаштирма. Бек ақамнинг номларини тилга ҳам олма, яқинлигингни бирор бўлмасин.

Бўлажак ишнинг хатарини Тарзан англаб, «чизган чизигингиздан чиқмаймиз», дегандек қўлинин кўксига кўйди. «Бу дунёда бехатар иш йўқ», деб хисобловчи Сур эса, шеригининг хавотирини «нозик-ниҳол ипак йигитнинг навбатдаги кўркоклиги», сифатида баҳолади.

Сайрамда катта ўйин бўлишидан милиция хабар топгани учун қиморхонани Ўтрор томонга кўчиришга тұғри келди. Чала қурилиб ташлаб қўйилган беш қаватли иморатнинг ертўласи шоҳона безатилмаса-да, қиморга мослаб жиҳозланди. Катта шаҳарлардан кутилаётган қиморбозлардан дарак бўлавермагач, ўйинни кичикрок даврада бошлайверишга қарор қилиниши Тарзан билан Ахтамнинг даврага кўшилишларини осонлаштириди. Аввалига бу икки нотаниш келгиндини яқинлаштиришни исташмади. «Жамолбек акамизга қуюқ саломимиз бор», дейишгач, ичкарига хабар қилишиб, ижозат текканидан сўнг омонат қурилган эшикдан қўйишиди. Даврада ҳал қилувчи сўзни айта олиш ҳуқуқига эга Жамолбек бу овлоқни излаб топиб келган икки йигитга шубҳа билан қаради.

— «Садирнинг жиянимиз», дебсанларми? — деб сўради у.

— Ҳам жияни, ҳам шогирдимиз, — деб аниқлик кирилди Тарзан.

— Қизиқ... бунақа кетворган жияnlари борлиги ни билмаган эканман? — деди Жамолбек улардан кўз узмай. Бу қарашдаги «мени лақиллатмоқчимисанлар?» деган маънони уққан Тарзан пинагини бузмай, ҳазил оҳангода жавоб берди:

— Катта бувамиznинг ўн тўртта хотинлари бўлган экан. Садир тоғамиznинг адлари еттинчи хотиндан, бизнинг адларимиз ўн тўртингчисидан туғилган экан. Биз супрақоқдимиз. Садир тоғамизга жияnlигимизни кўчалари аспал бўлганидан кейин билиб қолдик.

Садир қоморбоз кўчасига кўмилиб, усти асфальтланиб ташлаганини даврадагиларнинг кўпи билмагани сабабли бу гапга эътибор беришмади. Жамолбекнинг эса эти бир жимиirlаса-да, сир бой бермай, оҳангини ўзгартирмади:

– Садир хотин зотига ўч эди, бобосининг қонидан ўтган экан-да?

– Қиморбозлик ҳам ўтган. Катта бувамиз Тошканда ошиқ тепсалар, Бухоронинг миноралари зириллаб турар экан.

– Қара-я!.. Сенлар ҳам ошиқ тепасанларми? Агар шунақа бўлса, бу ерга келиб, адашибсанлар, ошиқ тепадиган жой бошқа.

– Адашмадик. Биз картада ташлашамиз. Хохласангиз проферанс, истасангиз покер ҳам ўйнайвемиз.

– «Покер», дегин? Садир покер-мокерингни билмасди.

– Тўғри, билмасдилар. Акам, – Тарзан шундай деб Ахтам томонга қараб қўйди, – Магадандаги курортга борганида америкалик билан бирга бўлиб қолибди. Америкаликка ошиқ тепишни кўрсатган экан, у акамга покерни ўргатибди. Халқаро тажриба алмашинув шунақа бўлади-да. Ҳозир Лос-Анжелесдаги казиноларда маҳсус ошиқтепар бўлимлар очилибди. Уч ҳафтадан кейин ўша ерда байналхалқ ўйин бўлади. Борай десак, йўлкира чакъпти. Бугун йўлкирани шу ерда ишлаб топмоқчимиз.

Бу даъвони эшигтан қиморбозлар бир-бирларига маънодор қараб олишиди.

– Биз билан ташлашиб, йўлкира топмоқчими-санлар? – деди улардан бири ўрнидан туриб. – Белларинг чидайдими, чоғларинг келадими?

– Кучаниб, чатаноқларинг йирилиб кетмайдими? – деди иккинчиси заҳархандалик билан.

– Қани, чўнтакларингни кавлаб кўрларинг-чи? – деди Жамолбек, уларни кувватлаб.

– Чатаноқларимиз бақувват, хотиржам бўлинглар, – Тарзан шундай деб, Ахтамга қаради. У эса хотиржам равишда чўнтагидан битта ўн сўмлик чиқариб, стол устига кўйди.

– Шунинг ўзими? – деди Жамолбек, кейин пичинг қилди: – Икки кишига кўплик қилмайдими?

– Бошлаб олишга кўплик қиласди, – деди Ахтам унга ўткир нигоҳини қадаб. – Бу иккиват пул, ўйин бошланиши билан туғишини бошлайди. Итдан ҳам кўп болалайди. Кейин... мен ўйнайман, укахоним, пул тахлаб ўтиради. Унинг бармоқчалари пул санашга мосланган.

Чакирилмаган йигитларнинг сурбетликлари ўтирганларнинг ғазабини кўзгатиб, уларни тепа-тепа кўчага суриб чиқаргилари келди. Лекин Жамолбекнинг хотиржамлиги уларни бу ҳаракатдан тўхтатиб турди. Жамолбек бармоқларини қисирлатиб, бир оз ўйланди. Бурама гапларга ўралган маъноларни тушунишга уринди. Йигитларнинг аниқ мақсадларини англай олмаса ҳам, уларни тепиб чиқаришга шошилмади. Ўйинга кўйишга қарор қилди:

– Ўтирилмаган, – деди Ахтамга рўпарасидаги бўш жойни кўрсатиб. – Пулнинг иккиватлигини энди эшишим. Агар шу рост бўлса, туғиши пайтида ўлиб қоладиганлари ҳам бор. Демак, шу иккиват ўн сўмингга ишониб, биз билан покер ўйнамоқчимисан?

Ахтам жавоб беришга улгурмай, Жамолбекнинг ёнида ўтирган одам тўнғиллаб, гапга аралашибди:

– Покер-мокерларингни йўқот. Ўзимизнинг билганимиздан қолмайлик. Покер ўйнагиси келаётган бўлса, Америкасига борадими ё ундан наригами, бора-версин.

– Узоққа бориб нима қиласди? – деди яна бири. – Ана, Сариоғочда казино очишибди, беш-олтита думи кесилганлар покер суроётганмиш.

– Халқ кўнмаётибди-ку, нима қиласмиш? – деди Жамолбек яна пичинг билан.

– Халқ нима деса шу-да! – деди Ахтам ҳам шундай оҳангда. – Устасига фарқи йўқ, кўлимга карта тушса бўлди, сураверман.

– Бунақа мард қиморбозни анчадан бери кўрмаган

эдим, – деди Жамолбек. – Мардлик қилиб келибди, биз ҳам тантилик қилайлик. Иккиқат пулини бир қўлда ютқизиб, шумшайиб кетмасин, кўнни катта қилмаймиз, эллик тийиндан тикамиз.

– Чақани қаердан оламиз, бир сўмдан бўлаверсин, – деди Ахтамнинг ёнида ўтирган қиморбоз. – Укахон, бир сўм оғирлик қилмайдими?

Қиморбозлар бир-бирларига маънодор қараб, жилмайганларича ўртага бир сўмдан ташладилар. Ахтам нодон, анқовлардан эмас, уларнинг масхара қилмоқчи бўлганларини англаб, мийигида кулиб қўйди. Тарзан даврадан чекиниб, деворга суюниб турди.

– Нега четлашдинг? – деди Жамолбек. – Иккиқат пулларинг түқсан болаларини санаб олмайсанми?

Бу гапдан кулган қиморбозлардан бири пичингни давом эттири:

– «Туғолмай ўлган иккиқат пулга жаноза ўқимайсанми?» денг...

Захарли бу ҳазиллардан ғашлари келса-да, икковлари ҳам жилмайиб қўйиш билан тийилдилар. Ахтам уч гал кетма-кет ютқизди. Қиморбозлар уни очиқчасига калака қилаверишгач, у ҳунарини ишга солди. Оқибатда, ўз таъбири билан айтганда, «иккиқат пули туға бошлади». Даврадагиларнинг чеҳралари жиддийлашиб, масхарани бас килдилар. Кўп ўтмай, очиқчасига ғазаблана бошладилар. Борини ютқизган одам Ахтамни ғирромда айبلاغанда Жамолбек ўртага тушиб, «исботинг бўлмаса, гапирма», деб уни қайириб ташлади. Шундай айблов бўлишини сезгани учун Ахтам енгларини шимариб ўйнарди. Енгиға карта яширмаса, ўзи билан карта олиб келмаган бўлса, бегона жойда шунақа кўп ютиш мумкин эканми – ўтирганлар шунга ҳайрон эдилар. Жамолбек унинг ҳаракатларини синчиклаб кузатиб, ғайри оддий бирон нарсани сезмагач, маҳоратига тан берди-ю, бу йигитнинг шунчаки пул ютиш максадида келмаганини фаҳмлаб, эҳтиётлик билан ўйинни давом эттириди. Пулларини ютқизганлар

бир-бир ўйиндан чиқавердилар. Шунда Жамолбек йигитнинг битта мақсадини сезди: «Охирида мен билан бирга-бир ташлашмоқчи, бор-йўғимни шилиб олмоқчи, демак, мени атай қидириб келган... Нега?»

Ана шу «нега?»га жавоб тополмай ичи күйди. Даврада уч киши қолишганда Ахтам ҳаддидан ошди: бўлар-бўлмас гаплари билан Жамолбекнинг жигига тегаверди. Айниқса, ютилган пулларни ўзи томон сураётганда «Афандининг гапи тўғри, бу дунёда ҳамма ўғри», деб хиргойи қиласвериши тоқат жомини тўлдириб, тошириб юборди. Ёнидаги пулнинг ярмидан кўпини ютқизган Жамолбекни ғазаб ўти ўз бағрига олди. Бутун жону жаҳонини тикиб бўлса ҳам бу сурбет боланинг абжағини чиқариб ташлашдан ўзга нарсани ўйламади. Махоратда оқсаса-да, тажрибаси кўп бўлган бу қиморбоз керакли чегарада ўзини тұхтатиб қолиши лозимлигини унуди. Учинчи қиморбоз «йўлкирага етарли пулим қолди», деб ўйиндан чиққанда Тарзаннинг бирдан ғойиб бўлиб қолганини Жамолбек сезмади. Ташқарига чиққан Тарзан ҳаялламади. Унинг изидан хонага кўзлари чақчайган икки бақувват йигит кириб келгач, ютқизиқ аламини тотиб ўтирганлар қиморхона устида зулм булути тўпланаётганини англаб, секин-секин чиқиб кетдилар. Охирги пулини ўртага ташлагандан кейингина Жамолбек атрофга қаради: қиморбозлар йўқ, ўзи билан келган ҳимоячи йигитлари ҳам кўринмади. Хонада Тарзан билан икки нотаниш йигит кўзарини чақчайтириб унга тикилиб туришибди. «Йигитларим қани?» деб сўрамади, «буларнинг шум нияти борлигини сезган эдим, нега арконни узун ташладим?» деб ўзини лаънатлади. Бўлар иш бўлган, энди Худога нола қилишининг фойдаси йўқлигини билиб, «шартингни айт», деб Ахтамга қаради. Ахтам «пачағингни чиқариб ташладим-ку!» дегандек тиржайди.

– Уч кўл ташлаймиз, шу пулларингга уйимни тикаман, – деди Жамолбек алам билан.

– Тўғри қиласиз, уй топилади, обрў топилмайди. «Бир Мурда келиб, Бекнинг иштонигача ютиб олибди», деган иснод ёмон.

– «Мурда» дедингми?

– Ҳа, Магаданда менга шунаقا от беришган. Сал хунукроғ-у, аммо ўзимга мойдек ёқади.

«Сени шу ерда тобутга тикиб, исмингни жисмингга мос килиб қўйишим керак», деган ният хаёлини ёритди-ю, аммо тилига чиқармади. Ҳимоячи йигитлари шу хонада шай турганида ҳам, дилидагини айтишга журъат этарди. Ҳозир эса... орзу бор, унинг амалга ошуви эса мубҳам.

Ахтам тантилик қилиб, уч мартасида ҳам карта сузиб, тарқатиш ҳукуқини Жамолбекка инъом этди. Йиллар давомида қад ростлаган данғиллама уй олти дақиқада Ахтам ихтиёрига ўтди. Жамолбек бошини эгди-ю жим қолди. Ғазабдан бағри ёнаётганини тез-тез нафас олиши ошкор этди. У уятдан эгмади бошини, нафрат ва алам юкини кўтара олмади.

– Дастурхонни йиғаверамизми, яна кўз ёшидан ивиб кетмасин, – деди Ахтам заҳархандалик билан.

Кейинги гап Жамолбекнинг танасига киличдек урилиб, қоқ иккига ажратиб ташлагандай бўлди.

– Ўзингдан кетма, бола, ўйин ҳали тугагани йўқ... – деди Жамолбек ҳансира.

– Ким ўйин тугади, деяпти? Энди қизияпти-ку? Нимани тикасиз, акахон? Фақат... илтимос, хотинингизни тикманг, «Мурда бир туршак кампирни ютиб олибди», деган гапдан ор қиласман. Майли, ўйлаб олинг. Қарзга ўйнамайман. Балки... невараларингизни тикарсиз, ёмон таклиф эмас, а?

Қилич заҳмидан азоб чекаётган вужуд энди киймаланди, бу ҳам етмагандай ўтга ташланди...

Жамолбекнинг кўз олди қоронғилашди. Хира парда ортида фақат стол устидаги қизил гулли чойнак кўринди. Уни отиб сурбет йигитнинг бошини ёрмоқчи бўлди. Аламзада киморбознинг бу ҳаракатини ол-

диндан билгандай, йигитлардан бири сапчиб, унинг кўлларини қайирди.

– Ҳа, нима бўлди, акахон? Тумруғингни чаён чақдими? Неварадарингни тиксанг ўйнайман, бошқасига кўнмайман. Тикасанми?

Кулларини бураётган бақувват йигитнинг чангалидан чиқиши умидини узган Жамолбек гап оҳанги ўзгариб, сенсирашга ўтилгач, типирчилашни бас қилиб, ҳансираганича «Йўқ», деди. Кейин жон бераётган одамнинг тушкун овозида қўшиб қўйди: «Бўлди, ўйин тамом...»

– Ўйиннинг қачон тамом бўлишини мен айтаман. Сен шу туришингда неварадарингни кўнга тиқдинг. Иккитамиди неваранг? Аслида менга учтаси керак. Майли, укангнинг битта неварасини ҳам қўшамиз. Ўйин кетди!

– Бўлди кил! Сен мени билмайдиганга ўхшайсан. Сен ўзингга ўзинг гўр қазияпсан!

– Адашдинг, сен галварс! Шу келишимда сенга гўр қаздирнб қўйганман. Неварадарингни ютиб олганимдан кейин олиб бораман, охирги масканингга. Садир тоғам «ошнамни юборларинг, аспалнинг тагида ётавериб зерикиб кетдим», деганиди. Ўйин кетди, учта одам гувоҳ. Кўзингни катта очиб, қараб тур, уч кўл ташлайман.

Набираларни ютиб олиш икки дақиқага бормади.

– Ҳайвон экансан, сен бола! – деди Жамолбек тишлирини ғижирлатиб.

– Ҳайвонликни сендан ўрганган бўлсам-чи? Сен учта етимни чириллатиб олиб кетаётганингда одаммидинг?

Жамолбек бошини кўтариб аввал Ахтамга, сўнг Тарзанга қаради, бу йигитларнинг асл мақсадлари энди унга аён бўлган эди.

– Икки йиллик гапни кавлаштириб келдиларингми?

- Икки йилда эсдан чиқиб кетади, деб ўйловдингми? Бунақа ҳайвонлик икки юз йилда ҳам унучилмайди.
- Мен ҳаппа-ю ҳалол ютиб олганман, сенларни ким юборди?
- Қанақасига ютиб олганингни билмайман, лекин отаси ўлиб, онаси қамалган болларни олиб қетишга ҳаққинг йўқ эди.
- Ўзинг кимсан-ки, бунақасига ажрим қиласан?
- Кимлигимни айтдим-ку? Мен – мурдаман, укахонимнинг оти – Азроил. Шунақасини эшигтганмисан?
- Ким юборди, сенларни?
- Меровмисан? Садир тоғам юборди, дедим-ку? Ёнларига бугун борасанми ё уч-тўрт кун кутайми? Сен менга бунақа олайиб қарама. Мен инсофли мурдаман. Ўликлар орасида мендақаси йўқ. Агар хоҳласанг, келишамиз: невараларингнинг ўрнига ўша болаларни бера кол.
- Қаердан оламан уларни?
- Бу нима деганинг? Қани улар? Ўлдириб юбордингми? Гўштларидан мастава қайнатиб ичдингми?
- Тилингни тий! Орқангда ким турганини билиб турибман. Сен унга ишониб, катта кетаверма. Сен яқинда пайдо бўлган боласан. Мен вақтида акахонимнинг хизматларини қилганман. Агар қиликларингни эшитиб қолса, терингни шилиб олади.
- Ким экан у, айт-чи?
- Ўзинг биласан.
- Билмайман, билишни истамайман. Мен ўзимга хон, ўзимга бекман. Хўш, болларни неча кунда топиб берасан?
- Билмайман, уларни кўрмаганимга бир ярим йилдан ошиди.
- Қачон кўрганинг билан ишим йўқ, улар каерда?
- Билмайман... мен уларни ютқизиб қўйганман.
- Кимга?
- Билмайман... узоқдан келган экан.

— Сен бўласан-у, ким билан ўйнаганингни билмайсанми?

— Ҳа, билмайман...

— Ёшлигингда бир одам бошингга пайтавасини ўраб, ўйнатган экан, эсингдами?

Нега эсламасин? Ютқизиклар, хорликлар, хўрликлар унутилмайди. Кишини гўрга қадар кузатиб боради. Лекин...

«Бу сурбет ўша хорликни нега эслатяпти? Буни кам одам биларди. Билғанларнинг кўпи ўлиб ҳам кетди. Тириклардан бири Асадбек ака, иккинчиси Ҳайдар ака эди... Наҳотки, улар шу мишикига гапириб беришган? Агар гуноҳим жиддий бўлса, Ҳайдар ака қозихонага чақириб танобимни тортиб қўярди. Буларни нега юборди?»

Мушоҳада қилиб, саволларга бамаъни жавоб тошига Жамолбекнинг фурсати йўқ эди. Пайтава воқеасини эслаб олиши учун Ахтам унга бир неча нафас фурсатни инъом қилиб, гапини давом эттирди:

— Мен бошингга пайтава ўраб ўтирмайман. Кафанга тикиб қўя қоламан. Йўқ... сенга бу ҳам ҳайф, — шундай деб Тарзанга қаради: — Азроил, нима дединг, кафанга ўрашга арзийдими бу хунаса? — Тарзанга шеригининг қиликлари маъқул келиб, жилмайиб қўйди. — Ана, Азроил куляпти, демак, Садир тоғамнинг олдига шипшийдам бўлиб бораркансан. Қани, тур!

Қимирлашга Жамолбекнинг ҳоли қолмаган эди. Кўлини бураб турган йигит туртиб турғизди-да, эшик сари судради. Унга иккинчи йигит ёрдам берди. Ташқарига чиқишгач, Жамолбек бошини кўтариб, атрофга нажот билан олазарак қаради. Тонг қоронгулигига зоғ куринмади. Уни туртиб, анча ергача қарийб судраб бордилар. Бу томонга келишаётганда чўмичи синган экскаватор пойидаги чуқур ўрани кўриб, Ахтам ниятини шу ерда амалга оширишни мўлжаллаб қўйган эди. Жамолбекни шу ўра лабига олиб келдилар.

— Қара, думларинг шу ерда, — деди Ахтам.

Жамолбек ботаётган ой ёргида икки одам корасини кўрди.

— Болаларни сендан ютиб кетган шоввоз ким эди, айт!

Ахтам шундай деб ўдағайлаб, уни қаттиқ туртди. Агар кўлини қайириб турган йигит бўлмаганида у пастга учиб тушарди. Бу туртки кафансиз кетишига яқин қолганидан хабар бергандай туюлиб, нафаси қайтди. Иккинчи турткида шошиб-шошиб тилга кирди. Керакли маълумотларни билиб олгач, Ахтам йигитга «кўйиб юборавер», деган маънода имлади. Қўли бўшаб, «кутулдим», деб қаддини ростлаши билан Жамолбек орқасидан тепки еб, ўрага учиб тушди.

— Тракторчига айт, тупрокни сураверсин, дунёда учта хунаса камайди, — деди Ахтам овозини баландлатиб.

Атрофда трактор ҳам, тракторчи ҳам йўқ эди. Бундан бехабар чорасизлар талвасага тушиб, Ахтам билан Тарзанга кўнгилро ҳаштанини бахш этишди.

3

Янги қўшқанотларининг қилиқларини Жамшиддан эшигтан Асадбек мийигида кулиб қўйди.

— Агар Ҳайдар аканг тирилиб келса, Сурга шогирд тушса бўларкан. Ўйинини жуда-а мақтаб юбординг, агар қиморни ташламаганимда бурнини ерга ишқаб, адабини бериб қўйган бўлардим-а! Тўққиз қайтганни ютиш иш эканми? Агар тўққиз қайтган ўша давранинг зўри бўлса, қолганларининг аҳволи маълум.

Асадбек шундай дея туриб Жамшид узатган қоғозга кўз югуртирди-да «Томскка боғлан, Балабухани топ», деб буюрди. Икки соатдан сўнг Балабуха ўз уйида телефон гўшагини кўтарди. Асадбекнинг илтимосини эшитиб, ўйланди:

— Арсен, лақаби «учувчи», Воронежда яшashi аниқми? — деб қайта сўради.

— Аниқ бўлса керак? — Асадбек шундай деб савол изазари билан Жамшидга қаради.

— Бунақасини эшитмаган эканман, — деди Балабуха мужмал оҳангда.

— Балки янги олифталарданdir?

— Янги олифталар бола еталаб юришмайди. Ўша ернинг ўзида пулга алмаштиришади. Майли, мен суриштириб кўрай-чи...

Мужмал ваъда берган Балабуха ярим тунда қўнғироқ қилиб, Воронежда ҳам, унинг атрофида ҳам Арсен деган қиморбоз йўқлигини билдириди. Бундан газабланган Асадбек сўкиниб кўйди-да, ташқарига чиқиб болохонадаги йигитни чақирди:

— Жамшидни топ, тўқиз қайтганинг ё тиригини, ё ўлигини топиб, эрталаб Ҳайдар акангнинг қозихонасига олиб келсин! Сур билан Тарзан ҳам ўша ерда бўлсин!

Жамшид Бек акасининг бу топшириғини вақтида бажара олмади. Жамолбекни эрталаб эмас, пешинга яқин топиб келди. Шошқич чорланганларининг сабабини билолмай хуноблари ошган Тарзан билан Сур бу вақт мобайнода қозихонада ипсиз боғлангандай бўлиб ўтиришди. Жамолбекнинг нима учун чақирилганини ўз тахминича билган Жамшид уни йигитларга рўпара қилмай, самоварчининг хонасига киритиб, «жон керак бўлса, қимирламай ўтиринг», деб тайинлагач, хожаси-никига қараб кетди.

Асадбек уни нороzi нигоҳи билан қаршилади.

— Бек ака, топиб келдим, — деди Жамшид айбдор одамнинг синиқ овози билан.

— Узинг туғиб, бира тўла катта қилиб олиб келдингми? — деди Асадбек заҳарли оҳангда. — Қачон топиб келишинг керак эди?

— Беркиниб ётган экан...

Жамшид ўзини оқлаш учун бошқа гап топа олмай,

бошини эгди. Асадбек буйруғининг вақтида бажарилмаганидан газабда эмас эди. Қиморбознинг беркиниб ётганини фаҳмлаган, тахмини бўйича, Жамшид уни эртага топиб, рўпара қилиши керак эди. Вазифа мўлжалидан олдин бажарилганидан қувониш ўрнига норози киёфада туришидан мақсад – тобеларини қаттиққўллик билан ушлаб туриш эди. Жамшиднинг синик ҳолда туриши унга маъқул келиб, ортиқча танбеҳ бериб ўтирмай, машина томон юрди. Хожасининг ғазабидан осон қутулганидан мамнун бўлган Жамшид эса чаққонлик билан олдинга ўтиб, машина эшигини очди.

Асадбекнинг қозихонага кириб келишини кутмаган Тарзан билан Сур шошиб қолишиди. Саломларига алиқ олинмагач, довдираганларича Жамшидга ҳам савол, ҳам нажот назари билан қарашган эди, у «мен ҳеч нарса билмайман», дегандай нигоҳини олиб қочди.

Бургут полопонини учишга ўргатиш мақсадида баланд қоядан пастга ташлар экан. Асадбек бу икки қанотига унча мураккаб бўлмаган вазифани топширган эди. Хомлик қилган йигитларни энди қоядан ташлаб, иложи бўлса, тошларга бошларини уриб, кўзларини очиши керак эди. Бир неча дақиқа мобайнида дам унисига, дам бунисига қаттиқ тикилиб турди. Жамшид қозихонада бундай сукунатли дақиқаларга сира гувоҳ бўлмаган эди. Бу ер сирли қарашлар макони эмас, балки қисқа фурсатли дўқ-пўписа изидан келувчи калтаг-у оху фарёдлар маскани эди.

– Қойилман, йигитнинг гули, – деди Асадбек Ахтамга тикилиб. – Боплабсан. Ўғил бола иш шунақа бўлиши керак. Энди болаларни олиб келиш керак. Воронежга ўзинг борасанми?

– Бир оғиз гапингиз... – деди Ахтам гап оҳангидаги пичингни сезмай.

– Сенга бир оғиз гап кифоя қилса яхши... – шундай деб Тарзанга қаради: – Сенга ҳам кифоями?

Тарзан бу саволдан хожасининг мақсади не экан

нини англамай, мутелик ифодаси сифатида қўлини кўксига қўйиш билан чекланди. «Бу айёр... жуда айёр, ичиди нима борлигини билиш қийин», деб ўйлади Асадбек, кейин Жамшидга қараб имлаб қўйди. Иккича үтмай Жамшид Жамолбекни бошлаб кирди. Куркувдан ранглари оқариб, лаблари титраётган Жамолбек эшик рўпарасида турган таниш йигитларни кўрди-ю, жони чиқиб кетаёзди. У нима учун чақирилганини биларди, тўғрироғи, чорланишини кутаётганди. Ўрага йикилганида тирналган, шилинг ан жойлари битмаган, кўркуви эса баттар ошган эди. Беркиниб ётган еридан чиқиб, Жамшидни кўрганида «ё Ҳайдар акам ё Асадбек акам чақиртирганлар», деб ўйлаган, Кесакполвоннинг ғазабига учрашишнинг оқибати хайрли эмаслигини билгани учун Бек акасига рўпара бўлишини Худодан сўраган эди. Қозихона остонасидан ҳатлаётиб, аввал Ахтамни кўрди-ю, унинг қаҳрли нигоҳи билан кўзлари тўқнашгач, «энди бу ўлдиради», деган ўйда оёқларидан жон қочгандай туюлди. Жамолбекнинг кириб келишини кутмаган Тарзан эса ажабланиб, хожасига қаради. Жамолбек ҳам беихтиёр у қараган томонга ўгирилди-ю, наожот фариштасини кўргандай кўзлари чақнаб кетди. Ҳаяжон ва умид билан «Бек aka!» деганича қучоқ очиб юрмоқчи эди, Жамшид елкасидан ушлаб тўхтатди.

– Ассалому алайкум, Бек aka! – деди кўзларини пирпиратганича.

Асадбек саломга алик олмади. «Сенам одаммисан?» дегандай унга бир оз тикилди-да, сўнг назарини Жамшидга қаратди:

– Янги пайдо бўлган «бек» шуми? Довруғи эсимни тескари қилиб юборди-я! – деди истеҳзо билан. – Нима бўлди, башарасини ит таталаганми?

Саволга жавоб қайтариши лозим эмаслигини фаҳмлагани учун Жамшид Жамолбекнинг елкасини ушлаганича жим тураверди.

— Кучайибсан, Жамолбек! — Асадбек «Жамолбек»ка кинояли ургу бериб, қалбида нажотга умид уйғонган қиморбознинг жонини сұғуриб олғандай бўлди. — Бошингга пайтава ўралгандан кейин майдақамдам бўлиб кетганингни эшитган эдим, қачондан бери «бек»сан?

— Унақамас, Бек ака... — деди Жамолбек титроқ овозда. — Беклик фақат сизга ярашади. Одамлар ўзича айтиб юришибди, мен орзу ҳам қилмаганман, Худо урсин!

— «Худо урсин»ми? Худонинг сендан бошка ташвиши йўқми? Анави Мурданинг ургани камлик қилдими?

Жамолбек бошини эгди-ю, жавоб бермади.

— Сур, «Жамол Бек» акангни кўряпсанми? — Асадбек «Жамолбек»ни заҳарли киноя оҳангида айтди. — Бир томонда сен, бир томонда у, яна бир томонда мен турибман. Жамшид ўйинда йўқ. Қани, каллангни ишлат-чи, уччаламиздан қайси биримиз лакмароқмиз? Жавоб бера оласанми?

Ахтамнинг бош эгиш, ерга қараб айбига икрор бўлиш одати йўқ эди. Ҳожасига «гапингизга тушунмаяпман», дегандай безрайганича қараб тураверди.

— Маҳмаданалик қилишга тилингнинг суюги йўқ-ку? — деди Асадбек қаҳрли овозини кўтариб. — Бу аканг сени лакиллатиби, сен эса мени овсар деб ўйлабсан. Шунаками?

— Мен буйруғингизни бажардим, — деди Ахтам ўжарлик билан.

— Буйруқ бунақасига бажарилмайди. Мен «биров лакиллатса лакқа тушиб қайтиб келавер», деб буюрмаган эдим. Бугун акангни олиб, Воронежга жўнайсан. Арсен деган қиморбозни топиб, оёғига йиқиласан.

Бу гапдан кейин Ахтам чорловдан мақсад не эканини англаб етиб, лаби гезарди. Қиморбоз томон сапчиб, уни ерга булғалаб ташлагиси келди. Тириклайнин кўумиб юбормаганидан афсусланди.

— Алдабдими? — деди Ахтам, муштумини туғиб.

— Алдаганми ё йўқми, ўзидан сўра, — деди Асадбек.

Иш кутилганидан нисбатан осонроқ битганидан қувониб қайтишаётганида Тарзан шеригига «дунёда шунаقا довдирлар борлиги ҳам яхшида, а!» деб қўйган эди. Ҳозир ўша довдир томонидан лақиллатилганини билиб, шу лакмалиги туфайли хожаси ҳузурида иснодга қолгани учун ўзини ўзи лаънатлади. Ахтам киморбозни ўлдириб юбормаганидан афсусланган бўлса, у «тирик қолдирганимиз яхши бўлган экан, бу хунаса сирни ўзи билан олиб кетганида бошимиз маломатдан чиқмас эди», деб, хожаси олдида ўзини оқлашга имкон сақланиб қолгани учун ўзига таскин берди.

Жамолбек кутилмаганда тиз чўкди, Жамшид уни ушлаб қолишга улгурмади. Ахтамнинг сапчиб, ташланиб қолишидан кўрқкан Жамолбек жонҳолатда тез-тез гапира кетди:

— Бек ака, айбимга иқрорман, лекин шундай қилишга мажбур эдим, мен буларни танимай туриб, қанақасига тўғрисини айтаман? Башарамдаги ярачақалар тузалгандан кейин ўзим келиб, сизга айтмокчи эдим.

— Бу болларнинг кимлигини билмадингми? Пайтавани эсингга солишибди-ку, шунда ҳам фаросатингни ишлатмадингми? Бахting бор экан, боллар ҳомлик қилишибди, Садир ошнангта ачомлатиб қўйишлари керак эди.

— Унақа деманг, Бек ака, мен сизни акам деганман, ҳар куни намозларимда дуойи жонингизни қиласман.

— Нима дединг? Ҳали сен намоз ўқийсанми?

— Ўқийман, Бек ака...

— Кундузи намоз ўқиб, кечаси қимор ўйнайсанми? Ҳажга ҳам боргандирсан?

— Борганим йўқ-ку, умид билан юрибман, сизни «борарканлар» деб эшитувдим, биллалашиб боришни Худодан сўраяпман.

Бу гапни эшитиб, Асадбек стол устидаги пиёлани олиб унга қараты отди-да, «хе, сендақа ҳожини...», деб сўкина кетди. Пиёла елкасига тегиб, сுягини зириллатиб юборган бўлса-да, Жамолбек чўккалаганича тек тураверди. Асадбек сўкина туриб, ўзидан ўзи норози бўлди. Бир пачоқ киморбоз олдида паст кетгани учун ғашланди. Вужуди кирланиб кетгандай туюлиб, афтини буриштириди. Бунақа қилиқ Кесакполвонга хос эди. Ўзини Кесакполвон ўрнида кўриш дилини тилиб ташлади. Ахтамни биринчи марта кўрганида Кесакполвонни қўмсаган эди. Тўғри, ошнасининг айрим хурмача қиликлари ёқмасди. Лекин унинг ўлишини, айниқса, хорланиб ўлдирилишини истамаган эди. Ахтам бетгачопарлиги билан ғашини келтирганида «Ҳайдар ўзи паст кетса ҳам, бунақаларнинг олдида пастлашишдан мени ҳимоя қиласди», деб амрон килганди. Ҳозир бу ҳақиқатга яна бир карра амин бўлди. Сукут сақлаш ўзига нисбатан бўлган нафратини ошкор қилиб қўйиши мумкин эди. Шу боис:

– Невараларингни ютқизибсан-а? – деди қаҳр билан.

«Саводул-важҳ фид-дорайн» дейилганидек, икки дунёда юзи қоралик нима эканини фаҳм этмайдиган Жамолбек бу саволни эшитиб, Асадбекка якинлашиб, оёғига бош урмоқ мақсадида ўрнидан турмоқчи бўлган эди, Жамшид елкасидан босиб, қимиirlатмади.

– Невараларимни мен тикканим йўқ, ўйин ғирром бўлди, Бек ака, – деди нажотдан умид узмай. Унинг бу ҳолати оч бўрига рўпара келса-да, тирик қолишдан умидвор бўлаётган нодон қўзига ўхшарди. Нодон умидворларни кўп кўравергани учун Асадбек бунақаларнинг аҳволларига ачинмасди, майдалашиб ўтирамай, Кесакполвон ихтиёрига топшириб юбораверарди. Ҳозир бир ишора қилса ёки юз ўгириб чиқиб кетса, тиш кайраб турган бу икки йигит уни ур калтак-сур калтак қилиб ташлаши аниқ эди. Арқонни узун таш-

лаб, бу пачоқ қиморбозни рұхан бурдалаб ташлаш мақсадида Ахтамга қаради:

– Сур, ғирром ўйнадингми?

– Ҳаммаси ҳаппаи ҳалол бўлди, Бек ака, – деди Тарзан.

– Сендан сўрамадим, – деб, Асадбек Ахтамдан жавоб кутди.

– Мен ғирромдан ҳазар қиласман. Ишонмасангиз, кўзингизнинг олдида бошқатдан ўйнайман.

– Эшиятсанми? Ўйнайсанми, «бек»?

Жамолбек «ўйнайман» дейишнинг оқибати нима бўлишини англаб, «йўқ» деган маънода бош чайқади.

– «Ғирром» деб даъво қилганингдан кейин гапингда тур. Ҳажиқизлик қилаверма. Сур, ўйна. Ютқизсанг, ўзингни тикасан, бунинг пайтавасини ўзинг ўрайсан.

Сур бу буйруқдан мамнун бўлиб, Жамолбекка қараб ишшайди-да, чўнтағидан карта чиқариб, стол устига ташлади:

– Ўзи чийлаб, ўзи тарқатсин! Уч қўл ташлаймиз, ўйин шунаقا бўлган...

Жамолбек «керакмас» дегандай умидвор кўзлари билан Асадбекка термилди-ю, қаҳрли овозда «тур ўрнингдан!» – деган буйруқ янграгач, амрни бажарди. Титроқ қўллари ўзига бўйсунмаса ҳам, картани чийлади. Уч қўлда ҳам ўйинни бой бериб, ўлимига рози бўлган ҳолда шалвираб қолди.

Асадбек ўйинни эътиборсиз кузатгандай бўлса ҳам, Ахтамнинг ҳар бир ҳаракатига диққат қилиб «Бало бу бола, қамоқхонанинг мактаби сезилиб турибди», деб қўйди. Кеча Жамшидга «бурнини ерга ишқаб кўйган бўлардим», деганини эслаб, бу болага адаб бериш осон кечмаслигини англади.

– Ўйинг кетибди, невараларинг кетди... бу кунингдан ўлганинг яхшимасми?

– Ўлганим яхши, Бек ака...

– Сенинг ўлигинг кимга керак? Ўйинг шу бола-

ники. Невараларингни алмаштиришни айтган экан, маъкул таклиф. Етим боллар қаерда?

– Барнаулда. Фима деган ютиб кетган.

– Фима? Рабиновичларданми?

– Билмадим... Олдин «Ефим» деди, кейин «Фима»...

– Иккаласи бир... – Асадбек шундай деб бир оз ўйланди-да, Ахтамга қаради: – Иш энди пишадиганга ўхшаб қолди Нима қилмоқчисан?

– Ўзим бориб келаман. Факат... битта шартим бор.

– Сен менга шарт қўйма, бола!

– Шарт бўлмаса... илтимос... У ёқقا борищдан олдин бунинг терисини шилиб олишим керак.

– Ўлдирмоқчимисан?.. Йў-ўқ, дунёни осонгина ташлаб кетмасин, бу тўқиз қайтган. Узок яшасин, туғилганига пушаймон бўлиб яшасин, тирик юриш жонига тегиб кетсин, етимларни бир келгиндига ютқизгани учун ҳар куни ит азобида ўтсин. Қара, ҳозир ўлимдан қўрқиб питирляяпти. Ҳар нафасида Худодан ўзига ўлим тилаганида ҳам ўлимга етишолмай титраб-қақшаб яшасин. Ичинг ёниб кетаётган бўлса, майли, аламингни ол. Тарзан, сен нима дейсан?

– Бир ажойиб ертўла бор, киндигигача сувда бўлади. Кўлидан осиб, тўртта оч каламушни қўйварамиз.

Тарзан бу гапни чиндан айтдими ё Жамолбекни даҳшатга солиш мақсадида бўрттиридими, Асадбек тушунмади. Шундай бўлса-да, «маъқул» ишорасини қилиб, чиқиб кетди. Саҳрода қақраб қолган қудукдан ташналигини қондиришни умид қилган нодон каби Жамолбек марҳамат илинжида дод деб ялинганича қолаверди. Ахтам ҳожасининг «майли, аламингни ол» деган лутфу марҳаматидан фойдаланишни галга солгиси келмади. Кучли мушт зарбидан Жамолбекнинг икки тиши синди, биқинидан тепки еб, ҳушидан кетди. Тарзан ўртага тушмаганида тепкилар зар-

би унинг тақдирини ҳал қилиб қўя қоларди. Жамолбек ютқизиқ пулини вақтида тўламаганларни жазога ҳукм қилганида ўз бошига ҳам қачондир зулм дўли ёғилажагини ўйлаганмиди? Бечоралар тепкилардан, тирноклари орасига санчилган иғналар заҳмидан фарёд уришганда роҳатланмаганмиди? Ошиқ ҳамиша олчи туравермаслигини биларди-ку? Эндиғи кўргулигини не учун адолатсизлик ҳисоблаб, Худодан норози бўлиб инграяпти?!

Жон ширин...

Боши узра ажал булути тўпланаётганидан талвасага тушди...

Кўзига уйи кўринди, ертўлага кўмиб қўйган бойлиги кўринди...

«Ўзимни ўлдирсангиз ўлдиринг, аммо набиралимга тегманг», деб илтижо қилмади-я...

«Ёмонликларимнинг мукофотига етишдим», деб тавба қилмади-я...

«Худойим, раҳминг келсин, менга!» – демади. «Нега мени бу бадбахтларнинг қўлига топширдинг, ҳар йили кўй сўйиб, худойи қиласдим-ку, ҳисобга олмаган эдингми?» – деб даъво қилди.

Тарзан ҳукм турини айтганида бир оз бўрттирган эди. Жамолбекни ташландик иморатнинг зах ва қоронғи ертўласига ташладилар. Ҳукмда айтилганидай киндигига чиқадиган сув ҳам, каламуш ҳам йўқ эди. Ёлғончи киморбознинг қўлларини чириган қувурга чандиб боғлаган Ахтам «каламушларинг қани?» – деди заҳарли оҳангда. Норози шеригининг жигига тегмаслик учун Тарзан гапни ҳазилга буриб: «Каламушларга раҳмим келди. Буни тишласа, заҳарланиб, ажалидан беш кун олдин ўлиб кетади», – деди.

– Дунё бир айланиб, бунинг қўлига тушиб қолсанг, сени аяб ўтирамайди. Бирорга раҳмдиллик қилсанг килавергин-у, бозор қайтишини ҳам ҳисобга олиб кўй, – деди Ахтам минғирлаб.

Асадбек ўша куниёқ яна Балабуха билан боғланди. Балабуха унинг гапини эшитиб, «аниқлаб қўяман», деб галга солмади.

— Фимани танийман. Ўйинда зўрмас-ку, лекин жуда айёр. Курумсоқликда бутун дунёга дарс беради. Болалар ўзида бўлса, осонлик билан топширмайди. Неча йил, ой, кун боксан бўлса, овқат пулигача тўлашингга тўғри келар, шуни ҳисобини олгин-у йигитларингни юборавер, менам уч-тўрт йигитимни Барнаулга жўнатаман, кутиб олишади. Эҳтиёт – шарт, «Балабуха аксирмай қўйди», деган одамга, менга ишонишгандай ишонаверишсин.

— Меникилар етиб боришгунича ўзи билан гаплашиб қўймайсанми?

— Тўсатдан бостириб боравериш керак. Олдиндан гаплашилса, у туллак думини тутқизмайди, нархини ошираверади.

Манзура «етимларни топишга ёрдам беринг», деб ялинганида Асадбек «топилса – топилар, топилмаса – Худодан», деган ўйда бу вазифани ғўр йигитларга юклаган эди. Калаванинг ғоят чигаллашиб кетгани, бир учи узок шаҳарга бориб тақалгани уни сергаклантирди. Йигитларга бош қилиб Жамшидни юбормокчи ҳам бўлди. Кейин фикрини ўзгартириб, «савоб ишлар қилишимизни ҳукумат ҳам билиб қўйгани яхши», деган ўйда уларга Ҳалимжонни кўши.

Учовлонни кузатгани Жамшиднинг ўзи чиқди. Ҳалимжон сув ичиш учун четлаганида «бунинг олдида ҳар нарсани валдирайвермаларинг», деб шипшитиб қўйди. Ахтам «бу одам ишончсиз бўлса, нега бизга бош оғриқ қилиб қўшиб қўйяпсиз?» демокка оғиз жуфтлади-ю, Тарзаннинг қарашидан «гапни чўзма», деган маънони укиб, индамади.

Барнаул уларни киши руҳини эзувчи ёмғири, изғиринли шамоли билан қаршилади. Уларнинг юртини аллақачон тарк этган тўрт фаслнинг султони баҳор бу ўлкага кўчиб келиб, астойдил жойлашиб олгандай эди. Аэропортдан чиқаверишда «Тарзан» деб ёзилган бир парча қофозни кўтариб турган болакай уччининг диққатини тортди. Жамшид «бир одам кутиб олиб, «Балабуха аксирмай қўйди», дейиши мумкин. Зарурат туғилса, ёрдам берар, лекин кўпам ишониб юборマルинг», деб огоҳлантирган эди. «Бизни ким қаршилар экан, кутиб олувчини қандай таниб оламиз» деган саволлари бир парча қофоздаги «Тарзан» деган ёзув билан осонгина ҳал бўлишини кутишмаган эди.

— Қара, сени бу ерда ҳам танишаркан, машхури олам экансан-ку! — Ахтам шундай пичинг билан шеригининг биқинига аста туртди-да ундан жавоб кутмай, болага яқинлашиб сўради: — Тарзанни сен кутяпсанми? Ҳалиям аксирипсанми ё аксирмай қўйдингми?

Бола унга ишонқирамай қараб олгач, кўлидаги қофозни тўрт буклаб, кўча томон юрди. Ахтам унга эргашди. Тарзан сергакланиб, сал орқада борди. Бунақа эҳтиёт чораларидан хабардор бўлган Ҳалимжон паст овозда: «Бек акамнинг танишлари четроқда кутишетгандир», деб қўйди. Бундан энсаси қотган Тарзан «акл ўргатма, ўзим ҳам билиб турибман», дегандай қошларини чимириб, унга қараб қўйди.

Аэропортдан анча узоқлашсалар-да, бола ёмғирга парво ҳам қилмасдан индамай кетаверди.

— Ҳой думбулча, чарчамадингми, опичиб олайми? — деди Ахтам уни гапга солиш мақсадида.

Бола унга қараб ҳам кўймади. Яна бир оз юришгач, уларни икки қора «Тойота» қувиб ўтиб, тўхтади. Орқадагисидан бўйдор, малла йигит тушиб, болага яқин турган Ахтамга яқинлашди:

– Тарзан сенмисан? – деди сўрашиш учун қўл узатиб. – Балабуха аксирмай кўйди.

– Тарзаннинг эгасиман, – деди Ахтам унинг қўлини маҳкам қисиб. Тарзан билан Ҳалимжон яқинлашиб сўрашишгач, йигит мақсадини айтди:

– Сиз қидириб келган одам ҳозир Барнаулда эмас. Бир юз тўқсонинчи километрдаги Комариха деган шаҳарчага борамиз.

Йигит кимлигини, ким томонидан юборилганини айтмади. Улар ҳам сўрашмади. Учовлари ҳайдовчининг ўриндиғи ўнг томонда бўлган «Тойота»нинг орқа ўриндигидан жой олишди.

– Шу машина яхши-ю, рулнинг ўнг томондаги ёмон, бир ой ҳайдасам ҳам ўргана олмадим, – деди Ахтам суюнчиққа ястаниб. Ҳалимжон «биз томонларда бунақа машинанинг уруғи ҳам йўқ-ку, қачон ҳайдадинг?» деган маънода унга қаради. Тарзан эса шеригининг мақсадини англаб, кулимсиради. Соддароқ одам бўлганида «бунақа машинага энди ўтиришим, роса юмшоқ экан, рулни чап томонга олса ҳам бўлади шекилли?» каби саволлар билан мезбоннинг бошини қотириши баробарида ўзини пастга урганини сезмас эди. Ахтам эса бир гапи билан «сенлар керилавермаларинг, бунақаси бизда ҳам бор», деган маънони англатиб қўйди.

Йигитнинг вазифаси меҳмонларни кутиб олиш-у хавфсизликларини таъминлаш эди. Уларни гапга солиш, зериктирмаслик хизмати зиммасига юкланмагани учун йўлдан кўз узмаганича жим кетаверди.

Барнаулдан узоклашиб, ўрмон йўлига чиқишганда ёмғир тинди. Чарчаган булутларни шамол булути кийма-қийма қилиб ташлади-ю, қуёш кўринди. Офтоб нурлари гердайган дараҳтлар баргларига, кейин эса тупроққа ёғилиб, намлик билан қовушди-да, паға-паға бўлиб яна кўкка кўтарила бошлади. Ахтам машина эшиги ойнагини туширди. Нам тупроқ ҳидига тўйган ҳаво барчаларига хуш ёқди. Аллоҳнинг мўъжизалари

беҳад, бекиёс. Шундай ажойиб гүзаллкни яратиб, унинг қайси бир кавагига зулмни яшириб қўяди. Фима яширган зулм кавагини бошқа бир зулм косови оловли учи билан кавлаб, титгани кетяпти. Косов ўзи алнга олдирган оловда куйиб адо бўладими ё кавакдаги чўғни тита-тита ўчирадими – Худо билади. Аслида униси ҳам, буниси ҳам кулга айланниб, совурилса, одам аҳлига фойдали эди. Наиложки, бундай бўлмайди, шуниси одамзодни паришон қиладиган афсусли ҳол...

Аллоҳ ҳар ерга ўзича гўзаллик, ҳар бир инсонга ўзича рух берган. Чиройли рух эгасигина табиат чиройини ҳис қила олади. Бу чиройга банди бўлгач, ўзини унутади. Атрофида разолат борлигини ҳам унутади. Бир неча дақиқа шундай бўлади, кейин яна разил дунё бағрига қайтади...

Тўгри яшашни билганлар учун ҳаёт ғоят гўзал кўринади. Табиат чиройига мафтун бўлган Ҳалимжон беихтиёр: «Ажойиб экан!» деб қўйди. Ахтам унинг кайфиятини англамай, ажабланиб қараб қўйди-да, совуқ оҳангда изоҳ берди:

– Бу ажойиб жойда уч-тўрт кундан кейин кун исиса, шунақанги додахўжа чивинлар талашни бошлиди-ки, чикқан жойингга кириб кетишга ҳам таптайёр бўлиб қоласан.

Ҳалимжонни гўзаллик бағридан юлиб олиш учун шу таърифнинг ўзи кифоя қилди.

Шаҳарчага яқинлашишганда йигит ўгирилиб:

– Фиманинг қуриқчиси кўп эмас, икки одами бор. Атрофини курғон билан ўраб олмаган. Кириб-чиқиши бемалол. Бирга кирамизми ё четроқда пойлайликми? – деб сўради.

Тарзан шериги билан кўз уриштириб олгач:

– Ўзимиз кирамиз. Ёмон ниятда келмадик, ишни яхшилик билан битиришимиз керак, – деди.

Йигит «иш яхшилик билан битиши учун ҳам эҳтиёткорлик керак», деб қўйиб, ҳайдовчига имла-

ди. Хайдовчи бу ишорани англаб, йул ўнгта бурилган жойда машинани тұхтатді. Йигит Фиманинг уйига қандай бориши тушунтиргач, «ичкари киргапла-рингдан кейин биз мююлишга бориб турамиз», деб огоҳлантириди.

Фима яшайдиган уй бошқаларни кидан фарқ қилмасди. Бир томони товуқхона, молхонадан иборат ҳовли тошевор билан эмас, ёғоч панжара билан үралганди. Товуклар күплигидан күнгилни айнитадиган хид анкиб турарди. Бу жой қиморбозлар оламида дурустгина мавқега эга одамнинг қароргоҳыга эмас, ўртақол деҳқоннинг томорқасига ўхшаб кетарди. Йигит айтган иккى күриқчи ҳовлида күринмади. Панжара эшикни очиб, ичкарига кирмокчи бўлишганда молхонадан бир бўйдор йигит чиқди-да кўлидаги хаскашни деворга суюб қўйиб, чақирилмаган меҳмонларга яқинлашди.

– Ким керак? – деди совуқ оҳангда.

– Саломатмисан оғайни? – деди Ахтам унга қўл узатиб.

– Ҳар ҳолда касал эмасман, – йигит унинг саломини жавобсиз қолдириб яна «ким керак?» деб сўради.

– Фима керак, – деди Тарзан унга ўткир нигоҳини қадаб. Йигит бу совуқ жавобдан қониқмай, «Нима ишларинг бор?» – деб сўради.

– Фимага қуёшли Ўзбекистондан қайноқ саломлар олиб келганимиз. Бизнинг Ўзбекистонимизда меҳмон бунақа кутиб олинмайди, – деди Ахтам у томон бир қадам қўйиб. – Хўжайнингга дарров кириб айт, қайноқ саломимизни тез қабул қилмаса совуб қолади.

Йигит «тўхта, жойингдан жилма», дегандай қўлини кўтарди:

– Бу ер Олтой, Ўзбекистонингмас.

Шу пайт уй эшиги очилиб, паст бўйли, елкаси-га кулранг камзул ташлаган, ҳаво совуқ бўлмаса-да кўлига оқ қўлқоп кийган одам чиқиб келиб, панжарали эшиги олдида турганларга күш қарashi билан

каради. Устидаги умрини яшаб бўлган кийимларига қўлидаги оқ қўлқоп ғоят номутаносиб эди.

— Алёшка, меҳмонлар билан танишиб олдингми? — деди мулойим овозда.

— Ўзбекистондан келишибди, — деди йигит хўжайини томон ўгирилиб.

— Хах, нодон! Ўзбекистонликларни чиройли тақаллуф билан кутиб олиш кераклигини билмайсанми?! Мен уларнинг юртига борганимда бошларига кўтаришган. Безрайиб туришингни қара, тентак, йўлни бўшат!

Йигит четланди, Тарзан билан Ахтам уй томон юришди, Ҳалимжон панжара ёнида қолди. Фима уларга пешвоз чиқмай, турган жойида кутди. Тарзаннинг кўришмоқ учун узатган кўли ҳавода муаллақ қолди. Фима унинг саломига жавобан худди ҳарбийлар каби кафтини чеккасига олиб бориб лутф қилди. «Нега келдиларинг?» деб сўрамаса ҳам уларнинг мақсадларини билиш мақсадида савол назари билан бир-бир қаради.

— Яхши ният билан келдик, — деди Тарзан бу қарашга жавобан. — Ўзбекистонликлар сизни яхшилик билан эслашади.

— Яхшилик билан эслашади, дегин... — Фиманинг юзида айёrona жилмайиш зоҳир бўлди. — Яхшилик билан эсланадиган одамникига дабдаба билан келинадими? Қора «Тойота»ларни пистирмага кўйиб келдиларингми?

Фиманинг уйи баландликка жойлашган, шаҳарчага олиб келадиган йўл кафтдек кўриниб турарди. Овлоқдаги шаҳарчада хориж машинаси ҳар куни кўринавермайди, бунақа «Тойота» кимларда бўлишини фаҳмлаш учун эса ақлли бўлиш шарт ҳам эмас. Бегона машиналарга кўзи тушиши билан эҳтиёт чорасини кўриб кўйганига бир одамининг молхонадан чиқиб келиши, иккинчисининг кўринмаётгани далил эди. Тарзан панжара эшик яқинида турганидаёқ

буни фаҳмлаган эди. Шу сабабли Фиманинг айёrona бокишидан шошиб қолмади.

– Биз томонларда ота-боболаримиз ардоқли одам-никига меҳмонга боришганда дабдаба билан отда кириб келишмаган, мезбоннинг ҳурматини қилиб, шаҳар остонасида отдан тушиб, бу ёғига пиёда келишган. Ҳар қадам босишганда меҳмоннин шарафлашган. Ардоқли мезбон эса меҳмонларни остоноада тўхтатиб, сўрокка тутмаган, қурумсокларнинг қурумсоғи бўлганда ҳам ичкарига таклиф қилиб, ҳеч бўлмаса бир култум сув тутган.

Нотаниш йигитнинг тилидан ўз лақабини эшитган Фиманинг авзойи ўзгариб, ўнг қоши учди. Ахтам буни сезди, «кўп маҳмаданалик қилма», деган маънода уни секин туртиб кўйди. Иккови ҳам Фиманинг лақабини билмас эди, мезбоннинг авзойини қайси гап ўзгартирганини билолмай гангиб, бир-бирларига қараб олишди. Фима эса юзидағи айёrona жилмайишни қочирмасдан сал нарида турган йигитга юзланди:

– Ўзбекистонда ҳурматли меҳмонларга аatab қўй сўйишидаи. Алёшка, энг семиз хўрозни сўй, кўнглим зиёфатни кўмсаб турувди, Худо ёрлақади, – деб буюрди.

– Кечаги товуқнинг ярми турувди, ўшани пишира қолсам-чи?

– Ҳе аҳмоқ! – деди Фима овозини кўтариб. – Сенга қўй сўйгин, демадим-ку? Бор, буюрганимни қил.

– Айтдим-кўйдим-да, ўзингиз исроф қилма, деб сўқасиз-ку? – деди йигит жойидан жилмай.

– Алёшка тўғри айтяпти, – деди Ахтам унинг мушкулини енгил қилиб. – Биз томонларда инсофли меҳмонлар яримта товуққа ҳам қаноат қилишидаи. Битта хўrozга тўймаган қоринлар яримта товуққа ҳам тўймас экан, тирик хўrozни сўйиш Худога ҳам ёқмайди.

– Алёшка, эшитдингми бу ҳикматни? Сен булар-

дан ақл ўрганишинг керак. Молнинг тагини тозалай-вериб, молфаҳм бўлиб қолибсан.

Фима шундай деб уларни ичкари бошлади. Остона ҳатлашлари билан димоғларига қиздирилмаган ёғнинг ҳиди урилиб, кўнгилни айнитди. Ваъда қилинган яримта товуқقا ҳам, ҳатто сўралган бир қултум сувга ҳам тоқатлари қолмади.

Хона ўртасидаги оёқлари йўғон думалоқ стол атрофига ўтиридалар. Дастурхон солиниши, чой келтирилишини кутиш ақлдан эмасди, шу сабабли Тарзан мақсадга кўча қолди.

– Ўйинга ҳеч бир даъвоимиз йўқ. Жамолбекнинг аҳмоклиги айтилмаса, ҳаммаси ҳалол бўлган. Биз болаларни талаб қилаётганимиз йўқ, илтимос билан келдик. Ютқизилган пулни олиб келгандиз.

Чакирилмаган меҳмонларнинг мақсадини билса-да, бу гапни эшигтан Фиманинг ўнг қоши яна учди. Тарзанга муғомбирлик билан тикилди:

– Ўзбекистондан олиб келган қайнок саломинг шуми? Саломингта тушунмай турибман?

– Болаларни бокишга сарфланган харажат ҳам ҳисобга олинган, – деди Тарзан унинг айёргигини сезмагандай.

– Қарилик тузалмайдиган ёмон касал, бўларкан, йигитча. Ё мен ниманидир унуганман, ё сен ниманидир тушунтира олмаяпсан.

– Довдир ошнам тушунтира олмаяпти, – Ахтам асабийроқ тарзда шундай деб сұҳбатга аралашди. – Бу нодон қарилик нималигини билармиди? Ҳалигача бир марта ҳам аксирмаган бу овсар йигитча одамни ўлдириб юборадиган бошқа касалликлар борлигини ҳам билмайди.

Гап замирига яширинган таҳдидни англаған Фиманинг юзидағи айёrona жилмайиш йўқолди. Буни сезган Ахтамнинг кўнгли шодланиб, донишмандларга хос хотиржамлик билан давом этди:

– Шунинг учун Худодан фақат саломатликни сўраш керак, қолган ҳамма нарсани сотиб олиш мумкин. Фима амаки, сизни шундай деб атасам майлими? – Ахтам жилмайиб, сўраган саволига жавоб кутмади: – Фима амаки, эшигингиз остонасидан жануби гарб сари роппа роса икки ярим миллион еттиз юз ўн бир минг уч юз ўн бир қадам юрилса, Новосибир деган шаҳарга етиш мумкин. Ўша шаҳардаги Ленком кўчасида яшовчи «Қонли «туз» деган одам менга «Барнаул атрофларида Фимадан ақллироқ одам йўю», деган эди. У бунақа масалада ҳечам адашмаган. Сизнинг олтин бошингизга олтиндан ҳайкал қўймоқчи эди. Ҳали қўйилмадими?

Асабийлаша бошлаган Фима бу саволдан кейин зийрак торгса-да, ажабланганини яшира олмади:

– «Қонли «туз»ни қаердан танийсан?

– Анатолий Игнатьевич менинг устозим. «Валет» билан «туз»нинг фарқини Учқудукда ўргатган.

Бу олам тобеси дўппи тор келиб қолганида ёки кимдандир устун келмоқчи бўлса, зўрлардан бири нинг номини дастак қиласди. Бу усулдан кўп фойдаланган Фима Ахтамнинг галига ишонқирамади. Кўзлари айёрлик билан қисилди. «Бу ўйинларинг менинг чўнтағимдан тушиб қолган, лақиллатишга бошқа овсарни топ», дегандай тикилди.

Ахтам алдамаётган эди. «Қонли «туз»дан киморга тегишли кўпчилик билмайдиган нозик услубларни ўргангани ҳам рост эди. У қамоқда орттирган устозининг Фима билан алоқаси бор-йўқлигини билмасди. «Буларни ошначилик занжири боғлаб турмаса ҳам, бир-бирларини танишлари аниқ», деган фикрда гап бошлаган эди, тахмини тўғри чиқди. Шу боис Фиманинг тикилган кўзларига безрайганича қараб тураверди. Фима ҳам «сен болани барибир синдираман», деган қасдда киприк қоқмай тикилди:

– Устозинг ҳали ҳам Ленком кўчасида яшайдими? – деб сўради муғамбирлик билан.

— Йўқ, ўтган йили ёғоч тахтга ўтқазиб, бошқа кўчадаги қасрга қўчириб қўйишган.

— Қаерга?

— Гўрга... Эшигмаганмидингиз?

— Эшигандай бўлувдим... Ҳа, Ленкомдаги уйда болалари яшаяпти шекилли?

— «Қонли «туз» уйланмаган, қиморбоз бўлса ҳам, ўғрилар қонунини ҳурмат қиласарди. «Владимир центратали»да тож кийдирмокчи бўлишганда «ёшлигида бир кизни бузиб қўйган», деган гап чиқиб қолди.

Фиманинг бу гаплардан хабари бор эди. Ахтамнинг ишонч билан гапириши унданги гумонни тарқатиб юборди. «Қонли «туз» тождор ўғри бўлмаса ҳам, бармоғига қалин узукнинг суратини тушириб олган, қимор ўйнаганда кўпчиликнинг кўзи шу бармокда бўларди.

Ахтамнинг тахмини тўғри эди: Новосибир, Томск, Краснояр, Ёкутистон-у Олтой томонларда ўзини кўрсатган қиморбозлар бир-бирларини билардилар. Фима ёқутлар ютидаги «Қонли «туз»га йигирма йил аввал биринчи марта рўпара келган. Ёкут йигитлар ўртага соф тилла тикишганда қўрқиб кетиб, этагини йиғишириб олган, «Қонли «туз» ём биларни осонлик билан ютиб олгач, қўрқоклиги учун ўзини ўзи лаънатлаганди. У ўшанда ютқизиб қўйишдан эмас, тилла билан кўлга тушиб, узок муддатга қамалиб кетишдан қўрккан эди. Ўша ўйинда ёқутларни ҳам, «Қонли «туз»ни ҳам доғда қолдира олишига ишончи бор эди. Кейинчалик яна икки марта «Қонли «туз»га рўпара келиб, хонумонини ютқизишига бир баҳя қолди. Болалик кезлари отаси унга карта чийлашни ўргатаётгандаёқ «пулингнинг ярмини ютқиздингми, ўйинни йиғишитир. Охирги тангасини умид билан тикадиган қиморбоз энг аҳмоқ қиморбоз ҳисобланади», деб таъкидлаган эди. Бир куни отаси уни катта ўйинга олиб бориб, ўзи четдан кузатадиган бўлди. Унинг қўлига бир ҳалта пул тутқазиб, «умрим бўйи

топган-тутганим шу. Ўлсам, мерос қолдиарман, деб ўйлагандим, тириклигимда ола қол. Ақл билан ўйнсанг, бойиб кетасан, аҳмоқлик қилсанг – хонавайрон бўлиб, ўла-ўлгунингча хорликда яшайсан», деди. Фима пулнинг ярмини ютқизганда тўхташ кераклигини унумаган эди. Лекин қизиган қони тўхташига йўл қўймади. Шайтонга миниб олган қиморбоз йигит қаергача борарди? Сўнгги чақасигача ютқизган Фима отасига қарашдан уялди. Отаси уни урмади, сўкмади, балки уч кундан сўнг қўлига яна бир халта пул тутқазиб, санаши буюрди. Санади. «Ўйинда ютқизган пулимни қайтариб беришдими?» деб ажабланди. «Ўйинда аҳмоқликдан ўзингни тия олмаслигингни билганим учун сенга аталган пулнинг қоқ ярмини олиб қолган эдим. Энди кўзинг очилгандир, бу ёғига пишиқ бўларсан?» Кўзи очилгани рост, пишиқ бўлгани ҳам рост. Шу боис ҳам «Қонли «туз» билан иккала ўйинда ўзини вақтида тўхтатди. У билан олишмади. Ўшанда «Қонли «туз»: «Энг ақлли одам Фима, дунёдаги барча қиморбозлар кирилиб кетса ҳам у тирик қолади. Ёмғирда қолган одам шалаббо бўлади, лекин Фима томчилар орасидан ўтиб, ўзига нам юқтирумайди», деган эди.

Бу гапларни Фима «Қонли «туз»нинг ўз оғзидан эшигтан. Кўзлари қаттиқ бу йигит ҳам шунга яқин гапни айтияпти. «Қонли «туз»га наҳот шу даражада яқин бўлса? Барнаулдан кечаси чиқиб кетган эди. Орадан бир кун ҳам ўтмай, изидан топиб келди. Ўзбекистондан кўнғироқ қилиб огоҳлантирган одам «Асадбек» деганинг номини тилга олди. Фима Асадбекнинг ўзини кўрмаган, аммо номи қулогига чалинган. Эҳтимол, у ўз юртида зўрдир. Лекин бу томонларга қўли етмаслиги аниқ. Йигитлари ўзларини жуда мағрур тутишяпти. Бу томонлардаги суюнчиклари ким? Агар бу безбет йигит лақиллатмаётган бўлса, «Қонли «туз» ўлиб кетгани билан соялари қолган. Соя

эса ўз номи билан соя! Ҳеч қачон «Қонли «туз» бўла олмайди...

Фима шуларни хаёлидан ўтказиб, бу икки келгин-дига қандай муомала қилишни ўйлади. Сўнг яна бир синааб кўриш мақсадида камзули чўнтағидан карта чиқариб, Ахтам томон ташлади.

– Товуқ пишгунча эрмак қилайлик.

Ахтам унинг мақсадини фаҳмлаб, кулимсиради.

– Бу ишингиз яхши бўлди. Ашулачиникига келган меҳмон ашула айтади, қиморбозникига келган одам бир қўл ташламаса ярашмайди, – деб карта чийлашни бошлади. Фима унинг ҳаракатларини кипприк қоқмай кузатиб, чаққон бармоқларда «Қонли «туз»нинг услубини кўрди.

– Қанчадан тикамиз? – деди Фима унга синовчан тикилиб.

– Пулингизни ютишдан уяламан, – деди Ахтам мугомбирлик билан. – Сиз ҳали қозонга тушмаган яримта товуқни тика қолинг. Мен бус-бутун хўрозни тикаман.

– Қарашингдан безбетга ўхшайсан-у, лекин ҳазилни ўрнига қўяркансан, – деди Фима кулимсираб.

– Тикадиган хўрозингни Ўзбекистондан олиб келганимисан?

– Йўқ, Барнаулнинг эрталабки бозоридан сотиб олдим.

– Аттанг, бу ерларнинг хўrozлари офтоб кўрмагани учун тотли эмас. Ўзбекистонники бошқача эди.

– Тотли хўroz гўштига кўнглингиз сус кетган бўлса, меҳмон бўлиб боринг, яхши одамларнинг қадрига етамиз.

Ахтам шундай деб карта узатди. Фиманинг юзи ғолиб одамнинг севинчи нури билан ёришди. Узатилган картага қўл узатмай «очиб ташла», деб ишора қилди. Ахтам биринчи қўлда ютқизди, иккинчи учинчисида ҳам ўйинни бой берса-да, жилмайганича тураверди.

– «Қонли «түз»га ўхшамадинг, у кетма-кет учта хўроз ютқизмаган бўларди, – деди Фима.

– Ташвишланманг, бизда хўроз сероб, энг муҳими – яримта товуғингиз қозонга тушмайдиган бўлди. – Ахтам шундай деб карталарни тахлаб кутисига жойлади-да, эгасига узатмай, стол устига беписандлик билан ташлади.

– Ҳа, дарвоқе... бу шеригинг ниманидир сўраганиди?

– Арзимаган нарсани сўради: Жамолбекдан ютиб олган болаларингизни олиб кетишимиш керак. Пулини берамиз. Хоҳласангиз, сиз болаларни тикинг, мен олиб келган пулни тикай, уч қўл ташлайлик – ора очик бўлади-қолади.

Фимадек одам бу йигитнинг хўроздарни атанин ютқизганини сезмас эканми? Болалар тикилган тақдирда ўйин бошқача бўлишини билмаса «қиморбоз» деган «шарафли» номни бекорга кўтариб юрган эканда, а?!

У Ахтамдан кўз узиб, Тарзанга «Сенам шу фикрдамисан?» дегандай қаради.

– Ошнам ҳазиллашяпти. Сиз билан ташлашадиган сиёки йўқ унинг. Биз бир қоп пул ютқизгани келмаганмиз.

– Эшилдингми? – деди Фима Ахтамга қараб. – Ҳазилингни йигиштир! Лекин... сен айтаётган болалар бўлганида таклифингни жон деб қабул қиласдим. Мен катта оғиз меҳмонларимни қанақа сийлашни яхши биламан. Бор-будини қоқиб олиб, иштончан ҳолларида кузатиб қўйишни жуда-жуда яхши кўраман-да! Барнаулда шунақа байрамлар кўп бўлган.

– «Болалар бўлганида» дедингизми? Ҳали «болаларни ютиб олмаганман» ҳам дерсиз?

– Ундай демайман. Ютганда ҳам қиморбозларингнинг тушмуғларини обдон ерга ишқаб келганиман. Кейин эса... афсус, омадим кетиб, бечорагиналарни ютқизиб қўйганман. Пулларимдан айрилгандан

кўра, бегона текинтомоклардан қутулганим дуруст-да, тўғрими?

— Кимга? — деб сўради Тарзан. Ахтам эса бу туллакнинг гапига ишонмай, тикилган кўзларини ундан узмади.

— Кимгалиги эсимда йўқ. Эсимда бўлганида ҳам сенларга айтмас эдим. Биздаги қиморнинг шарти шунақа. Сенлардагига ўхшаб сотқинлик қилинмайди.

— Сизга беш кетдим, Фима амаки! — деди Ахтам, кейин шеригига юзланди: — Тарзан, сен ҳадеб бемаъни саволларингни ёғдираверма. Ҳозир Фима амакимнинг хотиралари саёзлашиб турибди. Биз ҳам йўлда чарчадик. Олтойнинг самогонини ичмабсан — дунёга келмабсан! Бирон жойда чарчақбосди қилайлик-да, қайтайлик. Бизга «болалар ўша ерда бўлса, ҳақини тўлаб олиб келларинг», дейишган. «Фима амакингнинг бошини оғритиб, қийналаринг», дейишмаган. Биз қичкина одамлармиз, Фима амаки, баҳонада сиздай улуғ қиморбоз билан танишиб олдик, бизга шунинг ўзи бир баҳт. Ютуғингиз ҳалол бўлган, кимгадир ютқизган бўлсангиз, даъвоимиз йўқ. Шу атрофда кимникида зўр кўлбола ароқ борлигини айтсангиз бас, соғлиғингиз учун юзта-юзта отамиз-у кетамиз. Ҳозир ютқизганим учта хўрозни меҳмонга борганингизда юз баравар килиб қайтараман.

Ахтам шундай деб эшик томон юрди. Тарзан унинг пичинг гапларини тугатиб, сиқувга олишини кутган эди. Ҳозирги ниятини англамай, иложсиз ҳолда эргашди. Ҳовлига чиқишигач, остонаяда тўхтаган Фима:

— Ўнг томонга юрсаларинг, йигирмата хонадондан кейин «Азка-самогон» деганинг кулбаси бор. Ўша ерда ичарсанлар менинг соғлиғим учун, — деди.

Ахтам орқасига ўтирилиб унга қарамади, «илти-фотинг учун раҳмат», дегандай чап кўлинини кўтариб кўя қолди. Панжара-эшиқдан чиқиб, ўнгга бурилганда Ҳалимжон унга эргашди. Ичкаридаги савдодан беха-

бар бўлса-да, шерикларининг курук қайтишлари бе-
жизмаслигини фаҳмлади.

– Болалар шу ерда бўлиши керак, узокка кетмай-
лик, – деди у.

– Тўхтамасдан тез-тез юрларинг, оркага ҳам
қарамаларинг, – деди Ахтам йўлида давом этиб. – Бо-
лаларнинг шу ердалигини қаердан билдинг?

– Молхона ёнидаги хашакнинг орасида копток
куринди.

– Шунинг ўзими?

– Ҳар ҳолда Фима йигитлари билан копток
ўйнамаса керак?

– Ўйнайди, деган хулосага келамиз. Бекор турмай,
яхшилаб кузатганга ўхшайсан?

– Бек акам зийракликни ёқтирадилар.

– Шунақами, хўш, зийрак йигит, яна нималарни
аниқладинг?

– Уй бурчагидаги дараҳт шоҳида рўмолча кўрдим.
Улар ё кечқурун, ё эрталаб келишган. Машина изи
янги. Лекин машинанинг ўзи йўқ.

– Иккита одами бор дейишувди, демак, биттаси
машинада кетган.

– Молхонадан чиқсан йигит молларнинг тагини
тозалайдиган хизматкорга ўхшамайди. Ҳатто ҳаскаш-
ни қандай ушлашни билмас экан, сезмадиларингми?

– Мен ҳам умримда ҳаскаш ушламаганман, –
Ахтам шундай деб асабий равишда қўл силтади-да,
оркага қарашни тақиқлагани ёдидан кўтарилиб, ўти-
рилди. Жамшид «бунинг олдида ҳар нарсани валди-
райвермаларинг» деганида «хитларнинг одамими?»
деб гумонсираганди. Ҳалимжоннинг бирор айтмаса
ҳам атрофни зийраклик билан кузатиши ўша гумо-
ни ни тасдиқлади. Лекин унинг асабийлашишига са-
баб бу эмасди. Балки ўзи фаҳмлаши зарур бўлган
нарсаларнинг ўзга одам тилидан эшлиши кўнглини
ғашлантирганди.

– Иккинчи йигит уйда эди. Қүшни хона деразасида одам қораси күринди, – деди Ҳалимжон кузатуви хулосаларини давом эттириб.

– Буни мен ҳам сездим, – деди Тарзан уни кувватлаб. – Ҳар ҳолда, бу Фима амакинг анойи эмас, бурганинг орқасини кўрганлардан экан.

– Паст кетдинг, – деди Ахтам. – Амаким бургани тақалаб, миниб ҳам олган. Менам аҳмоқ эмасман. «Иккаланг қушилганингда ҳам битта ҳаром тукимга арзимайсанлар», демоқчи бўлганини фаҳмламабманми?! «Қонли «туз» вактида уни тузлаганми ё йўқми, буни билмайман-у, лекин чангалидан куруқ чиққанига ишончим бор. «Қонли «туз» ўзини бургут фаҳмларди, чангали ҳам, кўзлари ҳам ўтқирлигига гап йўқ эди. Лекин тулкининг айёрлиги олдида бунақа бургутнинг сариқ чақалик қадри йўқ. Бургутга қуёноми ё қўзичоқми бўлгани дуруст. Амакимизнинг оқ қўлқоп кийиб олганини кўрдинг-а?

– Ўйинга тайёрланяптими? – деб сўради Тарзан.

– Ҳа, билибсан. Биз билан кўришгани ҳам йўқ. Бармокларининг сезгисини авайлаяпти. Катта ўйинга тайёрланаётган одам овлоқда нега ивирсиб юриди, буни ўйлаб кўрмадингми?

– Ўйладим. У бизнинг келишимизни билган. Ким хабар берган, Жамолбек акангми?

– Ким бўларди! Сен латталик қилиб, ёнини олдинг. Даббани аямасдан, ўрага кўмиб кетишимиз керак эди.

– Ўрага кўмсанг, бу ернинг изини топа олмас эдинг. Фимага нега хабар берган, бу курумсокдан қарзи бормикин?

– Билмайман, Бек акамиз «тўққиз қайтган» дедилар-ку, хунасаларнинг шунаقا хурмача қилиги бўлади. Қайтиб борганимизда тумругини узиб олишмидан олдин сенга бир пасга бериб тураман, «нега? нега?» деган саволларингга жавоб олволасан. Үнга-ча каллангни ишлат: Фиманинг ўрнида бўлганингда нима қиласардинг?

– Унинг ўрнида нега мен бўлишим керак? Ўзинг бўлавер.

– Айёрликда аданг Фиманинг олдига тушмаса ҳам, ёнида тура олади. Сен эса ота ўғилсан.

– Адамни тинч кўй.

– Мен адангни мақтаяпман. Айёр одам ақлли бўлади. Сенам шахмат ўйнаганингда рақибингнинг камида бешта йўлини олдиндан ҳисоблаб қўясан-ку? Фиманинг катта ўйини қаерда бўлиши мумкин?

– Қиморбозларнинг қилиғини сен биласан.

– Биламан, шунинг учун менинг ишимга бурнингни тиқма, – Ахтам шундай деб орқасига яна бир қараб олди-да, йўлида давом этди.

Тарзанга бу қўпол танбех ёқмади, ғазабини чап томонига қараб «чирт» этиб тупуриш билан ифода этди. Гарчи, Жамшид Асадбекнинг: «Акаларингдан қайси бирига ўхшайди?» – деган саволига жавобан: «Маҳмуд акамга. Ўйламасдан бир иш қилмайди», деб таъриф берган бўлса-да, йигитнинг ўз оламлари учун бир оз хомлигини сезиб турарди. Тўғри, Тарзан фикрларди, лекин у зулм денгизининг сокин сатҳида оҳиста сузиб юрувчи кичик кемага ўхшарди. Қанчалик фикрламасин, бу денгизда «айсберг» аталмиш муз тоғлари борлигини, ҳар қандай катта кемани тоғнинг тепа қисми эмас, сув қаъридаги кўзга кўринмас баҳайбат муз қоялари парчалаб ташлашини ҳали яхши тасаввур қила олмасди. Ахтам эса сув ости кемасига ўхшарди – шайтанат денгизининг тўфонлари-ю гирдбларини яхши биларди. Энг қалтис шароитда ҳам шўнғиб, ҳужум қилишдан тап тортмасди. Тарзан буни биларди, билгани учун ҳам шеригининг хурмача қиликларига чидарди. Мазкур топшириқни бажариш жараёнида ўзининг бу соҳада ҳали ожиз эканини ҳам сезди. Сезди-ю ич-этини еди, аммо сир бой бермади. Ахтам эса ўзининг нимага қодир эканини, Тарзаннинг эса заиф томонларини яхши биларди. Билгани учун ҳам уни бир-икки заҳарли гапи билан

тупроққа қоришириб ташлашдан тилини тиймасди. Ҳозирги гап Ҳалимжон олдида айтилгани учун, Тарзан қарши жавоб бергиси келса-да, мавриди эмаслигини фаҳмлаб, индамади. Тарзан индамагани билан, вужудини ғазаб ўти ялаб ўтганини Ҳалимжон сезди.

— Үйинга тайёрланаётган бўлса, кўзимизни шамғалат қилиб кетиб қолиши мумкин. Пойлашимиз керак, — деди Ҳалимжон, уларнинг айтишуви ни узиб. — Кутиб олган йигитлар ҳам менга шубҳали кўринишиди. Балки улар шу Фиманинг одамлариидир? Бизни қопқонга туширишмоқчиидир? Бу ёкка бошлашса, овсарга ўхшаб индамай келавердик.

Ҳалимжон Балабуханинг «аксирмай қўйгани»дан бехабарлиги учун шундай деди. Асадбекнинг қанотига кирган икки йигитнинг нотаниш одамларга қўшилиб бу томон келавериши уни ажаблантирган, сирдан огоҳ бўлиш мақсадида бу шубҳасини баён қилган эди. Тарзан Асадбек яқинида юрган Ҳалимжонни бир-икки марта узокдан кўрган эди. Ўзлари Асадбек қаноти остига киришгач, бу йигит анчагача кўринмовди. Сафарга ҳамроҳ бўлишидан ажабланганида Жамшид сергак бўлиш хусусида огоҳлантиргач, унинг вазифасини «керак пайтида ёрдами тегади, кўпни кўрган бу бола», деб мавҳум тарзда изоҳлаган эди. Ҳалимжоннинг ҳозирги асоссиз гапи Ахтамнинг ғашини келтирган бўлса-да, ичиди «ўзинг овсарсан!» деб қўйди-ю, жавоб бермади. Тарзан эса эътиборсиз тарзда:

— Кочмайди, қочса, факат гўрга кириши мумкин, — деди.

— Амаким ҳали-бери гўрга кирмайди, — деди Ахтам.

— Бизни гўрга тиқишига уриниб кўрармикин? — деди Тарзан.

— Йў-ўқ, бунаقا иш қўлидан келмайди. У нархини оширмоқчи. Балки пулимизни ютиб, уйимизга иштончан юборар?

– Унда нега таклифингга кўнмади? Фирромга мосланган карталари тайёр эмасмикин?

– Бунақа туллакнинг карталари милисанинг тўппончасидай ҳамиша тайёр туради.

– Ўйнаса ютиши аникми? Кўлинин кўрдинг-ку?

– Агар бармоқларимда «Конли «туз»нинг ҳаракатларини сезган бўлса, ўйнашга юраги дов бермасов, бирон бошқа қилиқни ўйлаб топар. Икки-уч кун шу ернинг совуғини ейсан-у дод демайсан, чидайсан.

– Журъат қилса-чи? Ютишга чоғинг келадими? – Тарзан бояги қўполликнинг аламини олиш мавриди келди, деб ҳисоблаб, камситиш оҳангига ўтди: – Катта кетмаяпсанми, ўзингта ишонасанми?

Бу гапдан кейин Ахтам шарт тўхтаб, орқасига ўтирилди. Шеригининг мақсадини англаб, «Хозир тупроқка қоришириб ташловдим-ку, камлик қилдими, яна булғалайми?» дегандай, унга қошларини чимирганича тикилди. Кейин донишманд одамнинг салмоқли оҳангига сўради:

– Қиморда ўзига ишонганлар албатта ютқизади, нимагалигини биласанми?

– Мен қиморбоз эмасман.

– Қиморбоз бўлмасанг ҳам билиб ол, бу шахматнингга ҳам тааллуқли: қиморда ўзига ишонганинг албатта ютқизишига биринчи сабаб – ўзига ишонганлиги. Ўзига ишонмаган ҳам албатта ютқизади, бу иккичи сабаб. Мен эсам ютқизмайман, чунки ўзимга ишонмаслигимга ишониб ўйнайман. Тушунмадингми?

Ахтам гапни қойил қилганидан мамнун бўлиб, айёrona жилмайди. Ҳалимжон «фалсафасига менам тушунмадим», дегандай Тарзанга қараб олди. Шеригининг феълини яхши билган Тарзан эса «қани, донолигини охиригача етказавер-чи», деган каби унга қараб тураверди.

– Мен кучимга ишонмайман, ютишимга ишонаман. Иккаласининг фарқи бор. Куч – хоин, у албатта

алдайди. Ютишга ишонч эса алдамайди. Сен эса менинг ютишимга ҳеч қачон гумон қилма.

Ахтам «истасам, қимор оламининг қироли бўлардим, лекин ҳаётдаги мақсадим бошқа, шу мақсадга етаман деб, сенга кўшилиб, пастлаб юрибман», демоқчи бўлди-ю, Ҳалимжоннинг олдида гапни кўпайтиргиси келмади. «Сеи эса менинг ютишимга ҳеч қачон гумон қилма», деган гапни зарда билан айтди. Унинг аччиқланганини сезган Ҳалимжон кескинликнинг олдини олиш учун гапини бўлди:

– Ўн тўққизинчига келдик.

– Қанақа ўн тўққиз?

– «Азка-самогон»нинг уйи йигирмата хонадондан кейин эди, – деди Ҳалимжон сал нарида қорайиб турган ёғоч кулбага ишора қилиб.

– Шунақами? Сендақа сезгир йигитни энди кўришим. Бек акам қарашимга қараб туриб, менга «Сур» деб лақаб кўйган эдилар. Сеники «сезгир йигитча» эмасми? – Ахтам шундай дегач, рўпарадаги панжара-эшикни очиб: «Бабка!» деб бакирди. Ичкаридан жавоб бўлмагач, яна тақрорлади. Тўртинчи чакиришида уй эшиги очилиб, пешайвонга бир кампир чикиб келди.

– Бунча бақирасан, темирчининг боласимисан, нима бало! – деди Ахтамга норози қиёфада тикилиб.

– «Азка-самогон» сизмisisiz?

– Азкани нима қиласан? – деди кампир сергакланниб.

– Бу атрофда энг зўр самогонни Азка ҳайдаркан, деб эшитдим.

– Бунақа аҳмоқона гапни кимдан эшитдинг?

– Фима айтди.

– Фима айтдими? – кампир шундай деб афтини буриштирди. – Самогоннинг фарқини у тулки қаердан биларкан? Азага самогон ҳайдашни ким ўргатганини айтмадими?

– Шунисини айтмади у қари туллак, – деди Ахтам кампир томон юриб. – Лекин айтмаса ҳам биламан.

– Нимани биласан?

– Биринчиси – сиз «Азка-самогон» эмассиз. Иккінчиси, самогон ҳайдашни Азка сиздан ўрганган. Лекин шалтоқ бўлгани учун сассиқ самогонини ичиб бўлмайди. Бу атрофда энг зўр самогон фақат сизникида бўлади. Шунинг учун ҳам Худо бизни сизникига бошлаб келди.

– Ҳа-а... кўп нарсани биларкансан, сен қоравой, – деди кампир мамнун ҳолда.

– Фақат исмингизни билмайман, бувижон, – деди Ахтам меҳрибон набира овози билан. Бу оҳанг кампирни эритиб юборди.

– Бабка Нюра дейишади, сен «бувижон» деявер, неварамга ўхшаб ширин гапиракансан. Қанча қуйиб берай?

– Бувижон, биз кўпчиликмиз. Уйингизда ётиб қолишимиз ҳам мумкин. Ҳақини яхши тўлаймиз.

– Ётиб қолишларинг мумкинмас. Бегоналарни уйга қўймайман.

– Кўрқманг, бизнинг ёмонлигимиз йўқ. Неварангиз уйдами?

– Неварамми? – кампир йиғламсираб бурнини билагига артди. – Неварам уч ой олдин самогондан бўкиб ўлган. Шунга куйганимдан менам ичаман.

– Ичганингиз яхши, бувижон.

– Нимаси яхши?

– Худо уч тоифани яхши кўришини билмайсизми?

– Доно бўлсанг, ўзинг айтавер.

– Худо болаларни, аҳмоқларни ва майпарастларни яхши кўради. Сиз бола эмассиз, аҳмоқ ҳам эмассиз, демак, сизни яхши кўради. Нима қилайлик, кираверайликми?

Ахтамнинг юмшоқ оҳангдаги бу аврашлари ҳам қайсар кампирни эрита олмади:

— Бегоналарни қўймайман, — деди яна қатъий тарзда.

— Бу ишингиз ҳам тўғри, шалтоқ бўлса ҳам Азканикида ётаверамиз.

Ахтам шундай деб орқасига ўтирилган эди, кампир уни тўхтатди.

— Майли, кирларинг. Қанча ичсаларинг – ичларинг, ётсаларинг – ётларинг, фақат қиз бошлаб келмайсанлар.

— Нима деяпсиз! — деди Ахтам кулиб. — Бу атрофда қиз зоти борми ўзи?!

Тарзан билан Ҳалимжон ҳовлига киришганда кўчада уларни кузатиб келган «Тойота» кўринди. Ахтам изига қайтди. Машинадан тушган йигит «иима қиламиз?» деган маънода унга савол назари билан қаради.

— Иш пишмади, — деди Ахтам. — Бугунча шу ерда қоламиз.

— Биз четроқда пойлаймиз, — деди йигит.

— Беркинишнинг фойдаси йўқ. У тулки ҳаммасини билиб ётибди. Биз билан ўтираверинглар. Наригиларни ҳам чақир.

— Күённинг расмини чизиб, қочиб қолса-чи?

— Қочмайди. Бир халта пулни ташлаб қочадиган аҳмоқ рабиновичлар орасида ҳали туғилмаган.

— Иккитасини пойлоқчиликка қолдирман.

— Хоҳишинг. Фақат иккала машина шу ерда турсин.

Кутиб олган йигитларнинг учтаси уйга кириб, ўтиргач, кампир Ахтамни имлаб чақириб, ҳисоб-китоб қилиб олиши лозимлигини айтди. Ахтам саккизта йигирма бешталикни санаб бергач, чехраси очилиб, оёқ-кўли ҳам чакқон бўлиб қолди. Биринчи галда беш литрли шиша идишда тўла самогонни олиб кириб, стол ўртасига қўйди. Кетидан чўчқа ёғи, кейин нон билан пиёс кирди.

— Машинада конъяк, колбаса бор, олиб келсин-

ми? – мезбон йигит шундай деб лойқа сувни эслатувчи самогонга афтини буришириб қараб қўйди.

– Кампир ранжийди, – деди Ахтам, унинг шаштини қайтариб. – Биз ичмаймиз. Ичгинг келса ич, бўлмаса, буни қуритиш йўлини топ.

– Қанақасига қуритаман?

– Ана, дераза очик турибди. Дараҳтлар ҳам бир маза қилсин. Беш литр самогонга дараҳтнинг кайфи ошиб, кийшайиб қолмас-а? – Ахтам шундай деб кулди-да, кўзини қисиб қўйди. – Лекин худди ичиб маст бўлгандай бақириб, сўкишиб ўтиришимиз керак. Фақат онадан сўкмаларинг, бунақаси бизга ёқмайди.

Эҳтиёт чорасини кўриш ўрнига ҳужум қилишни, ҳар қандай ғанимни янчидан ташлашни афзал билувчи бу йигит Ахтамнинг мақсадини англаб, кўнглида норозилик ҳисси уйғонса-да, гапни кўпайтирмади. Билағи кучга тўла, аммо қалби меҳр-шафқатдан, акли эса фикрлашдан холи йигит учун бу ерда қанақа ҳолатда ўтиришнинг мутлақо фарқи йўқ. Унинг учун бир томон ғаним, душманни ким эканлигининг эса фарқи йўқ. Хўжайини «Ўзбекистондан келганларнинг хизматини қиласан, ўлдир деганини ўлдирасан, кулдир, деганини кулдирасан», дедими, бас, бошқа нарсани ўйлашига ҳожат ҳам йўқ. Худо уни «Ўзбекистондан келаётганлар ким ўзи, мақсадлари нима, уларга ёқмаган одамни нега мен ўлдиришим керак?» деган ташвишли ўйлардан холи қилиб қўйган. Агар Балабуха «Ўзбекистондан келганларни аэропортда эҳтиром билан кутиб олгин-у, ўрмон йўлига чикқач терисини шилиб олиб, жасадини Олтойнинг ботқоғига чўқтириб юбор», деганида «Бу бечораларнинг айби нима?» деб ўтирмай, вазифани бажаришга енг шимарган бўларди. Хўжайини унинг ихтиёрини меҳмонлар измига бердими, улар нима деса, бўйсунишга мажбур: «дараҳтни самогон билан суғор», дедими, суғоради. «Одам қони билан суғор», деса – бу ҳам мураккаб вазифа эмас. Бунақа топшириқни бажараётганида қўли

қалтирамаслиги аник, «менинг қоним ҳам эртамикечми қайсиdir дараҳт ёки күкатни суғорар», деган фикрдан ғоят узок эканлиги ҳам аник. «Мен ҳам кимдандир зулм күрарман, мени ҳам кимдир азоблаб ўлдирап», деган ҳақиқатни англаса, бу йўлидан қайтармиди? Худо билади! Ҳозир бирор келиб «Искирт бир кулбада ўз кучингта маҳлиё бўлиб керилиб ўтирибсан, яқин кунларда Моргаш худди ўзингга ухшаган бераҳм одамларини Томскка юборади. Улар Балабухага кўшиб сенинг жонингни ҳам сугуриб олишади. Жасадинг ахлатхонада ириб-чириб кетади. Но минг милиция ҳужжатларида «бедарак йўқолган», деб қайд этилади, сен учун қайгурадиган тирик жон топилмайди», деса-чи? Ишонадими бу гапларга ёки ҳабар етказган одамни жиннига чиқариб, орқасига биринки тепадими?

Киши ҳар бир иши учун Қиёматда жавоб беражгини, шунинг баробаринда охиратда кутаётган азобларни ҳар нафасида ҳис қилиб турсагина зулм йўлидан қайтиши мумкин. Дунё ҳаётини иймон эмас, шайтоний кувват бошқаришига ишониб яшаётган кишида бундай ҳис бўлмайди, демак, ҳисоб кўркуви ҳам унга бегона.

Синов дунёсидаги ягона суюнчиғи – набираси майхўрликдан бўкиб ўлган майхўр кампирнинг ярим ҳароб, шалтоқ кулбасидан вақтинча қўним топганларнинг бошини ана шу бегоналик қовуштириб турарди. Бу ирkit кулбага бузилган муҳитнинг заҳарли тухумлари айни мос эди. Буларнинг онгини зулм тузоқлари ўраб олган бўлса, нажот бормикин?

Даврага ўзининг бегоналигини сездириб қўймаслик учун Ҳалимжон ҳеч бир гапга, ҳеч бир ҳаракатта муносабатини билдиримай, хожасининг амрига маҳтал ижрочи кўринишида ўтирди. Остонадан ичкари қадам босишидаёқ димоғига урилган қўланса ҳиддан кўнгли айниса ҳам, сир бой бермай, чидади. Бошқаларнинг димоғи беркмиди ё бунақа жойларда кўп бўлганлари

учун ўрганиб кетишганмиди, ҳар ҳолда биронтаси-нинг башарасида ирганиш аломати сезилмади. Фақат Тарзаннинг афти бир оз буришди-ю, кейин унинг ҳам бошқалардан фарқи қолмади. Бир боғдан, бир тоғдан келиб тинмай гапираётган Ахтамнинг гапларини дикқат билан эшиштаётгандай кўриниш бериб жимгина ўтирган Ҳалимжон ис босган уйни аста кузатди. Ўтирган жойидан икки қадам нарида, печ ёнида теппасига газета парчаси ташланган эски челакка кўзи тушганда сассиқ ҳид қаердан тараалаётганини фаҳмлаб, кўнгли баттар айниди. Фикрини чалғитиши учун бошини бурди. Югурик нигоҳи уй бурчагини эгаллаган ўргимчак уясида тўхтади. Бурчакдан кўпдан бери ис олинмагани учун ўргимчак тўрини бемалол ёйиб, баҳузур ўрнашиб олган эди. Тўрининг пастки кисмида кимир этмай турган ўргимчакнинг қорни тўқмиди ё кўпроқ ўлжа тушишини пойлаётганиди, ҳар ҳолда домига илиниб, жон талвасасида, типирчилаётган пащшага эътибор қилмаётганди. Ҳалимжон бу манзарани дикқат билан кузата туриб, отасидан эшишган ҳикматни эслади:

Ўргимчак кулф тирқишига жойлашиб, темир саройга эга бўлдим, деб кувонибди. Тирқишдан мўралаб, режа туза бошлабди: «зинапоялар орасига тўр ташлаб, пащшаларнинг додини бераман. Анави бурчакка турларимни тортиб, семиз-семиз чивинларни тутаман, остонаяга тўр ташласам, майда қуртлар ҳам илинади...» ўргимчак ўз режасидан маст бўлиб турганида оёқ товушлари эшитилибди. Уй эгаси келиб, қулфга калит солибди-ю хаёлпаратни эзғилаб юборибди...

Асадбекнинг қаноти остида яқинда пайдо бўлган бу икки йигитни Ҳалимжон ўша нодон ўргимчакка ўхшатди. У янги шерикларининг қандай тақдир сўқмоқларидан ўтиб келишганини билмас эди. Жамшид «булар ҳалиғўрроқ, кўз-кулок бўлиб тур», деб тайинлашдан нарига ўтмаганди. Йўлда келишаётганди кисқа суҳбатлардан фаҳмлагани – Ахтам дегани

дўстига нисбатан ҳам ақллироқ, ҳам шафқатсизроқ. Ахтамнинг кўпни кўрганлардан экани, ғоят сезгир, ғоят эҳтиёткорлигини сезгани учун ҳам «акллироқ» деган тўхтамга келган эди.

Ахтам туғилганида барча тубанликлар, ҳамма фитна-фасодлардан йироқда эдими? Фитрати софа ва гўзал эдими? Разилликларнинг турфа иллатлари унга кейин ёпишдими? Онаси раҳмида эканида ташқаридаги шафқатсизликлар она ҳасратига кўшилиб, она қони билан унга ўтмадими, валлоҳи аълам?! Ҳалимжон буни билмайди, ҳеч қачон билолмайди. У янги шерикларининг ботинига қараш имконидан маҳрум, фақат зоҳирлари ва яқин орада қиласидан ишларига қарабгина бир хулоса чиқара олади.

Уларнинг зиёфати авжига чиққанда кампир Ахтами имлаб чақирди-да: «ўтиришларинг қизимаяпти, яхши қизлар бор», деди. Ахтам яна йигирма беш сўмликнинг баҳридан ўтиб: «чакиринг», деди. Кейин ўнталикни чиқариб, маънодор оҳангда:

– Ертўлангиздан каламушларнинг овози келяпти, кўпми? – деб сўради.

Кампир саволга тушунди-ю, бу саҳий йигитнинг яна пул чиқаришдан мақсади нима эканлигини англамади.

– Ҳамма ёкни каламуш босиб кетган, нима эди? – деб сўради ажабланиб.

– Учта каламуш керак менга. Учта халтачага солиб беринг.

– Нима қиласан?

– Пулни олинг-у, суриштирманг. Икки соатдан кейин тайёр бўлсин.

– Учта каламушга ўн сўминг кам, – деди кампир пулдан кўз узмай. Аслида шу пулга ҳам рози эди. Ертўлага сиғмай, уйда ҳам изғийвериб, жонига теккан каламушларнинг учтасини ушлаб бериш унга қийин эканми? Тўтидан бўшаб қолган қафасга данакдек чўчқа ёғи ташлаб қўйса, кифоя. Бирок, боболари

«иштаха таомланиш пайтида очилади», деганларидек, пулни кўрган сайин кўзи очлик чўғидан ёнаверди. Бу чўғ «ҳар бир каламушга ўн сўмдан бераман», деган ваъдадан кейин ҳам сўнмади.

Кампир айтган «қиз»лар ҳаяллашмади. Ёшлари киркни қоралаган, Худо хусну қомат улашганда лаллайиб қолган уч бақалоқ «қиз» кириб келиб, барчаларининг таъбларини тирриқ қилди. Тарзан Ахтамга газаб билан тикилди. «Бу энг азиз меҳмонларга аталган Фима амакимизнинг совғаси, – деди Ахтам унга шивирлаб. – Иккитаси Ҳалимга, биттаси сенга, танлаб ол».

Мезбон йигит кўнгли айнигандай афтини буристириб, Ахтамга «Бу қари товуқларни йўқотиш керак», деган эди, «асло! Энди дараҳтнинг ўрнига буларни суғорасан. Ярим соатда, қулатишинг керак», деган вазифани олиб, учта алюмин кружкани лиммо-лим килиб тўлдирди.

– Бизга етиб олларинг, кеч келганларинг учун бу сенларга жарима! – деб узатди.

«Қиз»лар ноз қилиб ўтиришмади, аксинча, хурсандлик билан олиб кўтаришди. Учинчи «жарима»дан кейин чайқалиб қолишиди. Ахтамнинг топшириғи шу зайлда тез бажарилиб, Тарзан билан Ҳалимжон ноҳуш майшатдан қутулиб қолдилар. Учта каламушни учта халтачага жойлаб, ўз ишидан ўзи мамнун бўлган кампир «майшат» бўлаётган хонага кирди-ю, саржин каби тахлаб қўйилган «қиз»ларини кўриб, чўчиб тушди. У «қиз»ларнинг ахволидан эмас, сахий йигитнинг «қизларинг вазифасини бажармади, пулни қайтар», деб қолишидан кўркди. Ахтамга яқинлашиб, «каламушлар тайёр», деб шивирлади.

– Буларингиз ҳам тайёр, – деди Ахтам «қиз»ларга ишора қилиб. Кейин кампирнинг ҳадигини сезиб: – Кўркманг, мен пулинин қайтиб оладиган номард эмасман, яхши хизмат қиляпсиз, – деб тинчтитди-да янги вазифа берди: – Энди Азка-самогоннига чиқиб,

«Фиманинг меҳмонлари очофат экан, сувдай ичиб ташлашяпти, тўйдиролмаяпман», деб, бир бутил самон-ғон олиб чиқинг.

– Уникини нима қиласан, ўзимда бор-ку? – деди кампир норози бўлиб.

– Уницидан ҳам ичиб кўрмасак, Фима амаким ранжийдилар.

Кампир Ахтамнинг гапларини тушунмади. Гўё унинг мақсади юзига ёзиб қўйилган-у, ўқимоққа қасд килгандай, тикилди-да: «Сен болада бир шумлик бор», – деб минғирлади.

– Шумлик йўқ, мен шўх боламан, ошналаримга бир ҳазил қилиб қўймоқчиман, – деди Ахтам кулимсираб.

Кампир бу сахий йигитнинг шўхлиги ва ҳазилига ишонмаса ҳам, топшириғини бажарди. Ярим кечада Ахтам шерикларига бўлажак вазифаларни тушунтиргач, ўринларидан қўзғалишиди.

Фиманинг икки соқчисини тинчитиш Балабуханинг йигитларига қийин бўлмади. Ахтам уйга кириб чирокни ёқди. Фима уйғоқ, оқ қўлқопи ечилган, панжаларини стол устига ёйилган картага қўйганича ҳаракатсиз ўтиарди. Чироқ ёқилгандан кейин ҳам қимиirlамади. Фақат «келишингни билар эдим», дегандай Ахтамга илкис қараб қўйди.

– Зерикаётганингизни билиб, қайта қолдим, – деди Ахтам унинг рўпарасига ўтириб. – Қимор ярим кечада қизиганда жоним роҳатланарди, шуни қўмсадим.

– Йигитларга тегмасаларинг ҳам бўларди, улар безарар, – деди Фима унга қовоқ уюб қараб.

– Тўғри айтдингиз, буларингиз молнинг тагини то-залащдан бошқага ярамас экан. Сиз эътиборли, кўзга якин одамсиз, уқувли болалардан топишингиз керак.

Фима Ахтамнинг гапига эътибор бермай, унга қаттиқ тикилди:

– Бу уйни деярли ҳеч ким билмас эди, қандай ис олдиларинг?

Ахтам мезбоннинг тикилишига жавобан, унга сурнигоҳини қадади-да саволга савол билан жавоб берди:

– Келишимизни қаердан билдингиз, Жамол айтдими?

– Билиб туриб нега сўраяпсан? «Ўқ илон»нинг бу атрофларда қанақа одамлари бор?

– Билмайман, билганда ҳам айтмас эдим. Ўйинни давом эттирамизми?

– Қанақа ўйин?

– Кундузи кўз-кўзга тушиши билан ўйинни бошлаган эдик, – Ахтам нигоҳини Фимадан узмаганича ёйилган карталарни бир-бир тахтай бошлади. – Сизга тушунмадим, ўйинингизни ғирром, демайман, лекин бунчалик қўрқиши, бунчалик синаш сизга ярашмайди.

– Кўрқкан ким, менми ё сенми? «Азка-самогон»га атая юборди, заҳарлаб ўлдиради», деб кўркиб, Нюрканигига кирмадингми?

– Заҳарлаб ўлдиришдан осони йўқ, қишлоқиларга беш сўм-беш сўмдан бериб, ҳаммасини кўтарасига сотиб олишингиз қийин эмас. Лекин сиз қотил эмассиз, киморбозсиз.

– Сенам киморбозмисан? Унда бу қилифинг нимаси?

– Мен собиқ қиморбозман. Пул ютиб олиш кейинги пайтда менга ҳузур бермай қўйди. Бир қоп пул ютсам ҳам кўнглим равшанлашмади. Мен ёлғиз бўлсам, шунча пулни нима қиласман? Менга қўнгил қувончи керак.

– Топдингми ўша қувончни?

– Топдим! Бир одам титкилаб-тиришиб, пул топади, бойлик тўплайди. Қайсиdir кечаси мазза килиб ётганда мен кириб бораман. Титрайди-қақшайди, дод солади. Мен пулларини жонини суғуриб олгандай тортиб оламан. Менга унинг пули керакмас, пул учун ўлишини томоша қилиш роҳатли. Охирги пулинин ютқизиб, титроққа тушган одамни кўрганда ўзингиз ҳам роҳатланасиз, тўғрими?

Фима бу гапни эшитиб, чакирилмаган меҳмонига бойқуш қараши билан қаради. Нопоклик, ғирром, бераҳмлик ортида фожиа ётганини қайси қиморбоз билмайди? Умри шоми қайғу ва алам булути остида ўтажагини-чи? Қайғу ва алам булутидан куйдирувчи ажал ёмғири ёғишини-чи? Фима ҳозир буларни ўйламади, унинг фикри безбетлардан осон қутулиш йўлини излаб топиш билан банд эди. Бир неча нафаслик сукутдан кейин у тилга кирди:

– Сен эса номардлик қилиб, қиморда ютганнинг шўрини куритасан?

– Йўқ, қиморбозга тегмайман, менга ресторон ёки универмаг директори ҳам бўлаверади. Қиморбозлиқ тубан ишга айланиб қолди. Милисадан қўрқиб, ҳали у овлоқда, ҳали бу овлоқда бикиниб карта суриш жонингизга тегмадими? Тўрт-беш сўм ютсангиз, ўғрилар қўлига тушмай, деб қақшаб юрасиз. Ҳали ҳам кеч эмас, мен танлаган йўлга ўта қолинг. Қиморбозлиқ гуноҳ деб эшитдим, ташланг шу хунарни.

– Отанг онангга қўшилаётган дамда тўшакнинг бир четини қўтариб, ўзинг ўргатиб турган бўлсанг керак-а? – деди Фима заҳарли жилмайиб. – Қиморбозлиқ гуноҳ бўлса, бироннинг молини тортиб олиш нима бўлади?

– Бироннинг молини тортиб олиш гуноҳ эмас, роҳат бўлади. Худо биз учун тўплатиб қўйган бу молни. Агар вақтида тортиб олмасак, Худо ранжийди.

– Китоб ўқиб турасанми?

Ахтам бундай саволни кутмаган эди. Дарҳақиқат, уларнинг олди-бердисига китобнинг нима алоқаси бор? Ахтам Фиманинг юзига тикилгани билан, ундан бир маъно уқиб ололмай, жавобни қисқа қилди:

– Бекорчи вақтим йўқ.

– Ўрисларнинг «Ақллилик балоси» деган китоби бор. Ўшани ўки, ўз ақлинг эртами-индинми сени ба-лога учратиб, барибир гўрга тиқади. – Бу гап ҳукмга айланиб, рўпарасидаги сурбет йигит ҳозирнинг ўзидаёқ ажал топгандек туюлди-ю, Фима мамнун ил-

жайганича кўшиб қўйди: – Ёшлигида ўлиб кетганларга жуда-жуда раҳмим келади-да...

Бунақа киноя Ҳалимжонга ёки Тарзанга салгина таъсир килиб, кўнглини озгина ғашлантириши мумкин эди. Асадбек қанотига киргунича «мурда» бўлиб юриб, энди «сур»га айланган йигитга килча таъсир этмади. «Аччиқни аччиқ кесади», деганларидек, пи-чингни пичинг қиличи билан урди:

– «Ақллилик балоси» дедингизми? Зўр-ку! – деб хитоб килди, кейин таъкид этди: – Ростданам зўр гап! Менинг ақлим – бошқалар учун бало! Бунга ишон-масангиз, энди карталарни очамиз: биринчиси, Азканникига ё Нюрканикигами ё бошқа шалтоқникигами киришимизнинг сиз учун фарқи йўқ эди. Агар шуни тушунмасам, ахмоклигим бошимга бало бўларди. Ўзингизнинг кўнглингизни овлаб юрувчи учта оғатижонни юборибсиз, «кўриб кўнгли айнир, Нюркадан пулини қайтиб олар», деб ўйлаган бўлсангиз, хато қилибсиз. Биздай довдирларга номи хотин бўлса бас, бўлаверади. Сиз факат бир нарсани кутмаган эдингиз, шунга бошингиз гаранг, сўрамоқчисиз-у тилингиз бормаяпти.

– Очиқ ўйинни бошладингми, энди гапни чўзма.

– Хўп, гапни чўзмасам, чўзмадим. Мен ўқиган китобларда «пачакилашиш» деган сўз йўқ. Сиз боятдан бери учта каламушга ҳайрон бўляпсиз.

– Хўш?

– Сизнинг каламушингиз ҳам табаррук, унинг ҳам ўз вазифаси бор. Хафа бўлманг-у бунчалик паст кетишингизни кутмаган эдим. Шахматдаги энг пачок юришни танлаб, болаларча мот бўлишимизни истадингизми? Шу йўл билан нархини оширмоқчи бўлган одамни сизларнинг тилингизда «аҳмок» дейдими?

– Нима деб валдираяпсан?

– Ўйинда ютқиздингиз, деб валдираяпман, – Ахтам ундан нигоҳини узиб, оstonада турган Тарзанга ўгирилди: – Алёшкани олиб кир, бир отамлашайлик.

Тарзан эшикни очиб имлаб қўйган эди, буйруқка маҳтал турган Ҳалимжон Алёшканинг гарданидан тутиб, ичкарига олиб кирди. Қуллари орқасига қайрилиб боғланган йигит остона ҳатлагач, заифлиги учун хўжайинидан уялгандай бошини эгиб олди.

— Алёшка, азизим! — деди Ахтам у томон юриб. — Кундузи бизни кутиб олганингда димоғингдан қурт ёғилаётган эди-я! Бир тепкилик ҳолинг бор экан-ку, сўтак! Бизнинг тарбиямизни олувдинг, бип-бинойи одобли йигитта айландинг. Хўжайининг қариб, склероз бўлиб қолибди, мияси айниб, ҳеч нарсани эслай олмаяпти. Бир оғиз гапинг билан унга ёрдам бериб юборсанг, биз безовта қилганимиз учун узр сўраймиз-у, қорамизни ўчирамиз. Кеча эрталаб келганларингдан кейин учта болани қаерга яширдиларинг?

Йигит хўжайинига қўрқув билан бир қараб олди-ю яна бошини эгди. Ҳавотирини яширмоққа уринаётган Фима уларга кўз остидан қаради.

— Алёшка, мен бир марта сўрашга ўрганганман. Ҳурматингни қилиб, майли, яна сўрайман: болалар қани?

— Қанақа бола? Ҳеч нарсани билмайман.

— Тарзан, сен ҳамиша ишни чала қиласан! Бу боланинг тарбияси ҳам чала бўлибди. Камчилигингни тез тўғрила.

Тарзан шу буйруқни кутиб турган эди. Ҷўнтагидан чилвир чиқариб йигитнинг аввал чап, сўнг ўнг сонини шими устидан боғлади. «Тарбия»нинг қандай азобдан иборат эканини билолмаган йигит бир хўжайинига, бир Ахтамга жавдираб қаради. Ахтам эса Ҳалимжон узатган халтачани олиб, йигитнинг тумшуғига тутди.

— Эшитишимча, сен майшатни яхши кўрар экансан. Хўжайининг учта парисини бизга тортиқ қилиб юборган эди, уларни сеҳр қилиб, каламушга айлантиридиг-у, биттасини сенга атадик. Ҳозир каламушни иштонинг ичига ташлайман. Олтой каламушлари сендака галварсларни ғажишни яхши кўрармиш. Нозик жойингта

қаноат қилмаса, буйрагингта ўтар, жигарингта ўтар... Миянгга етиб боргунича, эслаб қоларсан болалар қаердалигини.

Ахтам шундай деб халтача оғзини очди-да, типирчилаётган каламушни йигитнинг шими ичига ташлади. Куркув исканжасидаги йигитнинг бақириб юбориши учун каламушнинг типирчилаши кифоя қилди. Каламушнинг тиши ишга тушиб, Алёшка талvasани бошлаганида Ахтам имлаган эди, иккинчи йигитни ҳам олиб кирдилар.

— Шеригинг болаларни қаерга яширганини эслай олмаяпти. Иштонига каламуш қамалиб қолганмиш, қизик, а? — Ахтам гапини тутатмай, бу йигитнинг ҳам икки сони чилвир билан боғланди. — Шундай қилмасак, каламуш иштонингдан пастта тушиб қочиб қолиши мумкин, — деди Ахтам ишшайиб. — Айтасанми, ё каламуш билан маишат қиласанми?

— Нимани айтаман? Ҳеч нарсани билмайман.

Ахтам гапни кўпайтирмай, узатилган иккинчи халта оғзини тезлик билан очиб, шими ичига ташлади-да, орқасига ўгирилди:

— Фима, учинчи каламуш сенга аталган. Нима қилсин, олиб кирсингми?

Ахтам сенсирашга ўтмаса ҳам, пичок бориб, суюкка тақалган эди. Фима бармоқларини авайлаши шартлигини ҳам унутиб, столни кафти билан қарсиллатиб урди-да, ўрнидан шарт туриб:

— Тўхтат, томошангни! — деб бақирди.

— Фима, томошанинг тўхташи менга эмас, сенга боғлиқ, — деди Ахтам совуқонлик билан. Кейин меҳрибонлик билан қўшиб қўйди: — Фимушка, биз бир дунёнинг одамларимиз, бир-биrimизни севишимиз керак.

— Сени ажал севсин...

Фима пастки лабини тишлади, кейин оғриққа чидолмай, тили билан ялади. Бу йигитларни олдинроқ кўчада учратиб қолса, аҳамият бермай, «ҳа, иккита

мишики сўтак-да», деб ўтиб кетаверган бўларди. Буларни панжарали эшиги ортида курганида «Жамолбек ваҳима қилган «жон олғувчилар» шуларми?» деб менсимаган эди. Ҳатто бу хабар учун ваъда қилгани мукофотдан воз ҳам кечганди. У «жон олғувчилар»нинг турли тоифасини қўрган. Бу майдонда от суриб юрганлар билан тил топишиш осонроқ, лекин эшакнинг думига осилиб юрганларга гап тушунтириш қийин. Назар-писандга арзимайдиган бу сўтакларнинг кўзлари фақат жон талаб қилгандай хунук боқади. Тилидан бол томади-ю, нигоҳи эса қонсираган. Сўтак кўринишидаги йигит энди йиртқич хайвон ваҳшатида намоён бўла бошлаган эди. Фима Азроилнинг бу жиянларига қарай туриб, «Эй Мусо! Ҳассангни ташлаб денгизни иккига ажратганингда «Эй Худо, Фимага мана бунақа газандаларни рўпара қилма», деб сўрасанг бўлмасмиди!» деб ўзининг пайғамбарига дилида даъво қилди.

Каламушнинг иштаҳаси очилиб кетдими, Алёшка оғриққа чидомлмай йиқилиб, типирчилай бошлади.

– Тўхтат! Айтаман! – Фима йигитлари томон қадам ташламоқчи эди, Ахтам «аввал айт» дегандай унинг йўлини тўсади.

– Нариги хонадаги гиламни кўтарсаларинг ертўлага йўл бор, – деди Фима ҳансира. У қўркувдан ҳансирай бошладими ё ғазабданми, билиш қийин, зотан, меҳмонлар учун бу аҳамиятсиз эди.

– Шу оппа-осон ишни бунчалик мураккаблаштириб, бошоғриқ қилишинг шартмиди! Алёшкангнинг тухуми қуришига бир баҳя қолди-я! Тарзан, тарбиявий соатингта танаффус бериб тур.

Ахтам шундай деб қўшни хонага чиқди. Ҳалимжон гиламни кўтариб, ертўла оғзини ёпиб турган қопқокни очди. Тепадан тушган чироқ нурида ертўла ғира-шира ёришса-да, бурчакда ғужанак бўлиб ўтирган болалардан садо чиқмади. Оталари ўлиб, оналари қамоққа

тушганидан кейин сотилувчи матоҳга айлантирилган болалар яна қандай балоларга мубтало бўлишларини билмай, зах ертўланинг совуғидан эмас, кўркувдан титрашарди.

– Болажонлар, биздан кўркманглар, – деди Ҳалимжон пастга тушар экан. – Фурқат, Норхол, эшитяпсанларми, бизни ойижонинг юборди.

Ҳалимжон ҳеч нарсадан кўркмасди. Ҳатто Красноярда лўтгибозлар қўлига тушиб, вақтинчалик қамоқхонада ўтирганда ҳам, терговчининг тепкиларидан суяклари зирқираганда ҳам ўз тақдиридан кўркмаган эди. Нимқоронғи ертўла бурчагида кунишиб ўтирган болаларни кўриб, кўркиб кетди. Уларнинг қисматидан даҳшатга тушди...

Ўтган узоқ вақт ичида кенжা қизча ўзбекчани эсдан чиқарган, катталари унутишмаган бўлишса-да, меҳрибон оҳангда айтилган гап уларга ғалати туюлиб, кулокларига ишонишмай, жойларидан жилмай ўтираверишиди.

Болалар шафқат тилаган кўзлари билан мўлтиллаб, Ҳалимжоннинг қалбини поралаб ташлашди. Болаларни ютиб олган Фимани, ҳатто қутқариш учун келган шерикларини ҳам тепкилаб-тепкилаб ташлагиси келди. «Болаларнинг ҳар бир охи учун бу газандаларнинг кўзларини ўйиб олиш керак, гўдакларнинг кўзларидан томган ҳар томчи ёшни чўкка айлантириб, буларнинг яланғоч кўкракларига оловли дўл қилиб ёғдириш керак!» – бу Ҳалимжоннинг қалбида туғилиб, тилига чиқолмаган нидоси эди.

– Фурқат, – деб каттасига мурожаат килди, – Фазлия опанинг ўғлимисан? Ойинг юборганига ишонмаяпсанми? Фима амакинг «ёмон одамлар келишди», деб кўрқитганга ўхшайди, а? Туинглар, уйингизга кетамиз.

Пастга эгилиб караган Ахтам болаларнинг аҳволини кўриб, ғазабдан титраб кетди. Фимани булғалаб, тепкилаб ташлагиси келди. Аммо «қонли из қолдириш

мумкинмас», деган вазифаси борлигини эслаб, ўзини тутди.

— Фурқат, — деди у, — аканг алдаётгани йўқ, чиқа қолинглар. Фима амакинг ҳам рухсат берди.

Ҳалимжоннинг меҳрибон оҳанги эмас, Ахтамнинг гувоҳлиги ҳам эмас, Фима амакисининг рухсат берганлиги хусусидаги хабар таъсир қилиб, аввал Фурқат, кейин Норхол ўрнидан кўзғалди. Қизчалар акаларининг икки қўлига ёпишганларича эргашдилар. Ҳалимжон уларни худди туғишган акасидай бир-бир қучоқлаб, пешоналаридан ўпид қўйиб, нарвондан юқорига кўтарилишларига ёрдам берди. Ахтам болаларга ачинган эди, бироқ, меҳр-шафкатга бегона бўлгани учун уларни Ҳалимжон каби қучиб, ўпмади. Уларга бошдан-оёқ разм солди: кўрқишилари ҳисобга олинмагандা болаларнинг ранг-рўйлари, кийим-бошлари ёмон эмасди. Нималар бўлаётганига тушунмаётган қизча қўғирчоғини бағрига босганича Ахтамга жавдираб қараб тураверди. Унинг бу жавдирашида ўзининг эмас, қўғирчоғининг тақдиридан ҳавотирланиш зоҳир эди. Акаси билан опаси эса «бошимизга қандай бало ёғиларкин?» дегандай нажот кўзи билан мўлтиллаб қарашибди. Ахтамга бундай қарап бегона эмас, болалар уйида ҳам, кейинчалик болалар қамоқхонасида ҳам бундай нигоҳларни кўравериб, дийдаси қотиб кетган.

— Совқотдиларингми? Ҳозир кетамиз, ойинг соғинибди, — деди Ахтам Фурқатга, кейин Ҳалимжонга «шу ерда тура турларинг», деб катта хонага чиқди. Алёшка каламушдан қутулган бўлса-да, ҳали ҳам ўрнидан турмай, инграб ётарди. Шериги эса дум тушиб ўтириб олганди. Ахтам остона ҳатлаб ичкари кириши билан Фима:

— Буларни тез дўхтирга олиб бориш керак, — деди ғазабли буйруқ оҳангида.

— Кетганимиздан кейин дўхтирга кўрсатасанми, гўрковгами, ўзинг биласан, — Ахтам совуқ овозда шун-

дай дегач, Балабуханинг йигитларига имлаб қўйган эди, икковини судраб олиб чиқиб кетишиди.

– Кетишига шошилма, ҳисоб-китобимиз тугамади, – деди Фима жойига қайтиб.

– Қанақа ҳисоб-китоб? Эсинг жойидами, Фима? Каламушга ем бўлмаганларингта қувонсанг-чи! Эртага милиса қоқ суякларингни кўриб ачинадими ё каламушларни тутиб, «Иш» очадими?

– Учта муттаҳам камайгани учун милиса каламушларга раҳматнома эълон қиласди, – деди Тарзан, шеригини қувватлаб.

– Ана, эшитдингми! Тарзан билиб гапиради. Афуски, хўжайнинимнинг тантилиги бор, «қурумсоқнинг ҳақини берларинг», деб тайинлаган. Мен буйруқни буза олмайман. Пулни олгин-у, жим ўтиравер. Аслида болаларни шунча ушлаб турганинг учун онасиға сен товон тўлашинг керак эди.

– Болаларни кўрдинг, ёмон қарабманми? Ўзимнинг боламдай парвариш қилдим. Сен Жамол ютқизган пул билан, овқат пули олиб келибсан. Тарбия қилганимчи?

– Қанақа тарбия?

– Мен уларни ўйинга ўргатдим. Нега ҳеч кимга бериб юбормаганимни айтайми? Уларнинг томирларида зўр ўйинчининг қони оқяпти.

– Аравани курук олиб қочаверма! Отаси пачок ўйинчи бўлган.

– Отаси пачок бўлгандир, менга бунинг аҳамияти йўқ. Лекин учови эрта-индин қимор оламини остин-устун қилиб юборади. Менинг келажагимни шулар беришади. Ўзимнинг болаларим йўқ, бериб юборсам, келажагим нима бўлади?

– Нима бўларди, кариндошларингта ўхшаб тарихий юртингта жўнаворасан, қайтага яхши-ку! Писиб юришдан бира тўла кутулласан – деди Ахтам беписандлик билан.

– У ерда менинг насибам йўқ, бунда сенга

ўхшаганларни чув тушираман, у ёқда-чи? – Фима ҳеч кимга айтмайдиган ҳақиқатини бехос айтиб юбориб, уф тортди. Отаси ўлар олдидан «ҳеч қачон ўзимизникиларга қарши ййнама, бир тийинини ҳам ютиб олма», деб васият қилган эди. Бошқаларга күшилиб, тарихий ватанига кетса, тирикчилиги нима бўлади? Тўғри, у ерда ҳам қимор бор, лақма қиморбозлар ҳам борлиги аниқ. Лекин уларни ютиб, васиятни бузса, нариги дунёда учрашганида отаси кўзига қандай қарайди? Рўпарасидаги сурбетга қандай тушунтиурсин буни? Тушунтириши шартми? Шуларни ўйлаб яна бир уф тортди-ю, бошини эгди. Ахтам эса меҳрибон отанинг овозида уни овутишга киришгандай бўлди:

– Фимушка, бу болалардан ажраб хорланаман, деб куйинаётган бўлсанг, биз билан кета қол. Менга ўгай ўғил бўласан. Еганингча ейсан, кийганингча киясан. Мен етимларни яхши кўраман. Хор қилиб қўймайман сени.

Бу масхарадан кўнгли оғриган Фима бошини кўтариб, дадилроқ овозда деди:

– Олиб келган пулинг харажатларимни қоплашга урвоқ ҳам бўлмайди. Ҳисоб-китобни бошқача килишимиз керак.

– Ол-а! – деб юборди Тарзан. – «Рейтер» агентлиги кизиқ тадқиқот ўтказиби. «Йигирманчи асрдаги энг буюк найрангбоз ким?» деган саволга бир миллиард одам «Михаил Горбач», деб жавоб берибди. Бу хато, тўғрими? У аҳмоқлар Олтой деган овлоқда Фима деган найрангбоз борлигини билмаганлар. Мен уларни огоҳлантириб қўяман, Миша Горбач келиб, сенга шогирд тушсин.

Ахтам шеригига норози киёфада қараб, «аралашмай тур», деган маънода ишора қилиб қўйди-да, Фиманинг рўпарасига ўтириб, қўлига карта тўпламини олди:

— Эртакдаги Иванушка аҳмок эсингдадир, рўпарасидан уч йўл чиқади, а? Биттаси — «борса-келмас», кейингиси — «борса-ё келар, ё келмас», учинчиши — «борса-келар»... Қайси бирини танлайсан?

— Ўзинг-чи? Иккита каламуш билан қўрқитиб, осмонга устун бўлдим, деб ўйлаяпсанми? Балки енгимга яширган карталарим бордир?

— Биринчидан, бу ўйинда карта яшириш қўлингдан келмайди. Агар ўғрилардан қўрқмай, улардан ўзингни нари тутиб юрмаганингда эплардинг бунақа найрангни. Этагинг очилиб қолганда беркитадиганлар ҳам топиларди. Иккинчидан, каламуш иккита эмас, учта, биттаси сенинг хидингга маст бўлиб ётиби. Учинчидан, сен Иванушка ҳам, аҳмок ҳам эмассан. Сенга «борса-келар»и дуруст. Тўртинчидан, менинг рўпарамда ҳеч қачон учта йўл бўлмайди. Худо пешонамга «борса-келар»ни ёзиб қўйган. Бу ўчмайдиган ёзув, билиб қўй. Фима, Фимушка, мени лақма, деб ўйласанг ўйлайвергин-у, лекин аҳмок қиласман, деб хомтама бўлма. Агар болаларни ўзингда олиб қолмоқчи бўлганингда Барнаулдаги иккита бошибузук одамхўрни ёллардинг. Учта лақма ўзбекнинг судраб келган чориғини тобутга айлантириб бериш қийин иш эканми? Қийин эмас, фақат озгина чиқими бор. «Чиқим» дегани сени илондай чақади. Сенинг танглайнингни «кирим» билан қўтаришган. Тағин ҳам сен инсофлисан, отангнинг ўлигини сотиб юбормагансан. Шунақами? Ҳа, шунақа! Нега сотовдинг? Нимагалигини айтами? Отангнинг сассик ўлиги кимга кепрак? Харидор чиққанида сотищдан қайтмасдинг. Майли, мени аҳмок қилишга уринавер. Лекин анави иккита шеригимнинг сабр косасини тўлдириб, тошириб юборма. Мен аҳмок бўлсам, улар ғирт аҳмок! Бошлирида тарикча мия йўқ. Ўйлаб ўтиришмайди. Мен бир хунасани ушлаб, қўл-оёғини боғлаб берсам, булар сўйишдан бошқасини билишмайди. Айниқса, анави шохи йўқ хўкизга ўхшаганидан қўрқ. Жуда қўпол-да,

у ҳайвон! Одамнинг терисини шилаётганида ҳатто ўлик ҳам дод деб юборади.

Ахтам бу гапларни киприк қоқмай гапирди. Фиманинг юзида ўзгариш бўлишини кутди. Фима дарров титрокка тушадиганлардан эмасди. «Чўпчагингни айтавер», дегандай тикилиб тураверди. Ахтам руҳий зарбаси иш бермаганидан ғашланиб, давом этди:

– Хўш, ташлашамизми?

– Йўқ. Олиб келганингта яна шунча қўшасан.

– Фима, найрангларинг ўтмади, ўзингни тарозига солма. Хўжайним бу пулга бир тийин қўшмайди ҳам, олмайди ҳам. Қиморбозлик ҳурматингни қилиб, мен битта каламуш қўшиб қўйишим мумкин.

– Кўрқитма. Фимани кўрқитганларнинг бир саржини куйиб, кул бўлиб сочилиб кетган. Агар қўшмасанг, иккита кичигини олиб кетавер. Каттасининг нархи бошқача.

– Нимаси бошқача?

– У картани кўз юмиб ўйнайди, шахматни қотириб ташлайди. Икки йилда гроссмейстер бўлади. Ҳозирнинг ўзида Карпни эзив ташлаши мумкин. Уч йилдан кейин Каспар унинг олдида эмаклаб юрадиган бўлади. Шундай вундеркиндни бекордан бекорга бе-риб юборсам, овсар, деб маломат қилишмайдими?

– Аввалги жаҳон чемпионини эзив ташлай оладиган, ҳозиргисини букишга қодир шахмат устасининг нархини белгилаб ҳам қўйгандирсан? – деди Ахтам.

– Олиб келганингта яна шунча қўшасан.

Ахтам бир бечоранинг юзига ғам ёки кўркув соя ташлаганида ярасига туз сепиб завқ оладиган тоифадан эди. Айни дамда шу қилиғига содик қолди:

– Фимушка, менинг битта каламушдан бошқа бойлигим йўқ.

Ботқоқликдан балчиқ хиди анқийди. Бир челяк атир сепилса ҳам, хуш ёқувчи хид таралмайди. Ахтамнинг тилидан учайтган ширин сўзлар зулм ҳукмидаги

қалбдан куч олаётган эди. Буни англаган Фима ғазабини жиловлай олмади, овозини баландлатди:

– Ҳадеб каламушингни пеш қиласерма, ўйнасанг, каллангни ишлатиб, ҳалол ўйна.

– «Каллани ишлатиб» дедингми? Қойил тақлиф айтдинг, ўз тилингдан илиндинг, Фима, энди гапингдан қайтмайсан. Карта эмас, беш кўл шахмат сурэмиз.

– Гапни айлантирма, мен «шахмат сурэмиз», демадим. Бу ўйинга укувим йўқ.

– Сен ўйнамайсан, Тарзан билан Фурқатбек суриншиди. Ютсак, болани олиб кетамиз.

– Яхши, мен болани тикаман, сен-чи? Фақат каламуш, деб дийдиё қилма.

– Шундай болага қарши каламушни тикувчи инсоғиз эмасман. Мен Тарзани тикаман. Ютқизса, олиб қоласан, хизматингни қилиб юради.

– Сен ўзингни тикавер, – деди Тарзан унинг гапидан аччиқланиб. – Икковинг бир-бирингга мос экансанлар. Шу ерда ўлсаларинг қўшмозор бўла қоласанлар.

Ахтам ўгирилиб, «шунга ҳам жириллайсанми, аралашмай турсанг ўлармидинг?» дегандай норози киёфада қараб, пичинг оҳангини ўзгартирмай деди:

– Жон оғайнини, мени шу туллак билан битта гўрга тиқмагин. Бу кўмилган жойдан ҳаром ўлган товукнинг сассифи келиб туради. Майли, мен дўсти учун заҳар ютиб юрган одамман, сазанг ўлмасин – икковимизни тикамиз. Нима дейсан, Фима?

Фиманинг кўзларидан нафрат учқунлари сачраётгани билан вужудига иложисизлик пушаймони ҳукмрон, «Сенларни бошимга ураманми...» – деб тўнғиллашдан ўзга чораси йўқ эди.

– Бошқа иложинг йўқ, Тарзан, болани олиб кир.

Ахтам шундай деб ўрнидан турди-да, дераза токчасидаги шахмат қутисини олиб стол устига қўйди. Кейин уй бурчагида ётган халтачани кўтариб, Фима-

нинг кафти устига ташлади. Фима чўчиб, қўлларини тортиб олди. Халтачада типирчилаетган каламуш худди унинг ичини кемира бошлагандай туюлиб, сапчиб турди-да: «Ол, бунингни!» деб бакирди. Ахтам унга парво қилмай, эшиқдан кириб келган Фурқатни очиқ чехра билан қаршилади:

— Фурқатбек, Фима амакинг «зўр шахматчи», деб сени роса мақтади. Катталар билан ўйнаганмисан? Шу аканг билан бир ташлашиб кўрмайсанми?

Фурқатбек довдираб, нима дейишини билмай, мунгли кўзларини Фимага қаратди. Фима кўркувини ошкор қиласлик учун, халтадан кўзини узиб, дадил овозда:

— Фурзик, сен чўчима, ўғилгинам, чап томондаги тўрани олиб ташлаб ўйнайвер, — деб далда берди.

Фурқатга бу далда етарли бўлмади, титроқ бармоклари билан оқ доналарни териб, чап катакдаги тўрани четга олиб қўйди. Тарзан «ростданам шунаقا зўрмикин?» деган маънода шеригига қаради. Ахтамнинг нигоҳида ҳам шу савол бор эди. Ҳалимжон эса бир Фурқатга, бир унинг укаларига қараб, болаларнинг хуркак нигоҳларида кўркув кўрди. Эҳтимол, уларнинг қорни оч қолмагандир, лекин бу айёр чолдан ғоятда қўрқишлирини шу нигоҳлари аён этиб турарди. Фима билан овора бўлаётган Ахтам ҳам, Тарзан ҳам бунга аҳамият беришмади. Ҳалимжон эса бу кўркувнинг сабабини билишга ошиқмади. Унинг учун ҳозир энг муҳими бу бечораларни зулм чангалидан омон-эсон кутқариб, олиб кетиш эди.

Биринчи ўйинда Фурқат ютгач, Фиманинг кўзлари чўғдек ёнди, халтачадаги каламушга ҳам парво қилмай қўйди. Қандай қилиб ютқизганини Тарзаннинг ўзи ҳам тушунмади. Ахтам бир илмоқли гап айтиб, асабига тегиб қўймаслик учун юзини тескари бурди. Тарзан доналарни тергач, фарзинни олиб, четга қўйди-да:

— Мен ёш болалар билан фарзинсиз ўйнашга одатланганман, — деб кулимсиради.

Фуркат буни кутмаган эди. Фимага яна жавдираб қаради. Тарзанинг болага руҳий ҳужум қилганини англаган Фима, бу ҳакиқатни қандай етказишни билмай қошларини чимириди, кейин ўзини зўрлаб кулимсиради:

– Ўғилгинам, акангни молбокар қилиб ишга оляпман, бугун хоҳлаганича ўйнайверсин.

Рақибининг фарзинсиз ўйнаши чиндан ҳам бола руҳига таъсир қилиб иккинчи ўйинни бой берди. Бу сафар оқ доналарни тикиб, унинг ўзи фарзинни олиб қўйди-да, «найрангингизни билиб олдим», дегандай Тарзанга қаради. Тарзан бу қарашнинг маъносини уқиб жилмайди, қора доналарни битта-битта шошилмай терди. Фарзин ва ўнгдаги тўра ўрнини эса бўш қолдирди. Тарзанинг бу кутилмаган руҳий зарбаси Фурқатни янада довдиратди. Фимага қаради. Болага қандай далда беришни билолмай қолган Фима «қўрқма» деган маънода жилмайиб қўйиш билан чекланди.

Фима Фурқатга ортиқча баҳо бермаганди. Бола чиндан ҳам қобилиятли эди. Лекин юзлаб шахмат усталарининг ўйинларини синчиклаб ўрганган Тарзанинг енгишга етарли тайёргарлиги йўқ эди. Тарзан учинчи, тўртинчи ўйинда ҳам енгач, бешинчи сини ўйнашга ҳожат бўлмади. Тўртинчи ўйин кутилмаган мот билан якунланиши билан Фиманинг кўзлари телбаларча катталашди. Унинг оч нигоҳида ваҳший ўт бор эди. Қани эди, Худо уни бир зумгина йўлбарсга айлантириб қўйса-ю, бу бадбахтларни тилкалаб-тилкалаб юборса! Бу ғаламис сурбетларни сичқонларга айлантириб берса ҳам майли эди, товони билан эзғилаб-эзғилаб ташласа, кўнгил оғриғи ўрнига кувонч ва ҳузур келарди...

Фима бошини чанглаб ўтириб олди. У бургут тоифасидан эмасди. Аммо ўзини шу топда тирноқлари суғуриб, ўткир тумшуғи кесилган, қанотлари қир-

қилган, кўзлари ўйиб ташланган бечора қуш аҳволида кўрди. Найранглардан зўравонлик устун келаётган онда у миясини кемираётган ғалвали саволларнинг биронтасига ҳам жўяли жавоб топа олмай қолган эди. Қошларининг тепасида турган оғриқдан халос бўлиш учун пешонасини силаётганида енгил титраётган бармоклари аҳволини ошкор қилиб қўйди. Бошини кўтариб, жон олғучига қаради – сал нарида турган Ҳалимжон унинг кўзларида аламли мунгни кўрди. Ахтам эса унинг қарашига парво ҳам қилмай, мулойимлик пардасига ўралган масхарали гаплари билан унга «далда бериб», хайрлашгач, болаларни ташқарига бошлади. Ана шунда Фима худди жонидан айрилаётгандай сапчиб ўрнидан турди-да:

– Тўхта, бўпти, сазанг ўлмасин, уч кўл ташлаймиз, – деб хитоб қилди.

Ахтам Ҳалимжонга «чиқаверларинг», деб имлаб кўйиб, Фимага қараб жилмайди.

– Фима, ақлинг кеч кирадиган бўлиб қолибди. Биз кетганимиздан кейин энг қаттиқ тошни топиб, бoshингни ур! Шундагина аламдан чиқасан. Бошқа чоранг йўқ, сен бечоранинг. Ўйна, десам, ўзинг ўйнамадинг. Энди вақтим зик, самолётта кечикаман.

– Кечикиб бўлгансан. Тошкентга учган самолёт манзилига етиб бўлган.

– Тошкентга учади, деб ким айтди? Мен Бокуга учаман. Болаларнинг онаси бир озарбайжонга эрга тегиб, Бокуга кўчиб кетган... – Ахтамнинг Фимани лақиллатиш учун атай ёлғон гапираётганини тушуммаган Фуркат бир сесканди. Ахтам ундаги ўзгаришни сезса ҳам, бамайлихотир давом этди: – Болаларни Бокуга етказиб, эгасига топшириб, хизмат ҳақимни олгунимча сен ертўлангда ўтира турасан.

– Бундай қилишга ҳаққинг йўқ!

– Мени лақиллатишга ҳаққинг бормиди? Яхшилик билан келувдим, яхши гапирдим, яхшилик билан кет-

япман, шунисига қувонавер. Устозим «Қонли «туз» ўлар олдидан менга: «сени ким лақиллатмоқчи бўлса, яаб ўтирма», деган эди. Мен васиятни буздим, энди нариги дунёда унинг кўзига қандай қарайман? Ҳар ҳолда уни мендан олдин сен учратарсан, узримни етказиб кўй.

— Агар ростаданам «Қонли «туз»нинг шогирди бўлганингда бунақа фирромлик қиласдинг!

— Фимушка, мучалинг нима? Ҳа-я, сенларда мучал йўқ-ку? Гороскопда нимасан? Қисқичбақадирсан-а? Ҳар ҳолда, қилиқларинг ўхшайди. Лекин бугун туюкшнинг қилиғини қилдинг. Бошингни қумга тиқиб олиб, қутулмоқчи бўлдинг-а, галварс! Оркангни очиб кўйганингни ўйламадинг-а?!

Кўзлари олайиб кетган Фима унинг бу гапига ғазабли нигоҳи билангина жавоб бермоқчи эди, аммо, ғазаб хоинлик қилди:

— Мен сени ернинг тагидан бўлса ҳам топаман! — деди ўлик овоз билан.

— Фима, бир лўлига фол очирганимда «сени ўлдириб, ёқиб юборишади», деган. Шунақа! Мени ернинг тагидан кидириб, овора бўлиб юрма. Сен хотиржам гўрингта киравер. «Қонли «туз»га мендан салом айтсанг, тантана билан кутиб олади. Бемалол маишатингни қилиб ётсанг, эллик йилдан кейин борарман олдинга. Ҳисоб-китобнинг қолганини ўшанда қиласиз. Гўрда кўришгунча хайр!

Ахтам, Балабуханинг йигитига «бу ёғи ўзингга ҳавола», дегандай қараб кўйиб, ҳовлига чиқди. Ихраниб ўтирган Алешка билан шеригига кўзи тушиб, «буларни бабка Нюрканикига ташлаларинг, самогон билан эплаб ташлайди», деб машина сари юрди.

Тарзан пича ҳаяллади. Фимани ертўлага ташлашга киришмоқчи бўлган йигитга «шошмай тур», деган ишорани қилиб, графиндаги сувдан стаканга қуиди.

— Фима, сен ақлли одамсан, салдан кейин чан-

қайсан, тилинг танглайнингга ёпишиб ўлиб қолишинг ҳам мумкин. Мен сени яхши кўриб қолдим, бунақа азобли ўлим топишингни истамайман. Ўладиган одамга шунча пулнинг нима кераги бор? Ҳозир чо-расизсан, бор хазинангни тортиб олсам ҳам ғинг дея олмайсан. Лекин зўравонлик қилмайман, мен мард одамман, мардан эса ҳеч қачон ёмонлик чиқмайди. Сенинг жонинг ҳозир бу халтадаги пулга эмас, манави истакондаги сувга боғлиқ бўлиб қолди. Мен сенинг жонингни сотиб олмоқчиман, эвазига бир истакон сув бериб рози қиласман.

Тарзан «Ма, ол!» дегандай стаканни узатди. Фима стаканга беихтиёр кўл чўзаётганида Тарзан сувни унинг юзига сочиб юборди-да, бошқа сўз айтмай, пул тўла жомадончани кўтариб, изига қайтди. Машинага ўтираётган Тарзанни Ахтам норози қиёфада қарши олди:

– Паст кетдинг, Тарзан, отангта ўжшаб паст кетдинг. Пулни олмаслик керак эди, – деди у зарда билан.

Гапга яна отасини аралаштиргани Тарзаннинг ҳамиятига тегса-да, ўзини тушунмаганга олди-ю, қилган ишидан фахрланиб, жавоб қайтарди:

– Отам мени «исрофгарчиликдан қоч», деб тарбия қилган. Ўзинг охирида хол қўйдинг: мен олмасам, анави гўрсўхталар барибир шилиб кетишарди. Энди пул уччаламизнинг ўртамиизда. Бек акам билмай қўя қолади. Нима дединг, Ҳалим? Ё сотиб қўясанми?

Ҳалимжон унга қараб, қошларини чимириди:

– Яхши болага ўхшайсан-у, лекин тилнинг суюги йўқ эканини унутиб қўяркансан. Агар Бек акамнинг сояларида кўпроқ яшагинг келса, тилингни тийиброк гапир.

Тарзан «биз сояда яшашга қизиқмаймиз, бизнинг соямизда бошқалар яшай қолсин», деб гап қайтамоқчи бўлди-ю, лекин «тилнинг суюги йўқ» эканини билгани учун, бу сафар индамай қўя қолди.

– Тарзан, сен билан гаров ўйнайман, агар Фима ўлмай қолса, изимииздан бориб, Бек акамизга дод-вой қиласи. Баҳонангни тайёр қилиб қўй.

– Баҳона тайёрлагандан кўра, Фимани ҳаёт азобла-ридан қутқариб кета қолайлик?

Тарзан шундай деб, машина эшигини очганида Ах-там уни ёқасидан ушлади:

– Ликиллайверма! Фима ўладиган иш қилмади, ўлдиришга ҳаккимиз йўқ...

Машина қўзғалиб, қишлоқнинг лой кўчалари ортда қолгач, Ахтам Ҳалимдан: «Болаларни ўз фарзандидай кўришига ишондингми?» – деб сураб, «Балки шундайдир», – деган мужмал жавобни олди.

– Сен-чи, Тарзан?

– Болаларнинг уст-боши ёмон эмас, қорни тўқ, ҳар ҳолда яхши боқсан.

– Икковингнинг ақлингни кўшса, битта эшакка юк бўлмайди. Бола боққиси келса, Олтойда етимнинг уруғи куриб кетибдими? Сен устингга кўйлак сотиб олишга борсанг, матоси нимадан, деб қизиқасанми? Болалар бу туллак учун одам эмас, фойда келтирувчи бир матоҳ! Болаларнинг ота-онаси ким, деб қизиқмаганми? Аҳмок эрини чопиб ташлаган хотин камоқдан чиқиб, болаларини қидиришини билмаганми? Фақат у томонда Бек акамнинг, бу томонда яна аллакимнинг зўравонлари келишини кутмаган. Ё хотиннинг ўзи, ё тоғасими, амакисими келса, савдолашиб, пуллашни ҳисоб қилган. Ана шунаقا! Бир иш қилишдан олдин каллани ишлатиш керак. «Хўп бўлади, Бек ака», деб юраверсаларинг, шўрларинг курийди.

Кор ёғмаган қиши, дард келмаган бош бўлмайди. Асадбек қўшниси Қамариддиннинг ташвишли масаласини қозихонада ҳал қилиб берганига амин эди. Не афсуски, даъвогар қарздан воз кечгани, уй сотилмай қолгани билан бу хонадон осмонидаги абрибало ҳали таркалмаган эди. Қорадорига ўрганиб қолган йигитни офат ботқоғидан тортиб олиш учун қозихонада кўрилган чоранинг ўзи кифоя қилмаслнгини Асадбек ўйлаб кўрмаган эди. Тўғри, ўша кезлар фарзанди вафоти туфайли ўз ғами чодирига бурканиб қолди. Лекин, бу бало дўли ёғилмаганида ҳам қўшни йигит тақдирига бошқа қизиқмаган бўларди. Назарида, у қўшнисини дардан бутунлай халос этиб, бошига баҳт тожини кийгизиб кўйган эди. Ҳолбуки, уйни сотиш, қарзни тўлаш Қамариддин учун ҳаёт-мамот масаласи эмас эди. Уйи сотилган тақдирда ҳам кўчада қолмасди, бир кулбага жойлашиб, бир тишлам қотган нонга қаноат қилиб яшайверарди. Худо насиб қилган бўлса, яна бир бошпана куриб оларди, қорни ошга ҳам тўярди...

Унинг дардини бегоналар тушуниши қийин:

...гиёҳвандлик кафанида қўним топиб, тирик ўликка айланган кенжасини ҳаётга қайтариш мумкин бўлармикин?

Жувонмарг бўлганлар ҳақидаги гап-сўзлар унинг қулоғига ҳам етиб келади. Ўз фарзандини ҳам шундай қисмат кутаётгани ҳаёлига келса, бадани ажал музлиги хукмида титрайдиган бўлиб қолган эди.

Гуноҳкор banda!

Уй ташвишида, қарздан қутулиш дардида қўшнисидан ёрдам сўради...

«Фарзандимнинг жонини омон сақла, бу балолардан қутқар!» деб Яратганга сиғиниб, саждага

бош кўймади. Кўп қатори тили «Худо асрасин», дерди. Бирок, Худони танимай туриб, унинг кудрати-ю, мўъжизаларига ишонмай туриб, сўраб яна нажот кутиши ғалати! Танимаган нотаниш одамдан бир сўм сўраса бермаслигини билгани учун ялинмайди. Худони танимай туриб, амрларини бажармай туриб, сўрайверади, талаб қиласверади... Мантиққа зид бўлган бу ҳолда нажот кутишни нима деб аташ мумкин?

Оқибат уни қаерда кутяпти? Айрилиқ сахросидами?..

Гиёҳвандни зулмат салтанати бағридан юлиб олишнинг маشاқкат эканини ҳамма билади. Даволаш масканида ҳам қайдандир корадори топиб, томирига юбораётган нодонларни зулмат қаъридан тортиб олувчи куч борми бу вафосиз дунёда? Асадбек истаган такдирда ҳам бунга қодир бўла олмасди. Дори-дармон учун пул бериши, врачларнинг энг зўрини топиб бериши ҳам қўшнининг дардини пича енгиллатиши мумкин, лекин бу нажот эмас!

Манзура бомдод намозини ўқиб бўлиб, шийпондаги жойнамоз устида тасбех ўтириб ўтирган эди. Бармоклари тасбех доналарида, хаёли эса ўғли Абдуҳамидда эди. Тушида чиройли лиbosлар кийиб олган хушҳол ўғли билан сұхбатлашди... Ҳозир эса ўй-хаёlinи маҳшаргоҳ ва ундаги она-боланинг нурли юз билан кўришаётгани манзараси банд этган эди. Тушидаги бу гўзал манзара коронғи кўнглига чирок ёқди.

Унинг руҳи бу он Ҳолик сари интилган, ёнидаги жойнамозда ўтириб, пичирлаганича муножот қилаётган Фазлияни ҳам унуглан эди.

Субҳи содик қоронғуликни суриб ташлаган дамда қўшни томондан онанинг зорли ноласи эшитилиб, Манзура сесканиб тушди. Фазлия «нима бўлдийкин?» деган савол назари билан унга қараб, фармойиш кутди. Манзура «чикиб билиб келинг», деб буюрмай, ўзи чаққон турди-да, «вой шўрим, вой шўрим» деб пи-

чирлаганича дарвоза томон йўналди. Фарзанд доғида ёниб кул бўлаётган она қалби кўшни она не сабабдан фарёд килаёттанини гап-сўзсиз ҳам англаб етган эди. Фазлия дарвозага қадар изма-из борди-ю, кейин нима қиласини билолмай тўхтади.

Онанинг ноласини Асадбек ҳам эшилди. Туни билан алақ-чалак туш кўриб, күш уйкусидаги ётгани учун бу овозни тушидаги фарёдлардан бири деб ўйлади. Нола тинавермагач, кўзларини очиб, қаддини кўтарди. Кўшни хотин «вой, болам!» деб яна бир нола қилгач, овози тинди. Асадбек юз-кўлини ювиб, сочиқни кўтарганича ҳовлига чиқди. Фазлия уни кўриб, салом берди-да, ошхона томон юрди. Болохонадаги йигитлардан бири хожасига кўзи тушиши билан шошилганича келиб, кўшнининг ўғли вафот этганини маълум қилди.

– Қайси ўғли экан? – деб сўради Асадбек.

Йигит «билимасам», дегандай елка қисди.

– Шундай бурнингнинг тагида бирор ўлиб ётади-ю, кимлигини билмайсанми? – деди Асадбек.

– Кеннайим чиқиб кетдилар, – деди йигит айбор одам каби бошини эгиб.

Асадбек индамай бурилиб, ичкарига қайтди-да, кийимини алмаштириб чиқди. Дарвозаси рўпарасида турган милиция машинасига қараб олиб, кўшни осто-насини ҳатлади. Ҳолсизланган Қамариддин гилос дарахтига суюниб турар, катта ўғли унинг елкаларини силаб далда берган бўларди. Дараҳт шохларида қизара бошлаган гилос мевалари улар тепасидан қонли ёшлилар тўкаётгандай эди гўё... Сал нарида ерга ўтириб олган бошяланг онаизор ёнида тиззалаб ўтирган Манзура уни сабрга даъват қиласиди.

Катта ўғилни кўргач, Асадбек «демак, кичиги ўлибди-да», деган хулосага келиб, кўшнисига таъзия билдириди. «Нима бўлиб ўлди?» дейишга тили бормай, «Милисанни нега чақирдинглар?» – деб сўради.

– Олиб кетиб, ёриб кўриши шартмиш. Экспертиза

қилмаса, гүрковга қоғоз ёзиб бермас экан, – деб ота ўрнига ўғил жавоб берди.

– Экспертизаси нимага зарур экан?

– Доридан ўлди-ку, шуни исбот қилиб беради-да.

– Қанақа дори?

– Қанақа бўларди, қорадори-да!

– Ташламаганмиди?

Қамариддин саволга жавобан пастки лабини тишлади-да, алам билан бош чайқаб, «йўқ» ишорасини қилди.

– Бу тузаладиган касалмас, Бек ака, ўзи ҳам қийналди, бизларни ҳам қийнаб юборди. Мана, ўзи ҳам қутулди... – «биз ҳам қутулдик», деб юбормаслик учун тилини тишлади.

Қамариддин ўғлининг тилидан учмаган, аммо меҳрсиз дилидан жой олган ҳақиқатни англаб, ингради. Додлаб юборишдан ўзини тийиб, унга «ойингга қара», деб йиғламсираб пичирлади.

– Кечаси ҳаммомга кириб, томиридан яна олибди. Юраги чидамаган... – деди ўғил Асадбекка қараб.

– Ойингта қара, – деди Қамариддин бу сафар баландроқ ва зардали овозда.

Ўғли нари кетгач, «аканинг меҳри-оқибатини кўрдингизми?» дегандай мўнг тўла ёшли кўзларини Асадбекка тикди.

Гофил банда!

«Худодан қайтибди!» деган ҳикматни наҳот билмаса? Эшигтан... фақат ўзини билмаганга солади. Ўғиллар меҳр-оқибатни кимдан оладилар? Улғайланарида меҳр-оқибат фазилатидан бебахра бўлсалар ким айбдор?

Чорак аср муқаддам бу жойлар ўрни жаннатмисол боғ эди. Қамариддиннинг аждодлари неча йиллар давомида бир-бирлари билан аҳил-иноқ яшаб, бу боғларни парвариш этганлар, ўзларининг меҳр-мурувватлари билан охиратларини ҳам обод қилганлар. Иймон ва хидоят занжири Қамариддинларнинг авлодига кел-

ганда узилди. Бөг иккига бўлинганда онаси ҳали ҳаёт эди. Ака-укалар муносабатидаги ғайирлик онани кўп маъюс этди. Охири: «Икки кўчқорнинг боши бир қозонда қайнар-у, бироқ ака-ука бир боғда иттифок билан яшай олмас, силаи раҳм бутунлай барбод бўлмай туриб, қозонларини бошқа-бошқа қилиб кўя қолай», деган тўхтамга келди. Қамариддиннинг укаси топар-тутарда ғайратлироқ эди. Шу боис боғнинг иморатсиз бўлаги унга берилди. Ука онанинг раъйни оёқости этмай, акага даъво ҳам қилмай, баҳорда иш бошлаб, қишига қадар икки уй, бир дахлизни қуриб олди. Онасига атаб алоҳида уй курди. Уйлар офтобга қаратиб курилгани учун, ака томонга орқа қилиб қолган эди. Ҳали пойдеворга тош ташланмасдан аввал она иштирокида бу масалада узрҳоҳлик бўлган, Қамариддин укасидан рози эканини билдирган эди. Уй деворлари бел баробар кўтарилиганда розилик берганидан ачина бошлади. Онанинг ўлимидан кейин бу ачиниш норозилик ҳиссига айланди. Ўз кезлари уйнинг соясида роҳатланиб ўтиради, қишида соя узайгач, шайтон васвасаси қучайб, иморатни буздириб ташлашга даъват қиласверарди. Ҳидоятсиз қалбга кирган ғайирликнинг давоси – иймон! Аммо қани ўша иймон? Қамариддин норозилигини давомли равишда ошкор эта бошлагач, ака-ука орасидаги совуган салом-алик ҳам йиғиширилди. Ҳатто жиянларнинг амаки ва кеннойиларга салом бериши тақиқланди. У йилларда маҳалла ака-ука орасидаги бундай нохуш ҳолга бефарқ қараб турмасди. Ота қадрдонлар уларни муросага келтиришга уринганларида Қамариддин «укам менинг ҳовлимдан бир метр ўғирлаган, уйини бузиб, бир метр нарига курсин», деб, қайсарлик килди. Оқсоқоллар «ҳовлини онанг бўлиб берган эдик», деб эслатишса ҳам кўнмади. Охири, орани очик қилиш мақсадида мутахассисларни чақиртириб, ерни ўлчатишиди. Ака даъво қилгандай бир метр эмас, йиғирма беш сантиметрга хато қилингани аниқланди.

Қамариддин ана шу йигирма беш сантиметрга ҳам күнмади. Укаси «шу бир қарич ер эвазига кичик ўғлингизга атаб ҳовлингиз этагига бир иморат солиб берай», деса ҳам, бу марҳаматни садака, ўзини эса тиланчи ўрнида кўриб, унамади. Ота-она арвоҳининг безовта бўлиши эслатилганда ҳам хайрли йўлга бурилмади.

Укаси уйни бузишга ҳам рози эди...

Бироқ... охирги можаро бўлган кечаси уйқуга ётди-ю, эрталаб уйғонмади. Улим уйқуси уни бағрига олиб, аканинг даъво-ю ғалваларидан қутқарди. Уканинг оиласи ҳам, маҳалла аҳли ҳам ўлим можароларга якун ясади, деб янглишишган эди. Орадан тўрт ой ўтмай, аканинг фишаваси яна давом этди. Қайноғасининг ғалvasi тинмаслигини англаган келин эрининг йилини ўтказгач, ҳовли-жойини сотажагини эълон қилди. Оқибат шу бўлди-ки, жойни Асадбек сотиб олиб, эски уйни буздирди-да, ўрнига янада баландрок қилиб иморат солдирди. Уканинг уйи ҳовлининг учдан бирини эгаллаганди. Асадбекники бошдан охиригача эгаллаган бўлса-да, Қамариддин чурқ этмади – дардини ичига ютишдан ўзга чораси йўқ бечора аҳволида яшайверди. Тинмай акиллаётган лайча бўрибосарни кўрганида думини кисиб қолганидай, одамлар орасида ҳам бу каби манзара учраб туради.

Дардини ичига ютди, аммо «ёмонлигим учун Худо мени баттарроқ аҳволга солди», деган фикр қоронғи кўнглини ёритмади. Юзқўрмас бўлиб кетган келини, жиянлари ҳузурига бориб, узроҳлик қилмади. Кўзларигина эмас, қалби ҳам йиғлаган ҳолда пешонани саждага қўйиб, Яратганга сифиниб, «Гуноҳларимни кечир!» деб илтижо этмади. Ўғлининг гиёҳвандлиги, қарзга ботганлиги билинганда ҳам, ўзининг гуноҳларини эсламади, тавбани ўйламади.

Бу кеч Қамариддинни субҳи козибда хотини уйғотди:

– Чикиб қаранг, ўғлингиз боя ҳаммом томон ўтган эди, дараги бўлмаяпти, – деди хавотирланиб.

— Ярим кечада орқасидан юришим қолувди, — деб пүнғиллади ота, уйқули кўзини очишга эриниб.

Она яна бир неча фурсат ҳаммом томонга хавотир билан тикилиб ётди. Кейин ўрнидан турди. Ҳовлига чиқиб бир оз турди, сўнг бултур кесиб ташланган ўрикнинг тўнкасига омонат ўтирди. Узок ўтиришга тоқати етмай, ўрнидан шарт туриб, ҳаммом томон юрди. Эшикни очди-ю, додлаб юборди. Чала уйқули кўзларини очганича хотинини кузатиб ётган Қамариддин тезгина туриб, ташқарига шошилди. Ҳаммом эшиги остонасига ўтириб, кесакига суюниб қолган хотини беҳолмиди ё беҳушмиди, фарқламади. Кўзи ҳожатхона тувагига бош қўйиб чўзилган ўғлига тушиб, эсини йўқотди.

Йўқ, сал бошқачароқ эди...

Аввал укасини кўрди...

Чўккалаб ўтирган укасининг кўзларидан қон ёшлари оқарди...

«Ақажон, жиянимни олиб кетгани келдим, рози бўлинг, бу ерда уй куриб берай десам, кўнмаган эдингиз, у ёқда куриб қўйдим, биллалашиб ётамиз...» деди...

Уғли амакисининг тиззасига бош қўйганича гўё ширин уйкуда эди...

Манзара шундай эди...

Кўзлари алдаган экан, гўё чақмок нури бир чараклади-ю, ҳақиқат тасвири намоён бўлди: ўнг кафтида эм игнасини чанглаб олган кенжаси амакисининг тиззасига эмас, ҳожатхона тувагига бош қўйиб жон берган эди...

Хушидан кетгандир, деб ўйлаб, ўғлининг юзини енгилгина шапатилади, сув ҳам сепди. Кейин тўнғичини чакирди, хотинининг юзига сув сепиб, хушига келтирди. Тўнғичи дўхтир чакирди, улар эса милицияни... Мурдани ёриб кўриш шарт эканини эшитган она додлай бошлади...

Манзура, кейин Асадбек шу фарёдни эшишишган эди...

Түнгич ўғли узоклашгач, Қамариддин Асадбекка қаради:

– Ўрни бўлмаса ҳам, илтимосим бор эди... – деди ялиниш оҳангода.

– Маросимга нима зарур бўлса, тортиномай айтаверинг, – деди Асадбек.

– Жанозани ўтказишга тегишли гапим йўқ, – деб Қамариддин чайналди. – Илтимосим уйга тааллукли.

– Уйга? Уй масаласи ҳал бўлган эди, шекилли?

– Унчалик эмас... Сизнинг орқангизда бир иш бўлувди... Ҳайдар акамиз «билирмай тураверинг», деганларига индамай юрувдим.

– Чайналмай, дангалини айтинг, – деди Асадбек.

– Ҳовли-жойни сотганман...

– Кимга?

– Ҳайдар акамиз сизга атаб оловдилар, икки ой мухлат берувдилар. Шартга кўра, тўрт кундан кейин кўчишим керак эди. Агар йўқ демасангиз... қирқи ўтгунча кўчмай турсам...

Тахминининг тўғри чиққани Асадбекни ғазаблантириди, томоғига бир нарса тикилиб, нафаси бўғилди. Агар ёнида Кесакполвон бўлганида бўралаб сўкиши, ҳатто тепиб юбориши мумкин эди. Бироқ, гап талашиб, воқеани ойдинлаштиришнинг фурсати ҳам, ўрни ҳам эмасди. Ғазаб оловини ўчиришдан ўзга чораси йўқ эди. Бир нима деб, қўшни бечоранинг тилинган ярасига туз сепиб қўймаслик учун Асадбек уйига чикиб кетиши мақсадида бурилди. Унинг индамай бурилиши Қамариддинни ташвишга солди:

– Нима қилай, кўчайми? – деди йигламсираб.

Асадбек тўхтаб, унга ўгирилиб қаради:

– Нега кўчасиз? Ҳайдар... сизга айтмаганмиди?

– Нимани?

– Масковга кетишдан олдин мен билан маслаҳат

қилғанди, уйингизда... яна уч-гүрт йил ўтира туринг. Кўчишни ўйламант.

– Олди-сотди хат-хужжат бўлган...

– Кимнинг номига?

– Абдусамаджоннинг номларига хатланган...

Хайдар акамиз «жияннинг ўкишдан қайтишига совға бўлади», девдилар. «Айтмай тур», деганларига индамаганийдим...

Бу гапдан кейин ғазабни босиш кийин бўлди. Тишларини ғижирлатиб, «ҳайвон» деб пичирлади. Шарт ўгирилиб шошаётган одамдай қадамини тезлатди. Остонага етганда яна тўхтаб, изидан илинж билан тикилиб турган қўшнисига қаради:

– Гапимга тушундингизми? Кўчмайсиз. Жанозадан кейин одам келади, хат-хужжатни бошқача қилади.

Зардали овозда шундай деб чиқиб кетди. Қўшнисининг нима сабабдан ғазабланганини тушунган Қамариддин бўйини қисганича жойида қотиб тураверди.

Асадбек ғазабини босиш мақсадида ҳовлисида бир пас айланди, кейин шийпонга чиқиб, кўрпачага ёнбошлади. Фазлия шошилганича уйга кириб, кўрпача билан ёстиқ олиб чиқди.

– Муллака, кўрпача юпқа эди, – деди хижолатли овозда.

Асадбек ўрнидан қўзғалишга эриниб, қўлинин силтаб «керак эмас», деган ишорани қилди.

Жамшид келиб салом берганида алик ўрнига хожасидан топшириқ олди:

– Ҳали жанозадан кейин... йўқ, эртами-индин анавинга учрашиб, – Асадбек «анави»нинг кимлигини билдириш учун қўшни томон имлаб қўйди, – хужжатларини ол. Уйини ўзининг номига қайтариб, хатлатиб бер.

– Барибир сотибдими?

Сўради-ю, Асадбекнинг норози нигоҳидан сачра-

ган қаҳр ўқларига нишон бўлди. «Хўп, Бек ака», дейиш ўрнига савол берганидан афсусланди.

Кўшнилик ҳақи-хурмати учун Асадбек жаноза ўтгунича ўша ерда бўлиши керак эди. Бироқ, уйнинг сотилиши ҳақидаги гапни эшиганидан кейин Қамариддинни кўргиси ҳам келмай қолди. Иштаҳаси бўғилиб, бир пиёла чой билан кифояланди. Нонушта тайёрлаб, эрини кузатиш учун чиқсан Манзура дастурхонни йиғиштираётib «бояқишиларга жабр бўлганини» қайта-қайта таъкидлаб, Асадбекнинг жигига тегди.

– Ёрадиган жойда ишни атай чўзишар экан. Куриб кетмагурлар ўликнинг устида ҳам пул ишлаб олишаркан. Бугун беришмаса, эртагача бояқишиларнинг жонида жон қолмайди. Мусулмончиликда ҳам бугун ўлса, бугун кўмиш керак.

Асадбек бу жонкуярлиқдан хотинининг мақсадини англаб, пешонасини тириштириди.

– Мусулмончиликни ўргатмаган битта сен қолувдинг, – деди жаҳл билан.

Ичидан келган нозик титрашни кўзларидаги хуркак қараваш ошкор қилиб қўйди. Эрининг кайфиятига қарамай гапириб қўйганидан чўчиган Манзура энди ўзини оқламоқчи бўлди:

– Ўргатаётганим йўқ... одамларнинг гапини айтдим.

– Одамлар яна нима дейди? «Эрингга айт, уйда пашша қўриб ўтиrmай, боласини тирилтириб берсин», дейишмадими?

Гапиришдан олдин эрининг кўзларига қараб, кайфиятини билиб оладиган Манзура бугун шошилдими ё «кўшнининг фожиасидан эрим ҳам қайғуда», деб ўйладими, ҳар ҳолда яланг оёқлар билан чўғни босиб олган ғафлатдаги нодон ҳолатига тушиб, индамади.

Абдуҳамиднинг ўлимидан кейин хотинига меҳрибонроқ бўлиб қолган, унинг ранг-рўйига қараб, қаттиқ гапиримаслик чорасини кўраётган Асадбек бу сафар ўзини босолмай бир сачради-ю, дарров совиди. Кўшни

үйдаги фожиа Манзура қалбидаги айрилиқ ярасини янгилаганини англаб, «бекор ўдагайладим, бу бечоранинг айби нима?!» – деб афсусланди. Жамшидга қараб:

– Ўзинг бориб кел, жанозаси пешиндан қолмасин, – деб буюрди.

– Барака топинг, адаси, сиз кўп хайрли ишлар қиласиз, савоби боламизга етади, Худо ҳоҳласа, – Манзура йигламсираганича шундай деб, чиқиб кетди.

Жамшид хожасини шаҳар марказидаги уч қаватли уй ертуласига жойлашган идорага кузатиб, ўзи вазифани бажаришга йўл олди. Ичкарига кирган Асадбекнинг димоғига сигарет хиди урилиб, Қорақошга норози қиёфада боқди. Қорақош бу қарашнинг маъносини англаб, «айб менда эмас, анави чақирилмаган меҳмонда», дегандай елка қисди-да, чап томондаги хонага имлаб қўйди. Асадбек диванда ялпайиб ўтирганча сигарет туттатаётган Орзубекни кўриб, энсаси қотди. Телевизорга тикилиб ўтирган Орзубек унинг келганини кўрмади. Асадбек индамай ўтиб кетмоқчи бўлди-ю, «орқамдан эргашмасин», деган қарорда чап томондаги хонага кирди. Орзубек уни кўриб, сигаретини шошилганича кулдонга ташлади-да, ўрнидан туриб, тавозелик билан қўл узатди. Асадбек кўл учида кўришиб, узоқ гаплашишга ҳуши ҳам, вақти ҳам йўқлигини билдириш мақсадида диванга эмас, стулга омонат ўтирди-да, «гапинг бўлса, гапир», дегандай савол назари билан қаради.

– Шошилиб турувдим, шу томонга йўлим тушувди, индамай ўтиб кетишдан ор қилдим, – деди Орзубек.

– Йўл-йўлакай кўриб ўтиладиган одамлар қаторига кўшилиб қолибмиз, шунисига ҳам шукур, – деди Асадбек киноя билан. – Сиз йўқламасангиз, ўтган ҳам, кетган ҳам тепавериб, тупрокқа қориб ташлади.

– Вактида зиёрат қилмасам ҳам, юрагимнинг

тўрида турасиз... Вақт зик, депутатлик дегани арининг уясиға бош сүқищдан баттарроқ экан.

– Бугун вакт bemalolroqmi, ariilar dam olişyaptimi? Agar shoшлиб turган bўlsangiz, sizni uslab турадиган ўғри йўқ.

– Майли, муддаога ўта қолай: телевизор кўраёт-гандирсиз?

– Телевизорда кўп нарсалар кўрсатади, қайси бирини сўрайпсиз? «Оталар сўзи»ни эмасми?

– Кўшниларни назарда тутяпман?

Асадбек «қаердан эшита қолибди? Жаноза билан унинг нима иши бор?» деб ўйлаб, ажабланди-да:

– Қайси кўшниларни айтяпсиз? – деб сўради.

Орзубек: «Билмайдими ё мени лақиллатиб, кала-ка қилмоқчими?» – деб ўйлаб бир зум жим қолди-да, кейин фикрини аниқроқ баён этди:

– Кўшни республикани... Ваҳшийликларни кўриб, ҳатто Чингиз Айтматов ҳам даҳшатга тушди-ку? Ўшдаги воқеани эшитгандирсиз?

– Эшитдим.

– Роппа-роса бир йилдан кейин Фарғона фожиаси-нинг такрорлангани sizni ажаблантирмадими? Худди бир вактда қўйиладиган кинога ўхшамадими? Сце-нарий муаллифи бир – Москва, режиссёри бир – яна Москва... Бош ролларни ўйновчилар бир, фақат эпизодик ролларни бултур бечора фарғоналиклар ўйнашган эди, бу йил ўшликларга насиб килибди. Ҳамма бало-қазо эпизодик ролларни ўйнаган ғариблар бошига ёғиляпти. Бунга нима дейсиз?

– Нима дейишим керак? Менам бориб, эпизодик рол ўйнаб берайми?

– Ўзингиз бормасангиз ҳам йигитларингизни юбо-ринг, биз катта халқмиз, ярмимиз қирилиб кетсан ҳам, хорлашларига йўл қўймаслигимиз керак!

Бу гапдан Асадбек ҳайратта тушди. Бу депутатдан жўяли гап чиқмаслигини аввалги учрашувларида билиб олган эди. Бунақа бемаъни гапни ё ғирт аҳмок, ё

жинни, ё иғвогар айтиши мумкин. Бу одам аҳмоққа ҳам, жиннига ҳам ўхшамайди...

Иғвогарми? Иғводан мақсади нима?

Саволга жавоб олиш мақсадида унга тикилди...

У зулм учқунларини сачратиб шундай ғазаб билан тикилди-ки, агар бу он күзлари тилга кирганида «мен бундай қараш учун яратылмаган эдим», деб фифон чеккан бўларди.

Орзубекка бу қараш таъсир этмади, кўзларини олиб қочмади.

— «Ярмимиз қирилиб кетсак ҳам» дедингми? — Асадбек ғазабини яширмай, овозини баландлатди. — Сен ўзинг қайси томонда бўласан? Қирилиб кетадиган қисмидами ё панада тухум босиб, жон сақлайсанми? Кўлингга милтиқ беришса, «узр, бугун жуҳуд хотинимнинг қошига ўсма қўйишм керак эди», деб қочиб қоларсан, а?

— Гапимни айнан тушунманг, мен образли қилиб айтдим...

— Хе, образингга урай сени! Йигитларимни юборишим керакми? Нима деяётганингни биласанми? Мени бир босмачи деб ўйлајпсанми? «Борларинг, босларинг!» десам, «июв-илюв!» қилиб, қилич яланғочлайдиган бир дивизия аскарим борми? Бор бўлганда ҳам сенинг гапингга лаққа тушадиган аҳмоқманми мен?

— Ватанпарварлик ғурури...

— Сен ватанпарварликдан гапириб оғзингни кўпиртирма! Битта амал столи-ю, тагингдаги «Волга» билан ўладиган ғурурингни пеш қилма менга!

Орзубек эътиrozга оғиз жуфтлаган эди, Асадбек шарт ўрнидан туриб, «гап тамом!» дегандай стулни нари сурди-да, эшик томон юрди, остоңада буйруққа маҳтал турган Қорақош тисарилиб, хожасига йўл бўшатди. Асадбек хонаси томон бурилаётib унга бу-юрди:

— Акангни кузатиб қўй. Кўчага чиққунича иззат

қил, останани ҳатлаб ўтгач, орқасини тепкинг билан бир сийлагин-ки, қайтиб кўзимга кўринмайдиган бўлсин.

Хонасига кириб, жойига ўтириди. Қиласидаги зарур иши йўқ эди, хонаси кўзига тор кўриниб, юраги сикилди. Жамшид қайтгунинг қадар эзгин бир ахволда ўтириди. Кейинги ҳафталар ичи бундай ҳолат кўп тақрорланадиган бўлиб қолган эди: юрагига қил ҳам сиғмайди, бирор билан гаплашишни ҳам истамайди. Қаёқларгадир кетиб қолишни хоҳлайди. Тоғу тошларда бир кулбаси бўлганида ҳозирнинг ўзида шаҳардан чиқиб кетарди. Манфаат дўстлари кўп, аммо дард ўртоги бўла оладиган одам кам...

Шунақа бетайин дунёда яшаш осонми?

Оғир, жуда оғир...

Худо пўлат сандиқни пулу жавҳарларга тўлдирмай, атрофини дили субҳи содикдек соғ дўстларга тўлдиргани яхшироқ эмасмиди? Қалбини дард сиқа бошлаган кезларда ҳасратини пўлат сандиқка айтадими?..

Кўнгли ёлғизликни истайди. Ҳозир хонада бир ўзи ўтирибди, лекин унга бунақа ёлғизлик керак эмас.

Ёлғиз ўзи тезоқар сой бўйида ўтираса...

Кушлар чуғиридан бошқа овоз қулоғига кирмаса...

Ким бўкиб ўляпти, ким оч қоляпти – иши бўлмаса...

Абдураҳмон табибникида даволанаётганида узок қишлоқларда яшайдиганларга ҳаваси келган эди: тонгда туради, мол-ҳолга қарайди, нонуштадан кейин ё боққа, ё далага жўнайди. Оқшомда қайтгач, бир коса маставасини хўриллатиб ичиб, ёнбошлаганича телевизор томоша қиласи. Қишлоқда тўй бўлса, тўйгунича ичади-ю, эртасига боши тарс ёриладиган даражада оғриб, хотинининг жаврашларини эшишиб ётаверади. Қозони кунда бир қайнаб турса, бас, улардан баҳтилироқ одам йўқ...

Шу шинам хонасини ёмғир ёғса томидан чакка

ўтиб турадиган кулбага алмаштиришга ҳам тайёр эди.
Атрофда кенглик бўлса бас...

Кўнгли кенгликни қўмсайди.

Кенглик... қаерда бор? Сикиқ кўчаларга, сикиқ ҳовлиларга кўз ўрганган, аммо кўнгил кўниколмайди. Дунё тор... бир қарич ҳам бўш ер йўқ. Наҳот шундай? Ахир қаердадир кўнгилга таскин бера олувчи кенглик бўлиши керак-ку? Ёруғлик бўлмаса ҳам майли, аммо поёни уфқа туташиб кетадиган кенглик зарур. Кенглик ҳамма томондан ўраб олинган, сикиқда қолган. Кўнгил шу чегарани ёриб ўтишни истайди.

Тепадаги уч қаватли бинода ташвишли кун қайнаб ётиби. Пастда осудалик ҳукмрондай гўё. Осудалик... кенгликдан нишонами? Одатда кенглик осудаликни, осудалик эса кенгликни тақозо этади. Бири бирисиз вужудга келмайди. Уч қаватли иморатнинг ертўласида нима учун осудалик ҳукмрон? Кенглик эса сикиқ кўйилган... Табиатнинг азалий қонуни ўзгардими, даврга бўйсунишга мажбурми?

Бўш кенглик ҳеч ерда йўқ... Ҳатто хаёл ҳам банд. Бу сикиқ шаҳарда яшайвериб, тасаввури ҳам кенгликни унутган. Энди кўнгли нимани хоҳлади, нимани излайди? Кенглик – балки ўлим чохидир? Шу чоҳ уни балки кенгликка олиб борар? Агар шундай бўлса, ҳаракати бесамара. У изляяпти, ўлим эса ундан қочяпти. Наҳот қолган умри беркинмачоқ билан ўтса?

Ҳатто Кесакполвоннинг кўнгли ҳам ёлғизликни қўмсаб қоларди. Бунақа пайтда у Асадбек сингари сикилиб ўтирмасди, кўнгил ҳузурини осонроқ йўл билан топарди: қозихонасига борарди-ю, чети учган пиёлани сассик ароққа тўлдириб бир нафас билан кўтарарди-да, аччиқ пиёзни ё саримсоқни чайнаб ташларди... Баъзан Асадбекни ҳам шундай қилишга даъват этарди. «Бу ялтир-юлтир майшатларинг жонимга тегди, чойхонадаги ирkit кўрпачага ўтириб, кир дастурхон устида пашша талаб ётган бодрингни газак қилгим келяпти», деб қоларди...

Асадбек ҳозир нима қилсин? Қўнгил хотиржамлигини ўша қозихонадан изласинми?

Бемаънилик!

Асадбек хаёлига келган бу фикрдан ғашланиб, ўрнидан туриб кетди.

«Махмуд Юсуфхонадан жой кўриб келганди, шу ёзда битта кулба бўлса ҳам тиклаб олишим керак. Бу ғалвалардан қочмасам, жинни бўлиб ўламан», – деб ўйлади у.

Жамшид қайтиб, ўлик олиб кетилганини хожасига айтди. Кимга учрашиб, масалани қандай ҳал килганини баён этмади, Асадбек ҳам суриштирмади.

– Жанозани пешин намозидан кейин маҳалла масжидида ўқишаркан.

Жамшид жанозага бориш хусусида сўрамаган саволига жавоб олиш мақсадида бу хабарни айтди. Асадбек индамай ташқарига чиқиб, машинага ўтирди. Жамшид «жанозага кетяпмиз» деб ўйлаган эди. Шу сабабли хожаси «Тарзанинг анхор бўйидаги жойига ҳайда», деганида ажабланди.

Тарзанинг жойи ҳамиша саришта ва озода тутилса ҳам, Асадбекни кўрган чойхоначи довдираб қолди. Асадбек соҳилга тушиб, атрофни синчилаб кузатдида, «Кесакнинг фаросатидан дурустроқ экан», деган тўхтамга келди. Сўридаги шахмат тахтасига кўзи тушиб, биринчи сухбатда Сур айтган гапларни беихтиёр эслади: «сиз шоҳсиз, тўғрими? Мен шоҳларга ачинаман... Шоҳ ёлғиз, бечора ҳамиша ҳимояга муҳтоҷ. Вакти келса, битта пиёдага кучи етмайди. Битта пиёда сурилиб келиб, мот килиб қўйиши мумкин»...

«Мен «мишиқи», деб назарга илмаганим билан, бу «пиёда»ларда гап кўп, индамасам, писиб келиб, суриб ташлайди», деб ўйлаб, Жамшидга қаради:

– Шахматга ишқибозми дейман, укаларинг?

– Тарзани зўр ўйнайди, деб эшитганман.

– Ўзинг-чи, ўзинг суришмаганмисан?

– Ўйнашни билмайман.

— Билмаганинг чатоқ... От юриш килиб, тепиб қолса, қочгани жой топа олмайсан.

Жамшид хожасининг бу гапни айтишдан мақсадини англамади.

Асадбек сув устига қурилган темир шийпондаги күрпачага ёнбошлади. Сувга тикилиб ётиб, оқиб келаётган ахлатларни кўрди-ю, «ҳамма ёқни ахлат босиб кетди», деб ўйлаб, кўнгли гашланди.

— Бек ака, димлама тайёр экан... ё қозон кабобни кутамизми? — деб сўради Жамшид.

— Буларинг хўрда-маставани писанд қилмайдими? — деди Асадбек ётган жойида керишиб.

— Бир пасда гатоп қилиб ташлаймиз, — деди сал нарида қўл қовуштириб, буйруққа маҳтал турган чойхоначи.

— «Нон палов» деган овқатни ҳам биласанми? — деб сўради Асадбек унга қараб.

— Картошка билан нонни қовуришми? Кўнглингиз шуни тусаётган бўлса, қийма тайёр, шест секундда гатоп қилиб ташлаймиз.

— Қиймангни қўй... — Асадбек шундай деб енгил хўрсинди. — Уруш пайтида онам раҳматли ярим пиёла пахта ёғига озгина нон билан картошкани қовуриб олардилар. Менга шу шоҳона овқат ҳисобланарди. Ҳозир куйруқ ёғи соласан, кўзи гўштими ё қиймами қўшиб қовурасан, лекин барибир онам пиширган нон-паловга етмайди...

— Бек ака, бир уннаб кўраверсин, қўли ширин бу одамнинг.

— Уннасин, уннасин, фақат «шест секунд» деб шошилиб, овқатни моховга ошна қилиб қўймасин.

Чойхоначи таъзим қилгач, орқасига қайтди. Асадбек хонасида юраги сиқилиб ўтирганда ёлғизликни, кенгликни кўнгли кўмсаган эди. Шу ерда истаганини топгандай бўлиб, кўзи уйқуга кетди. Овқат пишганда ҳам Жамшид хожасини безовта қилмади. Асадбек пешиндан ошганда уйғониб, юз-қўлини анҳорда

ювмоқчи бўлди, лекин ҳануз оқиб келаётган ахлатларни кўриб, фикридан қайтди. Жамшид мақтай-мақтай дастурхон ўртасига кўйган таомдан бир-икки қошиқ еб, тўхтади.

– Ёқмадими? – деб сўради Жамшид, хавотирланиб. – Қозон кабоб олиб келсинми?

– Кўли ростданам ширин экан, ёқишига ёқди, – деди Асадбек, кейин ўйчан тарзда қўшиб қўйди: – Лекин қаҳатчиликдаги ош барibir бошқача totли эди...

2

Таомдан кейин бир-икки пиёла чой ичишгач, уйга қайтишди. Асадбек қўшнисиникига кириб фотиха ўқиди, Қамариддин унга миннатдорчилигини изҳор қила бошлагач, эшиттиси келмай, уйига чиқиб кетди.

Дам ўтмай дарвоза қўнғироғи жиринглади.

– Сизни сўрашса, нима қилай? – деб сўради Жамшид.

– Бошим оғриб турибди, мени тинч қўйларинг, – деди Асадбек пешонасини тириштириб.

Кўнғироқни чалган одам тинч қўядиган тоифадан эмасди: дарвозахонада Жамшид билан шошилиб сўрашиб, ҳовлига ҳовлиқиб кирган Жалилнинг рангида ранг йўқ эди. Дўстини ҳеч бу аҳволда кўрмаган Асадбекнинг юрагига хавотир оралади.

– Асад, шўримиз қуриб қолибди, – деди Жалил у билан кўришаётib.

– Нима бўлди? – Асадбек уни икки елкасидан тутиб, кўзларига тикилди.

– Абдураҳмон акамизни ўлдириб кетишибди, – деди Жалил йигламсираб. Кейин ғазаб билан қўшиб қўйди: – Шундай одамни-я!

– Ким ўлдиради? – деди Асадбек уни силтаб.

– Телевизор кўрмаяпсанми? Каллангни ишлатиб, хабар олгани борсанг ўлармидинг!?

Асадбек бўشاшиб, дўстини кўйиб юборди. Оёкла-

ридан жон қочгандай бўлди. Телевизорга кўзи тушиб эди. У томонларда бўлаётган ғаламисликлардан хабар топиб эди. Аммо... Жалил ҳақ! Каллани ишлатмабди... Ҳатто... ҳали Орзубек бу ҳақда гап очганида ҳам, ўт ичидағи уйлардан бирида Абдураҳмон табиб борлиги мумкинлигини ўйлаб кўрмабди.

Зулм сели Абдураҳмон табибининг қишлоғини ҳам мотам чодирига ўраб ўтганини эшишиб, нима дейиши ни ҳам билмай гарангсиб қолди.

– Отлан, Муҳиддин отага айтдим, тайёр турибдилар, – деди Жалил уни шошириб.

Жалилни кутиб олиб, ўзи берироқда колган Жамшид Асадбекка айтилган бу гапни эшитиши ҳамон, хожасининг амрини кутмаёқ, машина сари юрди. Жалилнинг келганини кўрган Манзура ошхонадан чиқди-ю, аммо меҳмон билан кўришишга ҳам, хайрлашишга ҳам улгурмай қолди. Эрининг бирданига қаёққадир отланиши, индамай жўнаб қолиши Манзура учун янгилик эмасди, лекин шошиб келган Жалил билан бирга кетиши уни хавотирга солди.

Довондан ошишганда шом қоронғуси тушган эди. Йўлнинг ўнг томонида кўринган қишлоқ томон бурилиб, масжид қаердалигини суриштиришди. Эллик-олтмиш кишини сифдирадиган, ҳавоси димиқиб, зах хиди анкиб турган масжидга кириб шом намозини ўқишиди. Бу вақтда Асадбек билан Жамшид машинада ўтиришди. Намоздан сўнг йўлда давом этишни мўлжаллаб турган Асадбек Жалилнинг чиқиб: «Бугун Аллоҳнинг уйида меҳмон бўламиз», деганига тушунмади.

- Ичкари кирларинг, бугун шу ерда ётиб қоламиз.
- Нега? – деб ажабланди Асадбек.
- Биронкиига ярим кечада кириб борамизми?
- Шунинг учун эрталаб йўлга чиқиш керак эди, – деб тўнгиллади Асадбек, жойидан жилгиси келмай. – Кўқондами ё Андижондами меҳмонхонада ётамиз, бу ер бўлмайди.

– Бўлади! – деди Жалил ўжарлик билан. – Югурдакларинг билан сайру саёҳатга чиксанг, меҳмонхонангда талтайиб ётаверасан. Биз фотиҳага кетяпмиз, кечаси билан шу ерда хатми қуръои қилиб, савобини Абдураҳмон акага бағишлаймиз. Имом ҳофизи қуръон экан, таклифимизга рози бўлди.

Асадбек кечаси билан бўладиган хатми қуръон нима эканини билмагани учун, эътиroz билдиришга гап тополмай қолди.

– Сен кириб туравер, – деди бир оз ўйлангач.

– Ҳа, маслаҳатни пишириб кейин кирасанми? Бўпти, каллангни ишлатавер, – деб Жалил орқасига бурилди. Тўрт-беш қадам босгач, тўхтаб ўгирилди: – Масжидга бетаҳорат кирилмаслигини биласан-а? Масжид қурдирган одам Аллоҳнинг уйида хатми қуръонни эшитса, савоби кўпроқ бўлади.

Жалил кириб кетгач, Асадбек «Нима килдик?» дегандай савол назари билан Жамшидга қаради. Бундай ҳолларда Маҳмуддан жўяли маслаҳат чиқарди. Ҳаётнинг аччиқ-чучугини етарли даражада тотган Жамшид устозининг ўрнини босиши мумкин, фақат фикрини баён этишга журъати етишмайди. Шу сабабли хожасининг савол назарини жавобсиз қолдирди.

– Биз Кўқонга бораверсак-чи, эрталаб келиб буларни олиб кетамиз, – деди Асадбек мужмал бир оҳангда.

– Борсак бораверамиз-у... отахоннинг кўнгиллари ранжирмикин...

Кирамизми?

– Бир кеча минг кеча эмас...

Тунни қишлоқнинг эски масжидида ўтказиш аҳди Асадбекка ёқмади. Ўғлининг вафотидан кейин «менинг Худо билан шартномам бор: энди мен унинг уйига қадам босмайман, у меникига кирмайди», деб юборганини эслаб, юраги эзилди. Гарчи ўша ондаёқ Жалил ва Мухиддин отанинг даъватлари ила тилида тавба қилган бўлса-да, ўғлидан айиргани учун

Аллохга даъвосини ҳали тўхтатмаган эди. Ҳаёлига «Кечаси билан куръон ўқиб чикқани билан бир нарса ўзгарадими, ўлган табиб тирилиб келадими?» – деган фосиқона фикр келиб, ошнасининг қилиғидан ранжиди. Жалилнинг ўзи бўлганида, масжидга кирмай, жўнаворар эди. Жамшид ҳақ, Мухиддин ота ранжиди. Иложсиз ҳолда масжид томон юрди. Жалил ошнасининг қалбдаги иймон нури билан эмас, нохуш бир иложсизликнинг зўри билан кирганини англаса-да, ичида «шунисига ҳам шукур», деб қўйди.

Хуфтон намозидан кейин давра тортиб ўтиргилар. Хатми куръон бўлишини эшитган қишлоқ аҳлидан бир неча киши қолди. Тиловатни Мухиддин ота бошлаб, имом ширали қироати билан давом эттиргди. Ярим кечада Асадбекни мудрок босиб, дераза токчасига суюнганича ухлаб қолди. Жамшид ўтирганларга сездирмай аста ташқарига чиқиб, машинанинг орқа ўриндигига ётди. Энди кўзи илингандা ойнакни кимдир тақиллатди. Қаддини кўтарган эди, ташқаридаги милиционер йигит эшикни очиб, «бу ерда нима бўляпти?» – деб сўради.

– Бу ердами? – деб саволни такрорлади Жамшид ташқарига чиқиб, кейин кесатик оҳангига аниклаштироқчи бўлди: – Машина ичидами? Мен ухляяпман. Мана энди уйғондим, саломлашсам ҳам бўлади.

– Мачитда нима бўляпти? – деди милиционер унинг киноясига парво қилмай.

– Хатми куръон бўляпти, – деди Жамшид керишиб.

– Ким рухсат берди?

– Рухсатми? – Жамшид «шунга ҳам рухсат керакми?» демоқчи эди, гапчувалашиб кетиши мумкинлигини фаҳмлаб, жиддий оҳангга кўчди: – Ким бўларди, Тошкентда ўтирадиган муфтий беради-да бунақа рухсатни, – деб эснади.

– Қоғози борми?

– Қоғознинг нима кераги бор, ўзлари шу ердаларку? Номерга қаранг, укахон, мошина кимникилигини билмайсизми? Милиса деган сал зийракроқ бўлиши керак.

– Ўзимам мошинга қараб, Тошкондан муфтий ҳазрат келгандирлар, деб ўйловдим. Анави шеригим, – у сал нарида турган милиционерга қараб олди, – «бегоналар кириб олганга ўхшайди» деб ваҳима қилиб мени чалғитди-да...

– Қорининг овозини эшитмадиларингми?

Дарҳақиқат, қорининг овози ташқарида ҳам эшитилиб турган эди.

– Омма имомимизнинг қироати зўр-да! – деди милиционер фахрини баён этиб. – Тошкондаги қориларнинг мусобақасида учинчи ўринни олибди. Ўтган хафта тоғам қайтиш қиганида уйларига бориб, кечаси билан ўкиб берди.

– Ҳа, ана, билар экансиз-ку. Хоҳласангиз киринг, мазза қилиб эшитинг.

– Йўқ, ака, биз хизматдамиз, бизга мумкинбас.

Милиционер шундай деб изига қайтди.

Бомдодни ўқигач, йўлга тушишмади, хатмни кутишиди. Кун терак бўйи кўтарилиганда имом охирги сурани ўкиб, дуога қўл очди. Масжиддан чиқсан Жалилнинг кўзлари мамнун боқарди. Уйқусизлик чарчоғи сезилмас эди.

Жалил Жамшиднинг ёнига, олд ўриндикка ўтирди. Асадбек билан Муҳиддин ота орқадан жой олдилар. Жалил имомни хурсанд қилган экан шекилли, у алоҳида тавозе билан кузатди.

– Шу ишимиз яхши бўлди, қуръонни эшитганда ҳар қандай тош қалб ҳам эриб кетади, – Жалил шундай деб ўгирилиб, «тўғрими, бу гап сенга тегишли», деган маънода Асадбекка қаради. Асадбек бу қарашга жавобан: «ўзинг обдон эриган бўлсанг, етарли» демокчи эди, «отанинг олдида яна бобиллаб бермасин», деган хавотирда индамай кўя қолди.

– Раббим тош қалбларга назар солмайди, тұғрими? – деди Жалил энди Мұхиддин отага қараб.

– Қалбнинг тошга айланиб қолишидан Ўзи арасын, – деди Мұхиддин ота. – Бу томонларда жанозадан кейин хатми куръон қилиш одати бор. Аллоҳнинг каломини сомеъ ҳолда тинглаш фарз. Савоби бор. Лекин... факт әшитишининг ўзи билан муддаога әришилмайди-да. Аллоҳнинг илохий китоби факт әшитиш учунгина эмас. Куръони Карим маънолари дарёи азимдур. Бу дарёдан ҳар ким ўз зехнига лойик сув олади. Банда ўзи ўқиса, тушунса, амал қилса савоб даражаси баландроқ бўлади. Басир кўз учун каломуллоҳни ўқишдан ҳам ортиқроқ баҳт борми? Ҳар бир одамнинг кафани бошқа, лаҳади бошқа. У дунёдаги савол-жавоби ҳам ўзига яраша бўлади. «Мусҳафни ўқидингми, унга амал қилиб яшадингми?» деган савол берилса жавоб қандай бўлади? «Тингладим, аммо тушунмадим, шу боис амал қила олмадим», дейишдан Худо арасин! Аллоҳ таборак ва таоло дейдики: «Эй Одам фарзанди, сенга уч нарсани ихтиёр килдим: яъни оила аҳлингни, молу дунёингни ва амалингни. Сен ўлиб, оёғинг ердан узилиши билан мол-дунёинг орtingда қолади. Оёғинг уйдан чиқиши билан оиласнг ҳам ажраб қоладилар. Кейин қабрда бўласан. Қиёмат кунида факт яхши амалинг фойда беради. Амалинг тузук бўлса, сени ҳам тузатиб қўяр, агар ёмон бўлса, сени ҳалок қилгувчи ерга топширад».

Куръон ўкишни ўрганолмаётган Жалил бу танбекхнинг ўзига ҳам тегишли эканини фаҳмлаб ўнғайизизланди, бир оз жим кетгач, ўзини ва ўзи кабиларни оқлашга қаратилган баҳонани айтди:

– Худо ҳаммани бир хилда зехни қилиб яратмаган-ку? Ҳамма ҳам қори бўлавермайди-ку?

– Бу гапингиз ҳақ, бўтам. Агар барчанинг зехни-фаросати, хотира кучи бир хил бўлганида Аллоҳ Куръони Каримни тўла ёд олишни бандаларига фарз киларди. Лекин хотирам заиф, зехним паст, деб ёд

олишга ҳаракат қилмаслик ҳам дуруст эмас-да. Хотира кучи заиф бўлган одам ҳам кунда бир кичик оятни ёд олиши мумкин. «Ихдинас сиротал мустакийм» – эй Парвардигоро, бизларни тўғри йўлга солгин, оятини эслаб қолиш мушкулми? Агар кунт қилиниб, кунда бир оят ёдланса, йилда уч юз олтмиш оят ёдланган бўладими?

– Бу гапингиз ҳам тўғри, – деди Жалил баҳсада енгилганлигини тан олиб.

– Ҳибсада эканимизда бир артист бор эди. Ўнлаб саҳна асарларини ёд биларди, Куръон илмида эса алифни калтак дейдиган даражада эди. Бир куни «шунча монологларни ёдлаб нимага эришдингиз? Бунинг ўрнига Куръонни ёдлаганингизда хидоят топиб, охират мукофотига эга бўлардингиз», деб эдим, гапимдан таъсирланибди. Ўн тўққиз порани мукаммал ёд олганда умри вафо қилмади. Жон берар чоги ўз ишидан мамнун бўлиб, хидоят берган Аллоҳга шукурлар қилди. Охиригача ёд олишга улгурмагани учун армон билан кўз юмди. Чиндан ҳам Тангри таоло у биродаримнинг қалбини Куръон нури билан ёритиб хидоят берди. Аллоҳ Ўзининг элчисига мурожаат этиб марҳамат қиласиди, «Эй Муҳаммад, Сиз кофирларни Худонинг азобидан қўрқитсангиз ҳам ё қўрқитмасангиз ҳам, уларга барибир. Улар иймон келтирмайдилар. Сизнинг насиҳатингиз, яъни огоҳлантиришингиз шундай зотларга фойда берадики, улар зикрга – Куръонга амал қиласидилар. Худони қўрмасдан туриб, ғойибона Ундан қўрқадилар. Сиз уларга Худонинг кечиришидан ва улуғ ажр бериншидан хабар қилинг». Улуғ ажр насиб қилганларни қўрдик. Ҳидоят топмаганларнинг қанчасини қўярпмиз? Эшитинг-а: «Инна жаъална фий аъноқиҳим ағлалан фахия илал азқони фаҳум муқмаҳун» – оянинг маъноси бундай: «Албатта кўп кофирларга Худонинг ваъда қилган азоби собит бўлган. Улар иймон келтирмайдилар, гўёки Биз у кофирларнинг

бўйинларидан то иякларига қадар ҳалқа-кишан солганимиз. Уларнинг бошлари юқори бўлиб, ғўддайиб қолганлар, ерга эгилмайдилар». Тушундингиз-а, Парвардигор уларнинг саркашликларини бўйнига кишан солинган одамга ўхшатяпти. Яна Аллоҳ дейдики: «Биз уларнинг олдиларидан ҳам, орқаларидан ҳам пардатусиқ яратдик, бас, улар ҳеч нарсани кўрмайдилар». Мана шу огоҳлантиришни ҳеч бир банда, ҳеч қачон унутмаслиги керак. Бўйинга кишан тушиб қолишидан Аллоҳнинг ўзи арасин!

Мухиддин ота шундай дегач, бошини эгиб, жимиб қолди. Жалил унга бир қараб олиб, бошқа гапирмади. Асадбек ҳам, Жамшид, ҳатто Жалил ҳам бу гаплардан ўзларича мутаассир бўлдилар. Жамшид билан Асадбек ўзларини кишандаги банда киёфасида кўриб, ғашландилар. Бундан ташқари, Асадбек Сибирдаги қамоқхона тилга олингани учун отасини эслади. «Адам қандай эдилар? Қай ҳолда кўз юмганлар? Қандай армон билан кетганлар?» деган савол уйғониб, юрагини таталади.

Андижонга яқинлашганларида тун чарчоғи хукмини ўтказиб, Жалил ухлаб қолди. Ўшга етганларида ҳарбийлар уларни тўхтатдилар. Жамшид уларга мақсадни тушунтиришга уринди. Зобит кўнавермагач, Мухиддин ота машинадан тушиб, ёрдамга эмас, фотиха ўкиб, таъзия билдириб, кўнгил сўрашга кетаётганларини англатгач, йўл очилди.

Кишлоққа кираверишдаги ёнган уйларнинг қорайиб турган деворларига кўзлари тушиб, маъюсландилар. Бу деворлар ортида қанча баҳтиёр оиласлар қанча саодатли онларини ўтказган эдилар. Қанчалари тўй килиб, элга дастурхон ёзиш ниятида яшаётган эдилар. Саодат қуёшини сўндиришга бир неча дақиқа кифоя қилди...

Олов тили Абдураҳмон табибнинг уйига ҳам етиб келган, бир қанотини ёндириган, одамларнинг ҳаракати билан ўт ўчирилиб, қолган қисми омон қолган эди.

Хатар нари бўлганига ишонган қишлоқ ахли бу кун уйларини офат ёпинчиқларидан тозалашга киришган эдилар.

Абдураҳмон табибнинг айвонида Мирзаали, Гўрўғли, Жўлон қирғиз гурунглашиб ўтиришган эди. Улар машинадан тушган меҳмонларни танимасалар ҳам, иззат билан кутиб олдилар. Мирзаали ичкарига ўтган эди, табибнинг келини меҳмонларнинг кимлигини билдириб, чой дамлаб берди-да, ўзи овқатга уннади.

Дуойи фотихадан сўнг бир-бирлари билан танишдилар. Мирзаали гапни Абдураҳмон табибнинг Үшга хавотирланиб борганидан бошлаб, бўлиб ўтган воқеаларни эринмай баён этди.

– Боши бузуклар авжга чиқиб, бу томонга бостириб келишаётганда ошнам бу Жўлон биродаримиз билан биргаликда уларни тўхтатмоқчи бўлибди. Ваҳший кўзига қон куйилса, одам танийдими? – деб ҳикоясига якун ясади.

– Уриб ўлдиришдими? – деб сўради Жалил.

– Уришларига Жўлон йўл қўймаган. Уйда тек ўтираверганида жони омон қоларди. Кўшнининг уйи ёнган экан, ичкарида қамалиб қолган болаларни олиб чиқаман, деб ўзини ўтга урибди-да... Икки боланинг жонини сақлабди, учинчисига кирганда нафаси бўғилибди. Жўлон ўт ичига кириб, биродарини олиб чиқибди. Куйишга қаттиқ куймаган-у, тутунда бўғилгани учунми, юраги дош беролмай, тўхтабдида...

– Бундай одамларни Аллоҳ ўтда куйдирмайди, – деди Мухиддин ота енгил хўрсиниб. – Қадим замонларда Бағдодга ўт тушиб, уйлар кетма-кетига ёнибди. Бир уйда гўдаклар қолиб кетган экан, валий одам ўтаётиб, ота-онанинг фарёдини эшитиби-ю, ўйлаб ҳам ўтирмай, ўт ичига кириб, болаларни олиб чиқибди. Битта туки ҳам куймабди. Болаларнинг отаси кувониб унга ўн тилла суюнчи узатса, у валий: «тиллаларни оладиган одам бўлсан, ўтдан соғ чиқмас

эдим», деган экан. Абдурахмон табиб ана шунақа валий қаторидаги ажойиб одам эдилар. Аллоҳ сүйган дўстини бу дунёда ҳам, у дунёда ҳам ўт азобидан асрайди.

Бу гап Гўрўғлига маъқул келиб, «яхши айтдингиз», деган маънода меҳмонга мамнун қаради-да, сұхбатта кўшилди:

— Гўр қазишга қўлим бормади. Кетмонни ерга ураман-у, «Абдураҳмонга кавляпманми?!» деб ўпкам тўлади. Омма, гўр ниҳоятда силлиқ чиқиб, ўзиммиям ҳайрон қолдирди. Лаҳад кенг бўлди, айвонини атай силлиқласа ҳам бунақа чиқмайди. Яхши одамнинг гўри шунақа бўлди. Ёмонники нураб кетаверади, эпақага келтиргунимча, эсим тескари бўлди. Валади зинонинг гўри шунақа бўлди: кетмон урсам, тупроқ сачраб кетади, девор уваланиб тушаверади. «Бу бадбахтни ер олгиси келмаяпти», деб ўйладим. Охири, Кўкшапканинг гўрини очиб, ўша лаҳадга кўйдим. Ота-болага бу ҳам хайф. Барибир Худога менинг айтганим маъқул бўлди. Абдураҳмон бир кечаси валади зинони бошлаб келди. Эртасига ўзи келди. Қарашлари паришон эди, нимадандир хавотири бор эди. «Кеча Коравой бир шумликдан дарак берди. Ўйлай-ўйлай нималигини билолмадим. Эҳтимол, сиз сезгандирсиз?» – деб сўради. Мен дангалчи одамман, дангалини айтдим: «Шумқадамдан ёмонликдан бошқа яна нима кутиш мумкин? – дедим. – Кўнглим бир нарсани сезиб турибди: шу икки-уч куннинг ичидаглавади зино ўлса керак. Унга янги гўр кавламайман. Кўкшапканинг лаҳадини очаман-у, суюкларини сурриб, шунинг ёнига қўяман. Икки фосиқ биргалашиб ётаверади... Сенам... «Жаноза ўқиймиз», деб хархаша қилмайсан». Абдураҳмон раҳматли кенг одам эди, бу гапимга унамади: «Мусулмоннинг боласига жаноза ўқиши керак», – деди. Бу гапидан аччиғим чиқди: «Қанақа мусулмонликни айтасан? Ким эди мусулмон? Кўкшапками? Унга ҳам жаноза ўқиган эдиларинг.

Қанчадан қанча иймон эгасини қуритди? Үша ҳам мусулмонмиди?» – деб юбордим. Абдураҳмон қайсар эди, гапимни олмади: «Күйинг бу ўтган гапларни, гуноҳларига ўзи жазо олади у дунёда», – деди. Менам бўш келмадим, ғазабимни яширмай: «Ўтган гаплар, дейсанми? Гўрга киргач, ҳаммаси унуглидими, тупроқ ҳамма абллахликларни кўмиб ташлайдими?» – деб бобиллаб бердим. «Юки енгиллар нажот топади, гуноҳи оғирлар дўзахга тушади», деб менга сал ён босгандай бўлди. Гап талашиб қолсак, «илмим йўқ», деб турарди-ю, лекин ҳар балога ақли етарди. Мен алифни калтак дейдиган оми одам бўлсан ҳам, ҳар гапга кўнавермайман. Жони чиқкан ҳар одамга ҳам жаноза ўқийвермаслик керак. Кўкшапка тоифасидагиларга жаноза ўқилмаса, унга ўжшаган фосикларнинг кўзлари очиларди. «Менам шу кўйга тушмай», деб гуноҳдан тийилишарди. У дунёдаги жазо қанақа бўлишини ким билиб ўтирибди?! Бу дунёдагисини ҳам кўрсатиб туриш керак-да, тўғрими? Абдураҳмон бу галимни ҳеч маъкулламасди. Үша куни мениям ўжарлигим тутиб: «Сен нима десанг деявур, Коравойга ўзим кўрсатаман. Унинг бу ерга келишига яқин қолди. Аслида унга бу ердан жой бермаслик керак», – дедим. Мен кичкина одамман, ўликларни кўмишдан ўзга ишим йўқ. Бундан бошқа масалаларда мендан бирор маслаҳат ҳам сўрамайди. Бу ёғини сўрасангиз, кўп ёмонликлар килиб ўтган одамга гўр кавлагим келмайди. «Бунақаларга жаноза ўқиш керакмас», деб факат Абдураҳмон табибга айтганман. Азбаройи юрагим қон бўлиб кетгани учун шундай деганман. Аслида дунёдаги ғаламисликларга зътибор қилмасам ҳам бўлади. Менга нима! Битта қорнимдан бўлак ғамим йўқ. Дунёда ким гўрковни подшо қилиб кўтарибди-ки, мен буни орзу қилсан! Худо одил, барабир менинг айтганим бўлди – валади зинога жаноза насиб этмади.

Гўрўғли ичини куйдираётган гапларини айтиб олиб

совугач, Мирзаали Мухиддин отага қараб, Кўкшапка билан валади зинонинг кимлигини маълум қилди.

— Қоравой деганимиз қамалиб кетган эди, бу ёвузликлар бошланмасидан олдин, ўзига ўҳшаганлар билан пайдо бўлибди. Абдураҳмон уларнинг мақсадини фаҳмлаб, Ўшга тушган эди. Ҳамма ваҳшийликларни Қоравой қамоқхонадан бошлаб келган ҳаромилар қилгани аниқ. Қилғилиқни қилиб, гумдон бўлишди, излари ерда ҳам йўқ, кўкда ҳам йўқ. Лекин олатасирда Қоравой одамларни ҳимоя қилганмиш, деб эшитдим. Зўрланаётган қизни қутқараман, деганда шериги пичоқ тортиб юборганмиш. Ўлигини бирор кафандаб, мозористонга бирор кўтариб боргани йўқ. Эмаклаб ўзи борибди. Онасининг гўри устига бориб, қон қусиб ўлибди. Қолган гапни ўзингиз эшитдингиз...

— Абдураҳман Кудай берген достэли, ани қирғиздар ўлтиргени жоқ, — деди бош эгиб ўтирган Жўлон худди ўзига ўзи гапиргандай.

— Ҳадеб шунақа деяверма, ҳеч ким қирғизни айблётгани йўқ, нима бўлганини кўриб-билиб турибмиз.

Жўлон бу танбехга эътибор бермай, ҳолатини ўзгартирганича давом этди:

— Аилимде ким оурса, Абдураҳманга чобатэли, дохтирга бормайтэли. Туувганим дари-дармек бериб, оқча олмабайтэли. Дўхтир неверемди қайтиш болат, дегенда, Абдураҳман сактаб қалған... Ул бул дунёнин адами эмесэли. Кудайим аға беишден орин берет.

Бу гапларни эшитиб ўтирган Жалил ўзини тутиб турга олмай:

— Шундай табибнинг қадрига етмадиг-а! — деб юборди. Барчанинг нигоҳи ўзига қаратилганини кўриб, фикрини давом эттириди: — Дўхтир зоти оқ ҳолатни кийиб олиб, гердайиб юради, димоғидан курт ёғилади-ю, даволашидан дарак йўқ. Битта дўхтирга дангал шундай десам, «табиблар ҳеч нима билмайди, ўтлар билан ҳозир даволаш мумкинмас», дейди.

Олдинги замонларда шу ўтлар билан даволашган-ку, тўғрими? Ҳозиргидақа укол бўлмаган-ку?

Жалил фикрини тасдиқдан ўтказиш мақсадида Муҳиддин отага қаради. Жалил гарчи, мавзуни бутунлай бошқа томонга буриб юборган бўлса-да, табобатнинг афзаллиги хусусидаги фикрлар мархумнинг номини шарафлашга хизмат қилгани учун Муҳиддин ота бош иргаб, гапга аралашди:

– Гапингиз тўғри, бўтам, ҳозирги тиббиётнинг ожизлиги – ўтмиш табобатидан юз ўтирганлигига. Электр лампочка шамчироқни менсимай, гердайиб: «Менинг нурим ғоят ёруғ» деганда, шамчироқ: «Тўғри, сен нурлироқсан, лекин сени менинг нуримда яратишган», деган экан. Сибирда ҳам ўт билан даволайдиган табибларни дўхтирлар чиқиширишмайди.

– Ўрисларда ҳам табиб борми? – деб ажабланди Гўрўғли.

– Сибирда, биродар, азалдан туркий қавм яшаган. Ҳозир ҳам яшайди. Табиблик кўпроқ ўшаларда. Уларнинг давосига ишонадиган ўрислар ҳам кўп.

– Одам дори ичавериб бўкиб кетади-ю, лекин таъсирини сезмайди, – деди Мирзаали.

– Сиз айтган дорини Оврупода ёки Америкада кашф қилишади, ўша ердаги одамларда синааб кўришади, – деди Муҳиддин ота. – Уларда «иссик мижоз», «совук мижоз» деган тушунча йўқ. Битта одамга шифо бўлган дори иккинчисининг касалини баттар қиласида ёки бошқача хасталик уйғотади. Табобат ҳақидаги доно китоблар кўп. Бу соҳага сўзи ўтадиган катта амалдор бўлганимда, тиббиётта ўқиётганлар Ибн Синони тўла ўзлаштиргуналарича қўлларига диплом бердирмасдим. Беморнинг яқинига йўлатмасдим. Тил биладиган олимлар «Тиб қонунлари»ни ўзбекчалаштириб беришди. Шу китобни қўлига олган ақлли талаба бормикин? Бу ёғини суриштирангиз, устозлари ҳам ўқишмаган. «Шу илмий асар нима учун минг йилдан бери ҳаёт? Нима

учун Оврупо тан беради-ю, ўзимиз инкор этишимиз керак?» – деб ўзларига савол бермайдилар. Бир овқат ёқмаса, «шўр бўлибди» ёинким «ёғи доғ бўлмабди», деб камчилигини айтамиз. Минг йил яшаб келаётган илмни рад этадилар-у, сабабини тушунтириб бера олмайдилар. Чунки уни ўқиб кўрмаганлар. Ўқимасдан туриб рад этишни нима деймиз?

- Аҳмоқлик! – деди Жалил дангал.
- Сал қўполроқ айтдингизми, бўтам, бу бир нодонлик ёинким жоҳиллик десак ҳам бўлар.

– Иккаласи бир эмасми?..

Жалил одатига хилоф қилмай, баҳсни бошламоқчи эди, ичкаридан келиннинг енгил йўталгани эшитилиб, Мирзаали ўрнидан турди. Дам ўтмай қўлида икки коса билан қайтиб, бирини Мухиддин отага узатиб:

- Насиба-да, кудаларникидан келибди, – деб изоҳ берди.

Яна икки коса узатилгач, «биз яқингинада тановул қилдик, сизлар бахузур», деб узрини айтди. Илиб қолган ошдан уч-тўрт қошиқ насиба олган бўлишиб, миннатдорлик билдиришди. Асадбек қарияларнинг суҳбати давом этмай туриб, улардан кечирим сўраб, ишком остидаги супага ўтди. Жалил дўстига норози назар билан қаради-ю, жойидан жилмади. Жамшид эса хожасига эргашди.

Даволанишга келган кунлари уй ичидаги нафаси сиқилганда, ҳовлига чиқиб, шу супада ўтиrsa, сал дарди аригандай бўларди. Ҳозир айвонда ўтиргани билан, руҳи эзилгани сабаблими, нафаси сиқилди. Қариялар даврасидан четланиб, шу супада нажот истади.

Чой ичаётган Мухиддин ота Гўрўғлиниң ўзи томон тикилаётганидан ўнғайсизланди.

– Биродар, бирорвга ўхшатдингизми? – деб сўради у ҳилмлик ила.

– Ўхшатмадим, – деди Гўрўғли ундан кўз олмай. – Сизнинг юзингиздан бир чиройли нур таралиб туриб-

ди. Шунга маҳлиё бўлдим. Омма, бошингизга кўп аламлар ёғилган экан.

– Фолбинмисиз, дейман? – Муҳиддин ота шундай деб жилмайди.

– Гўрковман, дедим-ку, тўпорилигимдан ранжиманг. Нимани ўйласам, шуни гапираман. Уликни лаҳадга қўйиб, юзини очганимда баъзи нарсалар менга аён бўлади.

– Аён бўлса... унда авлиё экансиз? – деди Жалил, сұхбатга аралашиб.

– Масхараламанг, авлиё қайда-ю, мен қайдаман? – деди Гўрўғли ранжиб.

– Масхаралаганим йўқ, – деди Жалил хижолат бўлиб. – Худо ўзига ёққан одамларга бир нарсаларни билдириб тураркан.

– Бўтам адашдилар, айбситманг. Валиуллоҳлик бошқа нарса. Аллоҳ суюкли бандасини ўзига дўст тутса, айрим кароматларни аён қилиб беради. Валиуллоҳлик улуғ мартаба, ҳамма ҳам эришавермайди.

– Бу гапингиз тўғри, меҳмон. Мен намозни ҳам эплаб ўқиёлмайман. Раҳматли Абдураҳмон ўргатганича ўкиб тураман. Келиб-келиб, Худо мени ўзига дўст тутадими? Лекин ўликларнинг юзига қараб, тириклигида қанақа одам бўлганини билишим тўғри. Баъзи тирикларнинг қўзига қараб, юрагида қанақа шумлик борлигини ҳам биламан. Анави икки йўлдошингизнинг ичлари қоп-кора, каттаси кўп ёмонликлар қилган, кичиги ундан баттар.

– У биродаримизни мулла Абдураҳмон даволаган эдилар...

– Жисмини даволабди-ку, руҳига қарамабди-да. Раҳматлининг шунақа одати бор эди, ким бўлса, даволайверарди. Баъзи ёмонларни даволаб овора бўлма, бунақаларнинг тезроқ ўлгани яхши, десам, менга танбех берарди.

«Руҳига қарамабди-да»...

Қараган эди...

Абдулҳамидга шифо истаб келган кунлари намоз ўқиб бўлишгач, Абдураҳмон табиб Муҳиддин отага синовчан тикилиб: «Ёдингизда бўлса, худди шу ерда ўтириб, инимиздаги рух хасталигининг чекинмогига умид қилиб эдик. Умидимиз сароб бўлиб чиқиби. Инимиз зулмни аввалгидан кучлироқ ҳолда касб қилибдилар. Ожиз иймонлари янада ожизлашибди», деган эди. Шунда Муҳиддин ота «Замон буларнинг тилини ҳам, дилини ҳам тош қилиб қўйган... На илож... ҳар ҳолда Аллоҳдан умидимиз бор», деб, айбни замонга юклаб қўя қолганди. Абдураҳмон табиб бу баҳонани қабул қилмаган бўлса-да, баҳслашмаганди. Муҳиддин ота ҳозир Гўрўғлига шу гапни айтса, у шубҳасиз, «замон ёмон йўлга соглан бўлса, ўзининг кўзи кўрмиди, ақли йўқмиди?» деган маънода бирон гап гапириб, қайриб ташлаши мумкин эди. Шу сабабли индамай қўя қолди.

Муҳиддин ота Гўрўғлининг гапини эшитиб, дастлаб келган кунларини, Дев аканинг қилиқларини эслади. Кўришаётиб «сенга миллион сўм бераман», деган, Асадбекка эса нохуш назар билан қараган эди. Девона бўлса ҳам, Асадбекнинг кўзларига қараб, ичидаги қоронгуликни кўрган эди. Фисқ зулматини бир девона кўрганида Гўрўғлининг сезишидан ажабланмаса ҳам бўлади.

«Бу ерда шифо умиди билан турганимизда бўтам ҳидоятта яқинлашиб қолган эдилар. Кейин тисла на бошлидилар. Фарзанднинг ўлимидан кейин янада узоклашдилар. «Худо уйимга кирмайди, мен унинг уйига кирмайман», деган шаккокларнинг гапини дилдан чиқариб, билиб айтгувдилар. У дамда бизнинг зўримиз билан, тил учida тавба қилиб эдилар. Саждаларда астойдил тавбалар билан турсалар, қалблари йигласа, меҳрибон Аллоҳ кечирав... Лекин тавба қиласмикинлар...»

Муҳиддин ота шуларни ўйлаб, супа томон қаради.

Асадбекнинг бош эгиб, маҳзун ҳолда ўтирганини кўриб, юраги эзилди. Хаёлан муножот қила бошлиди:

«Аллоҳим, дунёга келиб яхшини ҳам кўрдим, унданда кўпроқ ёмонни кўрдим. Бўтамнинг аҳволи Ўзингга аён, уни кечир, истиғфор айтгувчилар сафига қўш, бўйнидаги кишанни олиб ташлаб, ҳидоят бер. Биламан, бандаларингни: «Мен бирон бандамнинг баданига ё боласига ёки мол-дунёсига мусибат юборсам, у Менинг мусибатимни сабр билан кутиб олса, Мен Қиёмат кунида унинг номига тарози тикишдан ёки унинг аъмол дафтари очишдан ҳаё қиласман ва азоб бермайман», деб огоҳлантиргансан. Сабрли банданинг амаллари тарозига сифмайди, Ўз фазли караминг билан аъмол дафтари нуқсонларини беркитасан. Афсусим шуки, бўтам бу ҳақиқатни англашда сустлик қиляпти... Олдиларидан ва орқаларидан қўйган тўсиқни Ўзинг олиб ташла, ҳеч нарсани кўрмайдиган бандаларинг сафидан чиқар. Унинг ҳидоят топганини кўриб, сўнг ўлсам, армоним қолмас эди. Отасининг кўзлари очик кетган эди. Азроил жонимни олгач, менинг кўзларимни очик қолдирма. Отасининг ҳузурига хушхабар билан боришни мен нотавонга насиб эт...»

– Йўллар очик эканми, қийналмай ўтдингларми?

Мирзаалининг саволи уни хаёл дунёсидан ташвишли аччиқ ҳаёт оламига тортиб олди. Жалил «Анжонгача яхши келдик», деб гап бошлаган эди, томоқ кириб, уни тўхтатди-да, хотиржам оҳангда жавоб қайтарди:

– Чегарада аскарлар туришибди, бегараз одамларга монелик қилишмаяпти.

– Ишқилиб, тинчигани рост бўлсин, – деди Мирзаали.

– Мехмон, сизлар ҳам эшитгандирсизлар, кўкрагида ўти бор анжанли йигитлар бу ёққа ўтмоқчи бўлгандарида янги каттаконинглар йўлларини тўсганимиш-ку? – деди Гўрўғли.

– Ростдан шунаقا бўлибдими ё миш-миш гапми бу? – деб сўради Мухиддин ота.

- Рост – деди Мирзаали, – чегара бўйлаб одамларни кўйиб ташлаган.
 - «Одамлар» деганингиз сиз-у бизга ўхшаганларми ё ўриснинг аскарларими?
 - Асосан ўзимизга ўхшаганлар, омма милисалар ҳам бор.
 - Агар шундай бўлса, каттаконимиз тўғри иш қилибдилар.
- Мехмондан аксинча гапни, каттаконларни қоралашни кутган Гўрўғли ҳам, Мирзаали ҳам, ҳатто Жўлон қирғиз ҳам унга ҳайрат билан қараб қолишиди.
- Гапингиз кизик-ку?! – деди Мирзаали. – Ёрдамга шошганлар йўлини тўсишда яхшилик борми?
 - Эй-й биродар, сиз муаллим экансиз, бошқалар ту-шунмаса ҳам сиз билишингиз керак бунаقا сиёсатни. Мен советнинг турфа иғволарини кўравериб, мана бу ерим, – Мухиддин ота чап кўкрагини ушлади, – зада бўлиб кетган. Мана, ўтган урушни лаънатлайверамиз-лаънатлайверамиз. «Газанда», деб фашистни балчиққа булас ташлаймиз. Ўша фашистнинг ҳарбий учувчиларини ўттизинчи йилларда советнинг ўзи ўқитиб, тай-ёрлаб берганига нима дейсиз?
 - Йўғ-е, Европани бўлиб олиш тўғрисида Гитлер билан шартномаси борлигини эшитганман, буниси сал ғалати-ку?
 - Сиз-у бизга ғалати туюлади. Биринчи Жаҳон урушидан кейин немисларнинг ҳарбий қувватини сиқиб кўйиш мақсадида кўп нарсалар чеклаб ташланган. Шунда совет махфий равища уларга ёрдам берган. Оқибатда, ўзи ўқитган одамлар ўзининг ерларини бомбалаб ташлади. Тарихнинг варакларини титтаман, десангиз, фитналарга гувоҳ бўлавериб, эсингиз тескари бўлиб кетади. Бугун кўриб турганимиз ҳам бир ифво. Икки миллат бир-бирини қирсин, деб атайн уюштирилган ифво жанжали. Агар каттаконимиз сизлар айтган «кўкрагида ўти бор»ларни тўスマганида

кирғин алангаси янайм ваҳшатлироқ бўларди-ку, тўғрими? Советга худди шу нарса керак. Йигитларнинг кўкрагида ўт бўлгани яхши. Лекин бунака ғавғолар кўкракдаги ўт билан эмас, бошдаги ақл билан ечишгани дуруст. Мана, Жўлон биродаримиз хижолат бўлиб, «қирғиз ўлдирмади», деяптилар, сиз эса «кўриб-билиб турибмиз», деяпсиз. Шунаقا экан, кўкрагида ўти борларга не ҳожат?

— Бу гапингизда жон бор, меҳмон, — деди Гўрўғли. — Менинг бошим гаранг эди. Илгари ҳам ўзбекми, қирғизми, тоҷикми, қозоқми... ишқилиб, болалар бир-бири билан гап талашган, гапга тўймаса, муштга тўйган. Бу ҳам етмаса, аҳмокроқлари пичоғини қиндан чиқарган. Айби зўрроқ бўлса, милиса олиб кетиб, жазосини берган, камрок бўлса, эртасига бир-бирлари билан яна тил топишиб кетаверишган. «Беганас билан Тошпўлат тозза бир-бирини муштлабди», деб эшитардик. Лекин «қирғиз Беганас билан ўзбек Тошпўлат муштлашибди», демаган ҳеч ким. Қирғиз ўлса, тобутнинг бир чекасини ўзбек кўтарарди, ўзбек ўлса, қирғиз. Ана, Жўлон, тобутнинг бир томонини кўтарганича, ҳеч кимга тутқизмай, мозоргача келди. Ўзбек қирғиз ошнасининг жанозасига уч тоғ ошиб бўлса ҳам борарди, қирғиз ҳам тоғлар ошиб келарди. Шундай одамларнинг болалари бир-бирларига ваҳшийлик қилишига ишонмайман. «Иғво» деганингиз тўппа-тўғри! Мулла Абдураҳмон шуни сезган бўлса керак, Қоравойни мозорга бошлаб келганидан кейин ташвишланиб, Ўшга тушиб чиқувди. Ташвишланганини бетига қараб билувдим, лекин ўзи дардини очмаганди.

— Ҳақ рост, — деди Мирзаали уни қувватлаб, — бу телевизор жавраётганидай миллий масала эмас, иғво масаласи! Қадимги Римнинг сultonи Юлий Сезар: «халқларни бир-биридан айри-айри қилиб ташлагин-у, ҳукмингни мазза қилиб юритавер», деган экан.

— Хўп, масала иғвода бўлса бўла қолсин, — деди Гўрўгли. — Омма ваҳшийлик анов-манов даражада бўлмади, жавобини ким беради?

— Хитойликлар пайғамбар даражасида кўрувчи донишманд Конфуцийдан: «Яхшиликка нима билан жавоб бериш керак?» деб сўрашганда «Яхшилик билан», деб жавоб берибди. «Ёмонлик, зулмга-чи?» деб сўрашганда «Адолат билан», деб жавоб берган экан.

— Дуруст айтибди. Яхшилик қилиш ҳар бир одамнинг кўлидан келади. Бироқ, бироннинг ёмонлигини кечириб, унга яхшилик қилиш фақаттина мұъминга хос. Ҳақиқат шуки, Хитой донишманди айтган адолат тарозуси советда аллақачон бузилиб кетган, — деди Мухиддин ота. — Телевизорда кўрдим, мұхбирлар ҳам, сиёсатдонлар ҳам «жиноятчилар қонун олдида жавоб берадилар», деб жаврашяпти. «Қонун, қонун!» деймиз-у, қани ўша қонун, қани ўша адолат? Борми шунақаси?.. Бўлганида ҳам, қонун жамиятда тўла адолат ўрнатолмайди. Зулм даражасини пасайтира олади, холос. Ҳеч қайси давлат жамиятда жаннат яратиб бера олмайди. У жамиятнинг дўзахга айланиб кетмаслиги чораларини кўра олади. Лекин совет бундай чора кўришга ожизлигини билдириб кўйди. Дўзах эшикларини ўзи очиб беряпти... Ҳақиқат билан куч кундошга ўхшайди. Ҳозир куч кундошининг кўлидаги заҳар иш беряпти. Одамлар ҳақиқатни ким заҳарлаётганини билib қўйсалар ёмон бўлмасди.

Қарияларнинг сиёсат бобидаги ўзларига хос сухбатларига жимгина кулок тутиб супада ўтирган Асадбекнинг кўз олдига Орзубек келди. Унинг «ярмимиз кирилиб кетсан ҳам», деганига жавобан сўкиб берганини эслаб, «яхши қилган эканман», деб ўзидан мамнун бўлди. Ҳозир Мирзаалининг тилидан Рим сultonи айтиб кетган гапни эшлитиб, юрагида санчик турди. Гўё дард яраси очилгандай бўлди. Чувринди-Маҳмуднинг фожиали ўлимидан кейин у иттифоқсизлик ҳақида

кўп ўйларди. Ўлим билан якунланувчи ноаҳиллик сабабини билолмай гаранг эди. Пул талашишади, деса, ҳаммаси пулга кўмилиб ётибди. Амал деса... қизик, пул оқиб келиб турганидан кейин амалнинг нима кераги бор? Асадбек шуни тушуна олмайди.

Ҳамма бир-бирига тиш қайрайверса, миллатнинг тақдиди нима бўлади?

Асадбек буни ўйламайди. Унда ўз отасининг, айвонда ўтирган ота қадрдонининг, ҳатто «гўр казишдан бошқа нарсани билмайман», деб ўтирган одамнинг юраги йўқ...

Муҳиддин ота Асадбекнинг бетоқатланаётганини сезиб, Мирзаалидан кетишга изн сўради. Мирзаали «хозир, хозир», деб ўрнидан туриб, ичкарига қараб юрди. Бир пиёла чой ичилгунча вакт ўтгач, қўлида икки коса билан қайтди.

— Бир чиннидан шўрва ичмай кетсангиз, келинимизнинг кўнгли ранжийди, — деди кулимсираб. — Ошнамизнинг хотирасини сийлаб келибсизлар, сизларни Худо сийласин. Гап инимизнинг табибдан шифо топишида эмас, Абдураҳмондан шифо топганларнинг ҳисоби йўқ, гап одамийлик фазилатининг гултожи бўлган — меҳр-оқибатда! Оқибат қилибсизлар, Худо сизларга хайрли оқибат берсин. Дийдорга тўйганимизча йўқ, бугунча ётиб қолсангиз яна ҳам хайрли бўларди-да.

Муҳиддин ота айвон сари яқинлашаётган Асадбек билан кўз уриштириб олиб, мезбонга лутфи учун миннатдорчилик билдириди. Келин яна косаларни узаттагач, Гўрўғли шўрвага нон тўғрай бошлади.

— Мулла Абдураҳмонникида таом есак, савоби арвоҳига етиб боради. Шу бир коса овқат кечгача ҳаммамизни тўқ тутади, шунаками? — Гўрўғли негадир Асадбекка қараб олди-да, гапини давом эттириди: — Одамларга ҳайронман, ҳамма яхши яшашнинг қанақа йўли бор, деб бош қотиради. Серҳашам уйни орзу килади, етишса, энди саройни орзу килади. Кейин

чиройли мошинларни физиллатиб юришни хоҳлади. Мошинга етишса, кўнгли самолётни тусаб қолади. Саройда ўн йил яшар, боринг, ана юз йил яшасин, момик тўшакларда талтайиб ётсин. Кейин барибир менга ўхшаганларнинг қўлига келади-ку? Серҳашам уйда яшаганми ё кулбадами, менга фарки йўқ, бўй-бастига қараб бир хил лаҳад кавлаймиз. Бойнинг бошига қўядиган гувала ҳам, камбағалга қўйиладигани ҳам бир хил бўлади. Қўлимга қайси гувала илинса, шуни қўяман. Ҳеч қайси гўрков бойнинг бошига пар болиш қўймаган. Лаҳад қуртларига ҳам барибир. Бир чекадан кемираверади. Одам, истайдими ё йўқми, бир куни бошига барибир ўлим келади. Одамлар «нима учун дунёга келдиму нима учун яшаяпман?» деган саводдан узоклашиб кетишиди. Мулла Абдураҳмон билан бу ҳақда кўп гаплашганмиз. У ҳам ҳайрон эди. Яхши гаплари бор эди, камбағаликдан нолиганларга: «Агар Аллоҳ наздига мол-дунёнинг заррача қадри бўлса эди, уни аввал пайғамбарларига, кейин авлиё-анбиёларига раво кўрган бўларди», деб уларнинг юмуқ кўзларини очарди. Кейин: «Парвардигоро мол-дунёга ҳирс қўйишдан ва унинг фитнасидан ўз пано-хингда асрар!» – деб кўп дуо қиласади.

– Минг йиллар давомида кўп донишмандлар бизга ўхшаган нотавонлар учун ҳикматларни қолдириб кетишган, – деди Муҳиддин ота, Гўрўғлининг гапларини қувватлаб. – Сиз айтган саводдан узоклашиш – иймондан узоклашиш дегани. Раббимиз «бир куни эллик минг йилга teng келадиган Қиёмат келмасидан илгари Мендан қўрқинглар ва амалларингизни қилиб олинглар», деб буюрган. Қиёматнинг бир куни эллик минг йилга teng деган ҳисобга таққосласак, демак, умримиз бир неча дакиқага бориб-бормас экан. Нуҳ алайҳиссалом минг йил умр кўрган эканлар. Кички-нагина чайлалари бор экан, ётсалар, оёклари чиқиб тураркан. Қазо вақти келиб, Азроил алайҳиссалом ха-

бар берганларида «Умр шунчалик тез ўтишини билганимда, овора бўлиб бу чайлани қурмас эдим», деган эканлар. Инсонларнинг баҳтли яшашларига монелик қиласидиган нарса – уларнинг мол тўплаш касалига мубтало бўлиб қолишларидир. Мол тўплашни инсон тотиб кўриш, ҳидлаш, сезиш каби эҳтиёжларини қондириш учун қиласи. Лекин бу сезгиларнинг ҳеч бири мақсадга етиш учун кифоя қилмайди. Инсонга мол-дунё насиб бўлса-да, у дунёда ҳам, охиратда ҳам зиёндан бошқа бир нарса келтирмайди. Кимлиги ёдимда йўқ, ақлли шоир айтган экан:

Ўзингча тижорат қилгани келдинг,
Уй қуриб, иморат қилгани келдинг.
Бу дунё беш кунлик зиёратгоҳдир,
Аслида зиёрат қилгани келдинг.

– Бу гапингиз раҳматли мулла Абдураҳмон айтиб берган ривоятни эсимга туширди: Бир девона киши бор эди. Унинг маскани кеча-кундуз вайронана эди. Ҳар дам ўша вайронанинг бир ёнини қазиб, ўз умрини хазинага эришиш умиди билан ўтказар эди. Иттифоқо, шунча машаққат чеккандан сўнг баҳти чопиб, хазинани топиб олди. У қазиёттан чуқурда бир эшик кўринди. Эшикни очиб, ичкари киргач, катта бир саройни кўрди. У ерда тиллаю жавҳарларга тўла қиркта хум туради. Девона бу бойликни кўрди-ю, хушидан кетди. Шу онда бу ерга бир абллаҳ киши етиб келди. Хазина остонасида беҳуш ётган девонани кўрди ва ҳеч бир иккиланмай унинг кўксига ханжар санчиб, бечоранинг қонини шу хазина устига тўқди ва барча бойликка эга чиқди. Яшашдан бирдан бир мақсади хазинага эришмоқлик бўлган девона эса бору йўқ сармоясидан – ҳаётидан ажралди.

– Низомий ҳазратларининг бир ҳикматлари бор, – Мирзаали сухбатга қўшилиб, кўзларини хиёл юмганича ғазал ўқий бошлади:

«Бир кун Яман шоҳин гўри устига борсам,
Кўл чўзди-ю тутди кафан, кўрсатиб карам.
Ва деди: «Бу саҳоватим айб айламагил,
Бу дунёда бундан бошқа йўқ бирор нарсам».

Мирзаали «айтилган ҳикматнинг мағзини чақиб олинглар», дегандай тин олди. Ўтирганлар «гапининг давоми бор шекилли?» деб ўйлаб, сабр қилиши. Мирзаали ўқигани давра аҳлига таъсир килганидан хузурланиб, давом этди:

– Шайх Саъдий ҳазратларида яна маъно бор:

Агар султон ғаний ва комрондир,
Ва гар дарвеш ҳожатманди нондур,
Икков ҳам элта олмас жонпарвар ҳол,
Кафандин ўзга даҳр амволидин мол.
Чу килғунг мулк молингдин жудолик,
Эрур шоҳликдин авлороқ гадолик.

Ҳикмат барчаларига маъқул келди. Гўрўғли билан Жалил негадир Асадбекка қараб олиши. Асадбек қўлига қошиқ ҳам олмаган, шўрва ичгиси йўқ, буларнинг гапи тезроқ тугаса-ю, кета қолсак, деб бетоқатланарди. Мухиддин отанинг баҳузур ўтириб сұхбатлашиши ёқмаса-да, бир нима деб кўнглини оғритишни истамай, қовоқ уйганича жим ўтираверди. Қарияларнинг сұхбати айтилган ҳикмат билан якун топар, деб ўйлаганда, гапга Жалил аралашиб, ғашини келтирди.

– Ўтиб кетганларнинг ғазаллари зўр, лекин бу гунгиларники ҳам қолишмайди, – деди Жалил. Кексаларнинг доно сұхбатига аралашиш ҳусн санал маслигини билгани ҳолда сўз бошлаб қўйганидан хижолат бўлдими, худди бирор оғзидан гапини олиб қўядигандай, шошилиб гапирди. – Газитда бир шоирнинг шеърини ўқиб ёдлаб олган эдим, ҳозирги гапларнингга узукка кўз қўйгандай бўлади.

– Айтинг меҳмон, шўрва гурунглашиб ичилса, тотлироқ бўлади, – деб Гўрўғли унга далда берди.

Жалил «тумтаявермасдан эшит», дегандай Асадбекка қараб олиб ўқиди:

– Ўлимга барибир: гулдай дудоклар,
Ҳалол юрганлару ҳаром томоклар.
Уст-боши бутлардан чопонни ечгай,
Ковуш кийиб кетмас ялангоёклар.

– Жуда-а топиб ёдлабсиз, меҳмон, барака топинг, – деди Гўрўғли уни алқаб, кейин Муҳиддин отага юзланди: – Гапираёттанингизда, мулла Абдураҳмоннинг ривояти ёдимга тушиб қолиб, фикрингизни сал бузиб қўйдим. Назаримда, ичингиздаги гапнинг ҳаммасини айтмадингиз-а?

Муҳиддин ота кулимсираб қўйди:

– Буни ҳам сездингизми? Бир ҳикматни айтмоқчи эдим, эҳтимол кейинги сұхбатта қолдирамиз. Шўрва совимасин.

– Дийдор ғанимат, меҳмон, айтинг, гапираверамиз ҳам, шўрвани ичаверамиз ҳам, биз қишлоқиларнинг одатимиз шу.

– Ака, меҳмонни толиктириб қўймайлик, – деди Мирзаали узр оҳангига. Бу гап Асадбекка ёкиб, унга миннатдор назари билан қараб олди. Жалил эса унинг яна ғашини келтириб, гапга аралашди:

– Гўрўғли акамиз тўғри айтяптилар, отахонимизнинг ҳикмат хазиналари жуда бой, фойдаланиб қолиш керак.

– Бўтам, пича оширвордингиз, кишини бундай хижолатга қўйманг-да, – деди Муҳиддин ота Жалилдан ўпкалаган бўлиб, кейин Гўрўғлига юзланди: – Сазангиз ўлмасин, битта ривоятни айтиб берай. Издиҳомларда ҳикмат-у ривоятлар айтишнинг бир шарти бор: сұхбат аҳли эшитганларини эслаб қолиб, бошқаларга, айниқса, фарзандларга етказиши

керак. Айтмоқчи бўлганим, ривоят сиз баён қилган ҳикматларнинг бир исботи, – Мухиддин ота ривоятни эслашга ҳаракат қилгандай ўйланди, косани сал нари суриб қўйиб, гапини давом эттирди: – Бир одам қутурган туждан халос бўлмоқ учун жар устига эгилган икки шохга осилиб, жар ёқасига оёқ қўяди-ю, оёғи остидаги индан тўрт илон бош чиқариб турганини кўради. Жарнинг тубига назар ташласа, у ерда бир аждаҳо оғзини катта очиб, унинг тушишини кутиб туриди. Юкорига қараса, оқ ва қора сичқон у осилиб турган шохларни тўхтовсиз кемирмоқда. Бу аҳволдан кутулиш йўлинни ўйлаётган онда сал нарироқдаги асалари уясига кўзи тушади-ю, боши узра тўпланаётган бало булатини ҳам унутиб, бармоғини болга ботириб, ялай бошлайди. Асалнинг ширинлиги унинг бошини шу дараҷада айлантиради-ки, натижада, у ўзининг қандай аҳволдалигини унутади. Оёқларини тўрт илон боши устига қўйганлигн ва бу илонлар ҳар онда чақиб олишлари мумкинлиги, сичқонлар шохларни кемира-кемира синдиришгач, аждаҳо комига тушиши муқаррарлиги хаёлидан кўтарилади. Жаҳолат пардаси акл нурини тўсиб қўйгани туфайли оз фурсат ўтмай, жарга қулаб, ҳалок бўлади.

Мухиддин ота «ривоятга яширган маънени англadingларми?» дегандай даврадагиларга бир-бир қаради.

«Бир нодон асал ялайман, деб жарга йиқилибди» – Асадбек, Жамшид, ҳатто Жалил ҳам буни шундай тушунищи.

– Чакириши қийин бир ёнғоқни фаросат дастурхонимизга қўйдингиз, – деди Мирзаали бош чайқаб.

– Сўфийларнинг фалсафа ёнғоғи-да, бу, – деди Мухиддин ота кулимсираб, кейин баёнга ўтди: – Ривоятдан англашиладиган маъно: даҳшатли ва чуқур жарлик – дунё. Қора ва оқ сичқон – кеча ва кундуз. Улар инсонлар умрини озайтириш, ҳалок этиш учун узлуксиз бир-бирини алмаштириб туради. Тўрт илон –

борликнинг моҳиятини ташкил этган тўрт унсур: ҳаво, тупроқ, ўт, сув. Булардан биронтаси ўз мувозанатини йўқотса, инсон ўша заҳоти маҳв бўлиб кетади. Асал – азоби кўп, фойдаси кам бўлган, одамларни тўғри йўлдан оздириб, уларга нажот дарвозаларини беркитган фоний дунёдир. Аждаҳо – ҳеч ким қочиб кутула олмайдиган ўлимдир. Ажал шарбатини ичишга тўғри келганида, ажал фариштаси тепангга келиб турганида ўлимдан кутулиб бўлмайди. Пушаймонлик ҳам фойда бермайди. На тавбага вакт қолади, на дуо ўқимоқقا мажол. Бобораҳим Машрабbekорга изтироб чекиб айтмаганларки:

«Бир гуноҳнинг устига юз минг надомат яхшидур,
Юз туман ёзуқларим бору пушаймон манда йўқ».

– Ҳақ, рост! – деди Гўрўғли. – Бунақаларнинг кўпини кўрдим.

– Ҳа... – Мухиддин ота енгил тин олди-да, сўнг давом этди: – дунёнинг лаззати чақмоқ каби, булут сояси каби бир зумда ўтиб кетади. Шу боис ҳам унга ружу қўймоқлик нодонлик хисобланади. Пайғамбаримиз алайҳиссалом: «Дунёга рағбат қилмаслик, аҳамият бермаслик, дунё ишларидан йироқ обид ва зоҳид бир қул бўлмоқлик кўнгил ва баданга роҳат бағишлади. Дунёга рағбат қилмоқлик, уни севмоқлик ғам ва маҳзунликни зиёда қиласди», деганлар. Бу оддий гап эмас, мағзини чақишга уриниб қўрайлик-чи: дунёни севмасликнинг кўнгил ва вужудга роҳат бағишлаши нима? Бундай одамда ҳирс, ҳақсизлик, кину адоват қилиш туйғуси бўлмайди. «Қандай килиб фалончнинг оёгини чалсан, фалончининг молини ёки мансабини тортиб олсан», деган васваса киши қалбини безовта қилса, виждони «гуноҳдан қўрқмайсанми, одамлардан уялмайсанми?» деб тергайди. Чунки у биладики, Аллоҳ таоло «Инсон ўзини бой-бехожат кўрса, бас, тутёнга тушади, ҳаддидан ошади. Албат-

та, қайтиб бориш Раббингнинг Ўзига, бошқага эмас», деб огоҳ этган. Атрофимизга зийрак боқайлик: чиндан ҳам киши бойлик, мансаб орттиrsa, дарров түғёнга кетади, ҳовлиқади, ҳаддидан ошади. Лекин Қиёмат куни барибир Аллоҳга қайтади-ку?! Ўшанда ҳар бир нарсанинг аниқ ҳисоб-китоби бўладики, буни унумаслиги шарт. Раббимизнинг огоҳлантиришига эътибор берайлик: «Билингларки, бу дунё ҳаёти факат ўйин-кулги, кўнгил эрмаги ва зеб-зийнатдир, ўрталарингиздаги ўзаро мақтанишдан ва мол-мулкни ҳамда фарзандларни кўпайтиришдан иборатдир. У худди бир ёмғирга ўхшарки, унинг ёғиши сабабли униб чиққан ўт-ўлан дехқонларни ҳайратга солиб, ақлларини банд қилиб кўюр, сўнgra у курир, бас, уни сарғайган ҳолда кўурурсиз. Сўнgra у хас-чўпга айланиб кетади. Дунё ҳаётининг ҳоли ҳам шундан ўзгача эмасдир. Охиратда эса ўша дунёга алданиб қолганлар учун қаттиқ азоб ва иймон-эътиқод билан яшаб ўтганлар учун эса Аллоҳ томонидан мағфират ва розилик бор. Бу дунё ҳаёти ғууруга кетказувчи матодан ўзга ҳеч нарса эмас». Аллоҳ таоло бу дунё ҳаётини «ўйин-кулги, кўнгил эрмаги, зеб-зийнат» деб таърифлаяптими? – Мухиддин ота шундай деб беихтиёр Асадбекка қараб олди. Бош эгиб тинглаётган Асадбек бу қаращни сезмади. Сезганида «бу гапларнинг ҳаммаси менга қаратилган экан-да, бунча менга ёпишиб олишди, бу чоллар?!» – деб ғазабланиши аниқ эди. Мухиддин ота кўзини ундан олиб, Гўрўғлига қараганича давом этди: – «Муту қабла ан тамуту» – Пайғамбаримиз алайхиссалом «ўлмасдан бурун ўлинглар», деб марҳамат қилганлар. Бунинг маъноси – киши тириклигига охират синовига тайёрланиши керак. Ажабки, одамлар ўлчови билан қаралганида, ҳаёт беш кунлик дунёда ўйнаб олиш учун ажратилган фурсатга ўхшаб туюлади. Ўзингиз айтганингиздай, қаёққа қарамайлик, одамлар кийим-бош, емоқ-ичмоқ, ҳовли-жой, зеб-зийнат ортидан қувгани-кувган. Ўз обрўлари, мансаблари, ҳасабу

насаблари билан фахрланишган, мол-дунё ва болачакани күпайтиришга урингани-уринган. Аслида эса бу нарсалар арзимас, эътиборсиз ашёлардир. Бу дунё ҳаёти шундай бир ёмғирга ўхшайди-ки, у ёккандан сўнг чикқан наботот дехқонларни ҳайратга солади, завқлантиради. Аслида эса бу ҳол ўткинчиdir. Яъни ўсимликлар тезда қурийди, ранги сарғаяди ва қуриб, қовжираб, уқаланиб кетади. Ҳа, бу дунё ҳаёти ҳам шу каби алдамчи бўлгани сабабли у билан алданиб қолмаслик керак. Чунки охиратда кофирларга азоб, мўъминларга Аллоҳнинг мағфирати ва розилиги мавжуд. Одам ҳаром-хариш воситалар билан мол-дунё, ҳузур-ҳаловат топса ҳам, лекин маънавий жиҳатдан ҳакир бўлиши муқаррар.

— Абдураҳмон буни ҳам айтган эди менга, — деди Гўрӯғли. — Унинг ўзи бойликка паст назар билан қаарди. Тарозининг битта палласига тилла-ю жавоҳир, иккинчисига бир камбағалнинг дуосини қўйиб, «танла», дейилса, ўйлаб ҳам ўтирумай, дуони танларди. Бир одам тухум сотмоқчи бўлиб, баққолга борибди-да, «тухумларимни неча пулдан оласан?» деб сўрабди. Баққол кўрадиган фойдасини чамалаб, «Ўнтасини бир сўмга оламан», дебди. «Йў-ўқ, — дебди дехқон, — бир сўмга йигирматасини сотаман». «Ундей бўлса, майли, бир сўмга ўн иккита тухумингни ола қолай», дебди баққол. Бечора, ортиқча фойданинг гуноҳидан кўрқар экан-да... Дехқон: «Йў-ўқ, — деб унинг таклифига унамабди, — Бир сўмингга ўн саккизта тухум бераман». Ғалати савдо, а? Шунақа инсоф эгаларини кўргаимисиз бу юртда? Ҳа-а... Абдураҳмон ҳикматларни шунчалик айтиб кўя қолмас эди, аввало ўзи амал қиласади.

— Мулла Абдураҳмон билан суҳбатлашганингизда у киши кўп ҳадислардан мисоллар келтиргандирлар. Биз бу қутлуғ хонадонда бир неча кун яшадик, суҳбатларидан хўп баҳраманд бўлдик. Тўғри айтдингиз, дунёга кўнгил қўймаган эдилар. Бир суҳбатимизда

«Охиратни олиш учун дунё молини сотиш мумкин, дунё моли деб охиратни сотиш жоҳилликдир. Инсон дунёнинг бўм-бўшлигини билган куни ибрат ва ҳикматга эришган бўлади. Зулматдан нурга чиқади», деган эдилар раҳматли. Бир шарафли ҳадис хусусида фикр юритганимиз ҳам эсимда: «Икки иллат борки, сизларга улар туфайли зарап етишидан ҳавфдаман, – деганлар Пайғамбаримиз алайҳиссалом. – Бу кибру ҳавога эргашиш ва орзу-ҳавасга берилишдир. Кибру ҳавога эргашиш – Ҳақдан тўсилиш, орзу-ҳавасга берилиш эса, дунёни яхши кўришдир. Огоҳ бўлинглар! Аллоҳ таоло дунёни суйган бандасига ҳам, сўймаган бандасига ҳам беради. Иймонни эса, факат суйган бандасига ато этади. Эсда тутинглар! Диннинг ҳам, дунёнинг ҳам фарзандлари бор. Сизлар дунё фарзандлари эмас, дин фарзандлари бўлинглар. Билинглар-ки, дунё сизларга орқа ўгирувчи, охират эса пешвоз чиқувчидир. Огоҳ бўлинглар! Бу кун амал куни, унда ҳисоб йўқ. Яна огоҳ бўлинглар-ки, ҳисоб куни яқин, у кунда амал қилиш йўқ!» Бойликка ружуъ қўймаслигимиз учун бизларга яна қандай огоҳлантириш даркор? Сўзни мухтасар қилолмадим, айбситманг...

– «Иймонни суйган бандасига ато этади» дедингиз-а? – деб сўради Мирзаали. – Абдураҳмон дин фарзанди эди, шунинг учун Худо уни суйган. Абдураҳмондан менам кўп ҳикоят эшитганман. Шуларнинг биттаси ҳозирги сұхбатимизга мос, малол олмасангиз менам айтсан?

– Айтинг, айтинг, бу ҳам бир амри маъруф, Худо ҳоҳласа, амри маъруфнинг савоби мулла Абдураҳмоннинг руҳларига етади. Илм олиб, бошқаларга тарқатиш – садакотул жория саналади. Мулла Абдураҳмондан эшитганларингизни қаерда ва қачон тилга олсангиз, аъмол номаларига савоб ёзилаверилади.

Бу гапдан илҳомланган Мирзаали баённи бошлади:

– Бир ҳаким чиройли товусни кўрди. Унинг

гўзаллиги ҳакимни ҳайратга солди. Лекин товуснииг хунук қағиллаши, чиройли патларини юлиши ҳакимни ажаблантириб сўради-ки:

– Эй товус! Шундай гўзал патларингни нега юляпсан? Бундай чиройли патни ерга ташлашга қандай қилиб кўзинг қийди? Бу ишинг Аллоҳ берган неъматга ношукурлик эмасми?

Товус ҳакимнинг бу гапини эшитиб, фарёд қилиб ийғлади ва ҳакимга деди-ки:

– Эй ҳаким! Сен сувратнинг жозибасига қараб ҳукм қиляпсан. Менинг бу гўзал патим, бу гўзал қанотларим бошимга минг турли балолар келтирди. Барча чеккан заҳматларим, мана шу гўзал патларим туфайлидир. Бу патлар менда экан, ўзимни ҳимоя қилишга ожизман. Кошки кўримсиз бир қуш бўлсам. Халқнинг назарида бўлмасам, ана ўшандада озод яшардим. Хоҳлаган жойимда эркин кезардим. Эй ҳаким! Бу зийнат, бу сифатлар менда бўлгани учун душманларим жуда кўп.

Мирзаали баённи тугатиб, «фалсафасини ўзингиз изоҳлаб берасизми?» дегандай Мухиддин отага қарди.

– Кимса олтин ва кумушни кўрмаса ҳеч гап эмас. Бироқ уларни кўргандан кейин жуда кўп нолойик ишларни қилиб юбориши мумкин, шуниси чатоқ-да! – деди Мухиддин ота. – Дунёда гўзал ва жозибали нарсалар ғоят кўп: уюм-уюм пуллар, турли русумли мoshиналар, тилла-жавҳар безаклар, киз-жувонлар, фарзандлар... Булар ҳар бир кишининг истагида оз ёки кўп даражада мавжуд. Бироқ, буларнинг барчаси ҳаёт учун аҳамиятли нарса эмас. Дунёни ясанган келинга ўхшатадилар. «Фоний дунё хуштур, аммо оқибат мавт ўлмаса». Ҳа, оқибат – бу дунёда ўлим бор. Ҳеч ким абадий қолмас. Яна ўлимдан сўнг ҳисоб-китоб бор. Оманно ва саддакно! Шак-шубҳасиз бор!

Асадбек ҳам, унинг аёёни ҳам карияларнинг сұхбатидан хикмат олиш ўрнига «тезроқ кета қолсак эди»,

деган ўйда бетоқатланиб, ғашланиб ўтирилар. Асадбек ўзини қанчалик зўрламасин, томоғидан шўрва ўтмади. Икки қошиқ билан чекланди. Аввал Гўрўлининг, сўнг Муҳиддин отанинг узун дуоларидан сўнг хайрлашиб, йўлга тушдилар.

Бир томони узок йўл чарчоги, яна эшитган-кўрганларидан кўнгли гашланган Асадбекнинг гаплашишга хуши йўқ, Муҳиддин ота толикқанмиди, у ҳам жим эди. Давра сухбати таъсиридаги Жалилнинг эса жим кетгиси йўқ эди. Орқа томонга бир-икки қараб олгач, Жамшидга:

– Радионинг қулогини бурасанг-чи, ҳаммаёқ хуфтон бўлиб кетди-ку? – деб буюрди.

Жамшид «акахоннинг амрларини бажарайми?» дегандай пешкўзгу орқали хожасига қараб олди. Асадбекнинг эътиборсиз ўтирганини кўриб, радио мурватини буради. Янграган куйни эшитиб, Жалилнинг баҳри-дили яйраб кетди. Бу қўшикни неча минг марта эшитган бўлса, яна тинглагиси келаверарди. Ҳозир ҳам жон қулоги билан тинглади:

«Агар ошиклигим айтсан, куюб жону жаҳон ўртар,
Бу ишқ сиррин баён этсан, таки ул хонумон ўртар.
Кишига ишқ ўтидин заррайи тушса бўлур гирён,
Бўлур бесабру бетоқат, юрак-бағри ҳамон ўртар».

– Оҳ-оҳ, бунақа ашула учун жонингни бериб юборсанг арзиди, – деди Жалил кўнгил хушлигидан маст бўлиб.

– Жонингни асраб тур, арзийдиган нарсага керак бўлиб колар, – деди Асадбек кесатиб.

Бу киноя ортида «жим кетсанг-чи!» деган маъно яширинганини Жалил англади. Агар ёлғиз ўзлари бўлишганида «сен санъатни тушунармидинг, сен ишқи йўқ эшшак, дарди йўқ кессаксан», дейишдан тийил-маслиги аниқ эди. Ҳозир Муҳиддин ота ҳузурида одоб чегарасига риоя килиб, бундай дея олмади.

– Сен тушунмайсан, бу Отабекнинг ашуласи. Кумуш бибига ошиқ йигитнинг дарди вулқон бўлиб отилиб турибди, – дейиш билан чекланди.

– «Отабекнинг ашуласи» дедингизми? – Мухиддин ота ажабланиб, сұхбатга қүшилди. – Китобда бунақа ашула йўқ-ку?

Жалил «Ўткан кунлар»нинг киносини кўрган эди. Китобини ўқимаганлигини тан олгиси келмай, изоҳ берди:

– Кумуш ҳайдаганидан кейин Отабек бўзахонага киради-ку? Ўша ерда айтилади-да, бу ашула.

– Ажиб... ажиб... – деди Мухиддин ота ўйчан оҳангда. – Аввали шуки, бўтам, Отабекни Кумуш биби ҳайдамаганлар. Дадалари Мирзакарим кутидор ҳайдаганлар. Агар хотирам фаромуш бўлмаган бўлса, деганларки: «Уятсизга манинг уйимдан ўрин йўқ, уятсиз билан сўзлашишка ҳам тоқатим йўқ... Борингиз, манинг эшигим ёнида тўхтамангиз!» – деганлар. Шундан сўнг уста Алимга дуч келиб, унинг уйида мавиз ичадилар, кейин Тошкентга қайтадилар... Тунда мастраласт келганларида Ҳасаналидан дакки эшитадилар, сўнг яна бир Марғилонга борадилар, кейин Оқмачитга бориб-келадилар-да, Чукур қишлоқ бўзахоналарида кўнгилларига таскин излайдилар. Бўзагар у кишимни алоҳида ҳужрага олиб киради, а? Отабек «машшоғингизни ҳам кирғизинг» дейди, машшоқ кириб, «Қандай куйни чалиб берай, бек aka?» – деб сўрайди. «Билсангиз, ҳайдалиш куйини чалингиз, ажралиш куйини чалингиз», – дейилади, адашмадимми?

Ҳамроҳларидан биронтаси ҳам бу китобни кўлга олмаганини билмай туриб, савол бериши ғалат бўлди. Қамалгунига қадар бу китобни қайта-қайта ўқийвериб кариб ёд қилиб олган одамнинг саволга жавоб кутиши ажабланарли эди. Гапни Жалил бошлигани учун савол ҳам унга қаратилди, деб ўйлаган Асадбек ўнғайсизланмади ҳам. «Буларнинг сұхбатига

аралашишга ҳакқим йўқ, менинг вазифам – хизматларини бажариш», деб ҳисоблайдиган Жамшид эса, Муҳиддин отанинг гапларига мутлақо парво қилмади. Жалил эса дарров жавоб беради:

- Худди шу ерда айтади бу ашулани.
- Ажиб... Китобда машшоқ дуторда «Наво» куйини чалиб беради.
- Мен киносини айтяпман, – деди Жалил.
- Киносини кўрмаганман. Китобда айтилишича, «Наво» куйи Отабекнинг ҳасратини сўзлагандек, бўлади. Агар кинода бу ашулани айттиришган бўлса, Отабекнинг ҳасратига мос келмайди.
- Нега?
- Негаки, ашула килинган бу газал дунёвий севги баёни эмас. Бобораҳим Машраб илоҳий ишқни, яъни, Аллоҳга бўлган банданинг ишқини баён қилганлар. Соддарок тушунтирилса, бу «Менинг Раббимга бўлган ишқим шу даражада кучли-ки, бир-бир айтсам, бутун ер юзи ёниб-куйиб, кул бўлади», дегани. Гапга алаҳсиб, охирига дикқат қилмадингиз шекилли, «Агар Машрабда оҳ урсам, Биҳишти жовидон ўрттар» – агар Аллоҳ ишқи кўйида хонумонидан, дунёвий орзуҳавасларидан, ўзлигидан, борингки, бу фоний дунёда Аллоҳдан бошқа барча нарсадан мосуво мард ва фидойи ошиқи девона бир оҳ урса, абадий жаннат ҳам ўртаниб кетаркан.

Уларнинг бир ғазал хусусидаги суҳбатлари давом этаётган паллада иккинчи кўшиқ ҳам охирлаб қолган эди. Жалил Муҳиддин отанинг изоҳларига қаноат қилиб, сукут саклади.

«Гар фалак куйдурса мундог неча кунлар айланиб,
Бул жаҳонда қолмагай ному нишонлар, алвидо.
Нури дийдам, куввати жону дилимсиз, дўстларим,
Ингламоқдин кўзларимдин оқти қонлар, алвидо!
Ҳар на бўлса Машраби бечорадин айланг биҳил,
Хуш каломи булбули боғи жаҳонлар, алвидо!»

Күшик охирлагач, Мухиддин ота енгил хўрси-ниб, ҳасратдан бўғилаёзган кишининг паст овозида деди:

— Раббимнинг меҳрини қозонган валийлар ўтган табаррук жойларда инсон кони тўкилса-я...

Кўшиклар сўнгида ёшларнинг мушоираси бошланди. «Қошу кўзингдан акагинанг айлансин», деган мазмундаги биринчи шеърдан Жалилнинг ғаши келди. «Иккинчиси ҳам шунаقا бачкана бўлса, овозини ўчираман», деган қарорда охиригача чидаб эшилди. Иккинчи шоир шеърини ҳаяжон билан ўқиб, барчаларининг дикқатини тортди:

Деразамдан Ой боқди ярим тунда хонамга,
Юзлари ўхшаб кетди меҳри нурли онамга.
Анча хомуш ва ҳорғин, кўнглим кетди зиркираб,
Киприклари зил ёшни кўтаролмай пирпирап.
«Унутмагин, жон болам, жоним гиргиттон болам!
Найранги, иғвоси кўп, бу талотўп замонни –
Кўриб бағрим хун бўлди, дардли Ўзган томонни...

Жон куйдириб шеърини ўқиёттан шоир гўё бир неча дақика бурун Абдураҳмон табибининг уйида қарияларнинг сұҳбатига гувоҳ бўлган-у, ундаги изтиробларни қаламга олиб, қоғозга туширгандай эди. Жалил ҳаяжонланиб, Мухиддин отага ўгирилиб қараганича шеърнинг давомини эшилди:

Ўшдаги жоҳилликдан тоғлар ранги сомонми?!
Бобур Мирзо қурдирган хужра бутми-омонми?!
Жоним-жаҳоним болам, жоним гиргиттон болам!
Кўзингни оч, билиб ол, яхши билан ёмонни,
Эътиқодсиз – оломон, демак, сўкма замонни.
«Ал қасосул минал ҳак», осмонга от камонни...
Ярим тунда хонамга ўқсиб-ўқсиб Ой боқар,
Табиб оғамнинг руҳи чирқиллаб қанот қоқар...

Охирги сатр барчалари учун кутилмаган бўлди.

— Абдураҳмон табибни айтяптими? — деди Жалил ажабланиб.

— Шунақага ўхшайди, — деди Мухиддин ота мутаассир ҳолда.

— Ақлли бола экан, отасига раҳмат, — деди Жалил.

Бошқа гапга ҳожат қолмаган эди. Радиодаги мушири давом этиб, шоира «бировнинг ёрини олдим омонат», деб шеър бошлагандага Жалил ғашланиб, минфирилаганича радиони шарт ўчириб қўя қолди.

Хуфтон намозини кечаси хатми Куръон қилинган масжидда ўқидилар. Мухиддин ота билан Жалил масжидга кириб кетгандаридага Асадбек «ошнам яна бир галвани бошлаб қолмасайди», деган хавотир билан кутди. Ҳатто «агар яна хатми Куръонни эшитгиси келиб қолса, шу ерга ташлаб кетавераман», деган ҳаёлга ҳам борди. Бахтига, куттани бўлмади. Жалил жимгина чиқиб, машинага жимгина ўтирдн-да, Жамшидга «ҳайдамайсанми, аравангни!» дегандай қараб қўйди.

Асадбек уйига ярим кечада кириб келди. Машина овозини эшитган Манзура шошилганича ҳовлига чиқиб, эрини хушнудлик билан қарши олди. Салом бергач:

— Фазлияхоннинг болалари топилибди! — деб сүюнчилади.

— Келишдими? — деб сўради Асадбек.

— Келишмади. Ишхонангизга қайсиadir шаҳардан кўнғироқ қилишибди. Худога шукур, болалар соғомон экан.

— Энди кўнглинг жойига тушдими? — деди Асадбек уй томон юриб. Бу орада Фазлия хонасидан югуриб чиқиб салом бергач, Асадбекни дуо қила кетди.

— Бўпти, бўпти, дамингизни олинг, менам чарчаб келдим, — деди Асадбек унинг миннатдорлигига жавобан.

Болаларнинг топилганини эшитганда Манзура худди ўғли тирилиб келгандай кувонган, бегона бир

аёлнинг қувонганини курган Фазлияниң кўнгли яна-да чароғон бўлганди. Ҳозир Асадбекниң хушхабарни совуққонлик билан эшигиши уни ҳайрон қолдирди. Асадбекниң феъл-аворидан бехабарлиги учун «Уз-ларининг хизматлари туфайли болаларим топилди, нега эътиборсиз бўлдилар?» – деб ажабланди. «Нега кайфиятлари йўқ?» – дейишдан истиҳола қилиб:

– Чой дамлайми, овқатни иситайми? – деб сўради Манзурадан.

– Дамингизни олаверинг, чой ичгилари келса, ўзим дамлайман.

Манзура шундай деб эрининг изидан ичкари кирди. «Чой ичасизми?» деган саволга Асадбек бош чайқади-да, жавонни очиб билтур қадаҳга конъяк кўйди. Унинг ярим кечада ичадиган одати йўқ эди. Шунинг учун Манзура хавотир билан эрига яқинлашиб, елкасига кафтини кўйди. Аммо «Нима бўлди, нега ичмоқчисиз?» деб сўрашга журъати етмади.

– Мохора қилган эдим, олиб келайми? – деб сўради меҳр билан.

Асадбек нўхот шўрвани яхши кўрарди, лекин бу он ҳеч нима егиси йўқ эди. Қадаҳни бирпас кўтариб турди-да, конъякни ичмай, жойига кўйди. «Чарчадим», деб хобгоҳи томон юрди.

3

Фазлия ўтирган жойида мудраб қолган эди. Аzon товушини эшитиб, уйғониб кетди. Тезгина туриб, таҳорат билан покланди-да, шийпон томон шошилиб, тасбех ўтириб ўтирган Манзуранинг ёнидан жой олди. Аламли ҳаёт осмони остида сабр шарбати билан жон саклаётган бу икки муштипарни бу он четдан кузатган киши опа-сингил деб ўйлаши мумкин эди. Воқеан шундай: Фазлия бу хонадон осто-насини босиб ўтганидан бери Манзура жондан азиз синглисини шафқат билан бағрига босиб, юрак яра-

сига меҳр малҳамини босувчи опа мартабасида эди. Гарчи, тил билан изҳор этиб, опа-сингил тутинишмаган бўлишса-да, бир-бирларини руҳан қовуштирувчи туғишганларга хос меҳр ҳалқаси пайдо бўлганди. Фазлия бу аёл билан танишгунга қадар ўзини дунёдаги энг дардли инсон деб ҳисобларди. Гўё ғамли осмон устуни синган-у, дунё дардлари остида қолиб кетгандай ҳис киларди ўзини.

Дакиқалар, соатлар, кунлар ғилдираги уни аёвсиз равищда босиб, янчайтган эди. Қамоқдалигига болаларини кўриш орзуси билан яшаган бўлса-да, бу орзу ишонч билан кувватланмаган, балки, гумон заҳри билан заҳарланиб турарди. «Болаларимни кўрмай ўлиб кетсан керак», деган фикр ҳам бот-бот уйғониб, ўлимтик юрагидаги сўнгти томирларни бир-бир кесгандай бўларди. Қамоқقا тушгунига қадар бу дунёда қандай номаъкулчилик бўлса барчаси эркакларга хос, бузук гаплар ҳам эркакларнинг тилидангина учади, деб ўйларди. Унинг эри эҳтиётсизлик қурбони бўлди. Ўша ичувчи, ўша қимор ўйновчи, борини ютқизувчи, ҳатто болаларини тикишдан қайтмайдиган аҳмоқни у эр деб биларди. Риоясини киларди. Ютқизмай келса, «Худога шукур», деб кўярди. Баъзан эса, болаларининг луқмасига ҳаром аралаштириб бераётганини фаҳм этмай, эрининг ютиб келганига кувонарди. Шу нодон эрнинг кўнглига қараб яшаш – унинг учун ҳаётнинг ягона қонуни эди, Аллоҳ буюрганига эса эътибор бермасди. Қамоқقا тушгач, эрини ўз қўли билан қасддан ўлдирган ёки қотил ёллаб ўлдиртирган, бу ишидан афсусланиш ўрнига кувонган, ҳатто фахрланувчи хотинларни учратиб ҳангуманг бўлди.

Эрининг ўлимини хоҳламаган эди, қолган умри армон билан ўтади. Агар қўлидаги санчки санчилмай, эри ўзини осган тақдирда ҳам, бу аҳмоқона ўлимнинг олдини ололмагани учун ўзини айблаб яшаган бўларди.

Қамоқхонага арок ёки қорадорининг қандай кириб

келиши унга номаълум, билишга қизиқиб курмаган ҳам, билгани – маст-аласт хотинларнинг бузук ишлари... «Жаҳаннам азобидан қўркинглар», деган гапни, дўзахда олов ёниб туришини эшитган, бироқ бу ҳақда бошқа нарсани билмайди. Билиб олгани – қамоқхона азоби дўзахнидан кам бўлмаса керак. Эркакнинг эркакка зулм қилишини табиий нарсадек қабул қилиш мумкиндири, лекин нафосат олиҳаси сифатида яралган аёлнинг ёмонликлари...

Хотин кишининг зулм бобида ўнта эркакка дарс берса олувини тасаввур этишнинг ўзи даҳшатли ҳол...

Эҳтимол, Аллоҳнинг аёлга бу дунёда раво кўрган энг олий жазоси – уни раҳм-шафқатдан жудо қилганидир?..

У ўлмай туриб кўриб тургани дўзах азобидан эсономон қутулиб қолишига баъзан ишонмасди. Фазлия каби итоаткорлик билан умр кечириб, бир тасодиф билан қамоққа тушганларнинг аҳволи айниқса ачинарли... Эрига бўлган итоати, фарзандларига бўлган меҳр-муҳаббати туфайлимикин балки... Худо уни қамоқ азбларидан кутқарди.

Қамоқхона аҳли фақат эрини ўлдирган қотиллардан иборат эмасди. Бунда дунё юзида мавжуд жиноят турларининг исталган турини учратиш мумкин эди. Ўзларини «адолатсизлик курбони» деб билувчи хотинлар адолатсизликнинг турфа хилини шу ерда намойиш этардилар. Ўғри хотин ўғри билан, товламачи товламачи билан, порахўр порахўр билан тезгина тил топишиб оладиган жойда эрини ўлдирган қотилларнинг жамланишига ажабланишнинг ҳожати йўқ. Маҳкаманинг шафқатсизлик билан чиқарган ҳукмига кўра, Россиянинг совуқ ўрмони бағрига жойлашган қамоқхонага келтирилган Фазлия кўтариб кирган ўрин-кўрпасини тўشاшга улгурмай, сочи устарада олинган, такир бошига дурра ўрамаган хунук хотин унга яқинлашиб, «бу ёққа юр», деб буюрди. Бу камерада ўғриларга нисбатан қотилларнинг мавқеи ба-

ланд бўлгани учун хона тўрини шулар эгаллаган эдилар. Қамоқ оламининг ўзига хос қонунлари, ҳукмлари борлигидан бехабар Фазлия кетма-кет сигарет тутатётган хотинлар тўдасига кўркув билан яқинлашди. Газета парчасидан иборат «дастурхон» устидаги бир шиша ароқ, пиёз, тузлаган бодрингга, сочилиб ётган карталарга кўзи тушиб, боши узра бало булатлари тўпланаётганини ҳис этди. Лабига сигарет қистириб олган хотин, тутун таъсириданми бир кўзини хиёл кисиб, Фазлияга бошдан оёқ разм солди-да, ёнидаги аёлга имлаб кўйди. Даврага хизмат қилаётган аёл пачоқ алюмин кружкага ароқ қуйиб Фазлияга узатди.

– Ич, – деб буюрди лабига сигарет қистирган хотин.

– Мен... ичмайман, – деди Фазлия титрок овозда, кейин изоҳ берди: – ҳечам ичмаганман.

– Олдин ичмаган бўлсанг, энди ичасан, бу ерда Катка-бигизнинг айтгани – қонун, – деди сочини устарада кирдирган хотин.

Ажал тифига рўпара келгандай кўркувдан титрай бошлаган Фазлия кружкани қўлига олиб, лабига теккизди, ароқнинг қўланса ҳидидан кўнгли айниб, қалқиб кетди.

– Ичолмайман... – деди йигламсираб.

– Анаконда, кийнама буни, ол қўлидан, – деб буюрди Катка-бигиз, сочини устарада кирдирган хотинга, кейин Фазлияга «чўк» деб амр қилди.

Фазлиянинг қотиллар даврасига қўшилиши шутарзда бўлди. Денгиз пўртанасидаги ҳаснинг тақдири нима бўларди? «Катка-бигиз» номи билан ҳукм юритувчи хотин Фазлияни қаноти остига олмаганда бу муштипар аёл ҳасдан баттар ҳолга тушарди. Хотинлар Катка-бигизнинг бу марҳаматига тушунишмади. Ҳатто Фазлиянинг ўзи ҳам бундан ажабланди. Бир куни Катка-бигиз иситмалаб, қамоқ дўхтиронасига чиқиши истамай, Фазлияни ишдан олиб қолди. Катка-бигиз оёқка тургунича Фазлия унинг хизматини

қилди. Иситма тушиб, дармонга кира бошлагач, Фазлияга ўзини танитди:

— Келган кунинг ароқ ичмадинг-а? Менинг буйруғимни бажармаган хотиннинг ахволи нима бўлишини кейин кўргандирсан. Ўшанда ичишга зўрламаганимнинг сабабини айтами? Сенларнинг одатларинг менга ёқади: ичмайсанлар, чекмайсанлар, нақ фариштанинг ўзисанлар. Мен бу ерга келмасимдан олдин ҳам ичардим, чекардим. Касбим шунака эди-да... Мен геолог эдим, сенинг юрtingда кўп ишлаганман. Бир куни илон чакиб, ўладиган ҳолга тушдим. Врачга олиб боришгунча ўлишим тайин эди. Базамизга яқин кишлоқда яшайдиган бир кампирга олиб боришид. Мени ўша сақлаб қолди. Уч-тўрт кун уйида ётдим. Ҳамкасларим кўргани келишганда ўлимни енгганимни нишонлаш учун ичиб, чекиб ўтирган эдик, кампир келиб қолди. Мени бу ахволда кўриб, шунақангি бақириб берди-ки, росманасига кўрқиб кетдим. Гапларига тушунмасам ҳам, ичаётганимдан ғазабланганини англашим. Кампир бақириб-бақириб келиб, юзимга бир шапалоқ туширди. Хотин кишининг ароқ ичиши, чекиши гуноҳлигини ўшанда билдим. Бўкиб ичмасдим, лекин тўхтовсиз чекардим. Унисини ҳам, бунисини ҳам ташладим.

Онам билан қизимни соғинган эдим, қишига яқин Ленинградга қайтдим. Илмий иш билан ҳам шуғулланардим. Кутубхонада бир одам билан танишиб, яхши кўриб қолдим. У ҳам севги изҳор қилгач, кичкинагина тўй билан тақдирларимизни боғладик. Ҳисобли севги билан уйланганини мен аҳмоқ билмабман. Бошка шаҳарлардан келганларнинг Ленинградда қўним топиши қийин эди. Кўплари товламачилик қилишиб, ленинградликка уйланарди, иши битгач, ажралишарди. Менинг пешонамга битгани бундан ҳам баттар экан. Бир куни илмий кенгашда ўтирган эдим, кўнглим қандайдир ноҳушликни сезиб, бетоқатланавердим.

Охири, чидолмай, уйга учеб бордим, қарасам, қизим бир ахволда... Ҳали ўн тўртга кирмаган эди қизим бечора... Аблаҳ абллаҳлигини қилибди. Кўзимга қон тўлди, ошхонада чой ичиб ўтирган экан, қўлимга илинган нарса билан уравердим... уравердим... Қўлимга бигиз илинган экан, шунинг учун «Катка-бигиз» деган ном олдим. «Геология фанлари доктори, профессор Екатерина Сафина» деган мартаба билан кенгашларнинг раёсатида ўтириш ўрнига «Катка-бигиз» номини олиб бу сассиқ хоналарда ётиб юрибман. Фазли, энди мен бу ердан чиқмайман. Озод ҳаёт менга ҳаром. Аблаҳни ўлдирганимдан мутлақо афсусланмайман. Агар вақт ортга қайтса, уни яна бундан баттарроқ қийнаб ўлдирадим. Эрга текканим учун ўзимни ўзим кечира олмайман, энди қизимнинг кўзига қарай олмайман. Онам билан қизим кўргани келишганда чиқмадим. Уларга хат ҳам ёзмайман. Мени унутишсин, дейман, қарғаб-қарғаб, лъяннатлаб-лъяннатлаб унутишсин, дейман. Ичим ёнган пайтда аламимни бу ердаги хотинлардан оламан. Анаконданинг баъзан ваҳшийлашиб кетиши ҳам бесабаб эмас. Сен билмайсан, бузукликнинг турлари кўпайиб кетган. Аҳмоқ эрга битта хотин кам, битта ўйнаш ҳам етарли эмас. Ҳафтада ё ойда алмаштириб турмаса, кўнгли ўрнига тушмайдиган бузуклар кўпайиб кетган. Анаконданинг эри шунаقا тоифадан экан. Қўл-оёқларини каравотига боғлатиб, майшат қиларкан. Анаконда шунаقا майшатнинг устидан чиқиб қолибди. Эрини камар билан савалайверибди, савалайверибди... Жони тошдан экан, ўлмабди у абллаҳ, лекин хотинни етти йилга қамаворишибди. Шу ҳам адолатми? Оилани бузган бузук хотин билан бузук эрга гард ҳам юқмайди. Но-муси булғанган хотинни эса қамоққа тикишади. Анаконда эрини мажруҳ қилиб кўйганидан армонда эмас, ўлдира олмаганидан афсусланади. Хатосини қамоқдан чиққанидан кейин тузатишга аҳд қилган. «Эrimни ўлдирмагунимча шундай юраман», деган аҳдининг

қатъийлигини билдириш учун сочини қирдириб ташлаган.

Катка-бигиз дардини шу тарзда баён қилган эди. Номуси булғанган аёл қалбининг нечоғли қонсирашини Фазлия бу хикоядан сўнг бир оз англагандай бўлди. Катка-бигиз «сенинг юртингни яхши кўриб қолганман», деб Фазлияни қанотига олган эди. Бир куни яна бошқа армонини айтди:

– Газли атрофида юрганимизда бир ўзбек ишчи менга ошиқ бўлиб қолган эди. Менинг ҳам кўнглимда илиқлик бор эди, лекин аҳмоқлик қилдим, «маст-аласт ётувчи исқирт бўлса ҳам, ўзимнинг миллатимга тегаман», дедим. Худо мени бундан баттарроғига рўпара қилди. Ўша ишчига текканимда бунақа кўргиликлар йўқ эди. Фазли, эшитгандирсан, мени этапга тайёрлаб қўйишди. Ишимда ҳам қўним йўқ эди, камоқда ҳам бир жойда ўтирамайман. Сени Анакондага топшириб кетаман, кўзингдан ёш оқизмай яша. Ақлинг бўлса, бошқа эрга тегма. Эрсираб қолган тақдирингда ҳам чида, ҳеч бўлмаса, қизларингни узатиб юборгунингча чида, кейин кимга тегсанг тегавер.

Фазлия эрга тегишини хаёлига ҳам келтирмаётган эди. Шу сабабли Катка-бигизнинг армонли овозда айтган насиҳатини эътиборсиз тинглади. Унинг болалари дийдорига етишдан ўзга умиди йўқ эди. У болаларига интиларди, Катка-бигиз эса қизи билан учрашувдан қочарди. Икки хотиннинг ҳаёти дарёнинг икки соҳили каби айри-айри: бир соҳил жаннат боғларига, иккинчиси дўзах оташида куя бошлаган такир чўлга туташ эди.

Қамоқдан чиқиб, Асадбекнинг ёрдамига умид қилган ондан бошлаб, соат миллари янада секинлик билан ҳаракат қиласади гўё. «Кутиш азобига юрагим чидолмай ёрилиб кетса-я!» деб қўрқарди. «Улиб қолсам, болаларимнинг қисмати нима бўлади?» деган ўй уйғонса, баданини музлатиб юборади. Эшик тиқ этса, кимнингдир суюнчилаб кириб келишини

кутади, телефон жириңгласа, хүшхабар етказилишига умид килади. У қишлоғида Тарзан билан Ахтамни күрганидан сүнг уларнинг нима ишлар билан шуғулланганларини билмайди. Болаларнинг изини топиб, Барнаулга кетгандаридан ҳам бехабар. Болалар қай йўсинга изланаётгани ҳатто Манзурага ҳам маълум эмас. Бирон умидли хабар эшитиш истагида эрининг кўзига боқади. Асадбек бу қарашлардаги савол аломатини фаҳмласа ҳам, индамайди. Хотини саволни тилига чиқарганда ҳам «ишиңг бўлмасин» ёки «хүшхабар бўлса эшитарсан», деган тўмтоқ жавобдан бошқа гап эшитмаслиги аниқ эди. Жон олғувчи айрилиқ заҳрининг нечоғлик азоб бериши Асадбек учун бегона бўлмаса-да, хонадонидаги бу икки аёлнинг дардига у шерик бўла олмас эди. Фазлия ва Манзурага насиб этилган сабр ва шукурдан у анча нари эди. Бунинг ўрнига нафрат ва қасос ўти берилган эди унга. Бу борада унга қизи Зайнаб яқин эди.

Фазлияниң тевараги қоронғи, осмони ҳам қоронғи эди. Олачалпок булутлар орасидан дам-бадам кўриниб қоладиган хира юлдуз бу қораликларни ҳайдай олмагани каби умид юлдузи унга ҳаёт нашъасини бера олмас эди.

Манзура эридан ҳар куни, ҳатто ҳар соатда қандай хүшхабар кутса, Фазлия ундан ҳар нафасда кутади. Манзура бу муштипарнинг қарашларидаги мунгли умид учқунига дош беролмаган кезлари «яна озгина сабр килинг, синглим, Худонинг Ўзи меҳрибон», деб овутишдан ўзга чораси бўлмасди.

Ярим тунда юраги қафасдаги қуш каби потирлаб, Фазлия уйғониб кетди. Ўзининг уйида бўлганида ҳовлига чиқиб айланган бўларди. Бировнинг хонадонида, яна кундузгидай ёп-ёруғ ҳовлида бир ўзи юра олармиди... Қамоқхонада ҳам шундай бўларди. Уйқуси ўчиб, нафаси қайтарди, юраги потирлаб, жон озодлик истаб беҳаловат бўларди. Жоннинг озодликка чиқиши нима экани эса маълум...

Нақш билан безатилған шипга тикилиб ётишдан үзга чораси йўқ...

Кимлардир ана шунақа безакларни ёқтиради, солаб тикилиши, завқланиши ҳам мумкин. Қайсиdir уй эгалари эса завқланишмайди, безакли уйларини кўз-кўз қилиб мақтанишни ёқтиришади. Асадбек ҳам, Манзура ҳам бу тоифадан эмас, уйни безатиш Кесак-полвоннинг кўрсатмаси билан бўлган.

Фазлияning ота уйи томига қамиш ёпилган эди. Шипга ёпиштирилган қоғознинг вазифаси хонага чирой бериш эмас, балки томдан ёғиладиган чанг-ғуборни ушлаб қолиш эди. Баъзан қоғоз устида сичқонлар югургилаб қолишарди. Ёмғир ёккан кезлари чакка ўтиб ивиган қоғоз тешилиб, сичқон пастга тушиб кетарди. Бир марта Фазлияning косасига тушганда ҳамма маза қилиб кулган эди. Аввалига озгинагина кўрқкан Фазлия ҳам уларга қўшилиб мириқиб кулган, эртасига синфдошларига айтиб бериб, уларни ҳам кулдирган эди. Камбағал яшар эдилар-у, аммо ғамлари йўқ эди. Аксинча, ўзларига хос баҳтли кунлари кўп бўларди. Қозонга гўшт тушса – хурсандчилик, янги калиш олиб берилса – баҳтиёрлик... Тоғаси эски телевизорини совға қилган куни ҳақиқий тўй кувончи ҳукмрон бўлган эди. Бунака серҳашам, безакли, данғиллама уйлар мавжудлигини орзу қилиш у ёқда турсин, тасаввур ҳам эта олишмасди. Фазлия бу уй соҳибларини энг баҳтиёр одамлар деб ўйлаган эди. Бу хонадонда яшаб, уларнинг чехрасида саодат офтоби нурини кўрмади. Ҳозир безакли шипга қараб ётиб, яна шуни ўйлади. «Серҳашам уйда серташвиш яшагандан кўра, қамиштомли уйда баҳтли ҳаёт кечириш минг марта афзал», деган тўхтамга келди. Бир томонига қишлиқ хашак, иккинчи томонига ғўзапоя бостирилган бостирмасини, атрофи чала ўралган, шамол ғувиллаб турадиган ошхонасини қўмсади. Бу уйда неча кундан бери яшаётган бўлса, шаҳарликлар «кулайлик» деб атайдиган ҳашамларга ҳаваси кел-

мади. «Менинг ошхонам ҳам шундай бўлсайди», деб орзу қилмади. «Меникида ҳам шунақа ҳаммом бўлса эди», деган ўй хаёлига ҳам келмади.

Кундузи Афрузаникига бориб келган Манзура Фазлияга китобча бериб: «Ажойиб китоб экан, биттасини сизга атаб олдим, ўқирсиз», деган эди. Ҳадеб шифтга тикилиб ётаверишдан безиб, чирокни ёқди-да, китобни қўлига олди.

«Эй Одам фарзанди, фақирликдан бўлган хавфинг дўзахдан бўладиган хавфни дилингдан чиқариб юборади», деган Худонинг гапини ўқиб, «Буниси менга тегишли эмас, камбағалликдан кўрқмайман. Одам бир нарсасини йўқотишдан кўрқади, мен нимани йўқотаман?» – деб ўйлади. Шу хаёл оғушида ўкишни давом эттириди:

«Дунё ишларида қилинадиган кўп ва узоқ орзу-ҳаваслар охират ишларини қилишдан тўсиб кўяди, дунё молига муҳаббат Менинг муҳаббатимни дилингдан чиқаради...»

«Бунинг ҳам менга алоқаси йўқ, – деб ўзича хулоса ясади Фазлия. – Охират ишларини тўсиб кўядиган орзу ҳаваслардан узоқман. Битта-ю битта орзуим – болаларимни бағримга босиш. Ўзим бир тишлам нонга зор бўлсан ҳам майли, болажонларимнинг дийдорига тўйсам бас...»

«Мендан бошқадан иззат исташ Менинг назар-раҳматимдан сени йироқлаштиради...»

Аллоҳнинг бу каломи Фазлияни бир сескантириди. Кейин ўзини оқламоқчи бўлди:

«Мен булардан иззат истамадим, ёрдам сўраб келдим...»

«Менга ибодат қилувчиларни дўст тутишинг Менинг сенга бўлган муҳаббатимни яқин қиласди ва Мени ёмон кўриб ибодат қилмайдиган кишиларни ёмон кўришинг сени балолардан аритади...»

«Эй Худойим, бу амринг борлигини билмасам ҳам, Сенга ибодат қилувчига яқинлашдим, ёмон-

лардан ҳамиша нафратланганман, энди балоларни кўтаришингта умид қилиб яшяпман. Марҳаматингга эришиш учун яна қанча яшай? Болаларимни кўриш учун ҳар қандай азобга чидашга тайёрман. Менга яна қанча азоб тайёrlаб кўйгансан, майли, бошимга кулфат тошларини аямай ёғдиравер. Дўлдан кейин барибир булат тарқайди-ку? Бошим устидан ари-маётган булатлар қачон тарқайди, офтобим қачон чараклайди?»

Қўлда китоб, кўзда ёш билан узоқ ўтирди.

Ўтирган жойида уйқу элитдими ё кўзига эрининг арвоҳи кўриндими – аниқ билмайди. Ҳархолда эрини яна ўша аҳволда кўрди: кийимлари титилиб кетган, бўғзи қонталаш... Қамоқхонадаги биринчи тунда кўрганида санчқи санчилган бўғзидан қон отилиб турарди, кейин кўрганларида яра қотган эди... Тушида неча марта кўрган бўлса, эри ҳар сафар юм-юм йиғлаб, «Фазли, қийналиб кетдим, мени ўлдира қол, азоблардан қутқаргин», деб ялинарди. Фазлия уйғонганида «тушимнинг маъноси нима экан», деб ўйланарди. Қамоқдалигида бир лўли хотин фол очиб, «Эрингдан рози бўлмагунингча у нариги дунёда қийналаверади», деган эди. Тилида рози бўлди, лекин ризоликни дилига жойлай олмади.

Ҳозир эса...

Ҳали ҳам жулдур кийимда...

Ҳали ҳам бўғзи қонталаш...

Фақат... катта йўлдамиш. Йўлга ёнғоқларни сочиб ташлаганмиш.

Кейин ёнғоқларни бир-бир теришни бошлади...

– Нима қиляпсиз? – деб ажабланди Фазлия.

– Аҳмоқлик қилиб сочиб юборибман. Машиналар босиб, янчиб ташламасидан йиғиб олай...

Фазлия унинг ёнига тушиб, биргаликда ёнғоқларни тераверди-тераверди. Ҳориб-чарчаб, кора терга ботди. Қаддини кўтариб қараса, эри йўқмиш. Ёнғоқлар терилиб, учта қопга жойланганмиш. «Фазли, ёнғоқларни

уйга олиб бориб қўй, бирорга берма», деган овоз келгач, атрофга аланглаб, эрини ахтарди...

Шу онда азон товуши эшитилиб, қўзларини очди.

Бомдод намозини ўқиб бўлишгач, Фазлия нонушта тайёрлашга уннади. Манзура шийпонда қолиб, қулига китоб олди. Афрузанинг насиҳатига кўра, ҳар тонг намоздан сўнг китоб ўқишни одат килган эди. Фазлия бу хонадонда ўзини чўри деб билгани учун уй бекаси билан бир дастурхон атрофида ўтиришдан ийманарди. Манзура эса уни меҳмон, ҳатто сингил ўрнида кўргани сабабли ёнидан жой олишини истарди. Кун ўтган сайин Фазлияга ўрганиб борар, ҳатто «болалари топилиб, уйига кетса, яна ёлғиз қоламанми?» деган хавотирда юраги эзиларди.

Иштаҳаси йўқ икки аёлнинг нонуштаси нима бўларди? Бир пиёладан чой, бир бурдадан нон... Иситилган шавлага қўл ҳам узатилмади, қаймок тўла пиёлага қараб ҳам кўйилмади. Дастурхонга шукронда дуоси ўқилгач, неъматларнинг барчаси болохонадаги йигитларга узатилди. Ўн-ўн беш дақиқадан сўнг йигитлардан бири бўшаган идишларни олиб тушиб, раҳмат айтди. Манзура яна бир оз китоб ўқиган бўлди-да, Афруза билан сұхбатлашгиси келиб, йўлга отланди.

Афруза кимникигadir мавлуд ўқигани кетган экан, пойлаб ўтирмай, тезгина изига қайтди. Дарвозадан кираверишда уни йигитлардан бири қаршилаб, хушхабарни айтди. Болаларнинг топилганидан кувонган Манзура бу жонбахш хабарни Фазлияга етказишга шошилди.

«Болалар топилибди!»

Икки сўздан иборат бу хабар Фазлиянинг ўлаёзган рухи учун айнул-ҳаёт эди.

«Қаерда экан? Қачон келишади?»

Бу саволларга жавоб йўқ эди. Демак, интиқ кутиш охирига етмабди. Хабарнинг келгани ҳам бир баҳт, лекин болаларни бағрига босиш саодати ўзгача...

У фарзандларини нажот умиди билан кутди. Аллоҳ бу муштипарни умиди учун гўзал мукофот берди. Шундай экан, қирқига чидаганинг қирқ бирига чидашдан ўзга чораси йўқ. «Ал-муриду ятлубу вал-муроду яхрабу» – хоҳловчи мурид талаб қиласи, муроду мақсад эса қочади, деганлари балки шунинг ўзидир?..

Фазлияning юрак дукури босилмай туриб, телефон жиринглади. Гўшакни қулоғига тутган Манзурага Тарзан яхши таниш бўлмагани сабабли овози ҳам бегона эди. Шу боис унинг нима деяёттанини аввалига тушунмади. «Бек акамнинг топширикларини бажардик, болаларнинг онаси шу ерда бўлса, ўғли билан гаплашиб олиши мумкин», деган гапдан кейин шошиб қолди.

– Фазлияхон, тез келинг, ўғлингиз чақиряпти, – деди ҳаяжон билан.

Уғлингиз чақиряпти?!

Фазлия қулоқларига ишонмай, «Меними?» деб юборганини ўзи ҳам сезмади. Кейин югуриб келиб, гўшакка ёпишди. Фурқатнинг раста бўлган овозини танимади. Фурқат «Аяжон! Аяжон!» деб уч-тўрт марта тақрорлагач, кувончдан ҳаприқиб кетган юраги гўё тўхтаб қолгандай туюлиб, ҳушидан кетишига оз қолди. Кўз олди қорайиб, ўзи чайқала бошлаган Фазлияни Манзура маҳкам кучоқлаб олди.

XIV б о б

1

Барнаулдаги почтахонага аввал Ахтамнинг ўзи кириб, хожасининг уйига кўнғироқ қиласи. Болохонадаги йигитдан «Хўжайин сафарда, кеннайим қаёққадир кетдилар», деган жавобни эшитиб, топшириқ бажарилганини маълум қилиб қўйишни тайинлади. Кўчага

чикқач, машинада ўтирган Тарзани имлаб чакирдида:

— Болаларнинг онаси хўжайнинида экан, ўғлини телефонга олиб кириб гаплашиб чиқларинг, — деди.

— Шартми? — деди Тарзан малоллик билан. — Учтўрт соатдан кейин етиб борамиз-ку?

— Учтўрт соатдан кейин бормайсан. «Учтўрт кундан кейин етиб борамиз», деб онасини тинчитиб кўй.

— Нега?

— Негалигини кейин биласан, — деб гапни калта қилди-да, машинага яқинлашиб, эшикни очди: — Фурқат, туш, аканг билан почтага кириб чик.

Фурқат мутелик билан машинадан тушиб, Тарзанга эргашди. Фазлия болалари билан учрашувни канчалик изтироб билан кутган бўлса, Фурқатнинг изтиробли соғинчи унивидан кам эмасди. Қиморбозлар кўлидан қачон ва қандай килиб кутулиб чиқишини билмасди. Агар бир ўзи бўлганида қочишнинг йўлини киларди. Сингилларини ташлаб, қаерга қоссин? Отада бўлмаган виждон шу болада мавжуд эди. Сингиллари тақдирига бефарқ қарашнинг нақадар пасткашлик эканини унинг онги фаҳм этарди. Бу кеч ертўла қопқоғи очилиб, нажот сўзларини эшигандан ҳам, юқорига чиқиб, шахмат доналарини тераётганида ҳам қутилиб кетишига ишончи йўқ эди. Назарида Фима барчадан кучли, барчанинг пачагини чиқариб юбора оладиган курдатга эга эди.

Шаҳарга қайтиб, телефонда онасининг овозини эшигчач, «Аяжон! Аяжон!» дейишдан бўлак сўз айта олмади. Фазлияning «каердасизлар, қачон келасизлар?» деган саволини эшигтан Тарзан гўшакни кўлига олиб, унга жавоб берди:

— Учтўрт кундан кейин борамиз.

— Нега учтўрт кундан кейин?

Бу саволга жавобни Тарзанинг ўзи ҳам билмас эди, шу сабабли гапни мавҳум қилди:

— Шароит шунақа.
— Ўзингиз кимсиз?
— Қишлоғингизда күришган эдик, эсингиздами?
Сиз хавотир олманг, қизларингиз ҳам соппа-соғ, эртага яна қўнғироқ қиласиз, ҳозир вактимиз зик.

Шундай деб гўшакни жойига илди-да, Фурқатнинг елкасига кафтини кўйди.

Аэропортга боришгач, Ахтам ичкари кириб, қила-диган ишлари режасини пишишиб чиқди-да, Тарзани бир четга имлаб чақирди.

— Тошкентга самолёт икки кундан кейин учади. Бу ерда икки кун пойлай олмаймиз. Учта йўналишга бир хилда чипта оламиз, рўйхатдан ўтқизамизу-у, лекин учмаймиз. Икки соатдан кейин Олмаотага поезд жўнайди. Сенлар ўшандада кетасанлар. Мен Краснояр орқали учиб, сенларни Олмаотада кутиб оламан.

Ахтам режасини буйруқ оҳангода баён қилган бўлса-да, Тарзан эътиroz билдириди:

— Жуда-а ошириб юбормаяпсанми? Самолётда учаверамиз.

— Каллангни ишлатсанг-чи! — деди Ахтам жеркиб. — Фима бизларни менсимай янглишганини тушуниб олган. Болаларни олиб кетганимизга чидаши мумкин-у, лекин пулдан айрилганига чидолмайди. Ертўладан қутулиши билан бор пулларини сочиб бўлса ҳам, хатосини тузатишга уринади. Сен кимлар билан олишаётганингни ҳали ҳам тушунмабсан.

— Хўп, бунисига энди тушундим, лекин Красноярга нега учмоқчисан, бирга кетаверсанг бўлмайдими?

— Тўғрисини айтами? Онамни зиёрат қилмоқчиман. Бек аканг «ўлиги ёлғиз ётмасин, хилхонангга олиб келиб кўм», деган эди, йўлинни килсан, балки олиб кетарман.

Бу гапдан кейин Тарзан бошқа эътиroz билдиримади. Амра бўйсуниб, машина сари юрганида Ахтам қўшимча қилди:

— Агар Фима улгурса, икки кундан кейин Бек

акангнинг қозихонасида ўтирган бўлади. Шуни ҳам ҳисобга олгин-у, пулларини ишлатиб қўйма.

Тарзан «хе, пулини ҳам, ўзини ҳам...» деб мин-ғирлаб сўкиниб қўйди-да, машина томон юрди.

Краснояр орқали учишига Ахтамнинг зиёратдан кўра муҳимроқ бошқа маҳфий мақсади бор эди. У Тошкентта олдинроқ бориб, Тарзан йўқлигига отасига аталган жазони амалга ошириши шарт эди. Асадбекнинг «канави сўтакка яқинлашма, унинг менга керакли томонлари бор», деб огоҳлантиришини унутмаган, лекин хожасининг буйруғидан кўра, онасининг васияти унинг учун қадрлироқ эди.

«Уч йўналишга чипта олиб, Фимани чалғитамиз», деб Тарзанни алдади. Шерикларини кузатди-ю, ўзи Красноярга учди. Бироқ, онасининг қабрини зиёрат килишга вақт йўқ эди. Бир самолётдан тушиб, иккинчисига чипта олишга, Тошкентта кўнғироқ қилиб, эски ошнасига топшириқ беришга улгурди, холос. Оқшомда Тошкентга учиб келиб, тўғри «Зўр»ни кига йўл олди. Сибирда ўпкасини совукқа олдириб, силга йўликкан «Зўр» қамоқдан чиққач, қасос олишга ҳаракат ҳам қилмай, Ахтамнинг ишлари яхши кетаётганини билиб, унга тобе бўла қолган эди. Тарзан «Зўр»ни ёқтирмас, айниқса, у йўтала бошлагандан юзини намойишкорона буриб, бурнини жийирарди. «Шу исқиртингни йўқот!» деб талаб қилганида «мен шерикларимга хиёнат қилмайман, агар пешонамга сил бўлиб ўлиш ёзилган бўлса, сен – «пок» боладан эмас, шу исқиртдан юқишини хоҳдайман», деган кескин жавобни эшитганди. Асадбекнинг қаноти остига ўтишгач, Ахтам «Зўр»ни бу томон чорламаган, аммо кўкрагидан нари итармаган ҳам эди. «Зўр» ва яна тўрт йигит, Ахтамнинг хоҳишига кўра, панада пайт пой-лайдиган шерик сифатида иш юритаётганди. Ахтам Барнаулга отланганида «бир хунасини боплаб адабини бериш» режасини «Зўр»га юзаки равищда маълум қилган, беш-олтита каламуш топишни, қабристонга

бориб, битта қаровсиз гүрни очтириб, ўликнинг сужларини чиқариб қўйишни топширган эди.

«Зўр» топшириқлар «юз фоиз» адо этилганини маълум қилгач, Ахтам икки йигитни олиб қолиб, биттасини қабристонга жўнатди-да, режасини амалга оширишга шошилди. Бу тун қасос шарбатидан лаззатланишни, эртасига эса худди ҳеч қандай фожиа содир бўлмагандай, хожасига рўпара келишни мўлжаллаган эди.

Биринчи учрашувда бадбаҳт отасига жазо бермай, бошқа гуноҳкорларни ҳам топишни ўйлаган эди. Маҳкама жараёнида «шу хотин ўғри, давлат мулкини талон-тарож қилган», деб ёлғон гувоҳлик берганлардан бирини топгач, бу аҳдидан воз кечди.

Барнаулга отланмасидан аввал гувоҳлардан бирининг дарагини топиб, қариялар уйига борди. Офтобга орқасини қилиб ўтирганича нимадир тўқиётган кампир унинг кимни сўраб келганини билиб, «хайрият-е, бу шумкампирни йўқлаб келадиган инсофли одам ҳам бор экан-а», деб минғирлаб кўйди-ю, Ахтамнинг бўш келганидан ажабланди. «Иккита нон кимни ўлдирибди, шунақаям хасис бўладими», дегандай чиимирилиб кўйди-да, ичкарига бошлади. Бир хона эшигини очиб, бурнини жийирди:

– Оббо... яна боплабти, шумкампир, кираверасизми ё тозалашгунича кутасизми? – деб сўради.

Ичкаридан уфурган қўланса ҳид Ахтамнинг димоғига урилиб, «тозаланглар», деди-да, орқасига қайтди. Кампир фаррошнинг «вазифасини эслатиб» қўйгач, Ахтамга эргашиб ҳовлига чиқди.

– Кимингиз бўлади, бу хотин? – деб сўради дабдурустдан.

Унинг муомаласи Ахтамнинг ғашини келтирди:

– Ўлиб кетган катта поччамнинг таниши, – деди пичинг билан. Хотин гап оҳангига парво қилмай деди:

– «Битта ўғлим бор», дер эди, сизни ўша бемехр деб ўйлабман.

«Онам тирик бўлганида уни бунақа жойга ташлаб қўймай, бошимга кўтариб юрардим»...

Ахтам шундай деб ўйлади-ю, хотин билан гаплашгиси келмай, юзини бурди. Кампир эса гапларини эшигадиган тайёр қулоқ борлигидан қувонибми, гапни давом эттириди:

– «Шумкампир» деганимга ажабланманг. Жағи тинмайди унинг, иғводан бўшамайди. Бир тийин устида юз думалайди. Тагини тозалаб қўядиган санитарга ўн тийин бериб қўйиш у ёқда турсин, «Сенларнинг вазифаларинг бу» деб раҳмат ҳам айтмайди. Шу кампир ўлса, ҳаммага байрам бўлиб кетса керак. Умри давлатни шилиш билан ўтган, ўлигини ҳам давлат ҳисобидан кўмишади. Неча йилдан бери шу ерда ётибди, ит ҳам, бит ҳам хабар олмайди. «Бечорагина» дегим келади-ю, тилим бормайди. Кўргуликлари феълига яраша-да! Мен унинг яп-янги машиналарда керилиб юрганини кўп кўрганман. Ўзи бир дўконда ишларди-ю, димоғи министрницидан баланд эди. Унча-мунча одамни менсимасди. Бойлигига тўнқаярди-да! Нукул «ўғлим bemexр чиқди», деб минғирлайди. Ёшлигига тарала-бедод билан овора бўлиб, кичкина боласига меҳр бермаганидан кейин энди нимага дод дейди? Олдин болангни меҳр билан тарбиялагин-да, кейин ундан оқибат тила. Гапларим тўғрими?

Она меҳри нималигини билмай ўсган Ахтам нима десин? Агар онасининг ўлими ҳақидаги хабар ёлғон бўлиб, ҳозир уни топса, «меҳр кўрмаганман», деб шунақа жойга ташлайдими? Йўқ! Буни ўйлашнинг ўзиёқ вужудини титратиб юборди.

– Ўзингиз нима қилиб юрибсиз бу ерда, сизнинг ўғлингиз ҳам bemexрми? – деди совуқ оҳангда.

– Афсуски, Худо менга ўғил бермаган. Ўғлим бўлганида мени бунақа хорлаб қўймасди. Қизим бор. Ҳафтада бир хабар олиб туради. Ўлсам, олиб чиқиб кўмади. Куёвим ҳам яхши бола. Фақат... бирга тургим келмади. Яхши бўлгани билан номи «куёв»-

да. Биласиз-ку, йигитлар ичкуёв бўлишдан но-
мус қилишади, шунга ўхшаб, менам куёвимга юк
бўлишни хоҳламадим-да. Пешонам шунаقا экан, нима
килай? Уруш пайтида етимхонада «мени бирон яқин
кариндошим келиб олиб кетармикин», деб дарвозага
кўз тикиб кун ўтказардим. Ҳозир олиб кетишларини
хоҳламасам ҳам, барибир, йўлга қарайман. Бу ердаги-
ларнинг ҳаммаси умид билан йўл пойлайди. Кетиш-
ни истаганлар кўп, лекин олиб кетишни хоҳловчи ин-
софлилар йўқ. Ноинсофларнинг қисмати нима бўлади,
биласизми? Улар ҳам қариганларида шунаقا жойда
мўлтиллаб яшайдилар.

Фаррош чиқиб, хона тозаланганини маълум қилгач,
кампир яна ичкарига йўл бошламоқчи эди, Ахтам:
«Сиз овора бўлманг, ўзим кираман, пайғоғингизни
тўқийверинг», деб тўхтатди. Кампир «пайпоқ эмас, не-
варамга жемпер тўқияпман, нариги ҳафтада туғилган
куни», деб жавраганича қолди.

Фаррош тозалаб, дераза дарчасини очиб қўйгани
билан хона деворларига сингиб кетган қўланса ҳид
тарқамаган эди. Ичкарига кирган Ахтамнинг кўнгли
айниди. «Бу кампирни Худо уриб қўйибди-ю, нима-
ни гаплашаман?» – деган ўйда орқасига қайтмоқчи
ҳам бўлди. Фаррош «сизни бирор сўраб келди», деб
огоҳлантиргани учун кампир эшикка кўз тикиб ётган
эди. Ахтам остона ҳатлаши билан у кексаларга хос
майин ва мулойим овозда эмас, қўрслик билан:

– Кимсан? Сенга нима керак? – деб сўради.

Унинг дағал овозини эшитган Ахтам «бекорга
«шумкампир» дейишмас экан», деб ўйлаб, саволга
яраша жавоб қилди:

– Мен сиз қаматиб юборган Рихсиянинг ўғлимани,
эсингиздами?

– Рихсиянинг ўғли йўқ эди.

– Мен қамоқда туғилганман. Онамни қаматганинг
эсингдами?

Нотаниш йигитнинг сенсирашга ўтиб, отнинг кал-

ласидай гунохни зиммасига қўйиши кампирни саросимага солди. Аввалги шашти қайтди:

– Рихсияни мен қаматмаганман, паразит Данияр қаматган.

– Ёлғон гувоҳлик берганинг-чи?

– Паразит Данияр талаб қилган, гувоҳликка ўтмасанг, ўзинг қамаласан, деб кўркитган. Онанг ўша паразитни жуда-жуда яхши кўтарди. Камомадда айби йўқ. Бир сўм олган бўлса ҳам, ўзи емаган, паразит совурган. Амал оламан, деб хўжайнларга роса пахта қўярди. Онангни севаман, дерди-ю, ўзи бошқалар билан майшат қиласади. Рихсияни туғишган синглимдек кўярдим. Мен уларга уйимдан жой берган эдим. Онангнинг мендан қарзи қолган.

– Қарзи? Туғишган сингилдек бўлган хотин сиздан қарзмиди?

– Ҳа. Бир ишини тўғрилаб берганимда фойданинг ярмисини ваъда қилган эди, қамалиб қолиб, топганини ўзи еб кетди. Қамоқдан кутулиб чиққанида бе-пар, девдим, қораси ўчди. Ўн икки йил беришган эди, аллақачон чиққандир, қарзларини тўламай қаёкларда беркиниб юрибди?

– Қамоққа тиққанларингдан кейин... тўртинчи или ўлган, – деди Ахтам газаб билан. Кейин ёнидан пул чиқарди-да, иккита юз сўмликни унинг кўрпаси устига ташлади. – Қарзингни олиб қўй, ўлганингда кепрак бўлиб қолади.

Кампир қоқсуяк қўллари билан пулни ғижимлаб олиб, Ахтамга нурсиз кўзларини қадади:

– Бунинг кам, – деди ютиниб.

Ахтам чўнтағидаги пулларни олиб «Ма, тўй!» деб унинг оғзига тиқмоқчи бўлди. Лекин ночор кампир билан пачакилашгиси келмади. «Бундай одамнинг ётоғи гўр, либоси дўзах алангаси бўлиши керак», деганларидек, ортиқча гапга ҳожат йўқ эди. Ахтам соғинган кўнгил ҳузурига ета олмаганидан ғашланиб, шарт бурилди-ю, чиқиб кетди.

Жазо бериш учун Дониёрни уйидан олиб чикиш йулини ўйлаб топиш, ҳийла ишлатиш шарт эмас эди. Тун яримлаганда «Зўр» битта шериги билан унинг уйига бостириб кирди. Сароймонанд ҳайҳотдай уйда уч киши, ҳар бири алоҳида-алоҳида хонада яшарди. Эр хотиннинг бу уйга келин тушириш, набиралар шодон қийқириқларини эштиш умиди ҳануз сароблиги-ча қолаётганди. Дониёр ўғлининг уйланмай юришини кораласа-да, оила қуришга купам зўрламасди. Хотини тўй ҳакида гап очавергач, бир куни: «келин тушираман, орзу-ҳавас кўраман, деб хархаша қиласанлар-у, чилласи чиқмай, ғидинг-бидингларингни бошлайсанлар, келин йўғида мазза қилиб яшаб олсанг-чи!» – деб кайириб ташлаган эди. Эрининг суюқоёклигидан, ўғлининг саёқ юришидан безиб, асаби ҳасталанган хотин уйқусизликни енгиш учун ётишдан олдин дори ичишни одат қилган эди. Зўравонлар кириб, шира-кайф ҳолича ухлаб ётган Дониёрни таппа босишганини, унинг кўлларини боғлаб, оғзига латта тиқиб судраганча олиб чикиб кетганларини хотин билмай қолди. «Зўр» у ётган хона эшигини қия очиб, енгил хуррак овозини эшитгач, хотиржам равишда кетмоқчи бўлди. Кейин фикри ўзгариб, хонага кирди-да, уйкудаги хотиннинг бошига бир мушт уриб, қўл-оёқларини боғлаб, оғзига латта тиқиб, кўнгли хотиржам бўлди.

Дониёрни шаҳар четидаги қабристонга олиб боришиди. Ахтамнинг топшириғига кўра, ташландик бир гўр очилиб, одам суяклари олиб қўйилган эди. Тўлин ой нурида қабристон кўркинчли, айни дамда сирли кўринишни олган эди. Дониёр бу жойга ёлғиз ўзи келиб қолса, бир нафас туришга ҳам юраги дов бермаган бўларди. Одам суятига кўзи тушгач, кўпчилик курсовида туришига қарамай, кўркувдан тили қотиб колгандай туюлди.

– Идорангда мен билан гаплашгинг келмаган эди, кўнгилни кўнгилга улаб гаплашадиган энг гўзал жойни қидира-қидира шу гўристонни топдим. Ота-

боланинг дилтортар сұхбатига гувоҳлар керакми? Керак! – деди Ахтам унга яқинлашиб. – Шу ерда ётган ўликлар энг яхши гувоҳ ҳисобланади. Аввалги учрашувимиздан кейин дарров Бек аканғта йиглаб борибсан-а, сұтак?! Бек аканғ ким ўзи? Худоми? Агар у Худо бўлса ўзинг кимсан? Пайғамбармисан? Ҳа-а... Эсимга тушди: Бек аканғ – «ўқ илон!» Қасд қилсалар, товондан кириб, мияни ўпириб чиқишларини биламан. Лекин мен илонга товонини тутиб берадиган лақмалардан эмасман.

– Бек акамга шикоят қилмаганман, – деди Дониёр ютиниб. – Красноярдан ёғоч олаверайми, деб сўраганман.

– Шикоят қилғанмисан, қилмаганмисан – менга фарқи йўқ. Бек аканғни сенга қўшганда ҳам сариқ чақага олмайман. Бек аканғ – кечаги бек. Ҳозир Худо бўлганида ҳам сенга ёрдам бера олмайди. Менинг бу гапларимни энди Бек аканғга етказа олмайсан. Гўрингда бир-икки йил чидаб кутсанг, Бек аканғни ўзинг кутиб олиб, ҳасратингни дастурхон қиласверасан.

– Хўп... – деди Дониёр синиқ овозда, – Рихсиянинг олдида гуноҳим бор. Тушларимга кирганида ундан ке-чирим сўраганман... мени кечирган.

– Тушингда онам кечирган бўлса, кечиргандир, сенга қўйиб берса, «Худо ҳам кечирди», дейсан, лекин мен кечирганим йўқ. «Орага бошқалар ҳам аралашишган», деб уларнинг кимлигини айтмаган эдинг-а? Айтмасанг ҳам билдим. Шериларингдан биттаси қариялар уйида ўзининг ахлатига беланиб, ўлолмай ётибди. Сени «паразитларнинг паразити!» – деб мақташдан бўшамайди. Асосий шеригингни, ана, кавлаб олдик, танияпсанми?

Дониёр сұяклар томон қарашиб ботинмади. Кўкрагида уйғонган кўркув куши бу вужудни поралаб чиқиб кетар даражада потирлай бошлаган эди. Ахтам унинг иягини чангалилаб, бурди:

– Эски қадрдонлардан тониш ўғил боланинг иши эмас. Ўлик бўлса ҳам, инсофи бор экан, келишингни билиб, жойини сенга бўшатиб чикди. Қара, саломлаш. Тириклигида икки букилиб салом берардинг-ку? Одамлар «қамоқдан сақлаб қол», деб терговчига пора берарди, сен «исини чиқармай, бир ўзини қамат», деб чўзганимисан? Ҳа... яхшилаб қара, гапингни икки қилмаган терговчининг суюкларига тўйиб-тўйиб қараб ол. Берган пулингга кафанлик олиб қўйган экан, чириб адо бўлгунича сени дуо қилиб ётиби. Бу хунасанинг суюгини топиб бўлса ҳам ёқаман, деган эдим, мана, вақти етди – ёқаман!

– Сен... бунақа ваҳшийлик қила олмайсан...

Ахтам заҳарли кулимсираб қўйиб, энди унга жон олғувчининг қонсираган нигоҳи билан қаради:

– Нега қила олмас эканман? Ўйлаб кўр-чи, сендан яна қанақа ўғил туғилиши мумкин? Нопок ва номардан фақат ваҳший туғилади! Ўғлинг шахматга уста, а? Ўзинг ҳам ўйнаб турасанми? Бир юришда мот қила оласанми? – Дониёр унга қараб қўйди-ю индамади. Ахтам бу қарашни жавоб ўрнида қабул қилиб, давом этди: – Мумкинмас, дейсанми? Мумкин! Бир юришда мот қилолмаган одам бу дунёда яшамаса ҳам бўлади.

Лойқа сувда ўз аксини кўрмоқни истаган одам лойни кўради, деганларидек, Дониёр ҳозир шу ҳолга тушиб, инграб юборди.

Рихсиянинг «Иш»ини олиб борган терговчининг автоҳалокатда жон берганини Дониёр ҳам эшитган эди. Шу сабабли Ахтамнинг гапларига чиппачин ишонди. Аслида Ахтам терговчининг ўлганини билгач, гўрини қидирмади. Унинг суюкларини топиб ёқиши қарори ҳам йўқ эди. Шундай қилса, милициянинг назарига тушиб қолиш хавфи борлиги учун ҳам ўзини тийганди. Лекин Дониёрни обдон қўрқитиш учун суюкларни ёқиши фикридан воз кечмаганди. Агар ҳозир ён-атроф ёруғроқ бўлганида Ахтамнинг лабла-

ридан тўкилган ёлғонларни кўз кўзгуси ошкор қилиб кўйиши мумкин эди.

Ахтам бир оз сукут қилгач, ҳалиги гапига қўшимча қилди:

— Мен совуқ ўлкада туғилдим, онам ҳам совуқда дилдираб ўлди. Шунинг учун сенларни ёкиб, исиниб олишим керак.

Киши ширин умид учкуни билан кун кўради. Ахтамдаги қасос умиди учкун эмас, юракни куйдирувчи чўғ эди. Мана энди у чўғни аланга олдиради. Қасос алангасида ҳузурланади. Унинг роҳатланишидан огоҳ бўлган киши беихтиёр: «Эй буюк Раббим! Шу банданга озгинагина шафқат бера қолсанг, меҳр хазинанг камайиб қолмас эди-ку?!» деб юборгиси келарди.

Ахтам имлаб қўйган эди, йигитлардан бири шиша идишдаги бензинни суяклар устига куйиб ёкиб юборди. Яна бир имлаганда Дониёрни олов сари судрадилар. Дониёр оловга ташлайдилар, деб ўйлаб додлаб юборди. Икки қўлтиғидан олган икки йигит гулхандан бир қадам берида тўхтади.

Осмонга ўрлаётган олов тиллари...

Суяқдан сачраётган учқунлар...

Худди шайтонлар базми бошланганга ўхшайди...

Воқеан гўристонда шайтон измидаги кимсалар тўпланган, улардан бири кўнгил роҳатини истаса, иккинчиси жон талвасасида эди. Бу одамнинг ота экани, тақдири ўғли қўлидаги ажал сиртмоғига илиниб тургани ғоят таассуфли ҳол эди.

Олов пасая бошлаганда йигит яна бензин сепгач, аланга баландрок ўрлади. Дониёрнинг юзига олов иссиғи урилса-да, назарида ўлик совуқ лаблари билан унинг юзларини ялагандай туюлди-ю, тошқин бир қўркув билан чекинмоқчи бўлди. Лекин икки йигитнинг темирдек панжасидан чиқа олмади.

...аланга тиллари эса кўзига ўлим сиртмоғи бўлиб кўринди.

Ахтам «қамоқдан чиққан куним биринчи бўлиб кимни кўраркинман?» – деб кўп ўйларди.

Кимдир қадрдон дўстини кўришни истайди – қани ўша дўст?!

Кимдир онасини кўришни истайди – қани ўша она?!

Хатто... отаси билан кўришишни ҳам орзу қилган...

Ана, ўша ота...

У болалик баҳтидан маҳрум бўлди. Унинг қалбида бунинг эвазига номус ва нафрат қолди. Уч ёшга тўлиб, қамоқ боғчасидан болалар уйига чиқарилгандаёқ бу гўдак «Мен уларнинг ҳаммасини ўлдираман!» деб қасам ичган эди. Қасоснинг, хусусан ўлдиришнинг турлари кўп эди. Лекин гап фақат ўлдиришда эмас, ўлдира туриб роҳатланишда эди. Қотил ёллашнинг ёузокдан туриб отиб кетишнинг у учун ҳеч бир қизиги йўқ эди. У ажал куйи янграй бошлаганида отасининг ўлим талвасаси раксига тушишини ўз кўзи билан кўришни истарди.

Юзи ўлик рангини олган, кўзлари косасидан чиккудек бўлиб аланг-жаланг қиласётган Дониёрга караб, кибр ва ғурур оловидан баҳра олаётган Ахтам ўз ишидан мамнун эди. У аланганинг бу томонига, бадбаҳт отасининг қархисига ўтди:

– Мен бу исқирт каллангни узиб, онамнинг қабрига кўймоқчи эдим, – деди-да, йигитнинг қўлидаги шиша идишни олиб, оловга бензин сочди. Аланга ўйинига маҳлиё бўлгандай бирпас жим қолди, кейин хўрсиниб қўйиб, гапини давом эттирди: – Қабрни булғагим келмади. Сен ўлмайсан. Лекин ўлим азобида яшашинг учун барча шароитни муҳайё қилиб бераман. Эркак бўлиб туғилганингта пушаймон ейсан!

Дониёр «сен ўлмайсан», дейилгач, бу марҳаматнинг чин ё ёлғон эканини ажратолмагани сабабли кўркуви камаймай, жавдираф қараб тураверди. «Эркак бўлиб туғилганингта пушаймон ейсан», деганида нимани назарда тутганини ҳам англамади. Ахтамнинг

ишораси билан келтирилган қафасдаги учта каламушни күрганида ҳам фахм этмади. Соңлари чилвир билан боғланиб, каламушлардан бири иштони ичига ташланганида дахшатга тушди. Жонивор ишини бошламай туриб, у дод-войини бошлади. Уч каламуш бир бўлиб, моягини гажий бошлаганида типирчилай-типирчилай, ҳушидан кетди.

Қонга белангандек бехуш жасадни уйига олиб келиб, ертўласига ташлаб, каламушларни қафасдан чиқариб юборишгач, йигитлардан бири «03»га қўнғироқ қилиб, «адамни каламушлар талаб ташлашди», деб, манзилни айтди.

Ҳам дори, ҳам мушт таъсиридаги хотинни «Тез ёрдам» врачлари ҳушига келтиришди...

2

Хато йўлга кириб қолиш ёмон, бу йўлда қайсалик билан давом этиш ахмоқликдир. Ёмонлик сари бурилиш нуктасида тўғри йўлга чорлаётган воизнинг юзидаги иймон нури эмас, гуноҳкорнинг бетидаги зулм сояси унинг учун ёқимлироқ эди. Ҳаёт фалсафасини нотўғри англаган одамнинг акли ухлаши, унинг ҳеч қачон ҳакиқатга етолмаслигини эса ўша дамларда билмас эди.

Ахтам одам суюкларини ёқиб, отасининг талвасасидан хузурланаётган пайтда «Барнаул – Олмата» йўналишидаги поезд йўловчиларининг аксари ширин уйқуда эди. Юмшоқ купенинг тепа қисмиии Тарзан билан Фурқат, пастини эса Ҳалимжон билан опа-сингиллар эгаллашган эди. Тарзан пастга жойлашмоқчи бўлганида Ҳалимжон «бирон ҳатар юз берса, мен бу соҳада тажрибалироқман», деб уни тепага чиқарганди. Уйқусиз тун ва кун ўз кучини кўрсатган, болалар ҳам, Ҳалимжон ҳам ухлаб қолишган эди. Тарзаннинг кўзига уйқу илинди-ю, бирдан юраги ҳаприқиб уйғониб кетди. Гавдасини

сал кўтариб, пастга хавотирланиб қаради: бир-бирии ачомлаб олган қизчалар ширин ухлашар, Ҳалимжон эса енгил хуррак отарди.

«Хатарга қарши чиқадиган тажрибали одамнинг аҳволи бу», деб ғашланган Тарзан ёстиғига бошини кўйиб, кўзларини юмди. Бироқ, уйкуси учуб, турли хаёллару фикрлар карвонини бошқаришга курби етмай қолди.

Тарзан зулм дарёсига ҳаёт қайиғини жаҳл билан, ўсмирлик нодонлиги билан туширган эди. Дастлабки гирдобдаёқ эшкак эшишга курби етмай, кемани саркаш дарё оқимлари ихтиёрига ташлаб кўйди. Шайтанат дарёсининг асирига айланиб қолганини ўзи ҳам сезмади. Оқим мавжлари аввалига сокин туюлгандай эди. Кейин кучайгандан кучайиб бораверди. Тошдан-тошга урилувчи тўлқинларда нажот йўқ эди. Дарё тўлқинлари уни Барнаулга ҳайдаб келди, энди Олмаотага қараб боряпти. Яна қайси ғурларга ҳайдаб олиб боради – билмайди. Билолмайди! Улғайиб, Мурда – Ахтамнинг босган изидан юриб, онгининг юмуқ кўзлари очила бошлаганда парда кўтарилиб, дунё ҳаёти бутун яланғоч шармандалиги билан кўринганида кўркиб, тисарилмоқчи ҳам бўлди. Лекин орқага ҳам, ён-бериларига ҳам тўсиқлар кўйиб ташланган, «Ажал келмасидан аввал ўлиш – жувонмарг бўлиш» деган манзилта олиб борувчи аянчли қисмат йўлигина очиқ эди. Шошиб кетаётган бу поездда Олмаотага етиб олишадими ё «жувонмарг бўл!» бекатида тушиб қолишадими – валлоҳи аълам!

Поезд ғилдиракларининг «така-туқи» кучайиб, кўкрагига гурзи зарби билан урилаётгандай бўлди. Кейин «така-туқ, так-туқ» товуши унинг қулоғига «баттар бўл, баттар бўл!» – деган садо билан урила-верди.

Ҳаёт завқини топиш мақсадида Асадбек қаноти остига кирган эди. Разолат балчигини титиб топгани нима бўларди? «Исҳаб ан-носа камо тасҳабун-нора хуз

манфаатаҳо вахзар ан тухриқака» – одамлар билан муомаланг олов билан муомала қилгандек бўлсин – манфаатлангину куйдиришидан эҳтиёт бўл, дейилганидан бехабар бу банда фақат манфаатдан умидвор, аммо манфаатнинг аёвсиз гулханида куйиб адо бўлажаги етти ухлаб, бир тушига кирмас эди.

Уйқусизлик азобида тўлгона-тўлгона, поездда кетиш азобига рўпара қилган Ахтамни сўка-сўка, ҳатто поездда кетиш амрига осонгина бўйсунгани учун ўзини ҳам лаънатлай-лаънатлай, тонгта якин қўзи илинди. Нонуштага чой олиб кирган вагон оғасининг дўриллаган овозидан уйғонди-ю, тошдай зил бўлиб қолган бошини аранг кўтариб, пастга қаради: Ҳалимжон пишлоқ кесарди, бир-бирининг пинжига кирган aka-сингиллар эса унинг ҳаракатларини жимгина кузатиб ўтиришарди.

– Ана, Марлен амакинглар ҳам турдилар, энди билалашиб чой ичамиз., – деди Ҳалимжон тепага бир кўз ташлаб олиб. Кейин болаларга қаради: – Фурқатбек, уйингларда аянглар эрталабга ширчой қилиб берармидилар, ҳа... шунақа чойни менам соғинганман. Эрталаб вақтли туриб, аям сигир соккунларича мен тандирга ўт ёқардим. Ўзапоянинг чирсиллаб ёнишини ҳатто тушларимда кўраман. Пиёз аралаштириб ёпилган нонни ҳам соғинганман. Ноннинг қанақа тури бўлса еб кўргандирман, лекин пиёзли ноннинг таъмини ҳеч бирида тотмадим. Икки кундан кейин бунақа пайтда қишлоқдаги уйингларда қаймоққа нон ботириб еб, мазза қилиб ўтирган бўласизлар. Шаҳардаги ўкишларим, ишларим битса, менам қишлоғимга қайтиб бораман. Сигир-кўй бокаман, томорқада кетмон чопиб топадиган роҳатимни ҳеч нарсага алишмайман.

Ҳалимжон дилидаги орзусини болаларча соддалик билан баён қилаётган эди. Унинг гаплари болалардаги соғинч ўтини баттар алнга олдирди. Ҳатто

Наргизанинг киприклариға ёш томчилари илинди. «Тезроқ етиб бора қолайлик», деган илинжда акаси билан опасига мұлтилаб қаради. У аясининг сигир соғиб, нон ёпганини эслай олмасди. Норхол билан Фурқатнинг күзлари олдида тиним билмас онала-ри гавдаланиб, юраклари янада баттар эзилди. Поезд ғилдиракларининг «така-тук-так»и уларнинг кулоги остида «тез-тез-тез», деб жаранглагандай бўлаверди.

Тарзан туриб, ювиниб келгач, биргалашиб нонушта қилдилар. Сафар чоғи дилкаш сұхбатдош бўлмаса, киши зерикиб, юрак-бағри қон бўлиб кетади. Бу купедаги болалар ҳам, катталар ҳам шу аҳволга тушдилар. Тарзан Ҳалимжон билан қайси мавзуда сұхбат курсин? Нечта лакмани ресторанларда чув туширганлариними? Ҳалимжон-чи? Асли ким экани, қандай топшириқни бажараётганини айта олмагач, тилига келганини қайтармай валдираиверсинми?

Болалар-чи?

«Үрага сичқон тушди – гулдир-гуп!» қабилида яна икки кунни үтказиш осон эмасди. Катталар ўзаро гаплашишмаса-да, болаларни chalғитишлиари, овутишлари, уларни бир неча йиллик кўркув зиндонидан кутулишларига оз бўлса-да кўмаклашишлари шарт эди. Надоматки, иккови ҳам бола тилини, бола феълинни билмасди. Айникса, болаларнинг хавотирли юрак дукури улар учун бегона эди. Шундай бўлгач, нима қилишсин? Барнаулда бирон дўконга кириб, болаларбоп ўйинчоқ олмаганларидан афсусланишди. Поезд каттароқ бир бекатда тўхтаганда Ҳалимжон тушиб, иккита қўғирчоқ олиб чиқди. Лекин опасингилларга бу малласоч қўғирчоклар овунчоқ бўла олмади. Совғани «раҳмат», деб олдилар-у, кераксиз буюмдек кўтариб ўтиравердилар. Ҳалимжон уларнинг қарашларида ғалати хавотир, ҳатто кўркув борлигини сезди-ю, аммо сабабини англай олмади. «Биздан ётси-рашаётти», деб қўя қолди.

Поезд күзғолғач, Тарзан вагоноғасининг хонаси ёнидан ўта туриб, унинг столи устидаги шахматга кўзи тушди.

– Ишқибозмисиз? – деб сўради Тарзан ундан.

– Ўзим билан ўзим ўйнаб вақт ўтказаман-да, – деди вагоноғаси кулимсираб.

Тарзанинг «бир ташлашайлик», деган таклифи маъкул келиб, дарров доналарни терди. Ўзи билан ўзи ўйнаб, вақт ўтказувчи одамнинг даражаси маълум: ўн учинчι юришда мот бўлиб, «ие!» деганича иягини қашиб қолди. «Йиқилган одам курашга тўймайди», деганлариdek, яна икки марта ютқизгач, кичик бекатга яқинлишиб қолишгани сабабли ўрнидан туриб, байроқчасини кўтариб, вагон эшиги томон шошилди. Тарзан ундан шахматни сўраб олиб, купега қайтди-да:

– Фурқатбек, давом эттирамизми? – деди.

Фурқат у узатган шахматни олиб, эътиборсиз равиша стол устига қўйди-да, паст овозда:

– Ўйнагим келмаяпти, – деди.

– Реванш олиш имкониятинг бор, – деди Халимжон кулимсираб.

– Амакимни хохлаган пайтимда ютишим мумкин, – деди Фурқат ишонч билан.

– Акам ҳаммани ютадилар, – фахрини яширолмаган Наргиза шундай деб акасини қувватлади.

– Димоғинг бунча баланд десам, зўр муҳлисларинг бор экан-а? – деди Тарзан, кулимсираб. – Мактанишни Фимадан ўрганганмисан?

Бу савол Фурқатга ёқмади. Қовоғини уюб:

– Мен мақтанмайман, ютгим келса ютаман, – деди.

Боладаги бу ишонч Тарзанин ҳайратга солди. Яхши ўйнашини кеча Фиманикода синааб кўрди, лекин бу қадар ишонч, рақибга нисбатан бу қадар нописандликни алҳол ҳазм қилолмади. Дераза томон ўтириб, қора доналарни тергач, фарзинни олиб қўйди. Фурқат истамайгина ок доналарга кўл юбориб, фарзин билан бир тўрани четга суриб қўйгач, колганларини тахта-

га терди. У катта кетмаган эди: кетма-кет уч марта ютди. Қарашидаги жиддийликни йўқотмай доналарни яна тераётганида купега вагон оғаси кириб келди. Кўзи шахмат тахтаси устидаги ўйинда, оғзи эса гапдан бўшамади. Йўлда содир бўлган турли саргузаштларидан гап очиб, орадаги зерикиш булутини ҳайдиши Ҳалимжонга маъқул келди. Навбатдаги икки ўйинни ҳам бой берган Тарзанинг бош оғриғи кучайиб, ўрнидан туриб, жойини вагон оғасига бўшатди.

– Шу болани ўзингиз бир «эзиб» қўймасангиз, менинг кучим етмади, – деб ўзини жилмайишга мажбурлади, Фурқатга тан берганини билдириш учун эмас, боланинг кўнглини кўтариш учун қўшиб қўйди: – Бугун сизни ютса, вагон чемпиони бўлади, кейин жаҳон чемпионлигига ўйнайди.

– Акам чемпионлар, – деди Наргиза ишонч билан.
– Сен айтсанг, албатта чемпион бўлади.

Тарзан шундай деб жилмайди-да, эркалаш мақсадида қизчанинг юзини силаб қўймоқчи бўлди. Наргиза худди юзига чўт босилаётгандай қўркиб кетди, бир сапчиб, опасининг пинжига кирди. Синглисининг кўркуви Норхолга ҳам ўтди. Фурқат эса сингилларига хавотир билан бир қараб олди-ю, яна шахмат доналарига тикилди. Қизчанинг бунчалик қўркиши сабабини тушунмаган Тарзан вагон даҳлизига чиқиб, эшикни ёпди. Ўрмон бағридан юлқиниб чиқсан поезд энди кўм-кўк майсага беланган чексиз кенглик бўйлаб борарди.

Болага ютқизгани сабаб бўлдими ё бош оғриғининг кучайганими – энди юраги ҳам сиқила бошлиди. Кенгликка маъносиз бокиб, анча турди. Бекат яқинлашганидан огоҳ қилиш учун поезд секинлай бошлаганида, вагон оғаси шошилиб чиқди:

– Айтганингиздай, болангиз чемпион бўлди. Унга Каспаров бас келмаса, биздақалар яқинлашмаса ҳам бўларкан, – деганича вагон эшиги томон юрди.

Поезд бекатда уч дақиқагина тўхтади. Кимсасиз

чўлда нима учун тўхтади, ким чиқди-ю, ким тушиб қолди, билиш қийин эди. Воқеан, билишнинг ҳожати ҳам йўқ эди. Поезд ўрнидан жилгач, даҳлизга Фурқат чиқди. Тарзанинг ёнида туриб атрофни кузатган бўлди. Унинг нимадир демоқчилигини Тарзан сезди, шунинг учун «ичкари кир», деб орқасига қайтармади.

— Сиз Фишернинг ўйинларини кўп ўрганган экансиз. Менга Тальнинг композициялари кўпроқ ёқади, — деди Фурқат ташқаридан кўз узмай. Тарзан эса боланинг зийраклигига тан бериб, унга қараб, гапининг давомини кутди.

— Кеча сизга атай ютқизган эдим, — деди Фурқат энди унинг кўзига тик қараб, кейин гапини исбот қилиш истагида давом этди: — биринчи ютишингизда филнинг ўрнига отни «е2»га сурганимда икки юришдан кейин мот бўлардингиз.

«Гапи тўғри», деб ўйлади Тарзан. Кеча чиндан ҳам отни сурмаганига ажабланиб, буни боланинг тажрибасизлигига йўйган эди.

— Тез-тез шунаقا «атай» ютқизиб турасанми? — Тарзан шундай деб унга синовчан тикилди.

— Йўқ, биринчи марта шундай қилдим.

— Фима айтувдими?

— Йўқ, Фима фақат ютишимни талаб қилган. Ютқизганимнинг сабабини тушунмадингизми?

Тарзан боланинг ўткир нигоҳидан қўзларини олиб қочди. Савоннинг жавобини билса ҳам, айтишдан бўйин товлаб:

— Ўзинг айт-чи, — деди.

— Ўртага нимани тикдинглар? Ютқизсам, ўша жойда қолиб кетардим-ку?

— Қолмас эдинг, атай келиб, битта шахмат баҳонасида курук кетадиган аҳмокқа ўхшатдингми бизларни? Фимани сал жигига тегиб, лақиллатмоқчи эдик.

— Жигига тегищдан кўра, уни ўлдирғанларинг яхши эди...

Боланинг совуқ бир оҳангда айтган бу гапини эшитган Тарзанинг устидан гўё қайнок сув қуйилгандай бўлди-ю, сесканиб тушди. Зулм оламидаги кўргуликларга кўнишиб, ҳатто ваҳшийликка ҳам эътиборсиз қарайдиган Тарзан боладан бундай шафқатсиз ҳукмни сира кутмаган эди. Болалар бир-бирлари билан уришсалар ёки талашган нарсаларини бой берсалар, «ҳали қараб тур, сени ўлдираман!» деб пўписа қиладилар. Бу онда Фурқатнинг тилидан учган гап болаларча пўписа эмас, зулм оламининг ҳукми эди. «Ҳамонки, болада қатъий истак бор экан, бу аҳднинг жиддий сабаби ҳам мавжуд», деган фикрга келган Тарзан унинг чақноқ кўзларига тикилиб:

– Нега? – деб сўради.

Фурқат қалб исёнинг ҳайқиригини босишга ожизлик қилди:

– Бунақа одамни ёндириш керак, – деди у янада қатъийлик билан.

– Негалигини айт-чи, ахир сенларга яхши қараган эмиш-ку? Яхши кийинтирибди, корниларинг тўқ экан...

Тарзан боланинг айтгиси келмаётган ҳақиқатни суғуриб олиш мақсадида бу саволни унинг жигига тегиш учун атайнин айтди. Мўлжали тўғри чиқиб, Фурқатнинг лаблари гезарди:

– Ўлдириш керак! – деб муштумини тутди. Алам чангалидаги қалбининг фарёдини титроқ лаблари ошкор қилди – бир ютиниб қўйди-да, аламли оҳангда сабабини айтди: – У... кечаси сингилларим билан... ётарди... Фимага ютқизган одам ҳам бир марта Норхолни...

Шундай деди-да, бошига тушадиган муштдан кўрқкан кимсадай тумшайиб олди.

Бунақа гапни катталарнинг айтиши ҳам қийин. Машъум ҳақиқатни бировга ошкор қилгандан кўра юрагини ўз кўли билан тилка-тилка қилиб ташлаш

осонроқдир. Шундай экан, чорасиз боланинг аҳволини хис эта олувчи одам бормикин?

Тарзанга, бузукликнинг турли шаробини тотиб кўрган йигитга Фурқатнинг дардли хабари бошқача таъсир қилди. У тўшагида тунаган қизларнинг отоналари, акалари борлигини, уларнинг руҳи азият чекишини ўйлаб кўрмаган эди. Ҳозир, ўзи учун ҳам куттилмаганда, шуни ўйлади. Бирок, ҳозир ўзини Фима каби пасткашлар сафида кўрмади, аксинча, «кўнглимни олган қизлар тўшак ҳақини олиб қувонарди, кичкиналарга қарайдиган ҳайвонлар бошқа», деган баҳона топди. У Фимани ҳайвонлар қаторига қўшиб хато қилди – тўрт оёкли маҳлукларнинг бу борада инсофли эканини, айғир ҳеч қачон тойчокқа ирғимаслигини ўйлаб кўрмади.

Тарзаннинг унсиз турганига тушунмаган Фурқат мақсадини айтди:

– Уни барибир ўлдираман... аям билан кўришиб, сингилларимни топшираман-у, қайтаман.

– Ўлдиргинг келган бўлса, нега шунча пайт индамай юрдинг, кўрқдингми?

– Ўлдиролмай қолсам, сингилларимга қийин бўлишидан кўрқдим. Олдин уларни қутқаришим керак эди. Шу ёзда қочишни мўлжаллаб кўйган эдим.

– Сен... қасос олишга ёшлиқ қиласан, бу фикрни каллангдан чиқариб ташла, – деди Тарзан.

– Бу калладан чиқариб ташлайдиган фикр эмас, – деди Фурқат янада қатъий оҳангда.

– Гапинг тўғри, – деди Тарзан энди ён босгандай бўлиб, – Фима ўлиши керак! Мен сенга сўз бераман: итдай хор бўлиб ўлади. Ҳоҳласанг, калласини узиб, кўлингга олиб келиб бераман.

– Ҳоҳламайман... калласини ўзим узишим керак...

Тарзан энди унга нима дейишини билмай ҳам қолди. Ҳаётнинг азобли чиғирикларидан ўтган бу ўсмир бола тақдирини йўналишини ўзи белгилаб олибди.

Энди уни қайси куч тўғри йўлга бошлай олади? Тарзан уни «зулм оламига марҳабо, укажон!» деб қучоқ очиб кутиб олиши керакми? Бу олам атрофида гангиб, тентираб юрганида унинг ўзини куч билан тортиб олган эдилар. Фурқат эса шайтанат кўрғони дарвозасини зарб билан қокиб, шитоб билан кириб келмоқчи. «Боланинг гапларини Мурда эшиганида яйраб кетарди, унга шунақалар ёқади», деб ўйлади.

Чиндан ҳам Ахтам аҳди кескирларни хуш кўрарди. Фурқатнинг аҳдини эшигач, Тарзан каби ажаблан-масди, балки «Тўппа-тўғри қиласан!», деб зулм олами дарвозасини очиб берарди.

Тарзан болани нима деб овутишни билмай, гапни мужмал қилди:

– Фурқатбек, мен сен томондаман. Фақат... буни бошқа бирорвга айтма, уйга боргандан кейин масла-хатлашамиз, балки, Барнаулга бирга қайтармиз...

3

– Болалар қани? – деди Асадбек Ахтамнинг иш-шайиб турган юзига қарагиси келмай.

– Поездда келишяпти...

Ахтам шундай деб эҳтиёт чорасини баён қилиб берди.

– Оширворибсан, бола. Фиманинг айёрги ҳам, курқоғлиги ҳам, хасислиги ҳам борлигини эшиганиман. Бунақа одам сен ўйлагандай ақл билан иш юрита олмайди.

– Бек ака, ўрисларда «эҳтиёткор одамни Худо эҳтиёт қилади», деган мақол бор.

– Жонинг эҳтиёт қиладиган даражада ширинми? «Ўлимдан кўркмайман», деб катта кетган эдинг-ку?

– Катта кетмаганман, бўладиган гапни айтганман. Мен ўлмайман, ўлмайдиган одам ҳеч замонда ўлимдан кўрқадими? Мен болаларни эҳтиёт қилдим. Болаларни соппа-соғ ҳолатида қўлингизга топширай,

кейин «азроилнинг ичига кириб чиқ», десангиз, кириб чиқмаган – номард!

«Бу бола Ҳайдар ҳам эмас, Маҳмуд ҳам, ҳатто Жамшид ҳам эмас, бўлган-тургани шу сурбетлик, уни тарбия қилишга уриниш ортиқча. Ўзига яраша балодай ақли бор. Ақлли бўлгани яхши, лекин... хавфли... орқасига бир тепиб, йўқотиш керак, – деб ўйлади Асадбек, кейин фикридан қайтди: – Йў-ўк... бир тепки билан қуримайди бу сурбет. Рўпарамда туриб олиб бетимга сапчишга тайёр бола эртага орқамдан келиб курагимга пичоқ санчмайдими?.. Азроилнинг ичига кириб чиқмагунича кўз олдимда юра тургани маъқул».

Шу қарорга келган Асадбек «ҳозирча йўқот бунингни», дегандай Жамшидга қараб олди. Жамшид хожасининг истагини англаш, Ахтамга «сен боравер», деган маънода имлади. Асадбек хотиржам равишида узоклашаётган Сурга қараб, хаёлига бехос келган фикрдан сесканиб кетди. «Ҳайдар билан Маҳмуд таҳт талашиб-талашиб ўтиб кетишиди. Менам қачондир ташлаб кетаман бу лаънати таҳтни. Кимга қолади бу таҳт? Мана шу сурбетгами? Кесак – Ҳайдар бойликка ўч эди. Бу бола бойликка қизиқадиганга ўҳшамайди. Унда таҳтга интилиб нима қилмоқчи? Таҳтни ўзим бўшатиб кетаманми ё тортиб оладими? Подшоларни ҳеч қачон ташқаридаги одамлар заҳарлашмаган, атрофидаги энг яқинлар юрагига ханжар уришган. Бу бола жонимни суғуриб олиш учун менга яқинлашдими? Йў-ўк... унақамасдир... уни ўзим қанотимга тортдимку...»

Ҳа, ўзи тортди. Узоқда эгарлоғлиқ турган кўркам отни ўзи чорлади... Бу отнинг ажал тулпори эканини фаҳм этмади. Нима бўлди унга? Кўзларига ғафлат уйқуси парда тортдими? Ғафлат пардаси тарқаб, нимага рўбаро бўлганини энди тушуняптими? Унинг ажал тулпорига ўтиришини кўпчилик пойлаб туриби. Ўша кўпчилик орасида бу сурбет ҳам борми?

«Бу бола чанг солмайди, мендан нарироқда,

ишишайиб, қуллук қилиб туриб муддаосига етади. Шуниси хавфлироқ. Қиличи билан ташланса, химоя қилишга улгуралман. Бунинг қилиғи қанақа бўлади? «Бек ака, сиз тахтда яхши ўтирибсиз, тахтда ўтириш сизга ярашади», деб гап бошлайди. «Сизни қулатадиган аҳмоклардан эмасман. Факат сиз тахтда ўтираверинг-у, пастдагиларнинг ишига бурнингизни тиқманг. Сизнинг даврингиз ўтиб бўлди. Сиз қорин ғамидан бошқасини ўйламанг...» Ҳа-а... шунақа дейиши аниқ! «Ўқ илон» бир-икки мишиқининг қўлидаги қўғирчокқа айланса!? Ҳеч қачон! Қилич эскириб, занглаган бўлса ҳам бир зарб билан одамни иккига ажратиб ташлайди. Булар ким бўлибди – бир қаламтарош! Номига муносиб иш қилмаса, битта қаламни очмасдаёқ дами қайтади...»

Фикрлар жиловини бўш қўйган Асадбек муштумини тугди. Қовоқлари учди...

«Азроилнинг ичига кириб чиқмаган – номард!» дедими? Агар қадам олиши чатоқлашса, Азроилнинг ичига киради-ю, лекин чиқмайди. Ҳа, шундай бўлади!» – деб пичирлади.

Ахтам ўша куни шом қоронғисида Олмаота томон йўлга тушди. Қора «Волга»ни ўзи ҳайдади, икки йигит сарик «Жигули»да изма-из юрди. Тонг қоронғисида Олмаотага яқинлашдилар. Катта йўл четидаги оқ ўтовлардан иборат қаҳвахонада тўхтаб, нонушта қилдилар. Поезд пешинда келиши керак эди. Ахтам қаҳвахона хўжайинининг хонасидаги телефондан шоҳбекатга қўнғироқ қилиб, поезднинг уч соат кечикишини билгач, шаҳарда дайдиб юрмай, шу ўтовда дам олишни маъқул кўрди.

Поезд уч эмас, тўрт соат кечикиб келди. Ахтам соғинган аканинг меҳрибон овозида: «Кутавериб кўзларим тўрт бўлиб кетди-ку!» деб Тарзанга қучоқ очиб яқинлашди. Пешонаси тиришган, қошлари чимирилган Тарзан бу сохталиқдан баттар ғашланиб, кўл уни бериб сўрашди. Қайтишда яна ўша ўтовда тўхтаб,

овқатланишди. Тарзаннинг кайфияти ҳам, иштаҳаси ҳам йўқ эди. Ахтам буни сезиб:

– Уч кунда чимтомоқ болага айланиб қолибсанми? – деб тегищди.

Тарзан бу пичингта жавобан «овозингни ўчирсангчи!» дегандай қовоқ уюб қараб қўйди. Шу пайт қаҳвахона эгаси кириб, ўтовда тунаб қолишлари ҳам мумкинлигини айтди.

– Оҳ, бовурим-а, – деди Ахтам уни елкасидан кучиб, – қозоқнинг меҳрибонлигига беш кетаманда! Менга қолса, битта қозоқ қизга уйланиб, шу ерда хизматингни килиб юрадим. Лекин тўй бор, эрталаб Самарқандга етиб боришимиз керак, самарқандча ошни еб кўрганмисан? Бешбармоғинг ҳам зўр овқатку, лекин ош бошқача!

«Самарқандга етиб боришимиз керак», деган гапни эшигтан Фурқат ажабланиб, Тарзанга қаради. Тарзан уни тинчтиши мақсадида бош чайқаб, «йўқ, у ёққа бормаймиз» ишорасини килди. Қаҳвахона эгасини кузатиш баҳонасида ташқарига йўл олган Ахтам Тарзанни имлаб қўйди. Қаҳвахона эгаси ўз ўтовига қараб кетгач, Ахтам шеригига юzlаниб, «Нима бўлди, ўтиришинг бошқача-ку? Ҳалим билан уришиб қолмадингми, ишқилиб?» – деб сўради.

– Унинг нимаси билан уришаман, отига яраша ҳалим-да... – деди Тарзан қўл силтаб.

– Юмшоққина бўлса ҳам, Бек акангнинг ёнида юрганини эсингдан чиқарма.

– Менинг у билан ишим йўқ... Бошқа гап бор... Уйга борганда айтаман.

– Ҳозир айтсанг-чи?

– Фойдаси йўқ.

– Нега?

– Бу гапни билдинг нима-ю, билмадинг нима – ҳеч нима қила олмайсан.

– Ҳеч нима қила олмаслигимни қаердан била қолдинг? Поездда ўргатишдими?

- Поезддами?.. — Тарзан шундай деб жим қолди.
- Гапирмайсанми? Туголмаётган хотинга ўхшаб түлғониб юравер!
- Поездда... қизчани эркалаб, юзини силамоқчи бўлганимда у илон чаққандай салчиб кетди.
- Нега юзини силагинг келиб қолди?
- Эркаламоқчи эдим.
- Сенинг эркалашингга зорми у? Кейин нима бўлди?
 - Ҳеч нарса... Даҳлизга чиқдим. Орқамдан Фурқат чиқиб ҳаммасини айтди. Бу сирни бирорвга билдирама, девдим, ўзимнинг ичимга сифмаялти.
 - Бунча чайналасан, нимани айтди?
 - Фима, падарлаънати, педофил экан... Жамолбэгинг ҳам...
- Уҳ, мараз! — Ахтам тишларини гижирлатиб, уришга чоғлангандай муштумини тугди. — Қизларнинг жавдирашига қараб, кўнглим сезгандай бўлувди-я! Ичимда бир овоз нуқул «ўлдириб кет, бу маразни», деб зўрлайверди, зўрлайверди. Бек акангдан балога қолмайлик, деб ўзимни босувдим. Ҳа, майли, ўриснинг гапи бор-ку: ҳечдан кўра кеч ҳам яхшиrok. Ҳаромининг қонини ичгани алоҳида борамиз.

Болалар билан Тарзан «Волга»га, Ҳалимжон эса орқароқда борувчи сариқ «Жигули»га ўтириди. «Волга»нинг орқа ўринидиги кенг бўлса ҳам, болалар калхат ҳужумидан қўрқкан полапонлардай ғуж бўлиб ўтиришиди. Фурқат сингилларини меҳрибон она каби кучиб олди. Бир соатча йўл юришгач, машинанинг силкинишлари, поезддаги чарчоқ таъсир килиб, болалар ухлаб қолишиди. Тарзан ҳам бошини деразага суюб мизғиди. ГАИ нозири ола таёқчасини кўтариб, машинани тўхташга ишора қилганда Ахтам «Бошланди, уйга етиб боргунимизча, Фиманинг пулларини шуларга бўлиб берамиз», деб минғирлаганда уйғониб кетди. Шундан кейин худди поезддаги каби ухлагиси келса ҳам ухломай, азобланиб борди.

Күёш терак бўйи кутарилганда Асадбекнинг уйига яқинлашиб, тўхташди. Ҳалимжон тушиши билан вазифасини бажариб бўлган сариқ «Жигули» бурилиб, кўздан ғойиб бўлди. Тарзан ҳам, Ахтам ҳам бу уйга киришмаган эди. Шу сабабли Ахтам «кирасанми ё чақирасанми, бу ёғига сен хўжайинсан», дегандай Ҳалимжонга қаради.

Чақиришга эҳтиёж йўқ эди, болохонадаги йигитлар машина тўхташи ҳамон пастга тушиб, шийпонда Жамшид билан гаплашиб ўтирган Асадбекка янгиликни етказишиди.

– Болаларни олиб кир, анавиларинг соат тўртда анҳор бўйида бўлишсин, – деди Асадбек Жамшидга қараб.

Жамшид кўчага чиқиб, хожасининг амрини йигитларга маълум қилгач, болаларни ичкарига бошлади. Остонага етганда болалар кўркиб, тўхташди-да, нажот кўзи билан Тарзанга қарашибди.

– Кираверинглар, аянг шу ердалар, – деди Тарзан, кейин Фурқатга қараб қўшиб кўйди: – Ўша гап – гап! Қайтган – номард!

4

«Аллоҳнинг раҳмат-марҳаматидан ноумид бўлмангиз», дейилган Ҳақсўзга итоат этувчиларнинг гўзал мукофотларга эришувини ҳеч ким инкор эта олмайди.

Сабр аччиқ, аммо меваси ширин эканига Фазлияning ўзи гувоҳ бўлди.

Дарвозадан кириб келаётган фарзандларини кўриб, учмоқقا қанот ёйган қуш каби қўзголди. Ҳовли ўртасига етиб борганда кўз олди қоронғилашди-ю, ҳушсиз йикилди. Асадбек бу ҳолатни кутмаган эди, нима қиларини билмай, ҳайрон бўлганича қараб қолди. Манзура эса чаққон ўрнидан туриб, «вой Худойим,

Ўзинг асрал!» деганича ёрдамга шошилди. Болаларни бошлаб кираётган Жамшид ҳам шу томон югурди.

— Сув олиб келинг, сув! — Манзура шундай деб ўзи Фазлияниң бошини күтариб, тиззасига кўйди.

Фазлияниң юзидан қон қочган, лабларигача оқариб кетган эди. Киприклар гўё мангуга қовушгандай эди...

— Фазлия, Фазлияхон, кўзингизни очинг, қаранг, болаларингиз келди! — деди Манзура унинг бетларини силаб.

«Болаларингиз келди!»

Бу хушхабарни зўр қувонч билан суюнчилааб айтишни орзу қилган эди. Суюнтирувчи хабарни эшигтан она юзларида чаракловчи шодлик қуёши нурларидан баҳраманд бўлиш баҳтига умидвор эди.

Энди эса... Фазлияниң рангига, чирт юмилган кўзларига қараб, «юраги ёрилиб кетдимикин?» деган гумон уйғонди-ю, ўзининг юраги тўхтаб қолаёзди. Жамшид сув олиб келгунига қадар Фазлияниң лабларида ҳаёт нишонаси сезилди — «болам... болажон...» деб заифгина пицирлади. Заиф юрак зарби билан пицирлаб айтилган сўз Манзурага жаранглаб эшиглангандай бўлиб, назарида бутун замину само зириллаб кетгандай туюлди.

Одамнинг тупроқдан яратилганига ҳеч ким шак келтирмайди. Лекин маъсумаларниң чидамига, сабр ва тоқатига қараб туриб, «вужуди тупроқдан бўлса ҳам, юраги темирдандир», деган фикр хаёлни ёритиб ўтади. Осмондан ёмғир ёғса, раҳматга айланиб, тупроққа сингади. Фазлияниң бошига ёғилган жабру ситамлар эса чўққа айланиб юрагига тўпланаверган. Кўзларидан оқкан қон ёшлари бу ёнокларни куйдириб юбормаганининг ўзи бир мўъжиза!

Онасини кўргани ҳамон ўқ каби отилишга чоғланган Фурқат сингилларидан ўзиб кетгиси келмай, ўзини енгган эди. Бир қарашдаёқ ҳовли ва уйнинг ҳашамидан кўзлари қамашган Норхол онасини дарров

кўрмади, Наргиза эса... танимади. Фазлия йиқилгач, Фурқат сингилларини ҳам унутиб, югурди. «Аяжон!!» деган нола билан онасининг бошини кучиб, юзига юзини қўйди.

— Кўрқма, болам, кўрқма! Хурсандчиликда шунака бўлади, — Манзура шундай деб болани овутиб, онадан ажратди-да, беморнинг юзига сув сепди.

Фазлия бир сесканиб, кўзларини катта-катта очиб, девонаваш ҳолида атрофга жавдиради. Ўғлини кўрди-ю, яна хушидан кетди. Бу орада қизчалар етиб келишди. Наргиза бир қадам беридан қолиб, Норхол дод соганича онасини қучоклаб олди. Кўзларидан оққан ёш она ёноғига томди — бу сафар сув сепишга ҳожат қолмади, Фазлия кўзларини очиб, қаддини кўтарди. Йиллар бўйи бағрига йиғилиб, куйдириб келган дард ўкирикка айланиб, ташқарига отилди. Икки кўли билан икки боласини кучиб олди. Ётсираган Наргиза ҳамон сал нарида жавдираб турарди. Болаларини бағрига босган Фазлия бирдан йиғидан тўхтаб, «Наргиз, Наргиз қани?» деб бошини кўтарди. Манзура қизчани икки елкасидан ушлаб Фазлияга яқинлаштириди. Энди Фазлия кенжасини қучоклаб олди. Икки боласи икки елкасидан қучди.

Асадбек бу манзарага қараб тура олмади. Томоғига нимадир тикилди. Юрагини чўғ каби доимий равишда куйдириб турувчи соғинч чўғи бирдан аланга олди. Айниқса, айрилиқ ўтининг аламли тиллари оловли киличга айланиб, баданини тила бошлади. У бурилиб, уйга кириб кетди. Муштипар хотин ҳасратининг оғир тоши остида қолган Манзура эри каби ўзини ўзи енга олмас эди — кувонч ёшларига эрк берди. Унинг кувончи Фазлияницидан фарқ киласарди. Фазлия дийдор кувончидан кўз ёши тўкарди. Манзуранинг кувончи соғинч тошлари орасидан сизиб чиқарди.

Дийдор дақиқалари соғинч ярасига бир оз малҳам қўйгандай бўлиб, Фазлия болаларини ўзи яшаётган хонага бошлади. Ўғли билан телефонда гаплашиб,

кўнгли чароғон бўлган куни Манзура уни бозорга олиб борган, болаларнинг ҳозирги қадди-қоматини тахминан чамалаб, янги кийим-бошлар сотиб олган эди. Қиммат-қиммат кийимлар харид килинаётгани учун қимтиниб, хижолат бўлаётган Фазлияни «бу акангиздан суюнчи, суюнчини қайтариш мумкинмас», деб кўнглини кўтарган эди. Ният холислигиданми ё она кўнглининг сезгирилигиданми, чамалаб олинган кийимлар лоппа-лойик келди. Болалар чўмилиб, янги уст-бошларни кийишгач, Манзура баҳтиёр оилани меҳмонхонага таклиф қилди. «Булар сизнинг ҳимматингиз туфайли баҳтини топди, савоби, Худо хоҳласа, ўғлимизнинг руҳига етади. Ярим соат бўлса ҳам бирга ўтиринг», деб кўчага отланган Асадбекни йўлдан қайтарди. Иззатли меҳмонлар учун ҳамиша тузоғлик дастурхон болаларнинг кўзларини олган бўлса-да, ўзларини эркин ҳис қила олмадилар, неъматларга, ҳатто нонга қўл узатишдан иймандилар. Фазлия Асадбекка миннатдорлик билдириб, қайта-қайта дуо қилди-ю, жимиб қолди. Буларга ҳозир бу шохона дастурхон эмас, чакка ўтувчи уйларидаги бир оёғи лиқиллаб қолган хонтахта атрофида ўтириб, сувга қотган нонни ботириб ейиш азизроқ ва суюмлироқ эди. Уларнинг қалблари истаётган бу ҳузурни на Манзура, на Асадбек ҳис қила оларди. Агар Фазлия кўнгил истагини баён этгудай бўлса, «шунақаям ношукур бўладими!» деган таънани эшитиши мумкин эди. Манзура лабини тишлаб қолса ҳам, Асадбек шундай деб тўнғиллашдан қайтмаган бўларди.

Асадбек «гапингни икки қилмай, ўн дақиқа ўтиридим, буларнинг баҳтли бўлиши учун шу кифоя қилар, а?» дегандай хотинига маъноли қараб қўйди-да, зарур ишлари борлигини айтиб, ўрнидан турди. Бу шунчаки баҳона эмас, чиндан ҳам зарур иши бор эди: уни анҳор бўйидаги нохуш учрашув кутарди. Кеча Тошкентга етиб келган Фиманинг арзини эшитган, бугундан қолмай унинг масаласини ҳал қилиб бериши керак

эди. Аввалига «ўзинг тинчит, бу ишни», деб Жамшидга топширмоқчи эди. Лекин болаларга тегишли ма-саланинг аввал ўйлаганидан кўра жиддийроқ эканини англаб, мулозимларини ўзи сўроқ қилмоқчи бўлди.

Асадбек чиқиб кетгандан кейин ҳам болалар яй-раб ўтира олмадилар. Улар чўмилаётган пайтда Ман-зура Афрузага қўнғироқ қилиб, хушхабарни етказган, кейин «бир пиёла чойга» таклиф этган эди. «Бирров кириб, табриклаб чиқаман», деб ваъда қилган Афру-за келиб, давра сал жонланди. Истарали аёлнинг ши-рин сўзлари болаларга ҳам ёқди. Афрузанинг вақти зик эди. Мезбондан изжозат сўрашдан олдин Фазлияга мурожаат қилди:

– Синглим, агар айбга буюрмасангиз, шириналарин-гизнинг исми ҳақида бир гап айтмоқчи эдим? – деди.

Фазлия бу илтимосдан ажабланиб, «сиз айтинг», дегандай Манзурага қаради.

– Айтинг, отин ойи, – деди Манзура.

– Пайғамбаримиз алайҳиссалом, фарзандларга ҳам чиройли, ҳам маъноли исм қўйиш зарурлигини тайинлаганлар. Узлари кўп саҳобаларнинг исмлари-ни ўзгартирганлар. Ҳатто набираларига уруш асл-ҳаларининг номини исм қилиб қўйишганда бирини Ҳасан, яъни яхшилик, иккинчисини Ҳусайн, яъни чирой, хусн, деб ўзгартирганлар. Хайрли исм умид-ли ният фазилатида боланинг умри давомида ҳамроҳ бўларкан. Бизда тушунмаслик оқибатида маъноси ғалати исмлар қўйиб юбориш одати ҳам бор. Илгари араблар боласи туғилиши билан кўзига биринчи нима кўринса, ўшанинг номини исм қилиб кўяверган экан-лар. Биттаси ўғлига «Жуал» деб исм қўйибди. «Жуал» арабчасига «саҳро қўнғизи» дегани. Кулгили, а? Мана, сиз ўғлингизга «Фурқат» деб исм қўйибсиз. Маъносини биласизми?

– «Фурқат» деган шоир бор-ку... – деди Фазлия айбли иши фош бўлган одамдай кимтиниб.

– «Фурқат» шоирнинг тахаллуси. Асл исмлари

«Зокиржон» бўлган. Ватандан айрилганлари учун шунаقا тахаллус олганлар. Чунки «Фурқат»нинг – «айрилик» деган маъноси бор. «Норхол» – «туянинг холи» дегани...

- Мен туғруқхонадан чиққунимча дадаси шунаقا деб ёздириб қўйибдилар...
- Ўзингиз нима деб қўймоқчи эдингиз?
- Бувимнинг исмлари «Гуландом» эди, шуни қўйинг, девдим, унамадилар.
- Ҳали ҳам кеч эмас, «Гуландом» бўлаверсин.
- Майли... Фурқатжонга... – Фазлия Манзура га умид билан қаради, – мулла акам исм қўйиб бера қолсинлар...

Шу карорга келдилар. Афруза кетгач, Фазлия болалар билан хонасига чиқди. Шом намозидан кейин «Рухсат берсангиз, эрталаб уйимизга кетардик», деди ялиниш оҳангига. Манзура эътиroz билдирса, «ҳеч бўлмаса болаларингиз топилгунича яшаб туринг», девдингиз, мана, Худога шукур, бағрим тўлди», демоқчи эди. Йўқ, Манзура қаршилик билдирмади.

- Майли, – деди синиқ овозда, – ҳали мулла акангиз келсинлар...

Асадбек анҳор бўйидаги «қозилик»дан кўнгли хидалашган аҳволда қайтди. Манзура боланинг исмини ўзгартириб қўйиб беришни сўраганида ажабланди. Чунки бунаقا ҳолни ҳатто эшитмаган эди. Буни хотинларнинг иримчилигига йўйиб, қўл силтади-да, «ке-рак бўлса, ўзинг қўйиб беравер», деди.

- Сизники табаррук, бир умр эслаб юришади, – деди Манзура, бўш келмай. Ҳали шу масала кўтарилиганда негадир кўнглига «Абдуҳамид» бўла қолсин, деган ўй келган эди. Шундай қилинса, назарида ўғлининг номи ўчмас бўлиб қоладигандай эди. У ҳозир эридан шу исмни кутди. Асадбек кўп ўйламади, хаёлига келган биринчи исмни айтди:

– «Абдураҳмон» деб қўя қолларинг.

Шундай деди-ю, кўнгли равшанлашди. Эри-

нинг ҳар бир гапини қонун ўрнида қабул қилувчи аёл бу қарорни «нега?» деган савол билан мұхокама килиб ўтиради. Эрининг қарорини Фазлияга айтиш мақсадида чиқмоқчи бўлганида Асадбек тўхтатди:

– Болалари билан гаплашдингми? Акли жойидами? Маънилими? – деб сўради.

Кутилмаган бу саволдан Манзура ажабланди:

– Нега бунақа сўраяпсиз?

– Тушунмадингми? Эси-хуши жойидами? – деди Асадбек, бу сафар сал дағалроқ оҳангда.

Манзура «бир гап бўлган шекилли», деган ўйда эрига чўчиб қаради.

– Бип-бинойи болалар...

– Ўғлини чакир, гаплашиб кўрай-чи.

– Хўп, – Манзура шундай деди-ю, юра қолмади.

– Яна гапинг борми?

– Фазлияхон эртага кетмоқчилар.

– Кетса мен нима қилай?

– Рухсат берамизми?

– Қамаб ўтиромоқчимисан? Шунақа бўлишини мен сенга бошида айтганман. Йигитларга айтаман, кузатиб кўйишади.

– Уйларида бирон ҳафта туриб, кейин қайтиб келишса-чи?

– Қайтиб келишса-чи? Унгача сен каллангни ишлатсанг-чи! Бу хотин сенга хизматкорлик қилмайди. Болалари ҳам сенга бола бўлмайди! Орзуйингни амалга ошираман, деб овора бўлма!

– Унақа деманг...

Манзуранинг ғам тиришлари сўлиштирган қалтироқ лабидан шу сўзларгина учди. Бошқасига қурби етмади. Хотинининг қўйилиш истагидаги ёшларга тўғаноқ бўлиб турган киприкларига кўзи тушган Асадбек юмшади:

– Яна ўзинг биласан. Келгиси келса, келаверсин...

Бу гап Манзурага далда бўлди. Тез-тез юриб чиқди-да, кўп ўтмай болани бошлаб қайтди.

Ўзига «Абдураҳмон» деб исм қўйиб берган, кўри-нишидан баджаҳл бу одамга Фурқат тик қарай олмади. Асадбек эса унга бошдан-оёқ разм солди.

— Фима хафа қилмай, яхши қарадими?

Кутилмаган бу савол боланинг юрагини кемириб ётган алам илонини қўзғади, вужудини эса гўё шафқатсиз қўллар кўтариб ерга урди: ҳамма ёғи зириллаб кетди. Тили қотиб қолди, жавобга ҳатто уринмади ҳам. Фиманинг аглаҳлигини Марлен акасига айтган, унга ишонади. Қовоқ уюб турган одамга ҳам ишониши керакми? Ким сўраса, гапириб бериши шартми?

Асадбекка бола безрайиб тургандек туюлди, унинг ичини қоплаб турган дард булутини сезмади.

— Фима сени нималарга ўргатди? — деб сўради ундан кўз узмай.

Абдураҳмон саволни тушунмагандай елка қисиб қўйди.

— Шахматни зўр ўйнармишсан, — деб саволига аниқлик киритди. — Картани ҳам яхши сурасанми?

Бола нима деб жавоб қайтаришни билмай, яна елка қисди. Асадбек столи тортмасини очиб, тахи бузилмаган картани олди-да, унга узатиб, «чийлаб, тарқат», деб буюрди.

Онаси «сизларни шу киши топдириб бердилар», деган эди. Энди нима қилмоқчи, бу ҳам киморга ўргатадими?

Абдураҳмон шу хаёл зарбида енгил сесканиб, картани қўлига олди-да, буйрукни бажаришга киришди. Асадбек унинг бармокларидан кўз узмай, тикилиб турди.

— Яхши устознинг қўлига тушибсан, — деди Асадбек бир оздан кейин. — Нима қилмоқчисан, адангга ўхшаб киморбоз бўласанми?

У нима десин? Ўз тақдири ўз кўлида бўлса кошки эди! Қўлма-қўл ўтиб, бу ерга келди. Фимадан озод

қилган бу одамнинг мақсади нима – билмас... Унинг мушкулини Асадбекнинг ўзи осон қилди: гапни кўп чўзмасдан муддаосини айтди:

– Қиморнинг нималигини кўргандирсан. Бармоқларинг чаққон экан. Ана энди шу чаққон бармоқларинг билан бу картани йиртиб ташла.

Бола иккиланиб турди-да, кейин буйруқни бажарди.

– Нимага йиртганингни тушундингми? Бундан кейин қўлингга карта олмайсан. Карта ушлаганингни кўрсам ёки эшитсан, бармоқларингни ўтмас пичоқ билан битта-битта кесаман.

Асадбек «ўтмас пичоқ билан», деб таъкидламаса ҳам бўларди. Бармоқ ўткир пичоқда кесиладими ё занглағанидами, бу ёшдаги бола учун барибир кўркинчли, ҳатто даҳшатли ҳукм. Абдураҳмон эса қилт этмади, даҳшатга ҳам тушмади, чунки унинг ўзи қимор масаласида аниқ бир қарорга келиб қўйган эди. Унинг ҳаёт йўлини белгилаган қасоси Асадбекнидан ҳам, Тарзан ва айниқса, Ахтамнидан ҳам кескин фарқ қиласарди:

«Ўзим қимор ўйнамайман. Катта бўлганимда кимнинг ё хотинини ё боласини қиморга тикиб ютқизганини эшитсан, ўша куни бориб, қўлларини қайриб узаман, кейин бошини кесаман!»

XV 606

1

Анҳор бўйидаги ўзларининг жойларига соат тўртда келишлари шартлигини эшитиб, ажабланишмади. Вазифани қай йўсинда ўринлатганлари бўйича ҳисоб бериб, Бек акаларидан олқиши олишни ўйлаб, қайфиятлари кўтарилди. Тарзан ювиниб, дам олиш мақсадида уйига кетди. Ахтам эса анҳор бўйига бо-

риб, чойхоначига «зўр бир жонон дастурхон» тузаб қўйишни тайинлагач, бошпанасига жунади.

Анҳор бўйида белгиланган вақтдан бир соат аввал учрашдилар. Чойхоначи сув устидаги сўрига «жонон дастурхон» тузаб қўйган эди. Ахтам бу диidi учун уни алқаб турганида Тарзан тушкун кайфиятда келди. Чойхоначининг саломига алик ҳам олмади. Соҳилдаги сўрига омонат ўтириб, сувга тикилганча жим қолди. Ахтам чойхоначига қўшимча топшириқлар бергач, шеригига яқинлашди:

– Нима бўлди, худди мен еб сен куруқ колгандай тумшайиб олдинг?

– Бирпас жаврамай тур, – деди Тарзан унга қарамай.

– Ҳа, тушингни сувга айтиб ўтирибсанми, менга ҳам айт, бир мазза қиласай...

– Айтами? – Тарзан шундай деб ўрнидан турдида, Ахтамга ўткир нигоҳини қадади. Ахтам бу қараща аёвсиз зулм шарпасини кўриб, эҳтиёт юзасидан бир қадам тисарилди. Чўчиганини сездириб қўймаслик учун айёrona жилмайди:

– Ёнғокнинг тагида ухлаб келмадингми, ишқилиб?

– Кўрган тушимни айтами? – деди Тарзан газаб билан. – Тушимда бир аглаҳ адамни каламушга ем қилганмиш.

«Бу ифлосликни сен қилгансан, қани, тониб кўрчи!» дегандай Ахтамнинг ёқасига қўл юборди. Лекин кўли ёқага етиб бормади – Ахтам кафтининг кирраси билан бир уриб, четга сурди.

– Ўзингдан кетма, бола, дардинг бўлса, айт! Аданнга нима бўлиби?

Тарзан энди «ростдан билмайдими, бунинг иши эмасми?» деган иккиланиш билан қаради. Аввалги шашти сал сўнганини дардли овози ошкор қилди:

– Адамнинг нозик жойини каламушга ем қилиби... кимдир.

Аламли одамнинг дардли овозини эшитиб, Ахтам-

нинг ичидаги шайтон қаҳқаҳа отди. Аммо сир бой бермади, тухмат балосига учраб ранжиган дўст либосида эътиroz билдири:

– Шунақами? Ўша «кимдир» мен эканманми? Каламушларнинг базми қачон бўлибди, айт-чи?

– Олдинги кечаси...

– Красноярда туриб адангнинг нозик жойини мўлжалга олибманми, аҳмоқ! Красноярдан эртасига эрталаб учдим, кечаси аэропортида молдай ётганман. Пешинда учиб келдим-у, Бек акангга ҳисоб бериб, Олмаотага жўнадим. Аввал суриштириб аниқлагин-да, кейин менинг бўйнимга осил! Мендан шубҳаланишга ҳаққинг йўқ, каламуш сенинг кашфиётинг. Мен бунақанги ипириски ишлар билан шуғулланмайман. Аданг билан нима ишим бор?!

Ахтам дағал оҳанги билан уни ишонтиргандай бўлди. У Тарзанинг отаси учун қасос олишга ҳаракат ҳам қилмаслигини билса ҳам, эҳтиёт чорасини кўриб қўйганди: Красноярдан учиш вақти чиндан-да, эртасига эрталаб бўлгани сабабли, пешинда Чимкентга учиб, Тошкентта таксида етиб келганди.

Шеригининг гаплари таъсир қилдими, Тарзан жойига қайтиб ўтириб, бошини чанглаб олди.

– Аданг тирикми, ўзи? – деб сўради Ахтам.

Тарзан бош ирғаб «Ҳа» ишорасини қилди. Кейин «бундан кўра ўлгани ҳам яхшийди», деб минғирлади.

– Каерда бўлибди бу иш, суриштирдингми?

Тарзан «ростдан ҳам билмайсанми?» дегандай унга саволомуз қараб олди-да, худди ўзига-ўзи гапирувчи телбанинг оҳангида эшитганларини баён қилди.

– Ота-онангнинг ёлғиз яшаси ёмон, деб сенга неча марта айтдим. Уйланишинг керак. Хотининг ҳеч бўлмаса, ота-онангга қоровуллик қиласи. Мен ўғриман, уйланишим мумкин эмас. Сен тўғрисан, уйланишинг шарт, ўзинтга ўҳшаган валаки-саланг болаларни қаторлаштириб қўйганингдан кейин борадиган жойингга жўнайверасан. – Ахтам бу гаплари шеригига

ёқмаётганини фаҳмлаб, энди меҳрибон ака оҳангига кўчди: – Аданг касалхонада эканми, бордингми? Дўхтири нима дейди?

– Нима дерди! – Тарзан алам билан қўл силтади. – Кон қуишиби, хатар ўтибди.

– Хатар ўтган бўлса, нега дий-диё қиласан. Аданг ўшасиз ҳам яшайверади. «Адам бузук», деб онангга ачинардинг-ку, ана, энди онангнинг қучоғида ўтираверадиган бўлибди. Ўрислар айтади-ку, «баҳт йўқ эди, баҳтсизлик қўллаб юборди»...

Соат тўртда Бек акаларини кутиб олиш учун дарвоза томон юришди. Кетма-кет келиб тўхтаган машинанинг олдингисидан Асадбек тушди. Унга пешвоз чиқиши мақсадида қадам босгандарида орқадаги машина эшиги очилиб... Фима кўринди. Ахтам «айтганим тўғри чиқдими?» дегандай Тарзанга қараб олди-ю, саросимага тушмай, кулимсираганича Бек акасига салом бериб, кўришмоқ мақсадида қўл узатди. Асадбек паст овозда алик олди-ю, қўл бермади. Йўл бошлаган Жамшиднинг изидан анҳор соҳили томон юрди. Фима унга эргашди. Йигитларнинг ёнидан ўтаётганида ифрати ғазаб ва нафрат билан тикилди. У «Кутилмаган учрашув безбетларни шошириб кўяди», деб ўйлаб янглишганди. Ахтамнинг кўзларида саросимани ҳам, чўчиш аломатини ҳам кўрмади. Аксинча, Ахтам ишшайиб саломлашди:

– Салом, Фима амаки, яхши етиб келдингизми? Самолётда миянгиз чайқалмадими ишқилиб?

Фима: «Мия чайқалиши қанақа бўлишини ҳозир кўрасан», деб минғирлаганича ўтиб кетди. Йигитлар бир-бирларига «энди нима қилдик?» дегандай қараб қолишиди:

– Сен тез бориб, пулини олиб кел. Қолганини менга қўйиб бер.

Ахтам шундай деб меҳмонлар изидан шошилди. Асадбек сув устидаги сўрига ўтмай, соҳилдаги дастурхонсиз сўридан жой олган эди. Ахтам Бек акасининг

рўпарасига келиб, мутелик билан қўл боғлади. Асадбек унга бошдан-оёқ тикилиб, қошларини чимириди.

– Танийсанми? – деди Фимага қараб олиб.

– Бўлмасам-чи! – деди Ахтам кувонган одамнинг жилмайиши билан. – Етим бола боқиб оламан, деб юрганимда шу тавия учраб қолди. Менинг ўттай ўғлим бу. Аслида иккитасини боқиб олганман, биттасининг moyагига чипқон чиқибди, – деб меҳмонга айёрона бокди: – Фима, Алёшканинг аҳволи қандай, олиб келмабсан-да?

«Бу бола нега ҳеч нарсадан тап тортмайди? Гуноҳи борлигини билмайдими? – деб ўйлади Асадбек ғашланиб.– Айёр тулкининг гапларига ишонайми ё бу сурбеттами?»

Кеча пешинда қўнғироқ қилган Балабуха йигитларидан эшигтганларини айтшиб, Фиманинг йўлга чиққанини билдирган эди. Балабуханинг гапларига қараганда буларда айб бўлмаса-да, Асадбек барибир Ахтамнинг ёнини олмади.

– Майнавозчилик қилма. Эски ҳунарингни ташламабсан-да? – деб ғазабли нигоҳини унга қадади, бу гап билан ресторондаги қилифини эслатди.

– Бек ака, унақа деманг, булари янги. Фиманинг келгани яхши бўлибди, ўзимиз ювиб-тараб, одам қиласмиз, – деди унга тик қараб.

– Сенга «тўғри бориб, тўғри келларинг», деб топширилувди.

– Чизган чизигингиздан чиқадиган аҳмоқ эмасмизку, Бек ака. Тўғри келишимизга бу тавиянинг ўзи йўл бермади.

Ахтам шундай деб Барнаул воқеаларини русчалаб бир-бир баён этди. Ўзидан ёлгон кўшмаётгани учун Фима гап қўшмади. Ахтам тингач, Асадбек унга «энди сен гапир», дегандай қаради. Фимага жон кирди:

– Ахир мен нотаниш одамларга болаларни икки кўллаб топширмайман-ку, тўғрими, Бек? Булар мени ҳақорат қилишди, пулимни ўғирлашди.

– Шундай хурматли амакимизни ҳақоратлайдиган тил топилса, тилиб-тилиб итларга ташлаган бўлардим, – деди Ахтам. – Пулни олганимиз рост, лекин ўтирганимиз йўқ. Бек ака, бу амакимизни жонжонимиз билан иззат қилиб, меҳмонга чорласак, кўнмадилар. Биз томонларга келишлари учун пулни атай олвоздик. Мана, келдилар, тийин-тийинигача сабаб олаверадилар. Уч-тўрт ҳафта меҳмон қиласиз-у, уйларига тантана билан ўзимиз олиб бориб қўямиз. Фақат...

– Пул қани? – деди Асадбек унинг гапини бўлиб.

– Тарзан ҳозир олиб келади.

– Сен бола, қадамингни ўйлаб бос. Ўғри бўлиб, ўғриларнинг қонунига бўйсунмасанг, қиморбоз бўлиб қиморбозларнинг ўйинини бузсанг, оқибати нима бўлишини биласанми? Абжағинг чиқиб кетади.

– Бек ака, мен ўғри ҳам, қиморбоз ҳам эмасман. Мен – Мурдаман. Мурдаларнинг қонуни сал бошқачароқ бўлади.

Асадбек унга ғазаб билан қараб турди-ю, гапни қисқа қилди:

– Барнаулга соат еттида самолёт учади. Ҳурматини жойига кўйиб, кузатиб кўйларинг.

Асадбек шундай деб ўрнидан турди. Фима «мен нима қилай?» деган хавотирли назар билан қаради.

– Пул келгунча, зиёфатни еб ўтира тур, атай сени деб дастурхон тузабди, – деди Асадбек унга.

– Менга зиёфати керакмас, йўлкирамни, яна кўрган маънавий зараримни қоплашсин.

Бу талабдан Асадбекнинг энсаси қотди: «қоплайди, қоплайди», деб дарвоза томон юрди. Ахтам Фиманинг қизчаларга килган қилигини айтольмай қолди. «Айтсам, «ўлдириб юбор», деб буйруқ берарди, буйруқ берса-бермаса, нима қилишни ўзим биламан», деган қарорга келиб, ишшайганича Фимага яқинлаши:

– Ваъдам эсимда, сени хўроз гўшти билан сийламоқчи эдим. Лекин, афсуски, кутилмаганда вакт-

лироқ келиб қолдинг. Сенга аталган хўроз ҳали курк товуқ тагидаги тухум ичида ётиби. Шунинг учун боримизни баҳам кўрамиз, – деб довдираб турган меҳмонни сўрига таклиф қилди. Фима сув устига қурилган сўрига хавотир билан қараб қўйиб, ўрнидан жилмади.

– Фима, меҳмонни тўйдирив, кейин сувга итариб юборадиган маразлар бошқа жойда яшайди, – деди Ахтам унинг хавотирини фаҳмлаб. Кейин чойхоначи-ни чакириб, дастурхон устидагиларни бу сўрига олдиртириди. Шундан кейин ҳам Фима ҳатто нонга қўл урмади, чой қўйиб узатилган пиёлани олмади. Тарзан кўрингач, кутилган қувончига етишгандай бир қимирлади.

– Мана, пулинг эсон-омон етиб келди, Фима. Ҳали нима деятувдинг? Қанча қўшишимиз кераклигини хисоблагандирсан-а?

Фима айтди. Йигитлар бир-бирлари билан кўз уриштириб олдилар.

– Фима, ҳозир мени бозорга олиб бориб сотсанг ҳам бирор шунча пул бермайди. Сўраганингни кўнга тикиб балки бир қўл ташлармиз? – деди Ахтам, но-чорликдан азият чекаётган одам каби иягини қашиган бўлиб.

– Ўйнамайман. Мен самолётга улгуришим керак, – деди Фима бир пул ўрамига, бир унга хавотир билан қараб.

– Самолётинг сенсиз учмайди, хотиржам бўл. Биз Бек акамизнинг талабларини ерда қолдира олмаймиз. Ҳозир сени аэропортга кузатамиз.

– Қолган пул-чи?

– Қолган пулни Тарзанникига кириб оламиз. Бунинг отаси бой. Ундан қарз ола турамиз. Ҳозир бориб Бек акамиздан пул сўрасак уят бўлади. Кетдик, Фима, энди пулингни ўзинг кўтар. Чап кўкрагингга босиб олсанг, юрагингга дармон оқиб киради. Шу пулнинг қуввати билан яна юз йил яшайсан.

Тарзан шеригининг бир шумликни ўйлаганини сезди-ю, гап қўшмай, унга сўзсиз эргашди. Фиманинг улар билан бирга юришдан ўзга чораси йўқ эди.

Ахтам: «машинада ўтириб туринглар, мен чойхоначи билан ҳисоб-китоб қилиб қўяй», деб қаҳвахона ичкарисига кирди-да, «Зўр»га қўнгироқ қилиб, тезлик билан етиб борадиган жойини тайинлади. Кўчага чиқиб, машинага яқинлашганда орқа ўриндикда ўтирган Алёшкага кўзи тушиб, қадрдонини кўргандай жилмайди:

– Алёшка, азизим! Нега бу ерда ўтирибсан, тушсанг бўларди, бир отамлашардик. Чопқиллаб юриб кетдингми? Қадам ташлашинг қалай, ўрдакка ўхшаб лапангламаяпсанми? Фима билан бирга келганинг яхши бўлибди, буни ёлғиз қўйиш ҳечам мумкинмас.

Алёшка бу гапларни эшитмаётган соқов одам каби безрайиб ўтираверди. Ахтамга унинг бу қилиғи ёқмаган бўлса ҳам, индамади. Ҳайдовчига «сен шу ерда қол, пастга тушиб, дастурхонга қараб тур, бирор тегмасин», деб тайинлади. Ҳайдовчи йигит бу топшириқни жиддий буйруқ сифатида қабул қилиб, чойхона томон юрди. Ахтам рулда, ёнида Тарзан, орқада Фима билан Алёшка биргалашиб йўлга тушдилар.

Машина шаҳарнинг шимол томонига қараб бурилгач, Тарзан шеригининг мақсадини англади.

– Тарзан, адангнинг пули кўп, амали ҳам зўр, янги уйни шаҳар марказига қурса ҳам бўларди, – деди Ахтам атайин русча гапириб.

– Бу ёқларнинг ҳавоси тоза, – деди Тарзан.

– Гапинг тўғри, Фима амакингни баҳонада тоза ҳавога тўйдирап экансан-да. Фимины аданг билан таништириб қўй. Иккалаларининг ёшлари тенг бўлса кепрак, бунақаларнинг дунёқараши ҳам бир бўлади, гаплашишса, тез тил топишиб кетишади. Сибирдан ёғоч олиб келиб сотмоқчимиди? Ана, Фима билан келиш-

син. Фима, бунинг отасига қўшилиб, кооператив тузмайсанми?

Ахтам шундай деб пешкўзгу орқали Фимага қаради. Атрофга аланг-жаланг боқаётган Фима унга жавоб бермади.

– Фима, кўй энди, хафаликни йифиштириш. Аҳмоқлигимизни бўйнимизга олдик. Сен кетганингдан кейин Бек акамиз бизни роса тузлайдилар. Сендан бир илтимосим бор: аэропортга борганимизда Бек акамга кўнғироқ килиб, «шу аҳмоқларни мен кечирдим, сен ҳам бир сафар кечир», деб қўймасанг, теримизни шилиб, ичига сомон тиқади. Бизга раҳминг келмайдими, Фима?

Кўксига босиб ўтирган пул ўрами юрагига далда бердими, хавотирни унутиб, бағрини куйдира бошлиган ғазабини юзага қўполлик билан чиқарганини ўзи ҳам сезмай қолди:

– Сенга шайтоннинг раҳми келсин! – деб юборди-ю, «инدامай ўтирганим маъкул эди, валдираса валдиравермайдими» деган фикрда ўзига-ўзи танбех берди. Бир донишманд «айтган сўзим – хожам, айтмаганим қулим», деган экан. Фима яшайдиган олам бу каби ҳикматларни билмайди, уларнинг ҳукми бошка: «Айтган гапинг учун жавоб бер!» Шу гапни айтса-айтмаса тақдири ўзгармасди. Тинмай валдираётган йигит уни «доносан!» деб мақтаса-да, ўлим чангалидан қутулиб қололмаслигини ҳозир эмас, кейинроқ англади.

Ахтам эса унинг қўполлигини малол олмади, аввалги пичинг аралаш кувноклигини давом эттириди:

– Яхши тилак айтдинг, – деди. Кейин ишонч билан қўшиб қўйди: – Шайтон менга ҳамиша яхшилик қилиб келган. Мен шайтонга опичиб, баҳтини топадиган одамман. Келажакда мени жаннат парилари кутиб турибди.

Фима бу гапга жавобан: «Сени дўзах кутиб турибди», – деб тўнғиллагач, Ахтам хаҳолаб кулди:

— Унда яна ҳам зўр экан: агар нариги дунёда дўзах кутаётган бўлса, бу дунёда мазза қилиб яшаб олишим керак.

Кенг йўлда бораётган машина бир-икки силкингач, Ахтам четта олиб, тўхтади.

— Нима бўлди? — деб сўради Фима.

— Бензин келмаяпти шекилли, хавотирланма, Фима, машина янги, балки карбюраторга бирон нима тиқилиб қолгандир. Очиб, бир пуфланса, тойчоқдек ирғишлаб, чопиб кетади.

Ахтам шундай деб машинадан тушди. Тарзан ҳам тушмоқчи эди, Алёшка уни елкасидан маҳкам тутди.

— Сен жойингда ўтирилди, — деб буюрди Фима қатъий оҳангда.

— Асабинг чатоқ-ку? — деди Тарзан кулиб. Сўнг орқага ўтирилди: — Алёшка, кўлингни ол, елкамнинг китиги бор-а...

Ахтам олд қопқоқни очиб, ниманидир титкилагач, «Тарзан, калитни бура», деб буюрди. Калит буралди, мотор ўт олмади. Ахтам чап томондан юриб орқага ўтди-да, юхонани очди. Ниманидир қидирди. Кейин бирдан Алёшка ўтирган томонда пайдо бўлиб, эшикни шарт очди-ю, Алёшканинг жағига зарб билан тепди. Бақувват йигитнинг ҳушидан кетишига шу кутилмаган тепкининг ўзи кифоя қилди.

— Фима, соқчини ўзгартири, демаганмидим, ана, бир қоп ахлатга айланиб қолди, — деди Ахтам эшикни асабий равища қарсилатиб ёпиб.

Фиманинг жонида жон қолмади. Кеча Асадбек билан учрашганида анча хотиржам тортган эди. Бироқ, Асадбекнинг бугунги қарорига тушунмади. Анҳор бўйида турганида юраги хатарни сезиб бир қалқиган эди. Асадбек тақдирини яна шу йигитларга топширганда бежиз хавотирланмаган экан. «Ғирром ўйин бўлди», деб кўнглидан ўтказди. Бу йигитлардан ёмонлик кутган эди, аммо соқчисининг бу қадар латталигига чидай олмади. Нима қилсин, айб ўзида.

Бу йигитлар Барнаулда тузлаб кетишгандан кейин соқчиларининг думларини туғиб юбориши шарт эди. Лекин уларни алмаштиришга фурсати бўлмади. Яхши соқчилар дўконда қоплаб сотилса экан-ки, бориб танлаб олса! Ҳақиқат шуки, танлаш имкони бўлганида ҳам Фима энг арzonини оларди. Жони эмас, пулини азиз кўрувчи одамнинг тақдирига ўзидан бошқа ҳеч ким ачинмайди.

Тарзан тезлик билан орқага ўтди. Бир томонини хушсиз соқчиси, иккинчи томонини Тарзан эгалламаган тақдирда ҳам Фима қочишига уринмасди. Бу ахволда қочиб қаерга борарди. Пул дардида бу ёқка келиб хато қилганини англаб, афсусланишдан ўзга чораси йўқ эди унинг. Ахтам эса қопқоқни ёпиб, жойига хотиржам равища ўтирида-да, калитни буради. Машина, ўзи айтганидай, тойчоқ каби югуриб кетди, бояги силкинишидан асар ҳам қолмади. Машина силкинмасди, бироқ, Фимани сирли кўркув титрата бошлаган эди.

— «Ўқилон»ни ҳалол деб эшитган эдим, — деди Фима, пул тахламини бағрига янада қаттиқроқ босиб.

Унинг гапи ғалат эди: адолатсиз оламда қандай ҳалолликни талаб қиляпти?

Ахтам адолат, ҳалоллик хусусида фалсафий фикр юритиш фазилатидан маҳрум бўлгани учун ўз оҳангода давом этди:

- «Ўқилон» ҳалол одам, ҳамма бало Мурдада!
- «Мурданг» ким?
- Менман-да, — Ахтам орқага ўтирилиб Фимага қараб олди: — Нима, ўхшамайманми?

— Мени Асадбекнинг олдига олиб бор, энди бошқача гаплашаман.

— Асадбек билан гаплаша олмайсан, у Барнаулга учиб кетди. Сени ўзи тантана билан кутиб олади. Йўлда юрагинг ёрилиб ўлиб қолсанг, тобутга ўз кўли билан кўяди.

Ахтам манзилга етгунича Фиманинг жигига те-

гадиган телба-тескари гапларни айтиб, бир кулиб, бир сўкиниб борди. «Нима десам экан?» деб ўйлаб турмок, «бу сўзни нимага айтдим?» деб надомат қилгандан яхшироқдир», деган хикматдан бехабар одамдан маънили гап кутишнинг ўзи нодонлик эмасми?

«Зўр» яна икки йигит билан уларни ташландик бино олдида қаршилади. Поймонаси тўлганини сезган Фима «машинадан тушмайман», деб суюнчикқа ёпишиб олди. Уни судраб тушириш, хириллаб ётган соқчини эса юкхонага ташлаш «Зўр» билан йигитларга унча малол келмади. Фиманинг қўлини қайираётганда «Зўр»нинг йўтали тутди.

— Яхшилаб йўтал, сенинг микробларинг шу амакингга табаррук, — деди Ахтам. — Сил юқтиргани атай сени излаб келибди.

Бу гапни эшитган заҳоти жон талвасасидаги Фима афтини бужмайтириб, бошини бурди. Ҳадемай ўладиган одамнинг силдан ирганиши Тарзанга кулгили туюлди. Лекин ҳозир кулиб, масхара қилишнинг ўрни ҳам, пайти ҳам эмасди. «Зўр»ни кўргандаёқ ғаши келган эди, йўтал бошлангач, ундан узоклашиш мақсадида ертўла томон шошилди.

Ботаётган қуёш нурлари ертўла дарчасидан тушиб тургани билан, ёритишга ожиз эди. Ғира-ширада Жамолбекнинг юзи ўликники каби оқариб кўринди. Бу ерга банди қилинганидан бери бир бурда нон-у, бир пиёла сув билан тирикчилик қилаётган одамнинг силласи қуриб, қимирашга мажоли қолмаган эди.

— Чала Бек акажоним, зерикмай ўтирибсизми? — деди Ахтам меҳрибонлик никобидаги киноя оҳангода. — Улфатчиликка кўзингиз учуб турган экан, Фима ошнангиз ҳам келдилар.

Фимани судраб келган «Зўр» уни Жамолбек ётган томонга қараб итариб юборди. Кўркув туфайли оёғида жон қолмаган Фима Жамолбекнинг устига йиқилди. Бусиз ҳам азобланиб ўтирган Жамолбек дод деб юборди.

- Ана, жамоа жам бўлди. Энди хисоб-китоб қилсак ҳам бўлади. Чала Бек, Худога ишонармишсанми?
- Ишонаман, – деди Жамолбек йифламсираб.
- Ишонганинг яхши. Мен ҳам ҳозир ишониб қолдим. Агар Худо бўлмаганида сен бу ерда сасиб ўлардинг, ошнанг ўзининг ертўласида каламушларга ем бўларди. Фалати воқеани эшитувдим: бир фохиша сафарга чиқсан экан. Денгизнинг ўртасига борганда кема тешилиб чўка бошлабди. Бечора фохиша оҳ-воҳ қилиб, «Эй Худо, бузукларни ёмон кўришингни биламан, битта менинг касримга шунча яхши одам ўлиб кетиши инсофданми?» дебди. Шунда унга: «Ташвишланма, мен бу кемага сенга ўхшаганларни тўплаганман», деган экан. Худога раҳмат деб қўйларинг, ёлғизлиқда ўлиш ёмон... Барнаулдан қайтиб келганимдан кейин сени қўйиб юбормоқчи эдим. Бир қилиғингни эшитиб, аҳдимдан қайтдим. Фима, мен сени ўлдириш учун атай Барнаулга бормоқчи эдим, ўз оёғинг билан юриб келиб, оворагарчиликдан кутқардинг.
- Худонинг иши шунаقا бўлади, – деди Тарзан шеригини қувватлаб. – Худонинг иши шунаقا, ургиси келган одамларни тўплаб-тўплаб, биздақаларга рўпара қиласди. Худо хоҳламаса, биз бирорни чертишдан ҳам қўрқамиз.
- Шу пайтгача одамларни қийнаб роҳатланардим-у, лекин ўлдирмовдим. – деди Ахтам. – Жон суғуриб олишнинг ҳузури қанақа бўлишини билмайман. Тарзан, биттасини танла, сенам мазза қилгин.
- Киморда ҳар қанақа найранглар бўлади, лекин бунақа ишлар учун ўлдирилмайди, – деди Фима қаддини ростлаб.
- Сенинг қонунинг шунақами? Яхши, қонунингта бўйсунамиз, – деди Тарзан. – Болаларни ким қандай ютқизди, ким қандай ютиб олди – ишимиз йўқ, кимор тўғрисида гаплашиб ҳам ўтирумаймиз. Сенлар ҳайвонликларинг учун ўласанлар.
- Ҳайвонларни хафа қилма, Тарзан. Ҳайвонларни

бунақа ҳайвонлик қилганини қаерда күргансан? Сен менинг битта саволимга жавоб бер: одам маймундан пайдо бўлганми ё одамни Худо яратганми? Агар маймундан, десанг, бу иккала маразни кўрган маймунларнинг худосидан балога қоласан. Агар ўзимизнинг Худо яратган десанг, худойингдан сўраб кўр: бу падарлаънатларни яратиши шартмиди? Шу иккаласининг дунёни булғаб юриши шарт бўлса, шайтонни нима қиласади яратиб?

– Бу Чала Бекинг нима қилганини билмайман, менинг гуноҳим нима? Ҳақимни талаб қилганимми? – деди Фима жонҳолатда.

– Сенинг ҳеч кимда ҳақинг йўқ, – деди Тарзан. – Аммо болаларнинг сенда ҳақи бор. Айниқса... қизчаларнинг...

– Уйингда қизчаларнинг жавдирашига қараб қўрқишаётганини сезишга сездим-у, бу аҳмоқ каллам чукурроқ ўйлаб кўрмабди.

Жамолбек ҳам, Фима ҳам сирлари фош бўлганини билиб, бу гуноҳ учун ўлимлари муқаррар эканини англаб, кўркув даҳшати исканжасида бир неча нафас жим қолишибди. Ҳукмни индамай эшитиб, мутелик билан ўлиб кетишини иккови ҳам истамас эди. Жамолбек эътиroz билдиришга, ўзини оқлашга куч топа олмади. «Чиқмаган жондан умид», деганларидаи, Фима титрок овозда ўзини оқламокчи бўлди:

– Сен тухмат қиляпсан... аввал исботла... Болаларнинг гапига ишониб, мени ўлдирмоқчимисан?

Унинг бу гапи чўкаётган одамнинг жон саклаш умидида хаста тирмашишини эслатарди.

– Мен исбот қилиб ўтирумайман, – деди Ахтам. – Кўмирни оқ, сутни қора десам, исбот талаб қилсанг ярашарди. Қизчаларни олиб ётганингда бу роҳатларинг бурнингдан қонли булоқ бўлиб отилиб чиқишини ўйламагандинг, а?

Агар Фима болаларни оч қолдириб, ё бошқача қийнаб ўлдириб юборганида Ахтам тишини тишига

қўйиб, бу абллаҳларнинг қорнини чаваклаб ташлашдан эҳтимол ўзини тия олган бўларди. Лекин етимликнинг турфа хорликларини кўриб ўсган бу одам етим қизларнинг, гарчи улар бегона бўлсаларда, хорланишларини кечириши мумкин эмасди. Дунё қонунлари адолатли кўрингани билан жабрланувчи учун аксинча туюлади. Гўдакларга тегиниш дунёвий қонун билан ҳам жазоланади – жиноят кўламига қараб неча йилdir қамоқقا ҳукм қилинади. Лекин бу ҳукм жабрдийдаларнинг қалб яраларига малҳам бўлиб даволай олмайди-ку? Ахтам ўғрилар оламига кириб, ҳали ўз ўрнини топмаган, етарли обрўга эришмаган эди. Юқори мартабанинг «козирли фраер» деб аталувчи дастлабки босқичидан ўтган эди, холос. Шундай бўлса-да, ўғрилар қонунига сўзсиз амал қилишни ҳам одат қилганди. Уғрилар оламининг мутлақ қонунига кўра, ҳатто балоғат ёшидан ўтган қизларни зўрлаш ҳам жиноят ҳисобланиб, оғир жазога муносиб кўриларди. Ахтамнинг муросасиз қарорга келишига иккинчи сабаб айнан шу эди.

Тарзанга хорланган етимларнинг аччик қисмати бегона бўлса-да, ўғрилар қонунига амал қилмаса-да, унинг ҳукми ҳам шеригиники каби муросасиз, дунёвий маҳкамада жаранглагандай, «ҳукм қатъий, шикоятга ўрин йўқ» эди!

– Сен болаларнинг гапини тўғри тушунмабсан. Бир-икки марта чироқ ўчиб қолиб, қизчалар қоронғида кўркишганда хонамга олиб кирган эдим. Экспертиза қилдириб кўр, уларга тегмаганман. Қизларимни ўзимни боламдай авайлаганман, – деди Фима, кейин йиғламсираб кўшиб кўйди: – донишмандлар «жеч қандай яхшилик жазосиз қолмайди», деб тўғри айтишган экан.

– Тушингни сувга айт, Фима! Мен экспертиза қилдирадиган аҳмоқ эмасман. Қизчаларнинг кўркиб жавдираб қараашларининг ўзи мингта экспертизанинг

ўрнини босади. «Боламдай авайлаганман», дедингми? Қайси болангни айтяпсан? Пуштингда куйиб, тутылмаган болангними?

- Агар пулдан воз кечсам ишонасанми?
- Қани пул?
- Пул... машинангда қолди.
- Менинг машинамдами?
- Ҳа...
- Менинг машинамда бўлса, демак, пул меники экан, воз кечишинг шарт эмас. Келишмоқчи бўлсанг, костюмингни еч.
- Нега?
- Нега бўларди? Гуноҳингни шу костюмингта сотмоқчиман.
- Мени масхара қилмоқчимисан?
- Бир оёғинг гўрнинг ичиди турибди-ку, сени масхара қиласиган жинниманми мен? Еч дегандан кейин индамай ечаверсанг-чи, галварс! Ё манави сил ачомлаб-ачомлаб ечинтирсинми?

Бу гапдан кейин Фима титраб-қақшаб, пиджагини ечиб Ахтамга узатди.

- Ҳужжатларинг, калитларинг шу чўнтақдами? – деб сўради Ахтам пиджакни олмай.
- Қанақа ҳужжат, қанақа калит?
- Паспортни айтяпман. Уйингнинг калитини ташлаб келмагандирсан?

Бир тийин устида юз юмалайдиган одам уй калитини энг якин одамига ҳам ишониши мумкин эмасди. Бирон дарахтнинг тагига кўмиб яшириши ҳам эҳтимолдан узоқ эди.

- Чўнтағимда, – деди Фима иложсиз бир ўкинч билан.
- Олиб кўрсат, – деб буюрди Ахтам.
- Фима титроқ бармоқлари билан аввал паспортни, кейин калитни олиб кўрсатди.
- Темир сандиқнинг калитини қаерга яширгансан?
- Қанақа темир сандиқ?

— Остап Бендер деган қариндошинг айтган-ку, эсингдами: «пул сақланадиган сандик».

— Менда сандиқ ҳам, пул ҳам йўқ. Сенлар келмас-ларингдан олдин Туладаги ўйинда катта тушган эдим. Уйим ҳам гаровда.

— Уйинг гаровда бўлса, ўлсанг, у ерда ўлигинга ҳам жой беришмайди. Шунинг учун шу ерда ўла қол, янги костюм кийдириб кўмдираман.

Ахтам шундай деб чўнтағидан рўмолча чиқарди-да, Фима узатиб турган пиджакни рўмолчаси билан ушлаб, «Зўр»га узатди. Бу эҳтиёткорлиги сабабини анлаган «Зўр» ҳам пиджакка бармоғини тегизмай, рўмолча билан ушлади.

— Шимни ҳам еч, Фима. Ювилиб, дазмол қили-навериб шимингнинг жонида жон қолмабди.

Фима янада титраб-қақшаб буйруқни бажарди. Бу сафар ҳам Ахтам шимга кўлинни узатмади, имлаб кўйган эди, «Зўр» аввалгидаи эҳтиёткорлик билан олди.

— Чала Бек, сен нега курбакага ўхшаб бақрайиб ўтирибсан, тур ўрнингдан, ечин! – деди Ахтам.

— Мен нима гуноҳ қилдим?

— Ҳалиям тушунмадингми? Ё сенам ошнангта ўх-шаб қизчаларни болангдай кўрганмисан?

— Мен бола-чақали одамман, Худодан кўрқаман...

— Бола-чақалисан, лекин одам эмассан. Худодан ҳам кўркмайсан. Болаларни савдога қўйиб, бу мараз билан талашаётганингда «қизчалар шикалатдай-а!» деб нархини оширганингмисан? Татиб кўрмаган бўлсанг, «шикалатдай»лигини гўрдан билармидинг?

Ахтам тахминан айтган бу гап кўзни юмиб отил-ган ўқнинг аниқ нишонга етиб бориши каби бўлди. «Буларга ҳаммаси маълум экан-да», деган фикр ха-ёлини ёритиб ўтиб, талvasага тушганича тавба кила кетди. Яқингинада «Худога ишонаман» деган одам-нинг тавбаси Раҳмон ва Роҳийм сифатли Раббисига қаратилмаган, балки умиди ўзи каби зулмкордан эди.

Ахтам йигитларга имлаб қўйган эди, улар икки тепки ва уч мушт ёрдамида нола чекаётган бадбахтни онадан туғилгандай ҳолатга келтириб қўйдилар. Кейин гал Фимага келди.

Ахтамнинг амрига кўра, икковини орқама-орка тиз чўқтириб, тизимча билан аввал қўлларини, сўнг бўйниларини боғлаб қапиштиридилар. Кейин эса худди итни боғлагандай, занглаган кувурга боғлаб қўйдилар.

– Энди бу ёғи гардкам! – деди Ахтам ошиқ тепувчиларнинг лафзида. – Худога ишонсаларинг, гунохларинг бўлмаса, ўлмайсанлар. Уч кунда ўлмасаларинг қўйиб юбораман. Худо ўлдирмаса, мен ҳам ўлдирмайман.

Буларнинг иккови ҳам аҳмок эмас, марҳаматнинг охири барибир ўлим эканига, бу аҳволда уч кун эмас, уч соат ҳам чидаш мумкинмаслигига ақллари етиб турса-да, энди ялинмадилар. Кувватлари етмайдиган куч қархисида чорасизлик захрини ичишдан ўзга чоралари йўқ эди уларнинг. Кўзлари очик бўлса-да, гафлат уйқусига берилган нодоннинг қалб фарёди билан уйғонишидан энди фойда бўлармикин? Ҳаётнинг лаззатини қимор ўйинидан қидириб яшаган Жамолбекка ҳам, Фимага ҳам «Одам қачон ютқизади?» деган савол берилса, «омад кетганда» ёки «лаллайиб анқайса», деб жавоб қайтаришлари аник. Ҳолбуки, бу саволнинг жавоби ўзгача: агар ҳаётни қиморга ўхшатиш мумкин бўлса, бу ўйиндаги асосий ютқизик – ўлим. Ҳамма ўладими, демак, ҳамма ютқизикда! Аммо бу икки нодонга ютқизикдан кутулиб қолишнинг йўллари бордай туюлади. Ҳозир уларга азоб бераётган бу мағрур йигитларни ҳам шу ютқизик кутиб тургани ҳаёлларига келмайди. Озод инсон ўлаёттанида ҳаёт кувончини йўқотади. Қул эса алamu дард ва азобларини... Булар озод эмасдилар, демак, йўқотишлари мумкин бўлган ҳаёт кувончлари йўқ эди. Улар зулмнинг кули эдилар, ўлиб, аламу дардлардан кутулардилар. Лекин уларнинг заиф онглари аксинча ўйларди: корин тўклиги,

маишатлар уларга ҳаёт кувончи бўлиб туюларди. Озод эмас, зулм қули эканини ўйлаб ҳам кўрмаган одам шу майшатли ҳаётдан ажраётганидан афсусла-нади, холос. Кечагина зулм саройида керилиб юрган бу икки гуноҳкор банда умид кулбаси ёниб кул бўлган икки ғариб сингари андуҳ туфроғига корилиб колавердилар.

Нимкоронги ертўлага жам бўлган маҳкумлар ҳам, ҳукм чиқаргувчилар ҳам ўзларини «озод инсон», деб янглишардилар. Қамоқда ўтирмаслик, истаган пайтда еб-ичишлари, истаган пайтда майшат қилишлари, истаган одамини тепиб-янчишлари уларнинг назарларида озодлик эди. «Озодлик»нинг маъноси ўзгача эканини эса сира ўйлаб кўришмаган. Инсон учун энг улуғ дунёвий неъмат — унинг озод ва ҳурлиги экан, демак, озод инсоннинг баҳтсиз бўлмоғи мумкин эмас. Агар инсон «баҳтсизман», деб қайғу-ҳасратда ёнаяптими, демак, у озод эмас экан. У шубҳасиз ким ёки нима томонидан эзилган кимсадир.

Агар озодлик неъмат экан, озод инсон аглаҳ бўла олмайди. Агар бир одам бошқалар олдида паст кетаётган ёки хушомад қилаётган бўлса, демак, у озод эмас экан. Қамоқдан ташқарида юрган бўлса ҳам, у бир қулдир. У бўйнини куллик сиртмоғига тутиб, бунинг эвазига бир товок овқат ёки бирон мансаб, ёки шунга ўхшаш бир нима ундиримоқ истайди. Ким озроқ манфаатга эришибди, демак, озроқ хушомад қилибди. Зўрроқ хушомад билан эса каттароқ бойликка эришилади.

Озод одам ҳеч бир тўсиқсиз эгалик қилиш мумкин бўлган нарсага эгадир. Ҳеч бир тўсиқсиз нимага эгалик қилиш мумкин? Фақат Ўз-ЎЗИГА! Агар одам ўз-ўзига эгалик килмай, бошқаларга ҳам ҳукм ўтказмоққа жазм этар экан, демак, у озод эмасдир. У бошқаларга ҳокимлик қилишни истадими, демак, у ўз истаги — нафси қули экан!

Нафс инсонни ёмон нарсаларга буюради. Ин-

сон унга қулоқ солдими, тамом, нафс қулига айланади. Ҳақнинг қули эмас, нафсининг қули бўлади. Нимкоронги ертўлада жамулжам бўлган нафс қулларининг бир томони ўзларини адолатсизлик курбонлари, иккинчи томони эса адолат соҳиблари деб билардилар. Бугунми ё эртагами, Асадбек бу воқеадан хабар топиб, ғазабланса-ю, чора кўрса, ҳозир ғолиблик нашидасини суроётганлар жазо онида ўзларини адолатсизлик курбонлари сафига кўядилар. «У Уни ўлдирди, Сен Уни ўлдирдинг, Сени Мен ўлдирдим, Мени ким ўлдирап экан?» дейилгувчи ҳақиқат ҳам адолатмикин?

Ким билади, эҳтимол улар Қиёмат куни бир-бirlарига рўпара қелиб, даъволашарлар. Солих бандалар савобларининг ҳисобидан чиройли мукофотга эга чикиб, кувонаётган лаҳзаларда булар «кимнинг гуноҳи оғиррок», деб тарозу талашаётган бўлармикинлар, валлоҳи аълам! Щуниси ҳақиқатга яқинроқ. Чунки бундайлар дунёвий маҳкамага тортилгудай бўлсалар, жазодан кутулиб қолиш, ёки енгилроқ ҳукмга эришиш мақсадида шериклари устидан мағзава ағдраверадилар. Фоний дунё маҳкамасини чалғитишлиари мумкинdir, лекин боқий дунёда...

«Ал-маъмуру маъзурун» – буюрилган одам узрлидир, дейилганидай, Тарзан ҳам Ахтам бу онда ўзларини узрлилар қаторида кўрадилар. «Зулм денги зидаги тешик қайикқа ўтирган одамнинг қисмати не бўлар? Ҳар қанча эшкак эшмасин, гарқ бўлғусидир... Ўзинглар ҳам шундай қайикда ўтирибсизлар», дегувчи ақл эгасига учрасалар, бу ҳақиқатни тан олар эдиларми?

Йигитлардан бири кийимларни йигиштириб олгач, Ахтам шарт ўтирилиб, ташқарига чиқди-да, тўхтади. Изидан келаётган шу йигитта буюрди:

– Сен шу ерда қоласан. Булар-ку қочмайди, лекин атрофга сергак бўлиб тур. Битта-яримта овсар довдираб қелиб қолмасин. Бақириб жонингга тегишса,

пайпокларини ечиб, оғзига тиқиб қўй. Эрталабга, нари борса, пешингача етар. Ўлганидан кейин ишингни килавер, – шундай деб Тарзанга қаради: – Каламушларга кузинг тушмадими? Олдингти сафар каламушга ем қилмоқчи эдинг. Ҳеч бўлмаса, ўлигини ейдиган килгин. Милиса ис олса, суякларини томоша қилиб ўтираверади.

– Кислота қуйиб куйдириб юборсак-чи?

– Милисани текин томошадан бебаҳра қолдирансанми? Майли, билганингни қил. Гурсўхтага нимани тайёрлаб қўйдинг?

– Буни ўзинг пишитиб қўйгандирсан?

– Бек акам Барнаулга иззат-икром билан кузатиб қўйларинг дедиларми, бажармасак, йиғламоқдан бери бўлиб ранжийдиларми? Кеча келиб, бугун бащараприга тик қараб, сан-манга борсак, фирт аҳмоқ бўламиз. Фиманинг ўзи бу ерда қолса ҳам, костюми иззат-икром билан уйига етиб боради.

– Алёшканг олиб борадими?

– Барнаулдан икки киши келган. Икки киши қайтиши керак. Биттаси Алёшкалигини билдинг.

– Мени бу ишга рўпара қилма, – деди Тарзан кескин оҳангда.

– Хафа бўлмагин-у, братишка, сен бунақа ишни эплай олмайсан. Буни «Зўр» қотиради. Эшитяпсанми, – энди «Зўр»га қаради: – Костюмни ғижимламай кўтар. Ҳозир Фиманинг ўрнига сен Алёшка билан жўнайсан. Уйининг эшигини калит билан очасан. Кўйлак-костюмини, туфлисини чиройли қилиб қўясан. Худди ўзи келиб, ечингандай бўлсин.

– Алёшкангчи?

– Алёшка бир қоп хамир. Бунақа кўрқоқларнинг иши осон: яхшилаб ишлов берсанг, сўраганларга хўжайини билан қайтиб келганини айтади. Бизга шу гувоҳлиги керак.

– Унга ишонма, – деди «Зўр».

– Бу ёғини хом ўйлабсан, – деди Тарзан пешона-

сиини тириштириб. – Сен бу ерда «ишлов» берсанг, у ёқда терисини шилиб олиб ишлов берадиганлар ҳам бордир. Бир черткига чидамай, «гуллаб» күяди.

– Гулласа-гуллар... Кўрқма, унгача иш пишган бўлади.

– Агар у «гулласа», ўша куниёқ Бек акамизга хабар етиб келади. Хабарнинг ўзи бўлса майли-я...

– Хўп, нима дейсан? Фимадан кечирим сўраб, қўйиб юборайми?

– Бугун бўлмаса эртага Бек акамизга буларнинг қилигини айтсак, ўзбошимчалигимиз учунномига бир-икки сўкиб қўйиб, кейин «ўлдириб тўғри қилибсанлар», дейишлари аниқ. Лекин у томондан хабар келса, кечиришлари қийин.

– Мени кўрқитма.

– Гап кўркишда эмас. У ёқда Фимани тириклигига сарик чақага олишмаса ҳам, ўлдирилганини билишса, даъволари катта бўлади.

– Ҳе, даъвосига урай уларни!

Ахтам шундай деб аралашига бўралаб сўкина кетди. Унинг баъзи қиликлари, хусусан, шафқатсизлиги, кескинлиги, шарттакилиги Кесакполвонга ўхшарди, лекин окибатни салафига нисбатан камроқ ўйларди. Тарзан унинг режаси саёзлигини билиб тургани учун ҳам йўлдан қайтармокчи бўлаётганди. Ахтам сўкиниб бўлгач, ўз режасини баён қилди:

– Фима билан Алёшканинг паспортига иккита билет олиб «Зўр»инг билан бирга манавилардан биттасини юборамиз. Эшикни калит билан очиб киришади. Кейин уйни ағдар-тўнтар қилиб пулинни қидиришади. Қанча топишса – ҳаммаси ўзларига. Барнаулдан тўғри Қора денгизга учеб, бир ҳафта дам олиб келишади. Ҳаммаси оппа-осон ҳал қилинади: Фима уйига эсон-омон етиб келган-у, кейин кимдир бостириб кириб, тинчтиб кетган. Из қолдирмасаларинг бас. Ҳа, ҳозир пастга тушиб, бурнини қонатларинг-да, рўмолчасига теккизисб олларинг. Уйига борганларинг-

да ташлаб күясанлар. Милиса қизиқадими, шериклари қидирадими – бошларини қотираверсин. Мұхими – биз буларни иззат-икром билан кузатиб күйганмиз.

– Хўп, мени кўндиридинг ҳисоб. Уларни кузатиб қўйганимизга аэропортдаги сержант бола гувоҳ бўлади. «Зўр»ни самолётгача олиб чиқиб қўяди.

Тарзан эътиroz билдири:

– Сержантинг буни эплолмайди, юраги йўқ бир кўркоқ, сўтак у.

– Юраги бўлмаса чўнтағи бордир? – деган гап билан Ахтам уни қайириб ташлади. – Одамга юрак эмас, чўнтақ керак! Чўнтагини тўлдириб қўйгин, Барнаулга опичиб олиб боради. Бўпти, буларни мен кузатаман. Сен гўрсўхтани гумдон қилиб, ўрис мозорга кўмдириб кўй.

– Мозордан жой қидириб юрамизми? Ахлатхонадаги дайди итларга раҳминг келмайдими?

– Узинг биласан... пулни нима қиламиз? Йўқотиш керак, хосияти йўққа ўхшайди, бизларни ҳам гўрга тиқмасайди...

Тарзан унга қараб, «ҳа, мард йигит, ўлимдан кўркмас эдинг-ку?» деган киноя билан узиб олмоқчи эди-ю, лекин тилини тия қолди.

– Пул болаларнинг ҳақига ўхшайди, ўшаларга бериш керак, – деди Ахтам, аниқ тўхтамга келиб.

– Камбағал бўлса ҳам онасининг димоғи баланд эди, эсингдами? Нима деб берасан? Бир сўмингни ҳам олмаса керак?

– Ҳа, мен шунақа аҳмоқман, «Фимани ўлдириб, пулни ундириб олдим», деб бераман-да, а?

– Жириллайверма. Таклифинг яхши. Балки... Шоди шилтанинг хотини эсингдами? Ўшани ишга соламиз.

– Нега?

– Болаларнинг онаси Шоди шилтанинг номини биларди. Унинг хотинини балки танир ёки отини эшитгандир. Пулни шу хотин олиб бориб беради: «Эрингиз ютган пулинни бизникига яшириб кўйган экан», дейди.

– Хўп, у аҳмоқ хотин шодлигидан чапак чалиб пулни олади, «шунча пули бўла туриб эрим нега болаларни тикиб ютқизди?» деб ўйламайди, а?

– Ўйлайди, – деб хатосини тан олди Тарзан, лекин бўш келмай, давом этди: – «Эрим насияга ўйнаб, сизнинг эрингизга ютқизган экан, ўлимларидан олдин «тўлаб қўйларинг, кимордаги қарзи тўланмаса гўрда кийналаркан одам», деб васият қилганлар», деса ишонади.

Ахтам бир оз ўйланиб турди-да, кўл силтади:

– Нима қилсанг, ўзинг биласан, менинг бунақа майда-чўйда ишларга тоқатим йўқ. Эртага Жамшид акага учрашиб, бир кунга жавоб оламиз. Мен ойимнинг қишлоғига бориб келаман, сен Шилтанинг хотинига учрашасан.

– Ойингнинг қишлоғида нима қиласан?

– Красноярга нима учун бордим? Ойимни олиб келишим керак-ку? Қишлоққа бориб, хилхоналарини аниқлайман, бувам билан тоға-ю холаларимни яна бир марта тузлайман. Аввал борганимда «сенлар тўйларинг», деб пул ташлаб келган эдим. Ўйлаб карасам, бу ишим уларнинг аҳмоқ каллаларига тъисир этмаганга ўхшади. Борай-чи, энди қанақа кутиб олишаркин? Одамга ўхшаб кутиб олиб, ойимни кўмдиришса, индамайман, яна «оқ қилганман-кўқ қилганман», деб турса, шўрини қуритаман, аяб ўтирумайман. – Ахтам шундай деб бир оз тин олди-да, кейин кутилмагандан сўради: – Айтмоқчи, аданг яхши-микин, кеч бўлса ҳам ҳозир бориб хабар олиб кўй. Агар мени таниганида бирга борардим, танимаганим учун «салом айтиб қўй», деб ҳам қўёлмайман. Майли, ёмон бўлса ҳам отанг бор, баҳтингга тузалиб кетсин.

Кейинги гаплар Тарзанни ажаблантириди-ю, лекин «нега бирдан адамни эслаб қолдинг?» деб сўрамади.

Саҳрода адашиб, очлик ва ташналиқ балосига гирифтор одамнинг бахти бир қултумга боғлиқ бўлиб қолганидай, Ахтамнинг ҳаёт қувончини қасос онлари бериши керак эди. Қалби темир сингари занглаб кетганмиди, орзу қилган ҳузурни ҳис қилмади. Отасининг шўрини куритиши, икки абллаҳни ўлим чоҳига ташлаб чиқиши саҳро ташналигини қондирмади. Уни кейинги ҳафталар ичи пул ёки шуҳрат қизиқтирмай кўйган, ўз ҳаёлларининг қаландарига айланиб, сарсари кезади.

Тарзан билан хайрлашгач, анхор бўйига келди. Чойхоначи «мехмонлар қайтишармикин?» деган гумонда дастурхонни йиғиштиргмаган эди. Ахтамнинг томоғидан таом ўтмади, бир шиша пивони очишга очди-ю, ярмини ичиш билан кифояланди. Чойхоначани чакириб, сув устидаги сўрига кўрпа тўшаб бериши буюрди.

— Шийпонда ёта қолинг, ҳаво айниб турибди, — деди чойхоначи булутли осмонга хавотир билан қараб олиб.

— Мабодо тош ёғиб қолса, уйғотарсан, — деди Ахтам пичинг билан.

У Асадбек даражасига етмаган бўлса ҳам «нега?» деган савол ўрнига «хўп»ни яхши кўтарди. Ўзини доно ҳисобламаса-да, ўзгаларнинг ақл ўргатишларини ёқтирасди. Чойхоначи унинг одатини била туриб меҳрибонлик қилганидан афсусланганича амрни баҗарди. Ўринни қалин қилиб тўшаб, дастурхонни йиғиштиргач, «яна бирон нарсани истаб қолармикин?» деган гумонда сўридан узоклашмади. Ахтам кийимини ечмаёқ ўрин устига чўзилди. Ёстиқни нари суриб, қўлларини болиш қилганича, булут парчаларининг фитнаси туфайли тилкаланган осмонга тикилди: осмонни тилка-тилка қилишга азм этган яшинни зулмат дарҳол ютди-ю, дардли гулдирак билан замин-

ни титратди. Сўнг осмон йиғиси бошланди. Юзини ёмғир томчилари савалаши аввалига Ахтамга хуш ёқди. Кейин кўзларини чирт юмиб олди. Шийпонда жон сақлаётган чойхоначи жалада шалаббо бўлиб ётган Ахтамга яқинлашишни ҳам, шу ердан кузатиб тураверишни ҳам билмай иккиланди.

Ёмғир унга болалар уйини эслатди...

Аниқ ёдида – мактаб ёшига етган йили бир марҳаматли одам болалар уйига аллақанча ўйинчоқлар совға килди. Совғалар орасидаги велосипедни Ахтамга берди. Ҳатто «қоравой бу ерга қайдан келиб қолди?» деб бошини силаб, эркалаб ҳам қўйди. Шу пайтгача унга ҳеч ким, ҳеч нима совға қилмаган эди. Етимхонада ҳамма нарса ўртада, шахсий ўйинчоқ йўқлигини билса ҳам Ахтам бу велосипедни ўз-ӯзиники сифатида қабул қилиб суюниб кетди. Аммо қувончи узоққа чўзилмади. Ёши каттароқ бола велосипедни тортиб олиб, минди. Ахтам елкасига мушт урилганда индамади-ю, боланинг қувнаб, шодон қийқириб велосипед учшига чидай олмади. Бола ундан велосипедни эмас, ягона шодлигини тортиб олган эди. Ҳеч қандай хукуки бўлмаган заиф етимнинг қўлидан нима келарди? Кўпчилик йиғлаб-йиғлаб овунади.

Бу бола йиғласа ким овутади?

Ахтам ёши улғайгани сайин йиғини унугиб бораётган эди. Чорасизлиги туфайли йиғлаш ўрнига унда ўзини ҳимоя қилиш, ўз ҳакини талаб этиш ҳисси уйғона бошлаганди. Бу ҳис жажжи қалбига қасос чўғини ташлади – велосипедли бола яқинлашганда рулни итариб юборди. Бола бошқарув мувозанатини йўқотиб йикилди, ёшига ярашмаган ҳолда ариллаб йиғлай кетди.

Ахтам тортиб олинган шодлиги учун кичкина зулмкорни жазолаб, кўнгли роҳатланди – бу унинг биринчи қасоси эди. Бироқ, кўнгил роҳати узоққа бормади, тарбиячи унинг ўзини жазолади. Аввал бетлари-

га урди, кейин ечинтириб, битта иштончада ҳовлига олиб чиқиб қўйди. Кеч кириб қолганди. Шимол кузи аёзли нафаси билан дов-дарахтларни ҳам дилдиратиб қўйган чоқда иштончан бола титрай-титрай атрофга нажот билан бокар, аммо дод солиб ёрдамга чақирмас эди. Ёмғир ёға бошлади. Музтоғларни ошиб келган булут тўкаётган совуқ томчилар болани қақшатиб юборди. У ёруғ тушиб турган деразаларга нажот билан бокди. Қайси бир куни ўртоғини тарбиячи хотин ураётганида муштчалари билан ташланиб, уни ҳимоя қилган эди. Ҳозир ўша ўртоғининг бу ёққа чиқмаса ҳам, деразадан қараб қўйишини илинж билан кутди. Қараб қўймагач, алам қилганидан йиғлаб юборди.

Нажот бор эди, ҳамма болалар «Флюра оий» деб эркаланадиган энага югуриб чиқиб, болани рўмолига ўраб кўтариб олди. «Йиғлама, қора кўз, йиғлама», деб овутди. Бола бир ҳафта иситмалади-ю, кейин тузалиб кетди. Лекин қалб яраси тузалмади.

Ҳозир илиқ томчилар савалаётган дамда ўша яра қўзғаб, рухини азоблади. Харсангтош остида қолиб эзилгандай вужуди зириллади. Қаддини кўтариб, шийпонда турган чойхоначига кўзи тушди-да, «Ароқ олиб кел!» деб буюрди. Чойхоначи Ахтамнинг тушкун кайфиятини сезиб, «яна тортиб қолар», деган ўйда турфа ичкиликларни стол устига қўйиб, устини дастурхон билан ёпиб қўйган эди. Буйрукни эшитиб, ўша заҳоти қўлига шишани олди-ю, ёмғир остида бўкиб турган хожасига олиб боришни ҳам, уни бу ёққа чақиришни ҳам билмай, иккиланганича туриб қолди.

– Хой, анков! Эшитмадингми? – деб бақирди Ахтам. Ҳозир чойхоначи кўзига деразадан қараб ҳам қўймаган бевафо ўртоғи бўлиб кўринди. Агар чойхоначи яна бир нафас имиллаганида эшитадиганини эштарди. Бир қўлига сочиқ билан пиёлани, иккинчисига ароқни олиб, югурди. Сочикни Ахтамнинг елкасига ташлаб, шишанинг қопқоғини очди. Пиёлага куймоқчи эди, Ахтам шишани тортиб олиб, кўтарди.

Унинг бунақа қилиғини аввал кўрмаган чойхоначи анграйиб тураверди. Учинчи қултумдан кейин Ахтам қалқиб кетди. Бир-икки йўталгач, шишани кўтариб, бошидан кўйди.

– Шийпонга ўтинг, сочикни арокқа ҳуллаб, баданингизни артиб қўяман, – деди чойхоначи меҳрибонлик билан. Бу оҳанг энди Ахтамга меҳрибон энагани эслатди.

– Артиб нима қиласан? – деди шаштидан сал тушиб.

– Шамоллашнинг олди олинади-да...

– Мен шамолламайман. Сибирнинг совуғини еб пишиб кетганман.

– Шийпонга юра қолинг...

Бирпасда шалаббо бўлиб, титрай бошлаган чойхоначига қараб Ахтам қулди-да, арокни узатди:

– Сен ипакдай нозик одамсан, ичвор, яна эртага бурнингни оқизиб, пиқиллаб юрма. Ё баданингни артиб қўяйми?

Чойхоначи «йўғ-е, йўғ-е», деганича шишани олди-ю, аммо ичмади. Беихтиёр равишда ўрин-кўрпага қараб қўйди. Буни сезган Ахтам унинг елкасига енгил мушт уриб қўйди:

– Жудаям паст одамсан-да! Менга ачиняпсан, десам, дардинг кўрпаларингда экан. Дунё ўзи шунақа – одам эмас, шу исқирт кўрпа азиз.

– Унақа деманг, кўрпа топиладиган матоҳ, одамдан азизроғи борми? – деб ўзини оклади чойхоначи.

Ахтам ҳафсаласи пир бўлган киши кўринишида кўл силтаб қўйди-да, шийпон томон юрди, панага ўтиб яна икки қултум ичди.

– Ичкарига кириб... кийимларингизни қуритиб олинг.

– Кийимними?.. Уйга боргунимча ўзи куриб қолади. Бу ерда ўтирганимни ҳозир бирор кўрса, «жинни бўлиб қолибди», деб ўйлади. Жиннилигимни уйимга бориб кила қолай.

Ахтам шундай деб юқорига қараб юрди.

У бир кампирниңда ижарада турарди. Иккі-үч хонали үй сотиб олишга пули етса-да, бунга ҳаракат ҳам қилмасди. Тарзанның «үй ол», деган гапларига құл силтаб құя қоларди. Уйланишни ҳатто үйламаса, атрофида ота-онаси, ақа-сингиллари бўлмаса, үйни нима қиласди? Ижарачи кампир «шартнома тузайлек, ўлгунимча қарайсан, ўлигимни кўмганингдан кейин шу үй сенга қолади», деганида ҳам «уйингиз ўзингизга сийлов, ўлсангиз энг чиройли тобутга солиб кўмдирман, ҳудди маликалардай мазза қилиб ётасиз», деб ҳазиллашган эди.

Кийими шалаббо бўлиб кетган Ахтамни кутиб олган кампир шошиб қолди. Унинг кўзларидағи маъюсликни кўриб хавотирга ҳам тушди, лекин сабабини сўрамади. Ахтамниң хонасига кириб жавонни очдида, кийимларни олиб каравот устига қўйди, кейин ҳаммомдан катта сочиқни олиб чиқди.

— Тез бўлакол, — деди шошириб. — баданингни арокда артиб ташлайми?

— Баданимни ичидан артганман, — деди Ахтам кулимсираб.

— Нимадандир хафага ўхшайсан. Ритани чакирайми?

Кампир эрдан чиққан набирасини Ахтамга таништириб, «ёқса уйлан, истасанг ўйнаш қилиб ол», деб очиқласига таклиф қилган эди. Рита бир-икки марта тунаб қолганидан кейин кампирда умид уйғона бошлаган, ҳозир Ахтамниң тушкунлигидан фойдаланиб қолмоқчи эди. Ахтам «керакмас», дегандай бош чайқади.

— Унда кўнглинг нима истаяпти, айт, ёш йигитга сиқилиб юриш ярашмайди.

— Кўнглим нима исташини ўзим ҳам билмайман, — деди Ахтам ўйчанлик билан. Кейин хаёлини йиғишириб олиб, жилмайди: — Йўқ, биламан,

кўнглим юмшоқ ўринда ётиб, мазза қилиб ухлашни истаяпти...

– Ёшлар аклини еб қўйган, маза нимада эканини ҳам билишмайди.

Кампир шундай деб минғирлаганича хонасига чиқиб кетди. Ахтам ҳўл кийимларини ечиб, стул суюнчиғига ташлади-да, ўрнига ётди. Салқин таъсир қилиб, чойшабга ўраниб олди. Ичган озгина ароғи ёмғирнинг заҳрини кеса олмади, эти жунжикавергач, кўрпа орасига кирди. Кўрпада исиб кетиб, юраги беҳаловат ура бошлади... Тунни шу аҳволда, бесаранжом ўтказди. Кампир уйғонмай туриб, уйдан чиқди. Кеча Тарзанга «онамнинг қишлиғига бораман», деганда аҳди қатъий эмасди. Онасининг жасадини олиб келиб кўмиш учун, мозорини бориб қўриши шарт эди. Қишлоққа борганида «бобо», «тоға» аталмиш кимсаларни кўришни эса бир хоҳлаб, бир истамаётган эди. Хоҳлашининг сабаби – аввал учрашганида, гарчи илон каби уларни чаққиси келса-да, онаси арвоҳининг ҳурматини қилиб, ўзини тийган эди. Фақат кўзойнакли илон сингари лабини шишириб, тилини ўйнатиб кўя қолган, «шуниг ўзи уларни талвасага солади», деб ўйловди. Адашганини кейинрок фахмлади-ю, «аламдан чиқадиган вакт ҳам келиб қолар», деган умидда мақсадини амалга оширишни галга солди. «Ота» аталмиш Дониёрнинг адабини бергач, навбат қишлоққа етди, деган тўхтамга келди. Бу сафар қариндошларига етарлича заҳрини сочгандан сўнг, жасадни олиб келиб хилхонага қўйгач, мўлжалидаги юмушларнинг якунига етишига, тушларида қасосга даъват этаётган арвоҳнинг таъкибидан кутулишига ишонди.

Икки ҳил хис исканжасида отланиб, шу ҳолатда йўл юрди. «Ота» Дониёрнинг қисмати унинг учун аник, буларни тавбасига таянтириш йўлини билолмай гаранг эди. Баъзан уйғониб қолувчи «орадан ўтган вакт ичиди улар инсофга келиб қолгандир?» деган хайрли гумон йўлда яна қўзғолди: аввалги келгани-

да совуқ қаршилаб, совуқ гаплардан иборат ҳақорат тошларини отган бобоси бу сафар қучоқ очиб кутиб олса-чи? «Болажоним, қизимдан ёдгорлигим!» деб кўзларида ёш билан қучоқ очса-я?! «Бобожон, тоғажонларим! Бу кунни мен салкам ўттиз йил кутдим», деб уларни бир-бир бағрига босадими? Дийдор Қиёматта қолмагани учун кувониб, кўзларига ёш оладими?

Бўлмаган гап!

Хаёлини яшин нури каби ёриттан некбин орзу ўша заҳоти сўнди – қариндошларига инсоф кирганига ишонмади.

Кун тиккага келганда катта йўл четидаги чойхонада тўхтади. Ҳовуз бўйидаги тўртта мажнунтол соясига кўйилган сўридан жой олди. Шабада эсиб, қизиган машинада эзилган вужудига роҳат бахш этди. Мўйлаби сабза ура бошлиган ўсмир якинлашиб, салом берди-да, дастурхон ёзиб, ўргага иккита нон кўйди.

– Чой қанақасидан бўлсин? – деб одоб билан сўради. «Фамил» деган жавобни эшитиб, яна сўради: – шўрва олиб келайми ё ошми?

– Шу иссикда ош ўтадими, шўрва олиб кел.

Сал наридаги сўридан бир оила жой олганди. Калта оқ соқолли киши Ахтамни танигандай қараб-қараб қўйди-да, ўтирган еридан сўради:

– Мехмон, Тошкандан келаётганга ўхшайсиз, обҳаво қанақа?

Кўккисдан берилган савол оддийгина бўлса-да, Ахтамни ажаблантириди.

– Кечкурун ёмғир қуйиб ўтди. Эрталаб йўлга чиққанимда булут бор эди, чаласи қолган бўлса, балки ёғаётгандир. Нега қизиқиб қолдингиз?

– Набираларни ўйнатгани олиб кетаётувдим. Тошканда мошин кўп, аспал йўл кўп, куёш қиздириб ташлайди, деб эшитувдим.

– Кўрқмай бораверинг, сиз боргунингизча қиздирмай туради, – деди Ахтам кулимсираб.

Қария унинг ҳазилини чин ўрнида қабул қилиб, яна соддалик билан сўради:

– Чиллада эллиқданам ошаркан, а? Қандай чидайсизлар?

– Чидаймиз, – деди Ахтам ишонч билан. Тошкентликлар иссиқ юз даражага борганда қайнашади.

Қария ҳазилни англаб кулиб юборди-да, «ха, омон бўлинг», деб гапни бас қилди. Яна пича ўтиришгач, барчалари сояда турган икки машинага жойлашиб жўнаб кетишиди. Ахтам уларнинг изига соғинч кўзларини тикиб қолди. Қаерда бўлмасин, овқатлангани кирганда оила жамланиб ўтирганини кўрса, юрагида ғалати ҳис уйғонади. Оила даврасининг нечоғли баҳт экани унга бегоналиги рост. Лекин дам-бадам юрак шундай нотаниш баҳтни кўмсайди...

Ҳозир ҳам шундай бўлди. Ярим коса шўрва ичиб, хақини тўлагач, яна йўлга тушди.

Икки соатдан кейин онасининг қишлоғига етиб борди.

Чанқамаган, очикмаган бўлса ҳам, бурилишдаги чойхона ёнида тўхтади. Юз йиллик баҳайбат чинор паноҳида жойлашган чойхонада мудраб ўтирган икки қариядан бошқа ҳеч ким йўқ эди. Ахтам салом бериб, уларнинг яқинидаги сўрига омонат ўтирди. Чойхоначи «кўнгиллари нима истайди?» деб сўрамасданоқ бир чойнакда чой билан чети учган сопол пиёлани келтириб кўйди. Чой ичилаверилгани туфайли пиёланинг сири кўчиб, кирланганга ўхшаб қолган эди. Шу сабабли Ахтам ирганиб, чойдан қуйиб ичмади.

Мудроқ босиб, зерикиб ўтирган қариялар ҳангоматалаб бўлишади. Айникса, бегона одамни учратишса, гапга солгилари келаверади. Ҳозир ҳам шундай бўлди. Қариялардан бири тилининг тагига нос отиб, иккинчисига узатди. У носковоқни олиб, кўрпача устига ташлади-да, Ахтамга юзланиб:

– Мехмон ўглим, йўл бўлсин? – деб сўради.

Чолларни гапга солиб, бобоси ҳақида у-бу нарсаларни сўраб олишни мўлжаллаб ўтирган Ахтам учун бу савол айни муддао бўлди.

– Йўлим шу ёқса тушувди, чой ичай, деб тўхтадим. Илгари ҳам бир-икки келувдим. Сангин бобо деган отахон билан танишувдим, бормилар ҳали? – деб қариянинг саволига савол билан жавоб беради.

– Ҳа-а... Сангинми?.. – Қария шундай деб Ахтамга тикилиб қаради: – У билан қанақасига танишиб қолдингиз? Мухбир болалардан эмасмисиз?

– Шунақа иш ҳам қилиб тураман, – деди Ахтам кулимсираб.

– Сангин комсомолда ишлаб юрганида уни мухбирлар тинмай мақташарди, мақтовнинг чаласи қолган экан-да?

– Худо уриб қўйган одамни ҳам мақтайверишадида, бу ғўр мухбирлар, – деди нос отиб олган қария гўлдираб. Унинг бу гапи Ахтамни ажаблантириди:

– Худо уриб қўйган, дедингизми? Нима бўлди?

– Агар Худони танийдигон мухбир бўлсангиз, тұғрисини ёзинг, ўғлим, – деди иккинчи қария ўрнидан бир қўзғолиб олиб. – Авлиёнинг мозорини буздиргани учун пес бўлгани камлик қилган экан. Болалари ҳам куйдирди. Куйиб-куйиб ўлиб кетади ҳали.

– Бунисини билмабман, тушунтириброқ айтинг.

– Битта қизи ўттиз йил олдин бир ҳайвоншеванинг этагини тутиб қочворганийди, қамалиб йўқ бўлиб кетди, деб эшигтанмиз. Яқинда кенжা ўғли билан қизини қамаб қўйшибди.

– Нимага?

– Нафси ҳакалак отган-да! Ака-сингил бир вагон селитрни пуллаётганда қўлга тушиб қолибди. Агар отиб юборишмаса, икковиям анчага кетса керагов... Матқовул, эсингдами, «авлиёнинг мозорини бузма», деб Худонинг зорини қилганимизда «эскиллик сарқитини йўқотмасам, онам хотиним бўлсин!» деб қасам ичувди. Онаси хотини бўлмади-ю, аммо-

лекигин қасамхўрни Худо боплаб урди. Энди додини кимга айтади, билмайман...

– Ҳадеб Сангинга осилаверма, ўз ақли билан килмаган, тепадан буюришган.

– Билмасанг гапирма, тепадагилар «зиёратгоҳнинг дарвозасига қулф ур», деб буюришган, у қизигар, қулф топишга эриниб, буздириб ташлай қолди.

Бу янгилик Ахтамни яна аросат водийсига ҳайдади. Бобосига учрашиб нишини санчишни ҳам, «Худо уриб қўйибди-ку, шу ҳам кифоядир», деб изига қайтишни ҳам билмай иккиланди.

– Ҳа, меҳмон, ўйланиб қолдингиз? Бунақа гапларни эшиитмаганмидингиз? Олдин келганингизда сиз ҳам кифтини келтириб, бошдан-оёқ мактаб ёзганмидингиз?

– Ўзишга улгурмовдим, – деб Ахтам кулимсиради. – Худо бир асраран экан.

– Бу гапингиз ҳам тўғри, ёмонни мақтаган ҳам ёмон бўлади, бу иши Худога ёқмайди.

– Ўттиз йил олдин қочиб кетган қизини айтдингиз, бу тарихни сал-пал эшиитувдим. Қизлари қамоқда ўлибди-ю, лекин... бир ўғли қолган экан-ку?

– Шуниси қулоғимга чалинган-у, аммо-лекигин ўзини кўрмаганман.

– Шаҳарда менинг ҳам қулоғимга чалинди, ўша ўғли онасининг жасадини олиб келиб шу қишлоққа кўммоқчи экан. Шунақаси ҳам бўладими?

– Бунақасини эшиитмаганман. Жасади қаерда экан?

– Қамоқда ўлган бўлса... балки Сибирдадир.

– Сибирда ётавермайдими? Безовта қилиши шарт эканми?

– Ақлли одамлар маслаҳат бергандир-да...

– Шунақа маслаҳат берган ақлли одамнинг кўп нарсага ақли етмас экан. Агар ўғли онасининг жасадини олиб келиб кўмса-ю, кейин ўзи шу қишлоқда яшаб қолса, бир нави – вақти-вақти билан мозоридан хабар олиб туради. Қишлоққа кўмиб қўйиб, ўзи кет-

вorgанидан нима фойда? Сангин қизини ўша вақтда оқ қилган, гурига қарамайды.

— Оқ қилинган қизнинг ўлигини олиб келиб кўмишига қишлоқдагилар кўнмайди, демоқчимисиз?

Қария ён томонига эгилиб, оғзидағи носни тупуриб ташлади-да, лабини кафтига артгач, сұхбатга қўшилди:

— Отаси оқ қиладими ё кўк қиладими, қишлоқдагиларнинг нима ишлари бор? Ана мозор, хилхонасида жой кўп, кўмса кўмавермайдими? — шундай деб Ахтамга тикилди: — Менга қаранг меҳмон, қамоқда туғилган ўша бола ўзингиз эмасмисиз?

— Йўғ-е... — Ахтам ўнғайсизланди. — Нега унақа деяпсиз?

— Сангиннинг ўша қизига ўхшаб кетарканисиз. Айниқса қошларингизнинг тугашлиги ўхшаркан. Сұхроб, ўша қиз эснингдами? Оти Рихсиямиди? Чап ёногида холи бор эди.

— Холигача эсингда турибдими? Тоз-за сукланиб қараган экансан-да, а?

— Атай қарабманми? Ўғлим хуштор бўлганида, келин қиларман, деб қараганман-да. Аммо комсомолнинг қизи ўзига ўхшаган чиқди, бизларни менсимади, қочди-ю, кетди.

Ахтам қарияларнинг эндиғи хотираларини эшитгиси келмай, шошилаётганини баҳона қилиб, ўрнидан турди. Бобосини кўргиси, «Ана, яна икки болангиз қамалибди, уларни ҳам оқ қиласизми?» — деб сўрагиси келди.

Машинасини ариқ томонда тўхтатиб, тушиш ёки тушмаслик қарорига келолмай пича ўтирди. Ундаги ожиз меҳр шафқатсизлик зарбига кўпам дош беролмади. Машинасидан дадил тушди-да, дарвозанинг бир табақаси очиклиги сабабли ҳовлига тўғри кириб бораверди. Бобоси кетмонини елкага қўйиб, томорқадан чиқиб келаётган экан. Уни кўриб, аввалига танимади.

Кейин супадан анча берида тұхтаб қолди. Ахтам икки күлини чүнтағига тиққанича унга яқынлашди.

«Ассалому алайкум, бобожон, соғ-омонмисиз?» дейилмади.

«Ваалайкум ассалом, қизгинамнинг ёлғиз ёдгори – жоним болам, хуш келибсан, соғина-соғина кўзларим тўрт бўлди-я!» деб алик олинмади.

Бобо ва набира кўз уриштириш мусобақаси ўйнаёт-гандай бир-бирларига тикилиб туравердилар.

Ниҳоят бобо тилга кирди:

– Нега келдинг?

Бу совуқ муомаладан Ахтам оғринса-да, дарров жавоб бермади, сурбетларча қараб тураверди. Чол бундан ғашланиб, энди ғазабли оҳангда сўради:

– Нега келдинг, деяпман?!

Бу хонадон ахли, хусусан бобоси, тоғалари билан Ахтам орасида ҳурмат ва одобнинг белгили чегараси йўқ эди. Шу боис тўппа-тўғри сенсирашга ўтди:

– Агар ўлган бўлсанг, гўрингга тош-пош бостириб қўйами, деб келдим.

«Валади зино» аталгани билан ўз набирасига хукмрон эмаслигини Сангин чол билар, айни чоқда унинг қаршисида тиланчи кўринишида ўтиришни истамасди. Набирасининг бу хунук гапидан сўнг юраги қалтирай бошлаган бўлса ҳам дардини сиртга чиқармади.

– Кет, кўзимга кўринма, ҳароми!

Дарғазаб кўринища, ваҳшат билан айтмоқчи эди бу сўзларни, бирок, курби етмади, лабларининг титраши ожизлигини ошкор қилиб қўйди. Ахтам бундан хузурланиб, у томон яна бир-икки қадам босди:

– Яна «ҳароми», дединг-а? Агар қизинг бир хунасани яхши кўриб қолиб, туққан бўлса, менда нима айб? Дунёда алданган қизлар камми? Ҳаммаси оқ бўлганми? Қизингни оқ қилганинг учун Худо сенга нима берди? Олдин ҳам пеc эдингми ё қизингни оқ қилганингдан кейин бўлдингми?

— Сенсирама...

Ох, қани эди илгариғи күч-куввати бўлса-ю, бу сурбетни қулочкашлаб бир уриб, бўғзигача ерга кирғизиб юборса. Билак кучи етмай қолса, милисага битта қўнғироғи кифоя эди.

Қани ўша куч, қани ўша мартаба? Ўзича қишлоқ осмонининг устуниман, деб керилиб юарди, энди билса, осмонга устуннинг ҳожати йўқ экан... Қариганида бир сурбетга қараб, «сенсирама» деб дўк уришга ҳам ҳоли қолмаган бўлса... бундан тубанроқ хорлик борми?

Ажиб манзара: бирорининг гуноҳлар юкига бардош беролмаётган кемаси чўкиш арафасида турибди, бирори эса пўртаналарга парво қилмай, ҳаёт кемасига тўхтовсиз равишда гуноҳлар юкини ортятти... Яна да ажабланарлиси шуки, қай бир кеманинг аввалроқ чўкиши фақат Худогагина маълум.

Бобосининг ғам сели олиб кетган қайгули юзига қараб роҳатланаётган Ахтам ғолиб кимса тахтини эгаллаб, қаҳ-қаҳ ургиси келарди.

— Мен сенсираб гаплашадиган жойда катта бўлганман. Тилим қотиб қолган, — Ахтам энди бобосининг юзига лаънат тамғасини босаётгандай қилиб гапирди: — Сен мени олдин келганимда «валади зино» девдинг-а? Ўшанда аклим етмаган эди. Бунинг нималигини кейин тушунтириб беришди. Ҳозир «ҳароми» дедингми? Етимхонада ҳам мени «ҳароми» деб хорлашарди. Бунинг маъносига тушунмасам ҳам, ичим оғрирди. Кейин билсам, етимларнинг ярмидан кўпи ҳароми экан. Уч ёшлигимда мени онамдан тортиб олишган. Онам хайрлашаётганларида бир-иккита гапни айтганлари аниқ эсимда. Биттаси — «аданг билан никоҳимиз бор», деган. Ўшанда мен никоҳни ё ширин нарса, ё катта бойлик деб ўйлабман, шунинг учун бу гаплари эсимда қолган бўлса керак...

Ахтам кичиклигига шундай ўйлаб адашмаган эди.

Афсус шуки, никохнинг ширин ҳаёт асоси, энг катта бойлик эканини то ҳануз тушуниб етмади.

Кетмон дастасига суюниб қолган бобосига яна бир қадам яқинлашиб, кесатик оҳангидага сўради:

– Балки ўзинг ҳам валади зинодирсан?

Ахтам бу саволи билан ўзи билмаган ҳолда нозик жойдан тутди: Сангин валади зино эмас, бироқ, ўзи уйланаётганида ҳукумат идорасининг рўйхатидан ўтган-у, никоҳ ўқитишни истамаган эди. Ҳарбий хизматдан қайтиб келиб, комсомол йўлланмаси билан мактабда ишлаб юрганида ёш муаллимага кўнгил кўйди. Уларнинг аҳду-паймонидан қувонган мактаб аҳли, айниқса, комсомол идораси тўйни янгичасига қиласидан бўлишди. Ота-боболаридан ўтиб келаётган удумлар ёқмай, «комсомол тўйи» дегани кўзларига жилвали кўринди. Никоҳ ўқитишмади, ҳукумат рўйхатидан ўтгач, яқинларини тўплаб, уйларида колхознинг хисобидан базм қилишди. Кўни-кўшнилари бурда нонга зор бўлиб яшаётган бир замонда базм қилишдан ўзларини тия олишмади. Келинни ёр-ёр айтиб олиб келишмади, ўт атрофида айлантиришмади, тортишмачоқ ҳам бўлмади... Бунинг ўрнига қадаҳ сўzlари айтилди. Келин ичмаса ҳам қўлига мусаллас тўлдирилган пиёлани ушлатиб кўйиши. Куёвжўраси «қирқ кунгача оғзингга бир қултум ҳам ароқ олмайсан», деб огохлантиришига қарамай, қадаҳ сўzlаридан илҳомланиб, барча билан баравар ичди. Эртасига куёв ошида ҳам жўралари билан тенгма-тeng ичиб, тўшакка ширакайф ҳолда кирди...

Буларнинг ҳаммаси гуноҳ эканини кейинроқ билди. «Валади зино» деб айблаётган набираси ҳозирги гапи билан унинг шу оғриқ ярасини тилиб юборган эди. Агар никоҳсиз туғилган набираси валади зино бўлса, ўзининг барча болалари нима деб аталади?

– Оғзингга қараб гапир бола! – Бу гапни дўқ эмас, салкам ялиниш оҳангидага айтди.

– Ҳа, нима, бўлиши мумкин эмасми? Биттаси ўғил

кўрганини эшитиб, туғруқхонага бориб, хотинини чақирибди. Ҳаммага эштиларли қилиб, «полвонтой ўғлим кимга ўҳшайди?» деб керилиб турибди. «Сизга ўҳшайди-да, дадаси» дейилишини кутган-да у лакма. Хотини тўғрисини айтиб қўя қолибди: «Вой, дадаси сиз у кишини танимайсиз»... Ўғил кўриб керилган ўша аҳмоқ сен эмасмидинг?

– Тур, жўна! Сен билан гаплашадиган гапим йўқ.

– Шошилма, ҳали менинг анча гапим бор. Кўрслигим ёқмаяптими? Мен ширин тилда гапира олмайман, дедим-ку? Аслида сен ўйлаганчалик тўнкамасман, атай шунақасига гаплашяпман. Агар туғилганимни эшитиб, мени уйингга олиб келиб тарбиялаганингда бунақа бўлмасдим. Онам ҳам куйиб ўлиб кетмасди. Ёмон бўлишимга сен сабабчисан. Қамалишимга ҳам, қамоқдан чиқиб беш-олтита одами сўйиб ташлашимга ҳам сен сабабчисан.

«Беш олтита одам сўйиш»ни эшитиб чол бир чўчиб тушди. Ёлғон гапининг бунчалар таъсир қилганидан кўнгли тўлган Ахтам яна шу оҳангда давом этди:

– Қамоқдан чиққанимда лўли хотинга фол очи-рудим, «баҳтли яшашинг учун онангнинг қишлоғида ҳам уч-тўртта одамнинг қонини оқизиб, худойи қилиб юборишинг керак, ҳар сўйганингда бир пиёлани қонга тўлдириб ичмасанг, онанг гўрида тик туради», деди. Лўлининг гапи – гап! Менинг кўрқадиган жойим йўқ. Баъзи нодонлар қамоқقا тушишдан кўрқади. Қамоқхонада туғилган одам ҳам ўз уйидан кўркарканми? Уша лўлидан «аввал тоғаларим билан холаларимни сўяйинми ё суюкли бобожонимними», деб сўровдим, «кичиларидан бошла», деб айтди. Яхши маслаҳат... Кўз олдингда болаларингни битта-битта сўяман... Ҳа, болаларингга ачинасанми? Ачинма. Ахир уларнинг отаси ким экани аниқ эмаску? Одам онасидан туғилганини аниқ билади. Отам деб юрганидан туғилганми ё бошқаданми, онаси билан Худо билади. Сенам шунақасан. Ўғилларинг-чи?

Ўзингга ўхшайдими? Балки сен комсомол айғирини маниб давр сурганингда, молбоқар дев хотинингни маниб, уйингни гуллатгандир?

Бу гапга чидаш қийин эди. Чол суюниб турган кетмөнини даст күтариб, набирасига ҳамла қилди. Кетмөнни күтаришга улгурди, аммо, набирасининг бир тепкиси билан кетмонаига қўшилиб ўзи ҳам учиб тушди. Шу пайтда уйидан югуриб чиқсан ўғил отасига ёрдамга шошилмай, Ахтамга ташланди. Лекин унинг мушти Ахтамга этиб келмади. Жағига тушган тепкидан сўнг отасининг ёнгинасидан жой олди.

Ахтам чўнтағидан буклама пичокни чиқариб, тут масини босган эди, тиф «ширқ» этиб очилиб, офтобда ярқираб кетди.

— Хозир икковингнинг киндигингни чатиштириб боғлаб қўйами? Ё ичакларингни бошларингга салла қилайми? — У росманасига сўймоқчи бўлган одам шаштида улар томон қадам ташлади-ю, тўхтади: — Йўўқ... сўйсам ҳам ўзларингнинг пичоқларингда сўяман, бу пичокни ҳаром қилмайман.

Бу пўписа чолга нисбатан ўғлига таъсир қилиб, у қўрқувдан типирчилаб қолди. Ахтам кулиб, тифни жойига қайтарди-да, пичокни чўнтақка солиб, улар томон тупурди:

— Лўлининг гапини қилмайман: сенларнинг қонингни аҳмоқ одам ичади. Аслида мен суюнчи хабарни эшишиб, сени табриклагани кирувдим. Қамалган ўғлинг билан қизингни ҳам энди оқ қиласанми? Улардан умидингни уз, тирик чикишини кутма, мен қамоқдаги ошналаримни огоҳлантириб қўяман, болаларингнинг ўлигини ҳам кўрмайсан. Лекин мен онамнинг ўлигини олиб келиб, шу қишлоқقا қўмаман, тайёрланиб тур, ўз кўзинг билан кўрасан. Кейин ўлсанг, сенинг ҳам, менинг ҳам армоним қолмайди.

Бу шафқатсиз ҳукми билан уларни тириклайн гўрга тиқсандан баттарроқ азобга гирифтор қилди.

Асадбек күнгилни эзадиган туш күрди:

...аввалига дарвозахонасида олов күринди. Кеин бир түп одам аскарлар каби сафга тизилиб кириб кела бошлашди. Қараса, барчалари ўлиб кетган қариндошлари, яқинлари. Күзлари бир нұқтага қадалған... шийпонда ўтирган Асадбекка қараб ҳам күйишмайди. Ўликлар сафида отаси йўқ... онаси йўқ... ўғли йўқ...

...улар қани?

Сўрайман, дейди-ю, овози чикмайди. Кўчасига чиқиб қараса, икки томонига чуқур ва узундан-узун ҳандаклар қазиб ташланганмиш. Ўртада ёлгизоёқ йўл қолган. Асадбек қўлидаги чўлтоқ супурги билан йўлни тош-у кесаклардан тозалай бошлади. Шу онда оппоқ либосли, оппоқ дўппили дадаси кўринди. Ажаб... ҳаётлигига хасса ушламас эди. Ҳозир мўйсафид кўринишида яқинлашди-да:

– Ўглим, сеникига кирмоқчи эдим, йўл йўқ-ку? – деди афсусланиб.

– Ҳозир... ҳозир очаман йўлни, – деб янада тезроқ ҳаракат қилиб, тозалайверди. Шунда дадаси орқасига тисланмоқчи бўлди.

– Орқага юрманг, юрманг, дада! – деб бақирди. аммо...

вақт ўтган эди, дадаси ҳандакқа қулади. Асадбек дод солиб ўзини чуқурликка отди. Дадаси ҳандак тубидаги ботқоққа чўкиб кетган эди. Асадбек жонҳолатда лойга қўл ботирди. Шунда ёнида Абдуҳамид пайдо бўлди: «мен қутқараман», деди-ю, бобосини ботқоқликдан тортиб олди.

Лекин...

вақт ўтган эди. Ота-бала биргалашиб жонсиз тана ни юқорига олишди.

Узоклардан онасининг хаста овози келди:

«Даданг ўлганлари йўқ, қара, киприклари пирпираятти»...

Дадасини қучмоқчи бўлиб эгилган эди... Унинг ўрнига... Суликонинг бобоси қад ростлаб турди...

«Дадам қанилар?! Қанилар дадам?!» деб дод солди ва...

ўз овозидан ўзи чўчиб, уйғониб кетди.

Ёнини қараса, Манзура йўқ. Ташқаридан аzon чақириғи эшитилгач, қаддини кўтарди. Эзилган вужудини бошқариши қийин бўлса-да, дераза томон юрди. Манзура шийпонда жойнамоз устида ўтиради. Асадбек шу қарашида унинг келинлик чокларини, кимор ўйнаб қайтганда, жойнамоз устида ўтирганларини эслади. Манзуранинг жойнамоз устидаги ҳозирги ҳолати бошқачароқ эди. Ҳар тонг шийпонда Фазлия билан намоз ўкиётган эди, кеча меҳмонлари уйларига кетишиди. Манзурани тинмай эзаётган ёлғизлик азоби бу лаҳзада Асадбекка ҳам кўчди. «Шундай дабдабали саройда иккимизгина бўлсак-а?» деган ўй ҳозир кўрган нохуш туш таъсири билан қовушиб, юрагини увиштириди. «Енгил тортармикинман», деган ўйда ичкаридаги ҳовуз томонга ўтиб, ўзини сувга отди. «Сув – ёруғлик, сув кўнгил губорини ҳам кўтаради», дейдилар. Лекин бу ҳикмат ҳозир амал қилмади. Сувдан чикиб, артинди-да, кийиниб, диванга чўзилди. Бу орада Манзура кириб салом бергач, «чойни шу ерга олиб келайми?» деб сўради. Кейин нима учундир эрининг пешонасига кафтини кўйди.

– Соппа-соғман, – деди Асадбек, бошини буриб.

– Илойим соғ бўлинг, – Манзура шундай деб чиқди. Саждага бош кўйган онда у эрининг бакиришини эшитиб, чўчиб тушган, бироқ, намозни бузмаган эди. Эрининг тунлари алаҳсирашига кўникиб қолаёзган бўлгани билан, барибир сиҳатидан хавотирланарди.

Хотини чикиб кетгач, Асадбек яна кўрган туши таъсирига тушди. Суликонинг бобосини ҳеч тушида

күрмас эди. Бугун ҳолати қизиқ бўлди-ку? Гуржистонда учрашганида у: «Ўғилларинг мен каби узоқ умр кўрсинглар, мен каби ҳалол ящасинглар, аммо фарзанд ҳажридан йироқ бўлсинлар!» деб дуо қилган эди.

Ҳеч бир дуоси ижобат бўлмади...

Нега? Бошқа динда бўлгани учунми? Унда Мухиддин отанинг дуолари-чи?

Асадбек билмайди, билолмайди...

Суликонинг бобоси «Қароргоҳларинг чўкишини билмайсанми?» – деб маломат қилган эди.

Қароргоҳи чўкаждагини нега билмасин, била-ди. Факат қаерда, қачон чўкишигина унга номаъ-лум холос... Қароргоҳи ўз-ўзидан чўқадими ё бирор чўқтирадими – буниси ҳам мавҳум.

Тушига кириб шуларни эслатмоқчи бўлдими?

Гуржи чолнинг бу маломатини ҳар эслаганида бу мавхумликларнинг чигал илларини ечмоқчи бўлади-ю, аммо эплолмайди. Ўйлай-ўйлай тайнинли жавоб топа олмагач, «нима бўлса бўлар, бошга тушганни кўз кўрар», деб қўл силтаб қўя қолади. Ўғлининг ўлимидан кейин қароргохининг ҳалокати яқинлашгандай туюлди. Хотини билан қизини хорижга – Абдусамаднинг ёнига жўната олса эди, кўнгли анча тинчирди. Қароргоҳининг тақдиридан кўра она боланинг ўжарлиги уни кўп қийнаб қўйди. Азадор хотинини аядиган бўлиб қолгани сабабли унга қаттиқ гапиришдан тийиларди. Қизининг аҳволи ҳам маълум: унга салгина оғир гапириб юборса, кўнгил чинниси чил-чил синади...

Кеча Мухиддин отани зиёрат қилиш баҳонасида дардини баён этмоқчи бўлди. Лекин «оиламни четга жўнатаман, балки кейинроқ ўзим ҳам кетарман», деган гапни айта олмади. Бир-икки мужмал гап билан чекланди. Мухиддин ота Асадбекни ёмон дард қийнаётганини сезарди-ю, бошқа ташвишларидан бе-хабар бўлгани учун бу дардни фақат фарзанд ҳажри билан боғларди. Кеча ҳам шу тўхтамга келиб, Асад-

бекнинг кўнглини кўтариш мақсадида бир ривоят айтиб берди. Муҳиддин ота гап бошлаганида унинг юраги сиқилди, «қисқароқ қилса-ю, туриб кета қолсам», деган ўйда қимирлаб ҳам қўйди. Кейин фикри ўзгариб, дикқат билан тинглади:

– Қадим замонда ўтган улуғ донишманднинг ҳузурига одамлар келишиб, сухбати, панд-насиҳатидан баҳраманд бўлишар экан. Бир куни тўсатдан унинг ўғли ўлиб қолибди. Таниш-нотаниш ҳамма бу воқеадан қайғурибди, йиғлабди, – Муҳиддин ота шундай деб Асадбекка маънодор қараб олди: – Бироқ, бу зот бир томчи ёш тўкмабди. Шунда ахли аёли:

– Боламиз учун барча зор йиғлаб турса-ю, сиз нега йиғламайсиз, шунчалар бағритошмисиз? Қалбингиз шунчалар қотган бўлса, маҳшар куни инсонларга Аллоҳнинг изни ила меҳр-шафқат кўрсатиб, қандай шафоат қиласиз? – дебди.

Шунда у зот бундай жавоб қилибди:

– Эй ҳаётимнинг йўлдоши, йиғламаганимга мени марҳаматсиз, юраги тош қотган, деб ўйламагин. Менинг коғирларга ҳам раҳмим келади, уларга иймон насиб этсин, дея дуо қиласан. Кўпракларга, ҳатто мени тишлаган кўпракка ҳам ачинаман. «Ё Раббим, бу бечоранинг феълини ўзгартиргин, одамлардан калтак емасин, унга тош отишмасин», деб дуо қиласан.

Бу гап аёлига таъсир этмай, янада ўжарлик билан сўрабди:

– Қалбингиз шунчалар шафқат ва марҳаматга тўла экан, нега ўғлимиз учун йиғламаяпсиз?

– Инсон бир нарсани йўқотганда ёхуд ундан айрилганида йиғлайди, ранжийди. Фарзандларимиз ўлсин ёхуд тирик колишсин – улар қўнгил кўзидан йўқолмайдилар-ку?! Улар шундок кўз ўнгимда кезиб ўйнаб юрар экан, нега энди сенга ўхшаб йиғлайнин, хафа бўлайнин? Ўғлимиз бу замон даврасидан чиқди холос. У йўқолмади-ку? Атрофимизда айланиб юрибди, ахир! – Шайх шундай дегач, яна қўшиб қўйибди: –

Иифи ё аламдан келади, ё айрилиқдан. Ҳолбуки, мен севганларим билан биргаман. Табиий, ўлган болам билан ҳам вуслатдаман. У билан югуриб юрибман. Одамлар уни тушыда күрса, мен уйғоқ ҳолда, очиқ-равшан күряпман. Бу дунёда ўзимни яширганимда ҳам, борлик дараҳтидан туйғу япроғини силкитганимда ҳам у билан биргаман.

Мұхиддин ота ривоятни баён қилғач, пича сукут сақлади, кейин изоҳ берди:

– Бұтам, тушунгандирсиз-а, ривоятдаги шайх етук-ликка зришганлардан. Бундай одамлар нафсларини тарбиялаб, рухий-маънавий камолга етгандар. Улар дунёвий, башарий, моддий оламнинг таъсирларидан кутулған зотлардир.

Асадбек кечгача Мұхиддин отадан эшиттәнләри-нинг таъсирида юрди. Балки шунинг учун ўғли тушига киргандир? Фақат... сал бошқачароқ ҳолатда күринди, шундан күнгли хижил. У Мұхиддин ота баён қилған доңишиманд шайх каби бўлолмайди, шуниси ҳам бор. Сабр булоғидан сув ичмай, қасос гулханида ёнаётган одамдан яна нимани кутиш мумкин? Мұхиддин ота «бўтамнинг ярасига малҳам бўлар», деган мақсадда бу ривоятни айтиб эди, шамолга қараб гапираётгани хаёлига ҳам келмаганди.

Манзура чой кўтариб кирганда ҳовлидан Жалил-нинг овози эшитилди. У чойнакни хонтахта устига кўйиб, шошилиб қолди, лекин меҳмонга пешвоз чиқишига ҳам улгурмади, оstonага етмай тўхтади. Тўртта нони бор оқ белбоғ тугунча билан бир банка қаймоқ кўтарган Жалил кириб келгач, ўзини четта олиб, салом берди.

– Маҳалланинг нони билан қаймоғини соғингандирсизлар, деб вактли келдим, – деди Жалил саломга алик олгач. Ошнаси билан кўришиб, манзират кутмай тўрга ўтиб ўтирди-да, хонадон ҳақига хайрли дуо қилди. Манзура меҳмон келтирган неъматларни кўтариб, ташқарига чикди.

– Кече маҳалладаги оғайнилар билан ошхўрлик килувдим, сенга салом айтишди. Кечаси адамнинг уйларида мазза қилиб ётдим.

– Чакирсанг ўлармидинг, мен ҳам борардим, – деди Асадбек.

– Топилмайдиган матоҳдай бўлиб кетган бойваччани қаерлардан қидиришим керак?

– Кўнглингда бўлса, топардинг.

– Агар сенинг кўнглингда бўлса, ошналарим омонми, деб излаб борардинг.

– Айтмасанг ҳам бораман. Болларга самоворхонада ош қилиб беришни кўнглимга тушиб қўйганман.

– Ҳа, боллар сенинг ошинингта муҳтоҷ бўлишиб, тишлари такиллаб, оч-наҳор ўтиришибди.

– Бўлди, сасима. Ҳаммаси тинч-омонми ишқилиб?

– Ҳа, ана энди ўзингта келдинг: ҳаммаси тинч. Думбули думбуллитича, алкаши алкашлигича юрибди. Алкашнинг кўнгли балиқ тусаб қолибди, «кейинги сафар баликхўрлик қилайлик», дейди. «Балиқка бошинг коронғи бўлдими?» десам, «Балиқ ҳалқумни тозалар экан», дейди. «Ол-а, сенинг ҳалқумингни тозалаш учун бутун дengизлардаги балиқлар ҳам кифоя қилмасов», дедим.

– Баъзан ҳазилни ҳам ошириб, тагига олдирворасан, а?

– Ҳазил эмас, чин гап бу. Эрта-индин элликка кирадиган аҳмоқ ичишни ташламаса, балиқ билан ҳалқумини тозалаб бўларканми? Тўлқининг нима дейди? Бир йиллик қовоқ кўрганмиш. Айвонидаги сандик орқасида битта қовоқ қолиб кетган экан, кече кўрибди. «Нима бўпти, мен эллик йиллик қовоқни кўрганман», дедим. «Қаерда кўргансан?» девди, «ана, елкангнинг устида турибди, дедим.

Асадбек жилмайиб қўйган эди, Жалил ўзининг гапидан ҳузурланиб, хаҳолаб кулди.

– Мўмин-ювош ошнанг нега қовоқ бўларкан? – деди Асадбек.

– Пешона саждага тегмаса, қовоқдан нима фарки бор?

Бу заҳарли гапдан кейин Асадбекнинг юзидағи жилмайиш йўқолди.

Манзура Жалил келтирган нондан иккитасини, иккита пиёлага солинган қаймоқни патнисда кутариб кирди-да, бирини Жалил томонга, иккинчисини эрига яқинроқ жойга қўйгач, «хуш келибсиз, олинглар», деб лутф килди. Чой қўйиб узатгач, туриб кетмоқчи эди, Жалил тўхтатди:

– Бир ажойиб гапни ўқиб, илиниб олиб келдим, сиз ҳам эшитинг.

Манзура эрига нажот кўзи билан қаради-ю, қимти-ниб ўтирди.

– «Хотининг номаҳрамни олдида ўтирмасин», дердинг-ку? – деди Асадбек пичинг қилиб.

– Кессагинг номаҳрам эди, мен акасиман. Ака амри-маъруф қилаётганда сингил ўтирса бўлаверади.

Асадбек хотинига қараб, «иложинг қанча, ўтиришга мажбурсан», дегандай кулимсираб қўйди. Жалил чойдан бир ҳўплам ичгач, чўнтағидан тўрт буклоғлик газета қирқимини олиб, ёйди-да, ўқишни бошлади:

– «Бир одам кутурган туядан халос бўлмоқ учун жар устига эгилган икки шохга осилиб, жар ёқасига оёқ қўяди-ю оёғи остидаги индан тўрт илон бош чиқариб турганини кўради. Жарнинг тубига назар ташласа, у ерда бир аждаҳо оғзини катта очиб, унинг тушишини кутиб турибди. Юқорига қараса, оқ ва қора сичқон у осилиб турган шохларни тўхтовсиз кемирмоқда. Бу аҳволдан қтулиш йўлини ўйлаётган онда сал нарироқдаги асалари уясига кўзи тушади-ю, боши узра тўпланаётган бало булутини ҳам унутиб, бармоғини болга ботириб, ялай бошлайди. Асалнинг ширинлиги унинг бошини шу даражада айлантиради-ки, натижада, у ўзининг қандай аҳволдалигини унутади. Оёқларини тўрт илон боши устига қўйганлиги

ва бу илонлар ҳар онда чақиб олишлари мүмкінлигі, сичқонлар шохларни кемира-кемира синдиришгач, аждаҳо комига тушиши муқаррарлігі хаёлидан күтарилади. Жаҳолат пардаси акп нурини түсіб күйгани туфайли оз фурсат үтмай, жарга қулаб, ҳалок бўлади».

Жалил кўзларини сатрлардан узиб, дўстига саволомуз қаради-да, сўради:

– Бу ривоятни қаерда эшитганинг эсингдами?

Воажаб, бу дўсти тушмагур уни ғоят эси паст деб ўйлайдими? Абдураҳмон табибникидаги сұхбатни унутиш мумкин эканми?! Асадбек бир нарсага тушунолмади: «Ривоятни Манзурага ўқиб бериш учун атай олиб келдими ё «сен ўша асал яловчи нодонсан», деб яна таъкидламокчими? Ҳарҳолда бу мугомбирда бир гап бор...»

– Донишманд оталар айтиб юрган ҳикматларнинг газетда чиққани яхши бўлиди. Оғзаки гап бирорнинг қулоғига ё киради, ё кирмайди.

Жалил «бирорнинг» деган сўзга ургу берганини Асадбек фаҳмласа-да, унга қарши сўз айтмади. Жалил эса бундан фойдаланиб, ўқишида давом этди:

– «Ривоятдан англашиладиган маъно: даҳшатли ва чукур жарлик – дунё. Қора ва оқ сичкон – кеча ва кундуз. Улар инсонлар умрини озайтириш, ҳалок этиш учун узлуксиз бир-бирини алмаштириб туради. Тўрт илон – борликнинг моҳиятини ташкил этган тўрт унсур: ҳаво, тупрок, ўт, сув. Булардан биронтаси ўз мувозанатини йўкотса, инсон ўша заҳоти маҳв бўлиб кетади. Асал – азоби кўп, фойдаси кам бўлган, одамларни тўғри йўлдан оздириб, уларга нажот дарвозаларини беркитган фоний дунёдир. Аждаҳо – ҳеч ким кочиб кутула олмайдиган ўлимдир. Ажал шарбатини ичишга тўғри келганида, ажал фариштаси тепангга келиб турганида ўлимдан кутулиб бўлмайди. Пушаймонлик ҳам фойда бермайди. На тавбага вақт қолади, на дуо ўқимоққа мажол.

Низомий ҳазратлари шундай ёзганлар:

Бир кун Яман шоҳин гўри устига борсам,
Кўл чўзди-ю тутди кафан, кўрсатиб карам.
Ва деди: «Бу саховатим айб айламагил,
Бу дунёда бундан бошқа йўқ бирор нарсам».

Жалил ўқишдан тўхтаб, газетани яна аслидай килиб буқлади-да, Манзурага узатди. Манзура олишини ҳам, олмаслигини ҳам билмай, эрига савол назари билан қаради:

– Манзурага бунинг нима кераги бор? Ўзингда тураверсин. Мехмондорчиликларга борганингда донолик қиласан.

– Атай ўнта газит олганман, таги сероб. Лекин битта гапингни тўғри айтдинг, бунинг Манзурга кераги йўқ. Хотининг бир ўқиб берганимдаёқ тушунди. Сен қовоқмия фаҳмига етмадинг. Манзура сенга яна эллик марта ўқиб берса, кейин тушунасан.

Бу гапдан кейин Манзура Жалил узатиб турган газета парчасини олишдан чўчиди.

– Ўзимга бер, керак пайтида ўқиб оламан, – деди Асадбек хотинининг мушкулини осон қилиб.

– Сен бунака ақли галларнинг қадрига етмайсан, ўқишингга ишонмайман, ғижимлаб ташлаб юборасан, – шундай дегач, Манзурага қаради: – Олсангчи, эрингнинг кўзига мўлтиллаб қарайвермай, одам бўлишига ёрдам бер.

Асадбек «ҳали сен одамсан-у, мен одам эмасманми», деб гап бошлагудай бўлса, Жалилнинг гап халтаси баттар очилиб кетиб, шарманда қилиб ташлашини фаҳмлаб индамади. Хотинига «ола қол, шунинг жаги тинсин», деган маънода қараб қўйди. Манзура газета парчасини олди-ю, хижолат бўлганидан бетлари кизарив, тезгина чиқиб кетди.

Жалил пиёладаги қаймоққа нон тўғраб, иштаҳа билан еди. Асадбек бир-икки тишлам нонни аранг ютиб, дастурхондан қўлини тортди.

– Маҳалланинг нонини соғинмадингми? – деди Жалил чойни хўриллатиб ичиб.

— Нонни ҳар куни маҳалладан олиб келишади, — деди Асадбек.

— Унда мен аҳмок бўлиб кўтариб келибман-да?

— Ҳайрият-е, аҳмоклигингни бир марта бўлса ҳам тан олдинг, — деб кулди Асадбек.

— Ақлли одам бир марта аҳмоклик қилса, ҳамма кўриб, ноғора килиб чалади. Аҳмок одам кунда минг бир аҳмоклик қилса ҳам бирор сезмайди, — деди Жалил тагдор оҳангда.

— Аҳмокликни тортадиган тарози бўлганида биринчи бўлиб сени тортириб кўрардим.

— Менга кичкина қўл тарози ҳам кифоя қилади, ўзингта тракторларни тортадиган катта тарози буюршишинг керак бўлади, оғайнижон!

Нонушта шундай киноялар-у заҳарли ҳазиллар билан ўтди. Жалил чойни ичиб бўлгач, пиёласини тўнгариб қўйди-да:

— Тур, кийин, Мухиддин отаникига борамиз, — деб буюорди.

— Кеча борганман, — деди Асадбек, қимиrlагиси келмай.

— Кечагинг ҳисобмас, бугун ҳажжул-масокин, саййидул айём, жумадаги зиёратнинг савоби улуғ бўлади. Гапни кўпайтирма, бўла қол.

— Жамшид бозор қилиб чиқсин...

— Бозоринг керакмас, отамнинг кичкинагина қорни бор, сенинг ҳашаматингга зорлиги йўқ. Зарур нарсани ўзим олволганман.

Асадбек унга эргашибга мажбур бўлди. Жалил отага аталган тугунчани дарвозахонага қўйиб кирган эди. Асадбекнинг беписанд қараб қўйгани унга ёқмади:

— Нега чимириляпсан? Назарга илмаяпсанми? Иккита патир, бир бонка қаймоқ, ярим кило гилос, ярим кило кулупнай, ярим кило новвот сенга камлик қилади-да, а? Сен бозорнинг ярми ни тўртта қоғозхалтага жойлаб, керилиб кириб бор-

масанг, күнглинг ўрнига тушмайди. Кеча шунақа қилгандирсан?

— Шунақа қилмадим, икки қўлимни бурнимга тикиб кириб бордим, десам сенга ёқаманми?

— Сен бир жононмидинг-ки, менга ёқсанг, — Жалил шундай деб кўча томон юрди-да, аҳдини маълум қилди: — Автобусда кета қоламиз, ярим соатли йўл.

— Жиннилик қилма, ўтири машинага!

Асадбекнинг жаҳл билан буйруқ бериши таъсир қилди: Жалил тўхтаб, амрга итоат этди.

Улар кириб келганда Мухиддин ота мутолаа билан банд эди. Меҳмонлар билан кўришиб, китобни олиб қўймоқчи эди, Жалил: «Шошманг, бир кўрай, ҳар ҳолда сиз ақлли гапларни ўқийсиз», деб кўл узатди.

— «Аввал таом, баъд аз калом», — деб кулимсиради Мухиддин ота.

Кечаке Асадбек кириб келганда ҳам Мухиддин ота китоб ўқиб ўтирган эди. Варақлар орасига қоғоз пар-часини кўйиб, китобни четта олиб қўйишини Асадбек эътиборсиз кузатганди. Ҳозир Жалилнинг китобга интилишидан мутаассир бўлиб, унинг шаштини қайтармади.

— Биз нонушта қилиб келдик, сиз ҳам чой ичгандирсиз, — Жалил шундай деб китобни қўлига олди-да, ўқишни бошлади:

— «Саба жуда катта шаҳар эди, шунчалар катта эди-ки, катталиги бир товоқча келарди... Саба шахри айни пайтда жуда улуғ, баҳайбат, азамат шаҳар эди. Шунчалар баҳайбат эдики, гўё каттакон бир пиёздай...» — шу ерга келганда Жалил сатрлардан кўзини узиб, Мухиддин отага ажабланиб қаради: — Ие, хато ёзилмаганми?

— Хато эмас, айнан шундай, — деди Мухиддин ота жилмайиб, — ўқийверинг, мағзини кейин чақиб оласиз.

Жалил «қизик», деб бош чайқаб кўйиб, ўқища давом этди:

— Бу ғалати шаҳарда уч ғалати инсон яшар эди.

Бири кўр, бири кар, яна бири эса яланғоч. Кўр узокларни кўрап, кар жуда яхши эшитарди. Учови бир жойда ўтиришганда кўр: «Қаранглар, узокда отлиқлар келишяпти, уларнинг қайси қабилага мансублнгини ва неча киши эканлигини кўряпман», деди. Кар эса: «Ҳа, ҳа, мен овозларини эшитдим. Ҳатто нима деганларини айтиб беришим мумкин», деди. Гапга яланғоч қўшилиб: «Агар бу ерга келишса, бизларни ечинтириб қўйишади», деб қўрқди. «Қаранглар, яқинлашиб қолишиди. Қани, бўлинглар, улар келмасларидан, бизларни тутиб олмасларидан, қочиб қолайлик», деди кўр хавотирланиб. Уларнинг талвасаси карга ҳам ўтди: «Бўла қолинглар, дўстлар, шовқин борган сари яқинлашяпти, вакт борида жуфтакни ростлайлик», деб ўрнидан турди. Улар шаҳарни ташлаб қочишиди Ниҳоят, бир кишлоққа етиб келишиди. У қишлоқда жуда семиз бир қушни топиб олишиди. Қуш шунчалар бокилган эдики, семизлигидан вужудида гўштдан асар ҳам йўқ эди. Ҳатто суяклари ингичка ипдай эди. Уч ўрток қуш гўштини ейишиди, қорни тўйган филлар каби семиришиди. Шунчалар тўйиб ейишиди-ки, оламга сифмай кетишиди. Шунча шишганларига қарамай, бир эшикнинг тиркишидан ўтиб, бир уйнинг ичига киришиди...»

Жалил ўқишдан тўхтади-ю, сатрлар орасидан маъно қидиргандай кўз узмади.

– Ҳа, тишинг ўтмай қолдими? – деди Асадбек унинг ҳолидан кулиб.

– Тишинг ўтган бўлса, қани, тушунтириб бер-чи? – деди Жалил пешонасини тириштириб.

– Тушунмадим, мен сенга ўхшаб доноликни даъво қилмайман.

Муҳиддин ота икки ошнанинг маънисиз баҳсига тезок якун ясаш мақсадида гапга аралашди:

– Мавлоно Румий ҳазратларининг ҳикматларини англаш осон эмас, бўтам. Қадим сўфий адабиётида маънолар рамзлар, ишоралар билан баён қилинган.

Мавлонони тушуниш учун бошқа олимларнинг шархини ҳам ўқиши керак. Шўронинг ҳозирги адабиётида бунақа маънолар йўқ.

— Ўқишига ўқидик, бизни энди пичоқсиз сўймай, маъносини тушунтиринг, — деди Жалил.

— Аввали шуки, ўқиган ҳикоянгизни енгил киноя асосида деб қабул қилинг. «Саба шаҳри» — инсон танасининг рамзи. «Шаҳар аҳолиси» дейилганда инсондаги руҳоний ва жисмоний қувватлар назарда тутилган. Демак, Саба шаҳри — инсон кўнгли экан. Кар — истак, тилакдир. У ҳаётдан кўп нарсаларни талаб қилувчи, еб-тўймас инсон рамзи. У бошқаларнинг ўлимини эшитади-ю, ўзининг ўлиши муқаррарлигини хаёлига ҳам келтирмайди. Кўр эса нафсоний хирснинг тамсилидир.

— «Тамсил» нималигини ўзбекчалаб тушунтирингда, ахир биз оми бўлсак, — Жалил «оми бўлсак»ка ургу берив, Асадбекка маъноли қараб кўйди.

Мухиддин ота бу пичингни англаса ҳам, аҳамият бермай, салмоқли оҳангода давом этди:

— «Тамсил» — «мисол» дегани. Ҳикоядаги кўр ҳалқнинг айб-нуқсонларини ипидан-игнасигача кўради, ҳатто маҳаллама-маҳалла айланиб, уларни айтиб юради. Яланғоч эса доимо «этагимни кесиб кетишади», деб кўркиб яшайди. Ахир яланғочнинг ҳам этаги бўладими? Бўлмайди! Бу ердаги яланғоч — дунёга топинган, бойликка муккасидан кетган муфлисдир. «Муфлис» — бенаво, бечора, қашшок, «илмиз, бефаҳм», деган маънолари ҳам бор. Ҳикоядаги яланғочнинг руҳи қашшок. Руҳий қашшоқлик эса илмизлиқдан келиб чиқади, — Мухиддин ота шундай деб Жалилга қараб олди. — Яланғоч бечора ечинтиришларини, яъни тунаб кетишларидан қўркиб, вахима ичидя яшайди. Ваҳоланки, у дунёга яланғоч келган, оқибат яланғоч кетади. Пайғамбаримиз алайҳиссаломнинг: «Одам боласига бир водий тўла олтин берилса, иккинчисини истайди, иккинчиси берилса, учинчиси-

ни истайди, унинг кўзини факат тупроқ тўйдиради», деган муборак гаплари ана шунака яланғочларнинг кўзини очиш учун айтилган. Ҳазрат Навоийнинг бир байтлари ҳам шу ҳакда: «Нафским, ул айши мудом истагай, сенга гуноҳ, ўзига ком истагай». Нафс кишини гуноҳга қўйиш эвазига, ўзини баҳтли қилишни истаркан. Ҳикоядан менинг тушунганим шулар. Энди меҳмоннинг иззатини килиб, дастурхон ёзмасам бўлмас.

– Сиз энг зўр дастурхонни ёзиб, энг зўр неъматлар билан сийладингиз. Биз чойга келмадик, жума намозини сиз билан ўқиши ният қилганмиз, жомега бирга борамиз.

Жалилнинг «бирга борамиз» деган гали Асадбекка ғалати туюлиб, унга савол назари билан қаради. Жалил бу қарашга эътибор бермай давом этди:

– Бундан бу ёғига ҳар жумани бирга ўқиймиз.

– Иниша Аллоҳ, инша Аллоҳ, – деди Мухиддин ота «шу гап ростми?» деган маънода Асадбекка қараб олиб. Кейин ўрнидан турди-да, тайёргарлик кўриш учун ташқарига чиқди. Асадбек «бирга борамиз», деб ўзи билан отани назарда тутгандир», деган тўхтамга келиб, гапни кавлаштиrmади. Жалил ҳам индамай ўтираверди.

Машина ярим йўлга етганда Асадбекка қараб:

– Тахоратинг бормиди ё масжидда оласанми? – деб сўради.

– Мен сизларни кузатиб қўяман, зарур ишим бор, – деди Асадбек жавобдан бўйин товлаб.

– Биз билан жума ўқимайсанми? – деб сўради Жалил зарда билан.

– Бошқа сафар... Бугун зарур ишим бор, – Асадбек шундай деб узрли нигоҳи билан Мухиддин отага қаради.

– Худонинг фарзидан ҳам зарурроқ иш бўладими? – деди Жалил, портлагудай бўлиб. – Ростдан бормайсанми?

- Кейинги сафар дедим-ку?
- Сенинг «кейинги сафаринг» кўп. «Кейинги сафарга»ча ким бор-у ким йўқ. Тўхтат машинангни!
- Жириллама, олиб бориб қўяман.
- Тўхтат, дедим, биз машинада туғилмаганмиз, автобус ҳам бўлаверади.
- Бўтам, тўхтата қолинг, ҳали вақт бор, ҳаномалашиб етиб оламиз, – деди Муҳиддин ота уларни муросага келтириш учун.

Жамшид машинани тўхтатиши билан Асадбек тушиб, орқа эшикни очди. Жалил нимадир деб ғўлдираганича, нариги эшикни очиб, тушди. Муҳиддин ота Асадбекнинг ҳақига дуо қилди, Жалил эса «бунингизнинг одам бўлиши кийин», деганича қолаверди.

– Идорага ҳайда, – деб буюрди Асадбек, машинага қайтиб ўтиргач. Шаҳар марказига жойлашган учқаватли иморатта яқинлашганда ертўладаги серҳашам хонасида димиқиб ўтиришни истамай, қарорини ўзгартириди: – Анҳор бўйига ҳайда.

– Жўжахўроларинг кўринмайдими? – деди Асадбек сув устига курилган сўри томон юриб.

Жамшид уларнинг қаердалигини айтди. Асадбек «ҳар қадамидан хабардор бўлиб тур», деди-да, кўрпачага ёнбошлади. Чойхоначи хонтахта устини бир-пасда ноз-неъматларга тўлдириб ташлади-да, «янги картошкадан димлама қилиб қўювдим, қора қўзи гўштидан қозонкабоб ҳам тайёр», деб навбатдаги амрни кутди. Асадбекнинг кўнгли димламани тусади. Пахтагулли катта лаганда ҳовури чиқиб турган таом келтирилди. Зираворларнинг ёқимли иси димокқа урилиб иштаҳани қўзгаса-да, Жамшид қилтамоқ сингари кўп емади. Асадбек буни сезиб:

– Ҳа, бугун машкинг пастроқми? Ресторанда ивирсисиб юрган экансан, кечаги майшатинг чарчатиб қўйдими? – деди.

Асадбек «ресторанда юрган экансан», деб тахминан айтган эди, мўлжални бехато урди. Бўйдоқ одам

хожасини уйига кузатиб қўйганидан кейин қаёққа бориши мумкин? Акаларининг фожиаларидан сўнг бунақа жойларга камқатнов бўлиб қолган Жамшид чиндан ҳам кеча ресторанга борган эди. Асадбекнинг гапидан кейин «биров чақибди-да», деган хаёлга бориб, бошини эгди:

— Оғайнилар ўтиришган экан, ярим соатга кириб чиқдим, — деди кўлга тушиб шармандаси чиққан ўсмирнинг айбли оҳангидаги.

— Кўзингни очиб юр, ҳозир анқаядиган пайт эмас. Оғайнининг ҳам ҳар қанақаси бор.

Жамшид ёлғон гапирди, оғайнилари баҳонасида кирмаган эди. Кўнгли тортди-ю, кирди, бошқа сабаб йўқ. Хожасига шундай дея олмайди-ку? Аслида кўнгли бекорга тортмаган экан: кириб ўтиргач, тўрда давра курган одамларнинг шовқини хаёlinи олди. Қандайдир идора ходимлари кимнингдир туғилган кунини шоду ҳурамлик билан нишонлашаётганини шу шовқин орасидаги табрик сўзларидан англади. Давра томонга беихтиёр қаради-ю... ўша хонимни кўрди.

Ҳа, ўша хоним...

Фитна қилиб уни қамоққа жўнатган хоним...

Қамоқдалигигида, айниқса биринчи ойлари, озодликка чиққанидан кейин бу хонимни жазолаш йўлларини кўп ўйлаган, лекин қутулгач, уни кўришга харакат ҳам қилмаган эди. Ҳозир тўрда талтайиб ўтиришига қараганда, бугун унинг туғилган куни.

Айнан шундай! Унутиб бўларканми? Туғилган куни арафасида бўлган эди-ку, ўша воқеа?! «Эртага туғилган куним, лекин сиз билан бугун нишонлайман», деб шампанни очган эди. Паҳлавонкелбат ўсмирни осонгина енгаман-у, қучоққа оламан, деб ўйлаганди. Лекин Жамшид унамаганди. Кейин... найранг қилди — гўё учинчи қаватдан ўзини ташлагандай бўлди... Айнан шу куни Жамшидни зўрлашга уринишда айблаб, қамоққа тикишган эди.

Тасодифни қаранг-а!

Буларни эслагач, ғашланиб, чиқиб кетгиси келди. Лекин қитмирлиги тутиб, кузатишни истади. Рақс бошланганда даврага яқинлашиб, гүзәл қызни таклиф этди. Қыз нозланмади, ўрнидан турди. Қызни билагидан ушлаб, рақс майдончасига бораётганида хоним томон қаради: күзлар түқнашди! Қызни жойига кузатиб күяётганды ҳам нигоҳлар учраши.

Кейин...

Мусиқачилар «қызлар йигитларни таклиф этишади», деб зълон қилганида хоним у ўтирган столга яқинлашди-да, нозли табассум билан, «сизни таклиф этаман», деди.

Жамшид кутилмаган баҳтдан суюниб кетгандай жилмайиб, рақс майдонига бошлади. Ёши ўтиб қолган бўлса ҳам, хоним чиройини йўқотмаган эди. Жамшид уни белидан ушлаб ўзи томон тортганда кўзлари атрофига ажин оралаганини кўрди.

– Қариб қолибманни? – деди хоним, карашма билан.

– Чиройли қызлар қаримайди, – деди Жамшид.

– Сизга тилёғламалик ярашмайди. Бу ерда учрашиб қолишимизни кутмаганингиз?

– Нега кутмайман, атай келдим-ку?

– Алдаманг, атай келган бўлсангиз... гулдаста қани?

– Гулдастами? – Жамшид уни ўзига тортиб, қулоғига шивирлади: – сизга аталган анвойи гулларни гулчилар бугун экишди, кейинги йилгача кутасиз энди.

– Илтимос, мени майна килманг... – Хоним бошини бурди, Жамшидинг қучоғидан чиқишига урингандай, ўзини нари тортди. – Бир неча марта узр сўраб бормокчи бўлдим... Биламан, мени ҳеч қачон кечирмайсиз... Лекин бунчалик шафқатсиз бўлиш йигит кишига ярашмайди.

– Сиздан хафамасман, аксинча хурсандман. Агар мени турмага тикиб қўймаганингизда нари борса, қайсиadir кавакда илмий ходимнинг жойини эгаллаб,

китоб титиб ўтирадим. Сизнинг баҳонангизда ақадемияни битириб, профессор бўлдим. Мени баҳтли қилганингиз учун оёгингизни ўпсам ҳам арзиди.

— Кўйинг бунаقا гапларни. Уйландингизми, болача қанғиз борми?

— Уйланмадим. Болам йўқ, лекин чақам кўп. Сиз ҳам турмушга чиқмагансиз.

— Қаердан била қолдингиз?

— Кўзингиз айтди...

Хоним энди унга дадил тикилди:

— Истасангиз, бугун сиз билан кетишими мумкин.

— Афсуски, бугун ҳеч қаёққа кетмайман, мен шу ресторонда қоровулман. Бир кун иш, икки кун дам. Бугун менинг навбатим, — Жамшид шундай деб хонимни ўзига яна ҳам қаттикроқ тортди. Хоним қўлдан сирғалиб чиқмоқчи бўлган балиқдай уринди-ю, эплолмади.

— Ҳалиги қиз ёқдими, истасангиз таништириб кўяман. Ярим йил олдин эрга теккан эди, эрига кўнгли йўқ.

— Агар кўлингиздан келса, менга ёпиштирманг-у, эрига иссиқ-совуқ қилиб беринг. Менга онаси ўпмаган қизлар ҳам етарли.

Жамшид шундай дегач, хонимни кўйиб юбордида, столига қайтиб бормай, кўчага чиқиб кетди. Кечаси уйқунинг тайини бўлмади, Асадбек айтмоқчи, машқи пастлиги шундан. Яхшики, хожаси битта гап билан кифояланди. Майдалаб сўраганида, нима дея оларди, билмайди.

Асадбек қўлини артиб, чой ичаётганда чойхоначи кўриниб, Жамшидни имлаб чақирди. Жамшид унинг гапини эшишиб, хожасига қараб олди. Кейин яқинлашди-да:

— Бек ака, қанақадир хондан одам келибди, сизда зарур гапи бормиш, чиқиб қарайми? — деб сўради.

— «Қанақадир хон» деганинг нимаси?

— Отига тили келишмаётганмиш.

Асадбекнинг хаёлига «Хонгирейми ё Гирейхонми?» деган ўй келди. «Ўша мараздан келган бўлса, бу жойдалигимни қайдан билибди?» деган савол кўнглини хира қилиб, пешонасини тириштириди:

— Қара, Хонгирейдан бўлса, бошлаб кел, — деб буюрди. Кейин «ошга пашша тушди» деб минғирладида, пиёладаги чойни анҳорга қараб сепиб юборди.

У адашмаган эди: Жамшид Маматбейни бошлаб келди.

— Ў, жан гардашим, сени чўх сагиндум!

Маматбей шундай деганича кучоқ очиб кўришмоқчи эди, Асадбек унга қўл учини узатди. Маматбей бундан ғашланса ҳам, сиртига чиқармади, жилмайганича давом этди:

— Хабаринг ўлдумики, буюк фожиа кўпди: Козлов гардашни Аллаҳ чакирмиш экан, иззати юзасидан жанозасига вордим. Сўнгра эса Красноярдан учиб, Асадбек гардашимни зиёрат этмай ўтиб кетар ўлсам, оғам Хонгирейнинг арвохи чирқиллаб қолажак, дедим-у, виждоним чўх қийналди. Йўлни сен томон бурдим, азиз гардашим.

«Сенда ҳам виждон борми?» — деб ўйлади Асадбек. Үғлининг ўлимида Маматбейнинг ҳам иштироқи борлигини аниқ билмаса-да, уни бўғиб ўлдиргиси келди.

Маматбей Асадбекнинг ҳолини билиб турарди. Хонгирей Асадбекнинг ақлли эканини тан олиб, «ақлли одамнинг узоқ яشاши дуруст эмас», деган, лекин ўшанда камроқ яшаши чорасини кўрмаган, шу касали билан ўлиб кетади, деб калтабинлик қилган эди. Москвадаги учрашувдан кейин Хонгирей «анча дадиллашиб қолибди-ку?» — деб ажабланганида Маматбейнинг ўзи «Княз, у эртага бутунлай синиб, чилпарчин бўлиб кетадиган одам», деб ишонтирган эди. Ҳозир Асадбекни зимдан кузатиб, «ўзига келиб қолибди, синадиган одамга ўхшамайди», деб ўйлади-да, сир бой бермай гапини давом этди:

— Билюрмисанки, Козлов гардашим Хонгирейни чўх севиор эди. Аркадашининг ўлимидан калби сиқила-сиқила инфаркт бўлмиш экан. Княз номи ила бир сиким туфракни тобути устига ташлаб, Хонгирейни-да арваҳин шод эттим. Унда Козлов ҳам ўлимин топди, энди не ўлур, гардаш?

— Нима бўларди, Козлов ўлса, ўрнига Барапов чиқар, у ўлса, Зайцеви бордир. Сенга Зайцев бўлгани дуруст, — деди Асадбек заҳарли киноя билан. Насабга доир сўз ўйини қилгани Маматбейга хуш ёкиб, кўзлари чақнади:

— Чух гўзал сўз ўлди! Аммо Козлов Красноярни қандайдир Бараповга яки Зайцевга эмас, Гирейхонга васият қилмиш экан. Бунга не деюрсан?

— Гирейхон? — Асадбек қошларини чимириди. — Моргашни айтяпсанми?

— «Моргаш» узок ўтмишда қолмиш, энди ул Гирейхандир! Билиурмисанки, Крим хони Гирей у ёғи Полша, бу ёғи Русни титратмиш эди. Бизим Гирейхан совет русини бир қўлида ўйнатажак!

— Чоғи келармикин? Даъвоси катта-ку?

— Куввати етмас ўлса, Асадбек гардаши вор-ку?

— Асадбек қардоши энди бунақа ишлардан четга чиқиб кетган.

— Билюрмисанки, гардашим, бир инсан ики қайиқка оёқ кўюб турмас. Сув дўлқуни қайиқларни ики томон сурар ўлса, оқибат не ўлур? Чати йирилур, а?

Асадбек ўзининг четга чиққанини айтди-ю, Балабуханинг гапини эслади: «Ўйиндан чиқдим, деб хомтама бўлма, бизнинг ишимизда фақат ўлган одам ўйиндан чиқади. Одам йўқми, демак, муаммо ҳам йўқ. Сел келса, барчани баравар олиб кетади. «Бу киши ўйинда йўклар», деб ўзанни ўзгартирмайди».

Сел Хонгирейни, Кесакполвонни олиб кетди. Лекин сел йилда бир келмайди-да! Кейингиси кимни

олиб кетади? Энди сел йўлида Моргаш билан Асадбек турибдими?

– Сана Гирейханнинг чўх саламлари вар.

Аблаҳ одам ҳакида гап бориб, «у қашқирнинг ўлими яқинга уҳшаб турибди», дейишганда донишманд «ўлаётган қашкирдан қўрқкули», деб огоҳлантирган экан. Кўзлари чақчайиб турган бу одам ўладиган қашкирдан салом олиб келиб, нима демоқчи? Асадбек унга синовчан тикилиб, сўради:

– Сени Хонгирейнинг ўрнини олади, деб эшитувдим, ҳали ҳам дастёрликдан кутулмадингми?

– Тарозунинг бир палласийа ўлум, икинчи паласийа ҳаёт қўюлур ўлса, гай бир аҳмак ўлумни танлийор? Анжак дастярлик чўх яхши эмасми?

– Ўша тарози ҳали ҳам турибдими ё ташлаб юбордингми? – деди Асадбек пичинг билан.

– Бул тарозу ташлаб юборилмаяжак, – деди Маматбей жиддий тарзда. – Масковдаги жан гардашинг бул тарозуни сана юбармиш ўлду. Танламак ихтияринг вордур: Бек, сан-да, ман-да гап адамлари эмасдурмиз. Лакиллаб ўлтурмакка фурсатинг йўқтур?

– Дардинг бўлса, айт, гапни ўзинг чўзяпсан-ку?

– Хангирей гардаш вафат тапду, амо, ниятлари тирикдур, сан шунинг-да, ҳисабин алмагинг лазим ўлур.

– Хўш, кейин-чи? – деди Асадбек қошларини чимириб.

– Европая таман наркотик шу ердан ўтажак ўлса, сан қаршилик қилмиюрсан.

– Мен қанақасига қаршилик қилишим мумкин? – деди Асадбек зардали овозда. – Нима, мен чегарачиманми ё милисаманми? Аникроқ гапир, балки ёрдам беришим керакдир?

– Эҳтимал... эҳтимал... – деди Маматбей мужмал тарзда.

– Яна ҳам аникроғи – мен Моргашнинг гумаштаси бўлишим керами? Ё кўппагига айланаманми?

– Бунларни Гирейхана рўпара ўлганингда ҳал

қилиб алажаксан. Сан ила музакара юритмакка манда ихтияр йўқтур. Ман деганимни дедим. Жаваба шашилмак вазифанг вар, унутма! Сана қийин ўлди, гардаш, Айдер ҳам йўқ, Маҳмуд ҳам йўқ. Энди не ўлур? Бу гардашларнинг йўқ ўлгани сан учун чўх муддао ўлди. Варисларинг тахтингга чўх ишқибаз эдилар. Худо уларни олмас эрса, сани-да олиюр эди. Ай гардаш, ўлумни ўйламакдан на фойда, кўй, ўлумни! Ўлум лабларидан ўпич алмагимиз чўх узокдир. Аллах сени-да, мени-да роҳат ила яшасун, деб яратмиш экан, ман роҳата тўйганим йўқтур. Сан-да тўймагансан! Ўйнамак ва кулмак, кулмак ва ўйнамак керак! Гулагула яша, гардаш!

Маматбей шундай деб хайрлашди-да, изига қайтди. Асадбек ичидаги сўкиниб қўйиб, унинг гапларини фикр чиғириғидан ўтказа бошлади: «Козловни эслатиб, кўлимиз шу даражада узун, сенга ҳам етиб келади», демоқчими? Огоҳлантиришдан мақсади нима? Яна қанақа шумликларни бошлаб келди бу ҳароми?! «Ўйнамак ва кулмак...» дедими? Качондир айтган эди-я, шу гапларини? Ким ўйнаб-кулади-ю, ким кафандигини кучоқлаб ётади – эндиғи ечиладиган масала шундан иборатми?»

Асадбек адоқсиз саволларига жавоб истаб ўтирганида Жалилнинг бир заҳарли гапи хаёlinи бехос ёритиб ўтди: айтилган ўша гап отилган ўқ каби қалбига санчилиб қолган, ўқтин-ўқгин ғимирлаб, вужудини ғижимлаб ташлагандай бўлаверарди: «Агар оламнинг куни сенларга топширилса, ер юзида ҳалоллик ҳам, вафо ҳам, меҳр-окибат ҳам қолмайди. Сенлар куртак очган ниҳолни синдириб ташлашдан, бойчеками ё полопонларними аямай топташдан тоймайсанлар. Ҳатто, бир-бировингни аямай янчасанлар. Нима учун Ҳайдар кессагинг билан дўстсан, айтайми? Икковингнинг ҳалқуминг бир, нафсинг бир...»

«Ҳайдар ўлимини топди-ю кетди. Энди шу ҳаромилар билан ҳамтоворқ бўламанми?»

Дунё ҳаёти узунга ўхшайди, аслида кимсани ўз бағрига олган бир нафасдан иборатдир. Ўтган дакиқа ўтмиш бўлиб қолади. Киши эришганидан ортиқ ҳеч нарсага эга бўлолмайди. Келажагининг қандай бўлишини эса билолмайди. Вақт шундай нарсаки, тун кундузнинг ўлимидан хабар беради. Туннинг бошланиши у куннинг завол топганини билдирувчи бир ишоратдир. Тинимсиз келиб кетган ҳодисалар инсонларни ўзгартиради, эскитади, қаритади. Вактнинг вазифаси жамоаларни сочиб ташламоқ, сараламоқ ва неъматларни йўқотмоқдан иборатдир. Амал узун, умр кисқа, ҳар нарса эса ёлғиз Аллоҳга қайтади.

Маматбей ҳозир эндиғи вақтнинг зиммасига жиддий масъулият юкланганини англатиб кетди: Аллоҳдан қайтишдан олдин вақт шайтанат оламини саралаб бериши керак. Ким элакдан ўтади-ю, ким ўтмайди?..

XVI б о б

1

— «Аифклерунгс» деган идорани билурмисан? — деб қайта сўради доктор Худоёр.

— Билмайман, — деди Абдусамад.

— Мутлак билмиюр эрсанг янада чўх гўзал бўлур эди. Сизда «кгб» отлиқ бир идора вордур, «аифклерунгс» шу кабидур. Энди айт-чи, не сабабдин бул идора санинг ила қизиқмоқни ихтияр этмиш?

— Билмайман, — деди яна Абдусамад.

— Билиурсан, — деди доктор Худоёр кескин оҳангда. — Турк қаҳвахонасинда ким ила ҳамсуҳбат ўлдунг?

Абдусамад «сиз буни қаердан била қолдингиз?» дегандай ажабланиб қаради.

— Сан мана бу каби ажаб ила бокма. Ул малла ўrusнинг муддаоси не экан?

— Муддаоси...

— Истагинг йўқ эрса, демагилки, ўзима маълумдир. Агарчи ул маним ила кизикиб, «нейтрон бомба яратиш юмушларида иштирок этиюр», деса, чўх адашур. Ман қайдаман-у, нейтрон бомба қайда? Бироқким, доктор Яквалхўжамга ихтиярлари ўлса, ул зотга яқинлашмок амри маҳолдур. Яқинлашмок фикридан воз кечажа-гингиз маъқулроқ эрур.

— Менинг яқинлашиш истагим йўқ. Ўша ўрис йигитда хоҳиш бор, гапириб нима қилдим, ўзингиз билар экансиз.

— Ҳа, мани-да огоҳ эттилар. Мани-да «аифклерунгс» азаматлари сұхбатга тортмиш ўлдилар. Турк қаҳвахонаси ва ўрус йигит хусусинда сўзлаган ўшал азаматлардир. Сан ўйламагинки, доктор Худоёр «аифклерунгс»нинг ҳуфяси экан, деб. Асти ундей эмас! Ҳамонки, шу туфроқ тузини totaётмиш эканман, бу юртга хизмат этмоққа бурчилидирман. Ўзга ҳақиқат йўқ. Эрта-бириси кун азаматлар сени-да сұхбатга чорлиюрлар, зийраклик ила тадорик кўра тур.

— Нимага тайёрланаман?

— Сан ўрус йигит ила яна бир кўришмак чорасини қилувинг лозим ўлур. Мақсадин очик-ойдин англа. Сўнг...

— «Аифклерунгс» айғоқчисига айланишимни таклиф қилмоқчимисиз?

— Ўзга чорамиз йўқтур. Фаннинг ҳеч бир тармоғи йўқким, ҳарбийга хизмат этмаса. Биокимёни одамлар тирик организмларнинг кимёвий таркиби ва ўнларда содир бўлажак кимёвий жараёнлар ҳақиндаги фан деб билиюрлар. Нейтрон бомбага алоқаси мавжудлиги афкор омма учун маҳфийдир. Сан ики ўт исканжасига тушганинг англамагинг жоиз. Агар «аифклерунгс» ила ҳамкорликдан бўйин товламоқ ўлсанг, бу юртда турмоғингда хавф вордур. Юрtingга қайтмоқ истасанг, «кгб» шамширига рўбарў бўлажаксан.

Абдусамад буни ўйлаган эди. Бир вактлар бо-
босини «халқ душмани» деб йўқ қилган идора уни
аяб ўтирармиди? Зулм вужуди аслидай турганини,
фақат либоси ўзгарганини у билмайдими? Шуларни
ўйлаганда «Абдуҳамидинг ўлимига ким айбдор?»
деган саволга жавоб топгандай бўлади. Отасининг
душманларидан кўра, шу идоранинг кўли бормикин,
деб гумон қилади. Москва аэропортида қорадори би-
лан қўлга олинишлари, милициянинг «маймунхона»
деб аталмиш хибсонасидан осонгина чиқиб кетишла-
ри кўп гумонларни уйғотган эди.

«Бу найрангни милициянинг ўзи қила олмайди.
Қорадори масаласида ифво қилганлари ойдек равшан
эди. Чунки қорадори Шарқдан Фарбга оқади. Бизнинг
Фарбдан Шарққа олиб ўтишимизда мантиқ йўқ эди.
Демак, бу фитнани милиция тепасида турадиган идо-
ра қилган...»

Ана энди ўша идоранинг ноғорасига ўйнашга маж-
бур. Бу ёқда яна бир ноғора чалиниб турибди...

– Эҳтимол шуки, ишингни авиация соҳасига бу-
рарсан, балки бионикага, – деди доктор Худоёр маъ-
нодор оҳангда.

– Ўрис йигитни чалғитиши учунми?

– Оре, рост. Маним нейтрон бомба ила шуғуллан-
моғим эҳтимоли ҳам вордир.

– Бунга унинг ўзи ҳам ишонмайди. Гапининг
оҳангидан сезганман. Биофизика билан биокимёни
аралаштириб юборадиган гўлга ўхшамайди. Унинг сиз
 билан иши йўқ. Сиз орқали профессор Яквалхўжага
чиқиш. Менинг вазифам икки ўргада воситачилик
қилиш. Қайси бири фош бўлса ҳам биринчи галда мен
кетаман.

– Дуруст англабсан.

– Мен фақат бир нарсага тушунмайман: Берлин
деворининг бузилишига ўзлари йўл очиб бердилар.
Икки Германиянинг қўшилиб, яна Буюк Германияга
айланиши мумкинлигини энди англаб, хавотирланиш-

яптими? Бир мамлакатнинг кучайишига шароит яратиб бериб, энди талvasага тушиши нодонлик-ку?

– Ҳақ сўз айтдинг: ўнларнинг дастидан бир-ики одам жабр қурибгина қолмай, ҳаёт чоки сўқилиюр. «Холи жой топса, тўнғиз пештоққа чикмоқчи ўлур» мақоли мазмунига мувофик, дуч келган тўнғиз, кўряпмизки, Оврупо тахтига чиқяпти. Советнинг туфроғида бўлганимда ҳайратда эдим. Бундан қарасак, коинотга эга чикмоқ тараддуудида, унга бориб қарасак, трамвай изни темир таёқ ила буришяпти. Тараққиётнинг бир учи осмону фалакда, бир учи сассиқ балчикда. Оврупога қара, минглаб қирувчи, бомбаловчи учоқлар вордир. Бироқким, ўрмонига ўт тушса ўчира олғувчи сувсепар учоқлар бармоқ ила саналарли. Ақлданми шу?

Абдусамад «Европа менга деса бундан баттар бўлмайдими!» дегиси келди-ю, устози хузурида тилини тийди.

– Сана бир ривоят айтай, дикқат ила тингла: **Тақдир**нинг бениҳоя тенгсиз гўзал, оқила қизи бор эмиш экан. «Тақдир» исмининг тагдор маъносини англаюрмисан? Қараки, бир вактнинг ўзида **Ақл**, **Давлат** ва **Умид** исмли йигитлардан совчилар келди. **Тақдир** қизини чақириб дедики: «Куёв бўлмишни ўзинг танла, қай бири сенга маъқул?» Доно қиз ўйлаб туриб жавобан дедики:

– **Ақл** инсондаги энг олийжаноб фазилатким, унинг ёрдамида дўстни душмандан, ҳушёрни эса девонадан фарқлаш мумкин. Бироқ, **Ақл**нинг бир айби борки, кишини чалғитиб, хатарли йўлларга солиб қўймоғи ҳам мумкин. «Ақллилик балоси» деб бекорга айтмаслар.

Тақдир фарзанду аржуманди сўзларидан чўх хуурланиб яна дедики:

– **Давлат** ҳакида нима деюрсан?

– **Давлат** — ишбилармон ва ҳукмдордир. **Давлат**нинг итоатида кўп нарсалар бор. Бироқ, унда вафо ўйқ. Агар ихтиёрни ўзима бериурсангиз мен **Умид**ни

танлагум. Чунки Умид ҳар қандай ҳолатда ҳам инсондан ажралмаяжак, ҳар қандайин ҳолатда ҳам вафодин чекинмаяжак, энг яқин дўст бўлиб қолажак...

Доктор Худоёр ривоятни айтиб бўлгач, маҳзун ҳолга тушди.

— Сенинг англамоғинг мушкулдир: Олмонияда ўлсун, Бирлашмиш Штатларда ўлсун ённи Саудийдами, Туркиядами, Афғондами бўлсин, яшамоқда ўлан ўзбаклар шу умидни танлаганмиз. Умид күшини юрагимиздан аълорок равишда эҳтиёт саклаймиз. Айтиб эдим, боболаримиз бизлар учун тилла-жавҳар эмас, юрт соғинчин мерос қилиб ташлаб кетмишлар.

Доктор Худоёр «бошқа гапим йўқ», дегандай стопли устидаги китобни беихтиёр чертиб-чертуб кўйди. Абдусамад унинг аҳволини тушунди. «Аифклерунгс» билан ҳамкорликдан бўйин товлаган тақдирида буларнинг тинчи ҳам бузилишини ўйлаб, чорасиз одам кўринишида тушкунликка тушди. У айни чоқда маслаҳатга, кўпни кўрган доно одамнинг насиҳатига муҳтоҷ эди. Рўпарасидаги доно одам у истаган йўлни кўрсатиб бера олмади.

Отасининг паноҳида эмин-эркин яйраб юрган кунлари қани? Ҳамма атрофида эди, таъзимга шай эди, дўстлари бениҳоя кўп эди...

Қани улар?

Ҳаёт нақадар бешафқат!

Атрофини юзларча, ҳатто мингларча одамлар ўраб тургани ҳолда ёлғизлик балосидан жабр чекса...

2

Солиевнинг касалхонада хушсиз ётганини эшитган Зоҳид, барча ишини четта суриб, устозини зиёрат қилишга шошилди. Лекин уни кўриш насиб этмади. Даволовчи врач: «бехуш одамни кириб кўрганингизнинг нима фойдаси бор?» деб эътиroz билдирса ҳам, Зоҳиднинг ялиниши туфайли, касалхо-

на тартиб-интизомини бузишга мажбур бўлди. Зоҳид хона эшигини аста тақиллатганда ичкаридан Солиевнинг хотини чиқиб, «кирмаганингиз маъкул» деган маънода остонаяда туриб олди. Зоҳид саломлашгач, кўлидаги қоғоз халтани унга узатиб:

– Тузукмилар? – деб сўради.

– Худога шукур, бугун яхшилар, икки марта ўзларига келдилар. Кейингисида сизларни ҳам сўрадилар.

– Олдинги куни телефонда гаплашувдим, яхши эдилар... – деди Зоҳид афсусли оҳангда.

– Кечаси юраклари тутиб қолди. Иккинчи хуружи қаттикроқ бўларкан. Худодан умид қилиб ўтирибмиз...

«Балки топилиши қийинроқ дори керакдир?» деган гапига хотин «ҳамма нарса етарли», деб, орқасига ўгирилиб, хона ичкарисига хавотир билан қараб олгач, Зоҳид узр сўраб, изига қайтди. Ишконасига боргиси келмади. Бир оз пиёда юрди. Касалхонадан узоклашгани сайин кўнгли ғаш бўлаверди. Гўё Солиев унинг изидан норози киёфада тикилиб, «мени шу ахвода ёлғиз ташлаб кетяпсанми?» дегандай бўлаверди.

Солиев биринчи хуруж билан касалхонага тушгандада ошнаси ачиниб, «инфаркт бўлгандан кўра, елкасиданми ё сонидамни яралангани минг марта яхши эди, шу касал туфайли ишдан кетиши инфарктнинг ўзидан ҳам ёмонрок», – деган эди. Илёсов билан бу ҳақда бир марта гаплашган бўлса ҳам, Зоҳид нима учундир уни кўп эслайди. Ҳозир ҳам унинг гаплари кулоғи остида жаранглагандай бўлаверди:

– Умр бўйи кўчада юрган одамнинг бундан бу ёғига «энди яна қачон инфаркт бўларкинман, иккинчи сида ўлармикинман ё учинчисидами?» – деб уйда Азроил келишини кутиб ўтириши осонми?.. Одам одамини беш дақиқами ё икки соатми кутса, бетоқатланади. Ҳар дақиқа, ҳар соатда ўлимни кутса-чи? Инфаркт

нима ўзи? Юрек касаллигими? Йў-ўк... бу шунчаки хасталик эмас, аслида Азроилнинг ташриф қоғози. Куттилганга нисбатан кутилмаган меҳмон анча дуруст...

«Адолат сўқмоғи билан бориб, ҳақиқатга етмоқчи бўлган одамнинг топгани шуми энди?» – деб ўзига ўзи савол берди. Жавобни эса Солиевнинг ўзи шивирлаб айтгандай бўлди:

«Ким айтгани эсимда йўқ, бир донишманд: «Адолат кучли, куч эсаadolатли бўлиши керак», деган экан. Менинг ишларим бошқачароқ бўлди: кучсизadolат ваadolatsiz куч – икки даҳшат муроса қилди...» Биринчи юрак хуружи билан касалхонага тушганда шундай деган эди...

Кўнгли ғашланган киши хаёlinи тўзитиб ташлаётган саволлар жиловини бўш қўйса, баттар кийналди. Дунёдаadolат излаган камми? Узи-чи? Адолат излайман, деб илмдаги йўлинини йўқотди, энди нимани топяпти? Худо унга риёзиёт оламини ҳайратга кола оларли қобилият берган эди. Риёзиёт осмонининг ёрқин юлдузи бўла олмаган тақдирда ҳам, дунёning мана-ман деган риёзийлари орасида, шубҳасиз, ўз ўрнини топарди.

Акасининг фожиали ўлими, терговчи-ю ҳакамларнинг номардлиги Зоҳиднинг умидларини парчалаб ташлади. Унинг қулоғи остида кимдир: «риёзиёт йўлинини ташлайсан, ҳуқук илмини оласан, бу абраҳларга қарши курашасан,adolatни тиклайсан, бечораларга суюнчиқ бўласан», деб минфиirlайверди. Бу гаплар ўшанда унга ҳақиқат бўлиб туюлди. У ҳозир ҳам сонлар назарияси билан шуғулланиши, дифференциал тенгламаларни ечиб бериши, ҳатто катта олимларнинг курби етмаётган Ферма теоремасини исботлашга уриниши мумкин. Бироқ, йиллар бўйи тинимсиз уринса-да,adolat формуласини ечишга тиши ўтмаяпти. «Не-не алломаю донишмандларни юз йиллардан бери ўйлантириб келган бу масалани ечишга менинг қурбим етармикин?» деган савол ўзига бўлган ишончсизликни тобора мустаҳкамлаб борарди.

Ҳақиқатта кўрсатиладиган энг катта лутфу карам – унга амал қилмоқлик, дейдилар. Аммо дунёда ҳеч нимага ҳақиқатчалик машаққат билан эришилмайди. Ҳақиқатни излаш, унга етиш учун ойлар, баъзан йиллар зарур бўлади. Ҳаёт шундайки, бунда ҳақиқатдан кўра хатони топиш осонрок. Хато кўриниб туради, киши уни дарров пайқайди, ҳақиқат эса пинҳона – яширинган бўлади ва уни ҳар ким ҳам топавермайди. Ҳақиқатга етишмоклиknинг энг биринчи шарт – ҳақиқатни чинакамига севмоқлик эканини барча ҳам билавермайди. Зотан, факат ҳақиқатгина чинакам гўзалдир, факат угина меҳр-муҳаббатга лойикдир. Ҳақиқатни шунчаки севиш ва тил учида гапиришнинг ўзи кифоя эмас, ҳақиқатни бирон-бир улуғ мақсадни кўзлаган ҳолда юрак-юракдан севиш ва гапириш лозим бўлади. Киши бирор фойдали ҳақиқатни очгучи, юзларча одам омадсиз изланишлар ва аянчли янглишишлар билан ўз умрини ҳазон қилмоғи ҳам мумкин. Ҳақиқат излаш вақтичоғлик билан эмас, ҳаяжон ва ташвишлар билан ўтади. Бироқ, шунда ҳам барибир уни излайвериши керак, акс ҳолда, ҳақиқатни топмаган, уни севмаган одамнинг ҳалок бўлмоғи тайин. Ҳақиқатни ўргана туриб уч мақсад кўзда тутилади: уни излаб топиш, топгандан сўнг, албатта исботлаш, ниҳоят, ҳақиқатни изоҳлаб, исботлаётганда уни сохталиқдан ажратабилмоқлик шарт.

Ҳақиқатга етиш бир-икки жиноятчини фош этишдангина иборат эмас. Агар ҳаётнинг мазмуни факат шундангина иборат бўлса, демак, ҳақиқат ҳеч қачон қарор топмайди. Чунки, майдонни бир жиноятдан тозалаб улгурмасидан, иккинчиси сел каби ёпирилиб, балчикка тўлдиради. Солиев ўзини ҳазонрезгида ташвиши ортувчи кўча фаррошига ўхшатиб: «сарғайиб тўкилган баргларни супуриб, энди нафас росттайман, деса, шабада туради-ю, кўчани яна аввалги ҳолига келтириб кўяди...» – деб маъюс кулимсираган эди. Ҳозир Зоҳидни шу маъюслик таъкиб этди.

Касалхонадан икки бекат наридаги уйда илмдаги устози Ҳабиб Сатторов яшарди. Ҳаёллари ҳукмига ўзини топширган Зоҳид сувоқлари кўчиб, олачалпок бўлиб кетган, кўримсиз етимдай мунгайиб турган тўрт қаватли уйга келиб қолганини ўзи ҳам сезмади. «Нимага бу ерга келдим?» деб ўйлаб, тўхтади. Бу уйга келмаганига бир йилдан ошган эди, устозини кўрганидан бери ҳам кўп ойлар ўтди. Неча марта йўқлайман, деди-ю, турли ишлар баҳона бўлиб, зиёратни галга солаверди. Энди оёклари бошлаб келибди.

Аста зинадан кўтарилди. Тұртинчи қаватдаги ҳаворангга бўялган ўша ёғоч эшик... Олдинги келганида бола қўли билан бўрда «проф. Ҳабиб Сатторов», деб ёзиб кўйилганди. Бирор артиб ташлаганими ё вақт ўтиши билан ўзи ўчиб кетганми, ҳарҳолда ёзув кўринмади. Кўнғироқ тугмасини босди, овоз бўлмади. Олдин келганида устозининг ўзи текшириш учун тутмани учинчи босгандан ичкаридан булбул овози келган эди. «Болалар тутмани ўйнайвериб, ишдан чиқарганга ўхшайди», деб баҳона қилганди. Ҳозир учинчи марта босгандан кейин ҳам кўнғироқ ишламади – булбул сайроғи эштилмагач, эшикни аста тақиллатди. Эшикни профессорнинг бўйи етган қизи очиб, Зоҳидни дарров таниди, салом берди-да, «кираверинг, дадам уйдалар», деб ичкарига бошлади. Аввал қиши пайтида келган, томдан чакка ўтаётгани учун дे-раза томонга тоғоралар, ўртадаги стол устига эса кўк пластмасса челак кўйилган эди. Бу нарсалар йўклиги учун Зоҳидга хона кенг бўлиб кўринди. Ҳабиб Сатторов чикиб, хушнудлик билан кўришди-да, уни иш хонасига бошлади. Чап томонни эгаллаган жавон китобларга тўла. Стол усти ҳар доим батартиб бўлгучи эди, коғозларнинг ёйилиб ётиши, ёндафттарларнинг бетартиб сочилиши Зоҳидни ажаблантирди. Шогирдининг савол назарини уқкан профессор кулимсираб, изоҳ берди:

– Чанг артаятувдим. Жавон бўлди, стол усти колувди.

– Қизлар уйда экан-ку? – деди Зоҳид.

– Агар хонамни қизларим йиғиштиrsa, кейинги кунларим қоғозларимни қидириш билан ўтади. Қайси китоб қайси жойда турганини кузимни юмиб туриб ҳам топаман. Қизларим чанг артса... бу ёғини тушунгандирсан? Хонамни ўзим йиғиштиrsам, кўп кунлик, ҳатто кўп ҳафталик кўнгил ғуборларим ҳам тарқаганга ўхшаб, енгил тортаман. Агар хона чанг бўлса ёки шипнинг бурчагини ис босса, тамом, ишнинг баракаси кетади. Карра жадвалга ҳам каллам ишламай қолади.

Зоҳид унинг бу фазилатини яхши билади. Уйда ҳам, ишхонасида ҳам ҳамиша батартибликка, озодаликка амал қилишни устозидан ўрганган. Ҳамдам Толипов билан бирга ишлаганида шериги учун ҳам хонани йиғиштириб туришга мажбур бўларди. Ҳамдамнинг бундай тартибга тоқати йўқ, ўз ибораси билан айтганда, унга «ит ётиш – мирза туриш» ёқарди. Бетартиб ташланган қоғозлари ичидан кераклисини қидириб хуноб бўлса ҳам, тартибга ўрганай, демасди. Зоҳиднинг озодалигини кўриб, «сен милиса эмас, хирург бўлишинг керак экан», деб куларди.

Ҳабиб Сатторов Зоҳидни ўтиришга таклиф қилди:

– Чойни ҳам шу ерда ичамиз, – деди у, кейин муҳим нарсани эслагандай қўшиб қўйди: – Кеннаинг чиқмаганига ажабланма, бугун бизникида «учинчи жаҳон уруши» бўлиб ўтди.

Бу хонадонда тилга олинган «уруш» у ёқда турсин, эр-хотин орасида оддий аразлашув ҳам бўлиши мумкин эмасди. Ҳабиб Сатторов майда-чуйда гапларга парво қилмас, хотинининг феъли ҳам кенг эди. «Баҳслашиб, масала талашиш учун менга фан майдони ҳам кифоя қиласди, оила майдонини жангу жадалсиз генерал хонимга топширганман», деб ҳазиллашарди. Бугун «учинчи жаҳон уруши» бўлиши?!

– Ажабланяпсанми? – деди профессор. – Ўртанча қизимга совчи келавериб, чарчатиб юборди. Каттасига бирор оғиз солмай турибди. Кеннаингга «ўртанчани

узатаверайлик», десам күнмайди. Сингил олдин эрга тегса, опасини бирор олмай қўярмиш. Шунақа теоремани эшитганмисан? Опа-сингиллар орасида қатъий навбат белгилаб қўйилганидан хабаринг борми?

Зоҳид қай томонни қуллашни билолмай, мужмалик билан:

- Бу бир одат-да, – деди.
- Берлин девори йикитилган пайтда биз битта кичкинагина одат тусифидан ошиб ўтсак халқ душманига айланамизми?

Ҳаёт тажрибаси етарли бўлмаган Зоҳид оиласи миаммолар бўйича жўяли бир гап айтишга ожиз эди. Шу сабабли устозининг саволини жавобсиз қолдирди. Стол четидаги ўн икки варакли дафтарлар тўплами дикқатини олиб, устозига савол назари билан қаради.

– Болаларнинг назорат иши, – деб изоҳ берди профессор бу қарашнинг маъносини англаб.

– Қайси болалар? – деди Зоҳид ажабланиб.

– Эшитмабсан-да, мактабда ўқитувчилик кильяпман. Сенга кулгили туюляптими ё ачинарлим? Ҳа... академикликка номзоди қўйилган, Англиянинг нуфузли университетига таклиф қилинган, Москвада обрў топиб ишлаши мумкин бўлган одамнинг паст кетиши ё хорланиши бўлиб туюляптими сенга?

– Унақамас, лекин ҳарҳолда... – Зоҳид фикрини очик баён қила олмади.

Солиев: «одамлар адолатни севишлари учун уларга адолатсизлик оқибатларини кўрсатиб туриш керак», деган эди. Дунёнинг нуфузли дорулғунунларида ишлашга лойик кўрилган олим – Кембриж университети фахрий профессорининг оддий бир мактабда оддий ўқитувчилик қилиши адолатсизлик эмасми? Бу адолатсизликни кимга кўрсатиши керак. Бу адолатсизликдан кимлар ибрат олиши керак? Ибратнинг ҳосиласи хайрли бўлармикин?

Зоҳид гапиролмай, чайналиб қолган бўлса-да, устози уни тушунди.

– Кеннайинг ҳар куни маломат қилади. Нима, мен амалпарат Соҳиб Пўлатовга хизмат қилиш учун дунёга келганманми? Қаерда бўлса ҳам фанга хизмат қилиш муҳимроқ эмасми? Айт, тўғрисини айт менга!

– Муҳими... Соҳиб Пўлатовга, ҳатто фанга эмас, ҳакиқатга хизмат қилиш зарурроқмикин?

– Ҳа, қойилман! Сен математикани буткул унубтиб, милиса сифатида фикрладинг. Укам ўзини ўлдирмасидан олдин «дунёниг тузилиш формуласини яратдим», деб ҳакиқатни нолга тенглаштирган эди.

– Буни айтган эдингиз. Яқинда Элчин билан гаплашганимда, у ҳам айтди. Лекин...

– Ланжлик қилмай айтавер фикрингни. Милисаҳонангда бу мавзуда фикр юритадиган ҳамсухбатинг йўқдир?

– Милисаҳонадан кетганимга анча бўлди, прокуратурадаман, – деб изоҳ берди Зоҳид.

– Мен учун бунинг мутлақо фарки йўқ, – деб, мезбон хатосини тан олмади.

– Укангизнинг формуласи менга ҳам ёқсан, лекин ҳосила бир ёқлама бўлиб қолган. Формуланинг бошқа ечимларини ҳам излаб кўриш керак, бўлмаса яшашнинг қизиги қолмайди. Хуллас, укангизнинг ҳаёт формуласига танқидий ёндашиш тарафдориман, ҳеч бўлмаса, нисбият назариясидан четга чиқмай қаралса, тўғрироқ бўлар.

– Фикрларимизда яқинлик бор: дикқат қил-чи, ҳозир исбот этилган нарсалар илгарилари фақат тасаввурда мавжуд бўлганми? Бугун ҳакиқат деб эъзозланаётган қанчадан-қанча нарсалар-чи, то рўёбга чиқарилгунича хурофотга ўхшаб туолган. Ҳатто бу ҳакиқатлар аввалига масҳараланган. Тарихга қараб туриб, ҳар қандай таълимот уч босқичдан, таъбир жоиз бўлса, уч чиғириқдан ўтган, дейиш мумкин. Аввалига, уни «ақлга сифмайди», деб инкор этадилар. Ҳатто хуруж қиласидар. Кейин бу таълимотда озгинагина ҳакиқат борга ўхшайди, деб тан ола бошлидилар.

Ниҳоят, унинг ғоят мухим, оламшумул эканини тан оладилар-у, сўнг «уни мен очдим!», «йўқ, сен эмас, бу менинг кашфиётим!» деб талаша бошлайдилар. Улар обрў талашаётган пайтда бу кашфиётга йўл очган, боши балоларга қолган одам гўрда чириб ётган бўлади... Эслагин-чи, автогенни ихтиро қилган олимни дўстлари масхаралашганми, кашфиёти инкор этилганми? Уғрилар эса кизиқиб, сотиб олишган. Бир неча ойдан сўнг Лондон банкидаги энг мустаҳкам пўлат сандик автоген ёрдамида кесилиб, пул ўмарид кетилган... – Ҳабиб Сатторов баҳсни юмшатиш мақсадида гапни ҳазил оҳангига бурди: – Сен эса кашфиётнинг қадрига етадиган ўғриларни қамайман, деб излаб юрасан. Нисбият назариясини тилга олдинг, дуруст, баҳслашмайман, энди айт-чи, фанга нисбатан олганда ким жиноятчи? Янгиликни инкор этган олимларми ё янгиликка йўл очиб берган ўғриларми? Инкор этувчилар олимнинг бебаҳо ҳаётини ўғирлаганлари учун жазога тортилмайдилар-а? Чўнтақдан ўғирланган ўн сўм учун қамайсан, олимнинг ўн йиллик умрига зомин бўлганга гинг дея олмайсан. Сенинг ҳақиқатинг шуми?

Ҳабиб Сатторов усталик билан мавзуни бошқа томонга буриб юборди. У мактабда ишлашининг бошқалар томонидан мухокама қилинишини истамасди. Бу масалада олимлар орасидаги дўстларининг танбеҳ беришлари тушунарли, мактаб ўқитувчиларининг ўзаро висир-висирлари кўп ажабланарли эди. «Шундай олим одам мактабимизда ишляяпти, фарзандларимизга билим беряпти» деб фаҳрланиш ўрнига «ишидан нима учун ҳайдалган экан?», «нима учун урилиб кетибди?» деган бемаъни саволларга ўралалиб, бемаъни жавоблар топишлари унинг дилини оғритарди. «Ишдан урилиб» кетиши сабаблари орасида ёш шогирд кизни зўрлашдан тортиб, зўр иқтидорли олимни заҳарлаб ўлдиришгача жиноятлар балчиғи мавжудлиги ҳам кулгили, ҳам аянчли ҳол эди. Шундай муҳитда

бу олим одам яйраб-қувнаб ишляяпти, дейилса ким ишонаркин? «Юрган эканман-да, катта даргоҳларга осилиб, мактабда мазза қилиб юрибман», деганига ўзи ҳам ишонмайди. Бирок, бошқаларни ишонтиришга уринади.

Мактабда қандай найранглар борлигини Зохид билмас эканми? Енгил масалани ҳам еча олмайдиган ўқувчининг «олтин медал»га асосий даъвогар бўлиши, ўқитувчидан тортиб, директоргача бой ота-оналар олдида паст кетиши билан бу олим муроса қила олар эканми? Мактабда мингта бола ўқиса, шуларнинг нечтасида қобилият бор, нечтасига математика илми керак? Математикани пул сана什ни ўргатадиган фан деб билувчи нодонлар қанча?

Ҳозир устозининг гапини бўлиб шуларни айтсинми? Ярасини янгиласинми?

Ҳабиб Сатторов худди шогирдининг фикрини ўқигандай, бирдан хомуш тортиб, аввалги мавзуга қайтди:

— Ўқишини ташлаб, бу соҳага ўтиб кетганингда мен сени фанга нисбатан хиёнат қилдинг, деб айبلاغан эдим. Сезиб турибман, ҳозир сен менинг гарданимга шу айб юкини ортиб ўтирибсан. Лекин янглишасан, сенинг йўлинг чиндан ҳам хиёнат эди, менини ундей эмас. Сенам бошқаларга ўхшаб «Нега чет элга кетмадингиз?» деб маломат қиласан? Соҳиб Пўлатов мени ишдан бўшатганида бир гуруҳ илмий ходимлар норози бўлиб, Академияга хат ёзишибди. Шунда «бекор қилибсизлар, ўзим ариза бериб бўшамоқчи эдим, Москвага кетаман, бу ердаги ноҳақликлар жонимга тегди», деганимда келиним Хонзода «Московда ҳақиқат бор эканми?» деб киноя қилган эди. Бу ҳақда укам билан ҳам баҳслашиб, «Менга ҳақиқат эмас, илмий иш учун шароит керак», деганимда, «Ҳақиқат йўқ ерда шароит ҳам бўлмайди. Московдаги домлангиз бошингизни силагани билан «кора-қура келгиндиilar нонимизни еб кетишаپти», дегувчилар кўп эмасми-

кин?» – деб оғзимни очирмай қўйганди. Ҳозир сенинг ҳам шунаقا дегинг келяпти. Тұғри, четга жўнавориш мен учун қийин эмас. Тарихга қарагин, Али Қушчидан тортиб, Хоразмийгача барча энг зўр олимларимиз четга кетаверган, тўғрими? Бунга чек кўйиш зарур эмасми? Ҳеч бўлмаса сен тушун: мен юртим учун керакман.

– Ракибларингиз «юрга мен керакман» деб даъво қиласверса, илм бир ёқда қолиб, ўзаро тортишувларингиз давом этаверадими?

– Бу олишувларнинг охири бор. Телевизор қўрасанми ҳеч? Депутатларинг масала талашиб, муштлашиб кетай дейишяпти-ку? Диққат қил: советинг чокчокидан сўқилай деб турибди. Сахаров яратган водород бомбасини ишга солмади-ку, лекин ҳар бир гапи бомба бўлиб портлаяпти. Горбачёвинг бу портлашларга чидаёлмайди. Ана шунда юрга биз керак бўламиз.

Ҳабиб Сатторов шундай деб ўрнидан турди-да, узрли нигоҳ билан меҳмонига қаради:

– Чой кирмади, демак, «учинчи жаҳон уруши»нинг даҳшатли оқибатлари тугатилгани йўқ. Кеннайингга чиқиб, «узил-кесил мағлуб бўлганим ҳақидаги капитуляцияга» имзо чекиб, шунинг эвазига бир чойнак чой дамлаб келай. Албатта, кеннайинг «намунча дарров енгила қолдингиз», деб менга ишонмайди. Шунда Зоҳиджоннинг ўткир дипломатияси туфайли чекиндим, дейман, сен эса буни тасдиқлайсан.

Зоҳид устозининг бу ҳазилидан мамнун бўлиб, кулганича ўрнидан турди:

– Бу соҳада менинг дипломатик тажрибам йўқ, аралашмай кўя қолай.

– Ҳа, айтмоқчи, ўғриларинг билан дипломатик музокаралар олиб бормайсан-а? Демак, акангни жангужадал бўхронларига рўпара қилиб кетаверасанми?

Шу пайт эшик очилиб, мезбоннинг хотини патнисда чой-нон, ширинликлар кўтарганича кириб келди. Зоҳид билан саломлашиб, ёзув столининг бир четини бўшатди-да, дастурхонни тўрт буклаб солди.

— Мехмонхонага чиқа қолсанглар бўлар эди, — деди Эрига қараб.

— Уруш асоратлари тугамай туриб, чиқишдан кўрқдик, — деди Ҳабиб Сатторов кувлик билан кўз қисиб.

— Гапингиз курсин, кўйинг, совуқ нафас қилманг, — деди хотин Эрига гина қилиб. Кейин меҳмонга қарди: — Зоҳиджон, акангизга насиҳат қилиб кўйинг, қариганда бўлар-бўлмас гапларни гапирадиган бўлиб қолдилар. Бошларидаги «катет-гипотенуз»ларни сал четга суриб, «оила, тирикчилик ташвиши, қизларнинг баҳти», деган тушунчаларга ҳам жой берсинлар.

— Хоним, хоним, илтимос қиласман, урушга милисаларни тортманг. Мен енгилганимни тан олиб, ҳузурингизга чиқмоқчи эдим, яна тил замбарагидан ўкка тута бошласангиз, фикримдан қайтаман.

Хотин бу кинояларни эшитмагандай, Зоҳидга қараб ҳол-аҳвол сўради:

— Олдин келганингизда адангизни айтувдингиз, оёқлари синганмиди ё беллари чиқканмиди? Яхши бўлиб кетдиларми, ишқилиб Худо шифо берсин...

Шундай деб дуо қилиб чиқиб кетди. Зоҳид устозининг зўри билан бир пиёлагина чой ичгач, тез-тез келиб туришга ваъда бериб, хайрлашди.

«Тез-тез келиб тураман», деди-ю, бироқ, ваъдасига ўзи ҳам ишонмади, устози ҳам. Йилда бир келишини «тез-тез» деб аташ мумкин бўлса, демак, орадан яна ойлар ўтаркан. Яқинлари билан хайрлашув вақтида «тез-тез келаман» деб ваъда берувчилар, ваъдага вафо қилмовчилар ҳаётда кўп. Ваъдасини унугланган киши ўша яқин одами билан бир йилдан сўнг учрашгудай бўлса, турмуш ташвишларини баҳона қиласди. Кунда, кун ора чойхонадаги ошхўрликдан бўшамайдиган одам ҳам «ишим шунақанги кўп-ки, ўзим билан ўзим ўралашиб қолдим», дейди. Яқин кишиси эҳтимол гина қилар ё эътибор бермас, бу жiddий масала ҳам эмас, муҳими — дийдор Қиёматга қолмаса бас... Зоҳид чой-

хонада валақлаб ўтиrmайди, иши чиндан ҳам кўп, баъзан овқатланиш у ёқда турсин, бош қашишга ҳам фурсати бўлмайди. Лекин кўнгил чопса, якинларини зиёрат қилиш учун вақт топса бўлади. Мухими – кўнгил!

Даҳлиздаги телефондан Саид Қодировга қўнғироқ қилган эди, «тезроқ келинг, зарур гаплар чикиб қолди», деган топшириқ олиб, ишхонасиға шошилди.

Зоҳид бу чорловни эшитгач, «ашулачининг ўлимига доир иш бўйича ҳисобот талаб қилишса керак», деб ўйлади. Бу идорада ҳеч қачон «ишни пухта ўрганиб, қалаванинг учини шошилмай, адашмай топинг», дейишмайди. «Ишни нега чўзяпсиз?!» – катталарнинг талаби шу саволга жамланган бўлади. Зоҳид милиция олиб бораётган қидирув ишлари билан танишиб, марҳум ва йўқолган ашулачининг яқин дўстлари билан гаплашди-ю, лекин, содир бўлган жиноят хусусида ҳали аниқ бир тўхтамга келолмади. Шунга қарамай, раҳбарларга айтадиган гапларини тайёрлаб кўйди. Ишхонасиға бориб, тўғри Саид Қодировга учрашди.

– Бирпас йўқлигингизга ҳамма ёқни жиноят босиб кетди, – деб, гапни ҳазил оҳангода бошлади. – Ё эшитдингизми?

– Нимани? – деб сўради Зоҳид таажжубланиб.

– Ахлатхонадан яна битта одамнинг жасади топилган, тўғрироғи, дайди итлардан қолган суюклари... Экспертизанинг дастлабки хulosасига қараганда, жasad европа миллатига мансуб одамники, ёши ўттизларда... Шу маълумот етарлими? – Саид Қодировнинг кейинги саволи киноя оҳангода бўлди.

– Маълумот керагидан ҳам кўп, – деди Зоҳид худди шу оҳангда. – Яна ўша ахлатхонами?

– Яна ўша ахлатхона, яна ўша аҳвол, – деб тъкидлади Саид Қодиров. – Энди биз нима қилишимиз керак: ахлатхонадаги дайди итларни отиб ўлдириш ҳакида буйруқ берилган эди, ҳалигача бажаришмабди.

– Сабаби оддий: итларни топишса милтиқни қидиришади, милтиқ топилса, итлар йўқ.

– Бу муттаҳамларни қаранг: бечора итларни ҳам жиноятга тортишяпти-я! Ҳангомани эшитинг: бир одам машинасида кетатуриб, йўл ўртасида ётган итнинг ўлигини кўрди. У ўзининг итини таниди, машинасини секинлатди, аммо тўхтамади. Ёнидаги ҳамроҳига қараб: «Олапарнинг куни битиби, эрталаб кўринмай қолган эди-я!» – деди. Ит умр бўйи унга садоқат билан хизмат қилган эди. Ўлимига ҳам шу садоқати сабаб бўлди – хўжайинининг ошхонасидан гўшт ўғираётган мушукни кувиб бораётганда машина уриб кетди. Итнинг садоқатига хўжайини хиёнат билан жавоб берди. Агар дунё айланиб келиб, бу одамнинг бошига шундай кун тушса, ит хўжайинининг жасадини ташлаб кетмаган бўларди. Европаликлар итни яхши кўришларини биласиз. Уй ичидаги ҳатто тўшагида олиб ётадиганлар ҳам бор. Кўчаларда ит билан атай сайр қилгани чиқишиди. Лекин Лондонда ит билан қабристонга кириш негадир тақиқланган экан. Яқинда бир одам ўлибди-ю, ити эгасининг қабрига келиб ётиб олибди, ҳеч нима емабди ҳам, ичмабди ҳам. Шу ётишида охири ўлибди. Итнинг вафодорлигидан таъсирланган лондонликлар итларнинг қабристонга киришига рухсат беришибди. Кўрдингизми, уларнинг итлари ҳам маданиятли. Бизнинг дайди итлар прокуратурага керак бўлиб қолар, деб озгина бўлса ҳам ашёвий далил қолдирмай, ўликни ғажиб ташлашади.

Сайд Қодировнинг пичингларига жавобан жилмайиб қўйган Зоҳид жиддий оҳангга кўчди:

– Ўликнинг кийимлари қолгандир?

– Ҳа, отангизга балли! Криминалистлар ўрганишяпти. Лекин шими Киевда тикилган, пойабзали Ригада ишланган бўлса, ўзининг изини қаердан қидирамиз? Биласизми, аслида итларга раҳмат дейишимиз керак. Юнусобод томондаги ташландик бино ертўласида икки одамнинг қолдиқлари топилган. Хато гапирмадим, ахлатхонадагига ўҳшаган суюклари эмас, суюкларнинг қолдиқлари... У ёққа ит кирмаган, мурдаларни икки оёкли жонзот кислотада куйдириб ташлаган.

— Бу ишларни ҳам бизга юклашдими?

— Йўқ, азизим, бизнинг бахтимиз ҳам айнан шунда.

Бу билан бошқалар шуғулланишиади. Буни мен янгилик сифатида айтдим-қўйдим. Сизга тегишли янгилик бошқа: Дониёр Жасуров деган одамни танийсизми?

— Йўқ... лекин номи танишга ўхшайди.

— Шаҳарнинг бели бақувват казо-казоларидан бири. Демак, Асадбек билан яқинлиги бор. Асадбекни юрак-юракдан севмаса ҳам, ё хизматини қилади ё бир четда мутелик билан кўл қовуштириб туради, — Саид Қодиров шундай деб столи тортмасидан бир сурат чиқариб, Зоҳидга узатди. Унда Асадбек билан кўшкўллаб кўришаётган Дониёр акс этган эди.

— Энди эсладим, — деди Зоҳид, — бу одамни Асадбекнинг тўйида кўрган эдим. Кислотада куйганларнинг биттаси шу эканми?

Бу гапни эшитиб, Саид Қодиров кулиб юборди:

— Қаҳрингиз жуда-а қаттиқ, азизим, — деди ёлғон пўписа оҳангига. — Бу одам куйдириб ташлайдиган даражада хавфли эмас. Уни каламушга ем қилишган.

— Қанақасига?

— Икки сонини чилвирда боғлаб туриб, шимининг ичига оч каламуш ташлашган. Терини салгина тилиб кўйган бўлишса, озгина қон чиққану жониворнинг иштаҳасини очиб юборган. Энди олдинги йилдаги қотилликни эсланг: йўл четидаги дарахтга бир одами осиб, ёқиб юборишган. Мұҳими – аввал эркаклигини кесиб ташлашган. Каламуш жазонинг янгича тури эмасми?

— Иккала жиноят битта одамнинг иши демоқчимисиз?

— Битта одаммасдир, бунда жиноятчи гурухнинг кўли борга ўхшайди. Жабрланувчининг ўзи ҳам, хотини, ўғли ҳам бизга арз килмади. Буни тез тиббий ёрдам врачлари хабаридан билдик. Бу ҳолат ҳам ажабланарли.

— Кўркишдими? Кимдан? Асадбекдан, демоқчимисиз?

— Мен ҳеч нарса демоқчимасман. Олдинги иш билан сиз шуғуллангансиз. Жабрланувчини аникладингиз-у, котил ҳалигача топилгани йўқ. Жасуровнинг воқеаси билан ҳам қизиқиб кўринг, балки шу томондан йўл очилар?

— Мен Асадбекка тақалаётган ишлар ҳакида кўп ўйладим. Унинг жиноятлари бизга маълум бўлса ҳам, ҳозирча исбот қила олмаймиз. Лекин шаҳарда фақат унинг тўдаси керилиб юрибдими? Жиноят турлари янгиланаётганига қараганда, шайтоннинг янги жиянлари пайдо бўлмаётгандикин?

— Бу фикрингизни инкор эта олмайман. Айниқса, «шайтоннинг янги жиянлари» деганингизга гап йўқ. Бир жойда ўкувдим: шайтоннинг туёғига тақа уриб, устига эгарсиз миниб олганлар Худога сифиниб, шайтоннинг шарридан паноҳ сўрар эканлар.

Зоҳид бу гапдан кулиб, кўшиб кўйди:

— Бунақаларни кўравериб, найрангларидан куйган шайтон Худога ёлбориб: «эй Худо, шу одамларни яратган экансан, мени яратиб нима қиласардинг?» деб нолаю фифон қилса керак.

— Ҳа, шунақа, қўлга тушган жиноятчиларнинг кўпидан «мени шайтон йўлдан урди», деган гапни эшитганман. Суриштириб қаралса, аслида, унинг ўзи шайтонни йўлдан урган бўлиб чиқади, — Саид Қодиров энди муддаога кўчди: — демак, Жасуров воқеаси билан жиддий шуғулланасиз. Ўзи индамаса, атрофидагилардан гап олинг, сизга ўргатишнинг ҳожати йўқ. Бу масала ҳал, деб ҳисоблаймиз. Ашулачилярнинг иши нима бўляпти? Бугун раҳбарлар мени тикка турғизиб кўйишиди. Ҳисботга арзирли гап борми?

— Ҳозирча йўқ, яна бир-икки марта тик турингизга тўғри келади. Дастрлабки тергов юзаки олиб борилган. Баллистик экспертизада ҳам камчилик бор. Хуллас, кўп ишлар деярли бошидан бошланди. Милициядаги дўстларимиз Илёсбекни дўсти Коғимбек ўлдириб, яшириниб юрибди, деган гумонни маҳкам ушлаб олишган, бошка шубҳа-ю, фикрга

ўрин қолдиришмаган. Уларнинг иш услубини ўзингиз ҳам яхши биласиз: жиноят кодекси қаршисида тирик одам турганини ҳисобга олишмайди. Бу одамнинг руҳий олами, руҳий изтироблари эътибор доирасидан ташқарида қолади.

– Шу ерга келганда ўлчовни жуда тор олдингиз, сал кенгрок бўлаверинг. Жиноятчининг ё гувоҳнинг руҳий оламини ўрганишга уларнингтина эмас, сиз билан менинг ҳам вақтим йўқ.

– Германиядаги, Ҳиндистондаги мутахассислар ўрганишибди, дунёдаги энг даҳшатли жиноятлар Ой тўлишганда, яъни ўн учинчи, ўн тўртинчи, ўн бешинчи кунлари содир этиларкан.

– Бу даъвоингиз энди ортиқча бўлди. Жиноятчини осмондаги Ойга қараб қидириш керак, демоқчимисиз. Кўйинг, бу гапларни. Хўп, Илёсбек билан Козимбекнинг уйига борибсиз, консерваториядаги устозларидан сўраб-суринтирибсиз, кимлардан шубҳангиз бор, шуларни айтинг.

– Яхши... Демак, ҳозирча барча ишлар икки ашулачи йигит атрофида ўрганиляпти. Ҳолбуки, бу икки дўст ёнида Толибжон деган қўшиқчи ҳам бор. Учови калин дўст, учови қобилиятли. Энг муҳими – ораларидан бир гўзал қиз ҳам бор.

– Қиз талашиб ўлдиришган, деб ўйладяпсизми?

– Қизга учовининг муҳаббати бўлган. Лекин у гўзал тушмагур, «Бокудаги халқаро қўшиқ кўригида ким ғолиб чиқса, ўшанга тегаман», деб шарт кўйган. Устозларининг айтишича, кўрикка Илёсбек бориши керак бўлган. У ўлдирилган, дўсти йўколган, оқибат Толибжон борган-у, ғолибликни қўлга кирита олмаган.

– Гўзалингиз нима дейди, куни энди шу Толибжон деганига қолибдими, кўнгли бор эканми унга? Ё шартга биноан тегмоқчими?

– Гўзалим... «шартни ҳазиллашиб айтувдим, йигитлар ҳам ҳазил тариқасида қабул қилишган, ме-

нинг кўнглим бошқа йигитда, улар билишарди», дейди. Қизнинг йигити бошқа эканини Толибжон ҳам тасдиқлади. Унинг ўзини тутиши, довдираши менда шубҳа ўйғотди. Ўзи отмаган бўлса ҳам, қотилликни ўюштириши мумкин, деган тўхтамга келдим. Илёсбек ўлдирилмаса, халқаро кўрик Толибжоннинг тушига ҳам кирмас эди. Қизнинг қалбини забт этган йигитнинг касби заргар экан. Бунақа гўзал халқаро кўриклар ғолиби, машҳур қўшиқчи йигит турганда заргарни танлашига ҳам унча ишонмаяпман.

— Тушундим, — деди Сайд Қодиров, пешонаси ни силаб. — Милиция ходимлари тиндираётган ҳовуз сувини титиб, баттар лойқалатибсиз-да? Гапингизда жон бор, раҳбарлар олдида ҳали кўп терлашим аниққа ўжшаб қолди.

Бу сафар Сайд Қодиров уни буровга олмади. Кунлар ўтиб, раҳбарлар сикуви кучайса, унинг талаби ҳам бошқача бўлишини Зоҳид англади.

XVII б о б

1

Зайнаб боши берк кўчага кириб қолиб, чиқиши йўлини билмай довдираб қолган одам ҳолига тушган эди. У акасининг ўлимига кимлардир сабабчи эканини биларди. Уларнинг кимлигини тахмин ҳам қиласарди, аммо уларга қарши бир иш қилишга ақли етмас эди. У Ҳайдар амакисининг Москвадан қайтишини интиқ куттарди. Бир-икки марта Кесакполвоннинг тантиқ қизи Моникага кўнғироқ қилиб «амаким яхши юрибдиларми?» деб сўради. Моника «да ну его, юрибди где-то ялло қилиб», деб қисқа жавоб бергач, ўзининг янги кийимларию атир-упаларидан гап очиб, уни бездирди. Ҳайдар амакисининг қаерда эканини, қачон келишини фақат отасигина аниқ биларди. Отасидан сўрашга эса

Зайнабнинг ҳадди сиғмасди. Суриштириши оқибатида отасидан гап эшитишдан чўчирди. Жамшид ҳам билиши мумкин. Лекин... Жамшид билан қаерда гаплаша олади? Бу ерга, эрининг уйига чакирадими? Тўғри, Жамшид бу ерга келиб-кетиб туради, лекин у билан юзма-юз гаплашиш имкони унда йўқ. Отасининг уйида ҳам Жамшидни кўриб турса-да, бир оғиз сўзлашмоққа журъат эта олмайди. Энди нима қилсин, кўчада гаплашсинми?

Билмайди... билолмайди.

Акаси эса уни қасосга чорлайверади. Тушида эмас, баъзан куппа-кундуз куни ўнгидаги ҳам пайдо бўлади...

«Наҳот менинг тақдирим ҳеч кимни ташвишга солмаса?...» дейди алам билан.

Аслида акасининг пайдо бўлиши, қасосга ундаши Зайнабнинг хаёлидагина рўй беради. Агар Абдуҳамиднинг руҳи чиндан ҳам у билан гаплаша олса эди, синглисидан қасос олишни зинҳор талаб қилмаган бўларди. Зайнаб хаёллари тузогида қолган кезлари ўзининг қисмати, оиласи осмонидаги ташвиш булувларининг тарқамай туриб олганини кўп ўйлади. Бунинг сабабларини қидиради. «Буларнинг барчаси ҳаром луқмаларнинг меваси» деган ҳақиқат хаёлини ёритмайди. Балки «буларнинг ҳаммасига адамнинг ҳасадчи душманлари айбдор», деган фикр унга мутлақ ҳақиқат бўлиб кўринади. Кўпроқ отасига тортган қиз онасининг йўлини кўриб турса ҳам, унга эргашибни ўйламайди.

Кеча онаси «Худодан узоқлашиш одамнинг бошига кўп балолар ёғдиаркан, Аллоҳнинг «эй бандам, сен менга бир қарич яқинлашсанг, мен сенга бир қулоч яқинлашаман», деган ваъдаси бор экан. Одам саждага бош қўйганида Раббисига яқинлашаркан...» деб насиҳат қилган бўлди. Манзура муҳаббатсиз қалб – тош қалб эканини, Тангри таоло тош қалбларга зинҳор назар солмаслигини эътиборга олмай даъват қилди. Инсон қалби уйини Аллоҳга бўлган ишқи би-

лан тузатмоғи жоизлигини, вайрона қалбини фақат муҳаббат билангина обод этмоғи мумкинлигини илмисизлиги туфайли тушунтираб бера олмади.

Үлимнинг муздек лабига бир неча марта лаб тутган, үлимнинг димоғидан уфураётган совук нафасдан эти сесканган Зайнаб, «дунёдаги барча нарсалар заҳарланган», деб яшаётган бу маъсуманинг онаси йўлига ўтиши учун бир-икки даъват кифоя қилмас эди.

Онасининг Ҳудога яқинлашиш ҳақидаги гапи унга қора хотинни эслатди. Кейинги пайтда бу лўли хотинни эсламай қўйганди. Бу кеч онасининг гапи сабаб бўлдими, елкасига хуржун ташлаган ўша қора хотин кўзига яна кўринди. Иккинчи марта ўзини осмоқчи бўлган куни шу лўли хотинни кўрган эди. Дастрлаб кўчага чиққанида кўрди, бу тиранчига пул олиб чиқмоқчи бўлганида у «менга қаранг, дардингизни олай», деб тўхтатди. Кейин: «Худо дeng, дардингиз кетади», деди. Кўчага чиқмасликни тайинлади. Зайнаб корадорининг хумори тутганда унинг гапини унуди, кўчага чиқди... Оқибатда ўша шармандали ҳол... Адаси «ўзингни ос», деган мақсадда арқон ташлаб кетди... Арқондан сиртмоқ ясаётганда бу лўли хотин уй бурчагида пайдо бўлган эди. «Агар Азроил шу бўлса, ўзимни осмай туриб жонимни осонгина олиб қўя қолмайдими? Ўзимни осганимни билган одамлар минг хил миш-миш тўқийди. «Тўсатдан ўлибди», дейилса, «ёшгина жонга жабр бўлибди», деб ачинишади. Азроил бўлса нега тикилиб турибди? Шартта чанг солиб, жонимни суғуриб олавермайдими? Ё сиртмоққа осилишимни пойлаяптими? Уйимда осганимда бу хотин кўринмаган эди. Унда ойим кутқариб қолгандилар. Энди... ойим йўклар...» – деган афсусли ўйлар домидан кутула олмай, қора хотинга қараб: «Сен қанақанги Азроилсан ўзинг! Осишимни пойлаб нима қиласан? Ўлимга рози бўлганимдан кейин оладиганингни олавермайсанми?» – деб бакирмоқчи бўлган, бироқ, овози чиқмаган эди.

Овози чиқмаса ҳам, қора хотин унинг нима демокчилигини англаб, «ўзингни осиб овора бўлма, сен ўлмайсан, узок яшайсан... Сен Худодан узоклашгансан, ҳар кадаминг билан яна узоклашаверасан, ҳозир ўлим топмоқчимисан? Сенга бунақанги осон ўлим насиб этмайди. Худо узок умр бериб, сени қаттиқ азобларга рўпара қиласди...» деган эди. Бу оқшом яна ўша уй бурчагида пайдо бўлиб, пичирлади. Зайнаб унинг гапларини эшила олмади.

Элчин ўтирган хонадан радио овози эшитилиб, унинг хаёлини бўлди. Қора хотин ўша заҳоти кўздан йўқолди. Радиодан тараалаётган ҳазин оҳанг, сўнг дардли кўшиқ Зайнаб ўтирган хонага ҳам оқиб кирди:

Дилда дардинг, тилда отинг, ёр,
Қани сенинг диённатинг, ёр?
Менга бу қиёматинг, ёр –
Хиёнатинг, хиёнатинг, ёр!

Зайнаб овоз эгасини таниди – Илёсбек. Кўшиқни ҳам эслади. Икки ойча аввал келганида Илёсбек «устоз, янги ашулангизни мен айтмоқчиман», деб тор чертиб, айтиб берган эди. «Радиода ёздиришга ултурган экан, бечора, балки охирги ашуласидир», деб ачинди Зайнаб. Тор ёнига най ва ғижжак кўшилгани учун кўшиқ янада таъсирли чиқсан эди:

Эр киши ҳеч эгиларми, айт,
Фам чекмаса, эзиларми, айт,
Мени ерга teng қиларми, айт –
Хиёнатинг, хиёнатинг, ёр?

Кўшиқ тутамай, радио ўчирилгач, Зайнаб хавотирланиб, эрининг ёнига шошилди. Элчин суюнчиқقا бошини тираганича шифтга тикилиб ўтирас, икки ёноғини ўш томчилари намлаган эди. Хотини киргач, ўзини ўнглади-ю, ёноғини кафти билан артди. Зайнаб овунтирумочи бўлиб гап бошласа, уни баттар хижолат

қилиши мумкинлигини фаҳмлаб, ашулани эшитмаган одам кўринишида жавондан нимадир излагандай бўлди. Кейин иккита ликопча олиб, эрига юзланди-да: «хозир овқатни сузаман», деди.

Элчин йиғлагани учун хижолат бўлмади. Бу ашула ўзининг руҳан хорланган кунларини эслатган эди.

Бир йил ўтибди...

Беҳол ётган Зайнаб унга мунгли нигоҳини қадаб: «Мен ўзимни ўлдирмоқчи эдим... – деб йиғламсираган эди. Кейин даҳшатли ҳақиқатни айтишга ўзида куч топиб, кескин оҳангда давом этганди: – Жамшид акамни ўлдиришди... Мен Жамшид акамни яхши кўрардим... Худодан яширмаганни сиздан яширмайман... Худо жонимни олмади. Болангиз туғилганидан кейин... мени ўлдиринг! Мен... сизга хиёнат қилдим...»

Бу гапларга ишонгиси келмаса ҳам Элчиннинг юраги тарс ёрилиб кетай деганди.

«Ўлдирасиз...»

Бир неча нафас сукут саклаган Зайнаб энди пичирлаганди. Жонсиз лабларидан учган заиф сўз ўққа айланиб, Элчиннинг юрагига қадалганди.

Ўша тун уйда ёлғиз ўтирганида туғилган эди бу кўшиқ...

Зайнаб бу кўшиқнинг ўзига аталганини билмайди...

Овқат сузуб келган Зайнаб: «ўтган ҳафта тұғридаги кўшнимиз бир коса чучвара чиқарган эди. Чоршанба куни тугун оши қилиб, кўшниларга тарқатилса яхши бўлар эмиш, менам шу одатга риоя қилдим», деб кулимсиради. Зира хиди анқиб, иштаҳани қитиқлаган бўлса ҳам, косаларида овқат қолди. Зайнаб идишларни ювиб, телевизор томоша қилгани ўтирганда чирок ўчди. Шам ёруғида бирпас китоб ўқиган бўлди. Эрининг ўтирган ерида мудраётганини кўриб, унинг аравачадан тўшакка ўтишига кўмаклашди.

Ярим кечаси машина эшигининг қаттиқ ёпилишидан чўчиб уйғониб кетди. Аввалига «тушимда эши-тилдимикин», деб ўйлади. Кейин кўча томондан овоз-

лар эшитилгандай бўлиб, ўрнидан турди-да, деразага яқинлашди. Пойлоқчи йигитларнинг машинаси ёнида икки нотаниш одамни кўриб, хавотирланди. Шу онда бир қора машина деразаси қархисида тўхтади. Зайнабнинг юраги ёмонликни ҳис этиб, телефонга югурди...

Чироқ ўчган... телефон ҳам ишламайди. Машинадаги пойлоқчилар ҳам кўринмайди...

Эрини уйғотишдан фойда йўқ.

Нима қилиш керак? Отаси бекорга хавотирланмаган экан-да?!

Зайнаб бир қарорга келгунича дарвоза очилиб, тўрт-беш йигит югуриб кириб келди.

У бақиришга ҳам улгурмай қолди. Кўзига яна ўша қора хотин келди:

...сен ҳали узоқ яшайсан...

2

Субҳи содик азони эшитилмай туриб уйғонган Манзура эшикни аста очиб, ташқарига чиқди. У эрини уйғотиб юбормаслик учун шарпасиз юришга ҳаракат қилаётган эди. Ҳолбуки, аввалроқ уйқуси ўчган Асадбек хотинини уйғотиб юбормаслик учун жимгина ётган эди. Манзура ювингани ҳаммомга кирган пайдада тунги сукунат ҳукмронлигини болохонадаги телефон жиринги тўзитиб юборди. Дам ўтмай йигитлардан бири иккала табақаси очик турган деразага яқинлашиб, паст овозда «Бек ака!» деб чакирди. Асадбек шарт туриб, деразага яқинлашди.

– Жамшид акам телефон қилдилар, Зайнаб опаминига тез борар экансиз.

Асадбек «нимага?» деб сурамади. Орқасига қайтида-да, тезгина кийиниб, ҳовлига чиқди. Унгача бир йигит машинани ҳозирлаб, иккинчиси дарвозани очиб турган эди.

Жамшид хожасини кўчада кутиб олди.

- Нима гап? – деди Асадбек зарда билан.
- Ичкарига кирайлик, – деди Жамшид кўркувини яширолмай.

Ховлидаги темир сўрида бир йигит чўзилиб ётибди, иккинчисининг боши боғланган, ихраб ўтирибди. Яна иккитаси тик турибди. Асадбек уларнинг саломига алик олмай, уй томон юрди. Ётотхонадаги қаравотда кимдир ҳаракатсиз ётибди, тепасига чойшаб ёпиб қўйилган. Буни қўриб Асадбекнинг ранги оқариб кетди. Тили қотиб қолгандай бўлди: «Ким бу?» деб сўрашга ҳам курби етмади. Жамшид хожасининг аҳволини сезиб, чойшабни кўтарди-да, ётган одамнинг юзини очди. Асадбек унга бир оз қараб тургач, умиди сўнаётган одам овозида сўради:

– Зайнаб қани?

Жамшид айбдор кишининг узр сўрашига ўхшаган овозда жавоб берди:

– Олиб кетишибди...

Бу хабар Асадбекнинг зулмат босиб ётган бағрига янги ханжар бўлиб санчилди. У тақдир картасининг бу тариқа чийланишини хаёлига ҳам келтирмагани учун довдираф қолди.

– Ким?

Жамшид «билмайман» дегандай елка қисди.

Аламига чидолмаган Асадбек мулозимини уриб юборди. Кутилмаган зарбадан мувозанатини йўқотган Жамшид чўккалаб қолди, йиқилмади. У хожалар томонидан мулозимларнинг жазоланишини кўп кўрган, бироқ, у пайтлар бу вазифани асосан Ҳайдар акаси бажаарди. Аввал муштларди, кейин тепкилаш бошланарди. Жамшид ҳозир тепкини кутди. Бироқ, Асадбек тепмади:

– Қанақа сўтакларни қўйган эдинг?! – деб сўкинди.

– Элчин акам йигитларни ичкарига қўймасдилар... – деди Жамшид, қаддини ростлаб.

Асадбекка бу янгилик эмас, факат йигитларни ичкари қўймайдиган одам Элчин эмас, қизи Зайнаб эканлигини ҳам ўзи яхши билади.

— Ярим кечада беш-олтитаси бостириб келибди. Элчин акамни аравачасига боғлаб кетишибди. Кутуламан, деб ҳаракат қилганларида бўғилиб қолганларми ё улар ўлдиришганми... ҳарҳолда аравачада осилиб ўтирган эканлар. Милиса чақирайми ё дўхтирими, билмай иккиланиб турувдим.

Жамшиддаги иккиланиш хожасига ҳам ўтди. Бир зум жим турди-да, тақдирга тан берган одам овозида деди:

- Милисанি нима қиласан? Таниш дўхтирингни чакир. Зайнаб топилгунча «тирик», деб сақлаб турсин.
- Зайнаб-чи?
- Овоза қилмаларинг.
- Қидиришни бошлайликми?

Аслида «Зайнабни қаердан қидирайлик?» – деб сўрамоқчи эди. Бундай саволга яраша сўкиш эшишиб колишдан чўчиди. Асадбек унга ўкрайиб қараб:

- Қаердан қидирмоқчисан? – деб сўради.
- Маматбей... шу ерда бўлса, ишни ўшандан бошласакмикин?
- Ҳа, ўшандан бошлайсан. Факат... қидирмайсан, ўзи келади олдимга. Мен у хунасаларнинг гирром ўйинини биламан. Сур тайёр турсин. Ҳалимни топиб кел.

Ҳа, у адашмади – Хонгирей ўлгани билан зулм олами ўлмаганини яхши биларди. Моргашнинг телефондаги пўписаси, Балабуханинг огоҳлантириши, Козловнинг ўлдирилиши, Маматбейнинг пайдо бўлиб қолиши... бежиз эмас. Шиддат билан бостириб келаётган қора кунлар сели ўғлининг вафоти билан тўхтагандай бўлган эди. Йўқ, селнинг кучи ҳали кирқилмаган экан. Қора тақдирнинг қора дарёси бир ўлимга тўймадими? Наҳот?!

Хонада сиқилиб ўтиришга тоқати етмаса ҳам, Асадбек сабр қилишга мажбур эди. Қизини ўғирлаганлар шаҳарни остин-устун қилиб ташлашини кутишгандир. Аввалгисида шундай қилган эди.

Унда... бошқача ҳолат эди.

Унда... мавқеи ҳам ўзга мартабада эди...

Энди-чи? Сингани ростми?

Буни ўйлашнинг ўзиёқ дард устига чипқон эди.

Ҳалим келгач, дардли ўйлар исканжасидан кутулиб, аччик ҳаёт ташвишларига қайтди. Ҳалим ичкари кириб, одати бўйича хона ўртасига етмай тўхтади-да, «буюоринг, хизматингизга тайёрман», дегандай қўл қовуштириди. «Шундай йигитнинг мили-салиги чатоқ-да», деб ўйлади Асадбек унга бошдан-оёқ разм солиб. Кейин Ҳалимжонни ажаблантириб, ўтиришга таклиф этди.

– Эшигандирсан? – деди Асадбек, савол назари билан тикилиб.

– Эшигдим, – деди Ҳалимжон зийраклик билан.

– Нима қилиш керак?

– Хонгирей бошлаган ўйиннинг давомига ўхшашяпти?

– Тўғри сезибсан. Хизматимни қилмоқчийдинг, фикринг ўзгармадими?

Бошқа ҳолат бўлганида Асадбек «милисангда ишлайвермайсанми?» деб кўрслик қилиши мумкин эди. Лекин ҳозир бунинг мавриди эмас, мазкур маъно сақланиб қолса-да, саволнинг юмшоқроқ тарзда қўйилиши шундан.

– Хизматдан қочмайман.

– Очигини айтай, ҳали ҳам ишончим тўлиқ эмас, сенга.

– Синааб олишга шароит етилганга ўхшайди.

– Ҳа, етилган... Барнаулга қандай бориб келдиларинг?

– Айтишгандир...

– Айтишди. Фиманинг ўзи келиб-кетди. Шерикларинг хақида нима дейсан?

– Тўғрисини айтайми?

– Албатта.

– Улар ҳали ғўр. Бошида бўш жой кўп, шамол айланиб юради.

– Тўғри англабсан. Кунимиз шунақаларга қолган. Қовоқ каллада шамол айланмаслиги учун пишитишимиз керак.

– Пишитиш қийин бўларов... Уларнинг фалсафасини ўзгатириш керак.

– Яна қанақа фалсафа?

– Сурники жуда ғалати: «Кимнинг пули бўлса – ўшанинг келажаги бор, пули йўқда келажак нима қилсин?» – дейди. Бу фалсафаси яхшиликка олиб бормайди.

Бу гапни эшитиб, Асадбек бир сесканди. Чунки унинг ўзи ҳам бир пайтлар шу фикрда қойим эди. Касали зўрайган пайтда эса «Пулдорнинг аҳволи шуми? Пулдор одамнинг келажаги – кафанми?» деб афсусланганди.

Хозир бу фалсафа хусусида фикр юритишга вақти ҳам, тоқати ҳам йўқ эди, шу сабабли муддаога кўчди:

– Энди гап бундай: Маматбей шу ерда бўлса, менинг олдимга ўзи келади. Жамшид билан келишиб, унинг изига одам кўяссанлар: юрса – юрларинг, ётса – ётларинг, турса – турларинг.

Ҳалимжон вазифага тушундим, дегандай бош ирғагач, кетишга рухсат тегди.

Асадбекнинг ёлғизлиги бу сафар узок чўзилмади. Кутаётган одами уни пешинга яқин йўқлади. Қорақош эшикни қия очиб:

– Маматбей деган одам сўраяпти, – деди.

Бу хабарни эшигтан Асадбек сакраб ўрнидан турди. Мехмонни бўғиб ташлашга қасд қилгандай биринки қадам босди-ю, тўхтади.

– Чой ичяптилар, бирпас кутар экансиз, де. Ўзига ҳам чой қуйиб бер, ўпкасини босиб турсин.

Шундай деб илиб қолган чойдан икки ҳўпламгина қуйиб ичди-да, жойига ўтириди. Маматбейга сир бой бермаслик учун ўзини босиб олиши керак эди. Суянчикка суюниб, кўзларини юмди. Ҳеч нарсани ўйламасликка ҳаракат килди. Эплолмади... Кўз олдида кизининг маъюс чеҳраси гавдаланиб туравер-

ди. Бу кўринишини ҳайдашни истамади. Кўз олдига бошқа нарса келтиришга интилса, қизини гўрга тикиб қўядигандай юраги эзилди.

Ўн беш дақиқадан сўнг Қорақошни чакириб, «кирсин», деб буюорди.

Маматбей ҳеч қанақа разил воқеа юз бермагандай, кулимсираганича кириб келди. Асадбек ўрнидан ҳам турмади, сўрашмоқ учун кўл ҳам узатмади, меҳмонни ўтиришга ҳам таклиф этмади. Маматбей бу илтифотсизликни сезмаган одам кўринишида яқинлашиб, стулга ўтирди.

– Чай ичиб ўлдунгми, жан гардашим, Аллах сана чўх гўзал иштаҳа версин.

Асадбек жавоб бермай, ғазабли нигоҳини унга қадаб ўтираверди. Илико: «Бизнинг баҳтимиз зўр душманнинг қўлидан ўлим топиш» деган эди. Асадбек кўзига бир қоп ахлат бўлиб кўринаётган Маматбейдан нигоҳини узмай, «шулар зўр душманми?» деб ижирғанди. Кейин «бу бошни силаш керакми ё кесишими?» деб ўйлади.

Минг тўққиз юз қирқ тўққизинчи йилнинг ўттиз биринчи декабридан бери унинг қалбида бир қасос ўти ёниб-ўчгач, иккинчиси алнга олаверади. Асадбек отасининг қасосини олиш учун яшамай, отасига яхши ном, яхши дуо келадиган ишларни қилгани хайрлироқ эди. Олган қасосидан ким қандай наф кўрди? Отасини олиб кетганларнинг бири осилганида, иккинчиси жинни бўлиб дайдиганидан кейин ҳаёти чиройлироқ бўлиб қолдими? Йўқ! Ҳатто ўзининг қонга ташна синик кўнглига ҳам тасалли етмади.

Энди янги қасос гулхани ёниб, ичини куйдиряпти.

Маматбей «аввал сен дардингни айтиб, ёрил, кейин мен гапларимни айтаман», дегандай бамайлихотир ўтираверди.

– Қизим қани? – деди Асадбек тишларини ғижирлатиб.

– Бу ман учун қоронғудир, жан гардашим. Бу хусусда сўз юритмакка манда ваколат-да йўқтур.

- Нимага ваколатинг бор?
- Сен-да мусулманин, мен-да...
- Мусулмонликни аралаштирма. Нима демоқчи-санлар?

– Жан гардаш, анжак санинг бу аҳволинг ила катта кетмагинг хатарлидир, сўзима кулақ ас.

– Шунақами?! – Асадбек шарт туриб, унга рўпара келди-да, ёқасидан бўғди. Маматбей шунда ҳам талвасага тушмади. Асадбекнинг сўкишларини индамай эшилди. Ёқасини бўшатишга ҳам, ўзини хорланган ҳис қилиб жавоб қайтаришга ҳам уринмади. Унинг бу қилиғи Асадбекнинг шаштини қайтариб, ёқасини бўшатди. Маматбей шундан кейингина тилга кирди:

– Кизинг қаерда, ман билмиюрим. Иста, мани ўлтур, истарсан, мани гарова ол. Ҳар ики ҳолда-да ютқизик санинг томонингда ўлур. Ютқизмакни истаюмисан? Ўлайманки, йўқ. Сан Гирейхана муқобил ўлма, на деса десин, сан уни бажар. Санинг ихтиярингда ўзга чара йўқтур.

– Асадбекнинг бўйини синдириб, гумаштага айлантириш йўлини топдик, деб кувоняпсанларми?! Йўқол!

– Фазаб ихтияринда ўлмак хатарлндур, гардаш. Сан шартни тингла. Сўнра мани тепиб ҳайда.

– Айт, шартингни, – деди Асадбек, жойига қайтиб ўтириб.

– Шарт санинг учун заҳматли ўлмас. Ҳафта ўн кун орасинда Афгандан бир юк ўтар. Сан уни Термизда қаршилаб, то Қазақстанга ўтгуни қадарли назарингда ушлаб туражаксанки, то ҳеч бир бегана кимсанинг назари душмасун. Гирейхан бу учун сана чўх илтифотлар кўрсатиょр.

– Шунинг ўзими?

– Ҳа, гардаш.

– Олдинги хўжайнинг «куч билан битадиган иш учун ҳақ тўлаш аҳмоқликдир», дерди. Моргашнинг

бундан хабари йүкми? Кучларинг кўп-ку, нимадан кўрқасанлар?

— Ҳар бир юмушнинг ўз ҳадиси вордур. Гирейхан мурувватин сан инкор эта кўрма.

— Мурувват, дегин. Сенларнинг ишларингда мурувват йўқ, мажбурият бор.

Ноҳақлик зўр келган онда ҳакиқатнинг ожиз қолиши аниқ. Асадбек ғазаб алангасини босиб, энди арқонни узун ташлашни ихтиёр қилди:

— Моргашга айт, мен бу ердан чиқиб, уйимга етгумча қизим уйида бўлса, шартини қабул қиласман.

— Бу шартинг мақбул ўлмас, гардаш. Санда шарт кўймак ихтияри йўқтур. Юк Қазақстана ўтгани ҳамон қизинг уйингда ўлажак.

Маматбей тўғри айтди: Асадбек ҳозир иложсиз эди. «Ўқ илон»нинг тасарруфидаги оламга чанг солишдан тоймаган куч аҳмок эмасдир. Қизни узок шаҳарга олиб кетмаган тақдирда ҳам, яхшилаб яшириш йўлини қилгандир. Икки ярим миллион одам гимирлаб юрган шаҳарда қизни топиш, игнани излашдан ҳам мураккаброқ эканини билгани учун ҳам иложсиз эди.

Маматбей эса рўпарасида ўқилон эмас, чувалчанг типирчилаётгани каби мағрур ўтиради.

Асадбекнинг бу ҳолга чидаши кийин бўлди.

Лекин чорасиз эди...

— Қизимни кўйиб юборларинг, ўзимни гаровга олларинг. Сенлар айтган жойда ўтириб, ишларингни битириб бераман. Битирмасам – ўлдирасанлар.

— На ўлди, сана гардаш? Биз сани ўлтурмак истар ўлсак, муаммо йўқ эди. Сан шарт кўя кўрма. Бизим шарта кўнар ўлсанг, қизинг социдан бир тола ҳам тўкилмас.

— Яхши... жавобини эрталаб айтаман.

— Бу ишинг дуруст ўлмас, жавабин акшам олажакмиз.

— Яхши... унда... ўзинг билган Жамшид билан гап-

лашаверасан. Жамшид бу ишнинг оғир-енгил томонларини билади.

– Бу қарапинг чўх гўзал ўлди, гардаш. Ман Гирейхана дедимки: Бек гардашимнинг ақлн чўхдир, ул Московдаги гардаши Илико ила гардашлик рабитасин узуб ташлагандир.

Асадбек бу гапдан «Илико билан боғланишга овора бўлма, агар у аралашса, қизингнинг аҳволивой бўлади», деган маънони уқиб, заҳарли жилмайди:

– Сен тулки жуда сезгирсан-а! Илико билан алокани узганим рост. Акаси мендан анча қарз эди. «Акам қарздор бўлса, мозорига бориб, ўзидан талаб қил, мен тўламайман», деб туриб олди, туллак. Ишлари орқага кетганми, пули йўқ шекилли? Бунақа одам менга дўст бўла олмайди.

Маматбей бу гапдан кувонган кўринса-да, Асадбекнинг қарорига бир ишониб, бир ишонмай, ўрнидан турди. Стол устидаги қаламни олиб, газетанинг бир четига рақамларни ёзди:

– Телефон нумерам санда-да турсин. Энди биз санинг ила иш бирлиги япажакмиз.

Маматбей чиқиб кетгач, Асадбек кўп ўйлаб ўтирамай, телефон гўшагини кўтариб, Томск билан уланди. «Эшитяпман, гапиринг», деган овоз келгач, ўзини танитиб, «Павел Владимировични чақириб беринг», деб илтимос қилди. Ярим дақиқа ўтмай, Балабуханинг овози эштилди:

– Бек, тинчликми? Нима бўлди?

Воқеани баён қилишга Асадбекнинг тили айланмади. У Балабухага шикоят қилмоқчи ҳам, ёрдам сўрамоқчи ҳам эмасди. Ундан баъзи маълумотларни сўраб, аниқлаб олмоқчи эди. Балабуха унинг жим қолганидан хавотирланиб:

– Бирон ноҳушликка учрадингми? – деб сўради.

– Ноҳушликка дейсанми? – Асадбек ўзи учун ҳам кутилмаганда хўрсинди. Лекин сир бой бергиси келмай, гапни улаб кетди: – Қизимни ўғирлашди, куёвими ни ўлдиришди.

- Моргашми?
- Яна ким бўлиши мумкин?
- Шунга ўхшаган бир ҳайвонлик қилишини кутган эдим. Сени огоҳлантирувдим, хафа бўлмагин-у, ўшанда катта кетувдинг. Хўп, ким ўтган гапни кавласа, кўзи ўйилсин. Нима деяпти у мараз?
- Хонгирей нимани талаб қилган бўлса, унинг дарди ҳам шу – қорадори.
- Шартига кўнишдан бошқа чоранг йўққа ўхшайди.
- Мен дуч келган битлиқига тиз чўкадиган лақма эмасман!
- Мен сени камситиш фикридан узоқман, Бек. Қизингни қандай қутқармоқчисан? Агар уни бу томонларга олиб келишган бўлса, шубҳасиз, ёрдам бераман. У ёқда бўлса... демак, бу ўзингнинг муаммоинг. Яна қандай ёрдам беришим мумкин?
- Бир-иккита маълумот керак менга.
- Нималарни режалаштиряпсан, менга айта оласанми?
- Ҳозирча йўқ. Бугун ва эртага у аглаҳ қаерда бўлишини, атрофидаги одамлар қанчалигини аниқ билишим керак.
- Эштишимча, у ҳозир Хонгирейнинг дала боғида. Аммо эртага аzonда мен билан учрашув белгилаган. Ишончим комилки, учрашувга ўзи келмайди.
- Нега? Қўрқадими?
- Қўрқмайди, у тулкига ҳам дарс берадиган айёр. Одамларини менга ташлайди. Балки ҳаммамизни қириб ташлашга ҳаракат қиласар. Бек, ўлаб иш қил, олов билан ўйнашма.
- Ёшлигимда менга «ўқилон» деб лақаб беришганди. Ўқилон ташланса, одамнинг товонидан кириб миясидан чиқиб кетади. Менам бир ташлансам, душманим нафас олишга улгурмай қолади. Шунинг учун ҳам мени ҳамма хурмат қиласарди.
- Буни биламан, Бек. Лекин у замонлар ўтиб кет-

ган. Агар бу томонларга келадиган бўлсанг, қаерга қўнғироқ қилишни биласан. Мен кечгача Москвага етиб бораман.

Асадбек унга «ўқилон»ни бекорга эслатмади. «Ўйчи ўйига етгунча, таваккалчи ўйига етади», деганларидаи, ҳозир «нима қилсам экан?» деб машварат курадиган вақт эмас. Рақиб ғолиблик жомини симираётган пайтда унга шундай зарба бериш керакки, тондан кириб, мияни ўпириб чиқиб кетадиган ўқилон ҳам бу тадбир олдида ип эшолмай қолсин.

Асадбек режасини хаёлан пишириб, қатъий қарорга келган пайтда Жамшид кириб келиб, ҳисоб берди:

– Элчин акамни эски касаллари бўйича расмийлаштириб қўйишди. Ўлим ҳакидаги гувоҳномани ҳам шу асосда беришади. Ўликхонадаги одамнинг оғзи маҳкам, гулламайди.

– Ўликхонага қўйдиларингми? – деб сўради Асадбек.

– Касалларнинг ичидаги сақлаб бўлмайди-ку?

– Йигитларингдан биттаси ўша ердан жилмасин, дўхтирларингга ишониш қийин, бири бўлмаса бири лақиллади. Маматбей ошнанг келди, мана, телефоны, – шундай деб рақам ёзилган газетани у томон суриб қўйди. – Изига тушиб овора бўлмаларинг. Улар ўзларича очиқ ўйин ўйнашмоқчи. Ҳар қанақа очиқ ўйиннинг таги ғирром эканини мен билмас эканманми?! Ҳозир Сур, Ҳалим, яна тўртта бакувват йигитинг билан Москвага учаман. Сен шу ерда шай бўлиб турансан. Биз учгандан кейин шу рақамга қўнғироқ қилиб, итдан тарқаган Маматбейга «хизматингизга тайёрман, Бек акам ҳамма шартларингга розилар», дейсан. «Бек акамнинг шарти кетиб, парти қолган, шунақа зўрлаганларинг ҳам дуруст. Ҳозир иккита лимонад цехи билан тирикчилик қиласидиган замон эмас», – дейсанми, хуллас, бошимга ҳар қанақа мағзава ағдаравер. Ҳайдар аканг ўрнимни эгаллаш учун қандай ҳаракат қиласан бўлса, ўзингни шундай кўрсат. Термизга бугун

одам жүннатиши талаб килса, жавоб беріб юборған йигитларингни қайта түплаб, буйруқларини бажар. Тушундингми?

— Тушундим... Фақат... у ёққа борадиган бўлсангиз... олти киши камлик қилмайдими?

— Етти кишимиз, янглишма. У ёққа пода-пода бўлиб боришнинг ҳожати йўқ. Одам тўплашни Ҳайдар аканг яхши кўрарди. Сенам ўшанга ўхшайсан. Керак бўлса битта ўзим рўпара келаман у ит эмганларга!

Асадбекнинг бу гапида қатъий ишонч зохир эди. У олифтагарчилик учун айтмади бу гапни. Болалигида ҳам, ундан кейинги ҳаёти давомида ҳам «биргабир чиқиши»дан қайтмас эди. Ҳатто кавказликлар чақиришганда ҳам чўчимаган эди. Отасини қамоққа олиб кетганлардан бирини топиб, ўч олгани бу ёқдаги кавказликларга маълум бўлгач, унга жазо бермоқчи бўлишган эди.

— Йигирмата йигит душманларингнинг қонига ташна бўлиб турибди. Орқангдан борамиз-у, ҳаммасини бира тўла онасиникига кирғизворамиз!

Кесакполвон шундай деб катта кетганда Асадбек: «Биттанг ҳам бормайсан, сен бугун уларни онасиникига кирғизворсанг, эртага у ёқдаги юзтаси отасиникидан чиқиб келади», – деб унинг шаштини қайтарди.

«Келиб-келиб шулардан кўрқяпсанми?» деган ма-ломатни ўзига олмай: «Қирғин бошланишини истамайман, улар мени чақиришляпти, демак, бир ўзим бораман. Агар ўлдиришса, отам учун ўлган бўламан. Бу ҳам чиройли ўлим», – деди.

Чиндан ҳам ўлимни бўйнига олиб борди. Кесакполвон «Улар билан ҳазиллашма», деб йўлдан қайтармоқчи бўлди. «Мен ҳазилни ёмон кўраман, теппа-тенгига гаплашаман», деб қароридан қайтмади.

— Бу дунёда бирга-бир чиқиб гаплашадиган мард қолмаган, – деди Кесакполвон ўжарлик билан.

— Бирга-бир чиқиб, теппа-тенг гаплашадиган битта одам қолган, валдирама, – деди Асадбек.

– Кавказлигингни айтяпсанми, ўзинг валдирама, унингда мардликнинг «м»си ҳам йўқ.

– Ўзимни айтяпман, кавказлигинг билан нима ишим бор? Йигитларингни тўплаб қўйган бўлсанг, чойхонада ош дамлаб тур, узоги билан икки соатдан кейин қайтаман.

Марказга жойлашган меҳмонхона орқасидаги дарахтзорда уни тўрт йигит қарши олди. Тўрттовининг лабларида сигарет, бармоқларида тилла узук, бўйнилари ва билакларида тилла занжир... Асадбекни ўраб олишиб, «сенам одаммисан?» дегандай беписандлик билан қараб тураверишди. Уларнинг бу қилиғи Асадбекнинг ҳамиятига тегиб, йигитларини бошлаб келмаганига афсусланди. «Буларнинг уруғини ўйнатиб юборишим керак эди», деб ўйлади. Кавказлик йигитлар «кимсан, нега келдинг?» деб сўрашмади, у ҳам гапирмади. Орадан ўн-ўн беш дақиқа ўтгач, меҳмонхона томондан башанг кийинган, кирра бурни остидаги мўйлови ярашмаган бир йигит келиб, Асадбекнинг рўпарасида тўхтади. У ҳам шериклари сингари сурбетлик билан тикилди. Кейин энсаси қотган одам овозида сўради:

– «Ўқилон» деганлари сенмисан?

– Менман, – деди Асадбек киприк қоқмай унга тикилиб.

– Айтишларига қараганда, менинг юртимда адабиб юрган экансан?

– Юрting қаерда ўзи? – деб сўради Асадбек дадил овозда.

– Кавказда... Унутдингми? У ерда бир одамни ранжитибсан?

Асадбек унинг нима демоқчи эканини англаш, «кимни ранжитибман?» деб сўрамади:

– Ранжитган бўлсан, сабаби бордир? Бекорга қидирмагандирман уни.

– Агар мингта сабабинг бўлса ҳам, бу ҳаром кўлингни бизнинг одамга кўтаришга ҳаққинг йўқ! –

деди йигит тупук сачратиб. – Унинг бир пайтлар ахлат бўлганини биламиз. Ахлатдан ҳам баттар бўлгани учун ундан нафратланамиз. Бизнинг миллатдан бўлгани учун эса севамиз! Биз миллатдошимизни хорлатиб қўймаймиз, шунга ақлинг етмадими?

– Сенинг ҳисобинг бошқа, меники бошқа: у ўлиши керак эди – ўлди. Мен отам учун қасос олишим керак эди – олдим. Бу ҳисоб-китобнинг ҳеч мураккаблиги йўқ. Менинг ўрнимда бўлганингда ўзинг ҳам шундай қиласардинг.

– У отангни ўлдирғанмиди?

– Шунақа десам ҳам бўлади. Қирқ тўккизинчи йилда отамни қамаган, отам Сибирда ўлиб кетган. Сен севадиган миллатдошинг жуда кўпларнинг ёстиғини қуритган. Агар сен ҳакиқий кавказлик бўлсанг, ўғлонларнинг оталар учун қасос олиши мутлақ шараф эканини билишинг керак.

– Сени ўжар, ахлоқсиз, деб тўғри айтишган экан. Сендақаларни ўлим яхши кўради.

– Кавказга бориб келгунимча отам учун қасос ололмай ўлиб кетишдан қўрқардим, энди қўрқадиган ерим йўқ.

– Қасос олиб бўлдингми?

– Буниси энди менинг ишим.

– Албагта... албагта... сенинг ишингга аралашиб га тоқатим йўқ. Йигитларинг қани, бу атрофда кўринмайди, пистирманг қаерда?

– Ўзимнинг уйимда ўзим пистирма қўяманми? Бир ўзим келдим.

Башанг йигит «ростданми?» дегандай шерикларига қаради, улардан бири Асадбекнинг гапини тасдиқлаб бош ирғаб қўйгач, кулимсиради:

– Бир ўзинг келган бўлсанг... гапни чўзишдан маъно йўқ. Оғайнilarимнинг сенга нисбатан бўлган нафратлари чексиз эди. Лекин биз ўғлонлар қасосининг қадрига етамиз. Мардлик қилиб келибсан, биз ҳам мардлик қиласамиз, юр, дастурхонимизнинг азиз меҳмони бўл...

Ха, ўшандай шундай бўлган эди. Жамшид буни билмайди. Балабуха тўғри айтди: у замонлар бошқача эди. Ҳозиргиларда бунақа мардлик йўқ.

Асадбек қилинадиган ишларни Жамшид билан келишиб олгач, ўрнидан турди. Аэропортга боришдан олдин уйга бирров кириб-чиқмоқчи бўлди.

Ховлига қадам босди-ю, шийпон зинасида паришон ўтирган Манзурага кўзи тушиб «билиб қолдими?» деган хавотирда тўхтади. Манзуранинг бошидаги рўмоли сирғалиб елкасига тушган, нигоҳи бир нуктага қадалиб қолган эди. Эри келганда пешвоз чиқишига шошилувчи аёлнинг кимирлагиси ҳам йўқ эди.

– Манзур, сенга нима бўлди? – деди Асадбек унга яқинлашиб.

Манзура дардли нигоҳ билан унга қараб, синик овозда салом берди. Асадбек хотинининг юзидағи ғам чизикларига қараб, инграб юборай деди.

– Нега бу ерда ўтирибсан?

Манзура эридан берухсат бир иш қилиб қўйган айбдор хотиндай бош эгиб хўрсинди.

Тонгда тахорат қилиб чиққунича эрининг шошилиб кетиб қолишидан хавотирга тушди. Намозини қандай ўқиганини ҳам билмади. Юраги потирлаб, ўйнаб кетаверди. Болохонадаги йигитни чақириб:

– Аканг қанилар? – деб сўради.

– Билмадим, шошилиб кетдилар...

Йигитдан тайнинли жавоб ололмаслигини билса ҳам яна сўради:

– Ким телефон қилувди?

– Билмадим, меҳмон келибди шекилли...

Тонг отди... Куёш терак бўйи кўтарилди. Хавотирини енгиш учун тахоратини янгилаб, чошгоҳдаги нафл намозини ўқиди. Кўнгли бир оз таскин топгандай бўлди. Нонушта ўрнига ярим пиёла чой ичди. Томоғидан бир тищлам нон ҳам ўтмади. Телефон гўшагини кўтариб Зайнабга қўнгироқ қилди – жавоб йўқ. Кейин эрига сим қоқди – Қорақош гўшакни

күтариб, хўжайини меҳмонлар билан юрганини маълум қилди. Бундай гаплар билан безовта она қалбини алдаш кийин. Манзура яна Зайнабнинг рақамини терди... Учинчи марта ҳам жавоб бўлмагач, қизиникига отланди...

Тайинли хабар эшиитмаган бўлса ҳам, ҳушидан кетар ҳолида қайтиб, шийпон зинасига ўтирган эди.

– Тур, уйга кир, – деди Асадбек уни билагидан ушлаб.

– Зайнабникига борувдим... – деди Манзура ўрнидан туриб.

– Нега бординг?

– Сиз ҳам борибсиз-ку? Нима бўлди?

– Ким айтди, борганимни?

– Кўшни кўрибди. Эрталаб сал бесаранжомлик бўлганмиш-ку?

– Кўшниларнинг миш-мишига ишониб ўтирибсанми? Эрталаб қизинг телефон қилувди, куёвингнинг мазаси қочибди. Бориб, касалхонага ётқизиб келдик. Зайнаб эрининг ёнида қолди.

– Қайси касалхонада?

Манзура шундай деб «мени алдаманг», деган маънода эрининг кўзларига маъюс тикилди. Қизи дастлаб ўғирланганида Асадбек хотинини ношудликда айبلاغан эди. Энди бу хабарни ўзи айтиши керакми? Қайси тили билан айтсин? Яраланган кўнгилни баттар оғритсинми?

Асадбек хотинининг бу қарашига дош беролмай, нигоҳини олиб қочиб, уни заҳарли оҳангда енгмоқчи бўлди:

– Айтсам, ҳозир учиб борасанми ёнига?

– Ҳеч бўлмаса телефонда гаплашай?

– Шарт эмас. Бугунча безовта қилма, эртага бирга борамиз.

Асадбек хотинини ишонтиргандай бўлиб йўлга отланди.

Манзура дардли жилмайиш билан эрини кузатиб қўйгач, яна шийпон зинасига бориб ўтириди. Алхол

у ўзини фақат шу ҳовлида эмас, олам аро ёлғиз ҳис қилди.

Бу қанақа ҳаёт ўзи? Худо унга уч фарзанд берди-ю, лекин худди тирноққа зор хотин каби ёлғизлатиб кўйди. Уйда ҳамма нарсаси бор. Бекаму кўст яшашига кўпчилик ҳавас қилади.

Фақат... биттагина бўлса ҳам дардкаши йўқ...

У эрининг алдаётганини билиб турган бўлсада, эътиroz кила олмади. Куёвига эмас, Зайнабнинг ўзига бир нима бўлганини сезди. Манзура оғир дард юкларининг ҳаммоли бўлиб яна қанча яшашини билмасди. Бунақа юкнинг эзиз туришига ҳеч бир она чидамаган, Манзура чидай олармиди? У ўзига аталган ташвиш сандигини тўлиб-тошган деб ҳисобларди, эрини кузатиб, ўйлаб қараса, бу сандикда ҳали бўш жой бордай туюлди.

Кимнингдир елкасига бошини кўйиб йиғлагиси келди.

3

Асадбек ўтирган машина унинг вужудини олдинга сурар, хаёли эса ортда қолаётган уйида, паришон чехра билан кузатиб қолган хотинида эди. Жон вужудини тарк этмоқ истади. Дард қуртлари емириб адо килаёзган тана елпигич каби тебрана бошлади. Ҳозир дардга бўйин бериши мумкин эмасди: чукур-чукур нафас олиб, енгил тортгандай бўлди.

Самолётнинг олд бўлмасидан ёнма-ён жой олдилар. Ҳалимжон хожасининг одатини билгани учун тарбияли мўмин боладай жим кетди. «Атрофда хатар йўқмикин?» деган мақсадда дамо-дам олазарак қараб кўйиши назарга олинмаса, тек ўтирди. Ахтам ўриндикқа ташлаб қўйилган кўп сахифали русча газетани вараклаб, у ер-бу еридан чўкилаб ўқий бошлади. Асадбек бошини суюнчикқа тираб кўзларини юмди. Бир маҳал Ахтам Ҳалимжоннинг бикинига тирсаги билан туртиб, гапга солди:

– Мана буни эшит: Хитойдаги зилзилада қирқ минг одам ўлибди. Яна қирқ минги бедаракмиш. Саккиз кун давомида босиб қолган уйи тагида қолган бир юз саккиз ёшли кампир тирик чиқибди! Сувсиз, овқатсиз саккиз кун яшаганмиш. Минг-минглаб ёшлар ўлиб кетганды бу кампирнинг тирик қолиши ҳаётнинг адолатсизлиги эмасми?

– Адолатсизлик эмас, – деди Ҳалимжон паст овозда. – Қирқ йил қирон келса, ажали етган ўлади.

Бу гапларни Асадбек ҳам эшилди. Кўзларини очмаган ҳолда «ўчирларинг», деди. Ҳалимжон «жим ўтирсанг ўлармидинг, гапингга жавоб қайтарган мен аҳмоқ!» дегандай Ахтамга норози қиёфада қаради-ю, бошини бурди. Ахтам эса газетани тўрт буклаб, оёғи остига ташлади-да, суюнчикни пастлатиб, ястаниб олди.

Кўзлари ярим юмуқ Асадбек гўё воқеликдан тамоман узилгандай эди. Ҳавотирли ўйлар ҳукмига ўзини топширган одамнинг аҳволи ачинарлими ё дўзах ўтида куяётганникими – буни аниқлаш мумкин эмас. Ўйларнинг бири ёғоч курти сингари миясини кирчиса, бири чўғ бўлиб товонини куйдирса, бири илон каби қўйнига кирса, яна бири сиртмоқ бўлиб бўйнига осилса, бошқаси эса ўргимчак тўрига айланниб, қўл-оёғини чирмаб ташлаган бўлса, қаердан, қандай чора ахтарсин? Москвада қамалиб қолган ўғилларини чиқариш учун учганида ҳам худди шундай аҳволда – оташ чўйлар узра ялангоёқ югургандай бўлган эди. Ўша сафар чоғида ўттиз йил олдинги бир фарёд қайта уйғониб, вужудини тилкалаб ташлаганди. Ҳа, қизи бадном бўлган хотин қарғаган кезда ҳали Зайнаб туғилмаган эди. Қалб фарёди билан отилиб чиқсан қарғишнинг ўлмас экани, йиллар чиғириғидан ўтиб келиб, кутилмаган онда тақдирга чанг солишини ўшанда билмаган эди.

«Худодан қайтсан!» – хотиннинг фарёди эди бу.

«Худодан қайтибди... Сен зўрлаган қизларнинг

ҳам ота-оналари бор эди...» – ошнаси Жалилнинг шафқатсиз холосаси шу эди.

Ҳозир Москвага учайдиган онда бу фарёд яна момакалдирик сингари гумбурлаб, вужудини титратиб юборди. Жалилнинг овози гумбурламади, аксинча, висирлаб, томир-томирларига сингиб, қақшатди. Ҳамма-ҳаммаси ўшандаги даҳшати билан яна кўзига игна бўлиб санчилди.

Худодан қайтибди...

Бу қулоги остида жаранглаган овоз змас, балки юзга урилган ўлим нафасидай туюлиб, баданига муз югурди.

Зайнаб ўтириланганда Жалил айтган бу гап йил давомида унтилмаган, дараҳт илдизига тушган курт сингари юрак томирларини кемириб ётган эди. Гарчи ўшанда «Менинг маишат қилганимни кўрганимдинг?!» деб баланд келишга уринса-да, фақат ўзи-ю ва Аллоҳгагина маълум бўлган қиликларини эслаб, бу холоса рўпарасида ич-ичидан таслим бўлган эди.

Ҳозир...

Жалилнинг овози эшитилгач, энди ўзи кўринди...

Кўзларида ғазаб учқунлари бор...

Киприк қоқмай яна гап бошлади:

– Утмишда ўтган донишмандлар чиройли безатилган дунёни шайтоннинг дўконига ўхшатишган. Ким бу дўкондан бирон нарса олса, то ҳакини тұламагунича шайтон ҳоли жонига кўймайди. Такдирдан нолима, безакларга маҳлиё бўлиб, бу дўкондан кўп нарсалар олиб кўювдинг, қизингнинг номуси, ўғлингнинг жони билан ҳак тўладинг. Эҳтимол, тўловларингнинг яна чаласи бордир. Шайтоннинг иши шунаقا, ҳакини пул билан олмайди, унга банданинг ғамли кўз ёшлари керак, қонли кўз ёшларидан эса ҳузурланади. Шуни билмай қолдинг. Эсингдами...

– Бўлди, бу гапларингни ҳадеб такрорлайверма, ундан кўра дуо қил, боламни Худо асрасин!

Ҳалимжон хожасининг пичирлаб айтган бу гапини

эшитиб, унга қаради-да, «үйкүда алаҳсираяптилар», деб ўйлади.

Самолёт Домодедово аэропортига кўниб, ташқарига чиқишгандан дим ҳаводан кўнгиллари бехузур бўлди. Икки кун ёккан ёмғирдан сўнг кун бўйи куёшнинг қиздириши натижасида ердан кўтарилиган намлик шаҳарни эгаллаб олган, куёш ботган бўлса-да, бу намликни тарқатиб юборишга қодир шабада эсмаётган эди.

Асадбек шу ернинг ўзидан Балабухага кўнғирок қилди:

– Ҳалиги маълумотда ўзгариш йўқми?

– Йўқ. Ҳозир бир одам сенга яқинлашади. Нима дейишини биласан.

Қиска гап тўсатдан узилди. Асадбек ким келар экан, деб атрофига аланглади. Шу пайт унга бўйдор малла йигит яқинлашиб: «Балабуха аксирмай қўйди», деди-да, жавоб кутмай, кўча томон юрди. Ахтам ҳам, Ҳалимжон ҳам Барнаулда кутиб олиб, ҳамроҳ бўлган бу йигитни танишди. Ахтам тез-тез юриб бораётган хожасига яқинлашиб: «ишенчли йигит, бизни Фиманикига шу олиб борган эди», деди. Асадбек гапни эшитмагандай кетаверди, унга ҳатто бир қараб ҳам кўймади.

Майдончада турган «РАФ»га чиқишилари билан, машина тез қўзғолди. Аэропортдан узоклашишгач, ҳайдовчининг ёнида ўтирган йигит орқасига ўтирилиб, Асадбекка юзланди:

– Мижозингиз ҳозир Шаховскойда, икки соатлик йўл. Район марказида битта «Запорожец» билан «Москвич»га ўтамиш. Ўрмонга кираверишда «КамАЗ» кутади.

– «КамАЗ»инг нимага керак? – деб сўради Асадбек.

– Темир дарвозани очиб беради.

Асадбек эҳтиёт чораларини эшитиб, Балабуханинг ниятини тушунди: «Демак, Моргашни йўқотишни

мўлжаллаб кўйган экан, у пишириб кўйган ошни мен сузуб оламанми?» Ҳозир Балабуханинг мақсадини мушоҳада қилиб ўтирадиган вакт эмасди. Асадбек темир дарвозадан ўтгунига қадар ихтиёри шу йигит кўлида эканини англади.

– Ярим соат вақтингиз бор. Эрталабки рейсда Ленинградга учасиз. У ерда уч соат бўлиб, кейин уйингизга қайтасиз.

Агар бу гапни Балабуханинг ўзи айтганида Асадбек: «эҳтиёткорликни оширвординг, Масковдан тўғри учавераман», деб зътиroz билдирган бўларди. Бу йигит ижрочи, хўжайнини нима деган бўлса бажаради.

Шаховскойга етишганда машинадан тушмай туриб, малла йигит ён чироқни ёқди-да, чўнтағидан тўрт буқланган қоғоз чиқариб, ёйди:

– Эслаб қолинглар: бу Хонгирейнинг қароргоҳи. Моргаш ҳамма хоналарнинг чироғини ёқиб қўяди. Ётоқда ҳам, меҳмонхонада ҳам ётмайди, қазноқча жой қилиб олган. «КамАЗ» дарвозага урилиши билан, мен ошхона орқали ўтиб, ўша қазноқни оламан, сенлар, – шундай деб Ахтам билан Ҳалимжонга қаради, – ётоқ билан меҳмонхонани босасанлар. Пойлоқчилар буларники. Бир шартни унутмаларинг: бу ер Барнаул эмас, ўзбошимчалик қилмайсанлар.

Уларнинг қисқа ва кескин тарзда айтилган буйрукка сўзсиз бўйсунишдан ўзга чоралари йўқ эди. Ҳалимжон билан Ахтамга кимнинг буйруғига итоат этиш фарқсиз эди, Асадбекка эса оғир ботди. Малла йигитнинг сўзини бўлди:

– Энди сен ҳам эшишиб ол, – деди Асадбек унга амр оҳангига: – «КамАЗ»инг керакмас, дарвозани бузмай, шовқинсиз оламиз.

лар ичи Ҳамзатбей ҳам, бошқалари ҳам унга индамай қуишиди. Ҳатто Балабуха құнғироқ қилиб, иноклик билан ишлашни таклиф этди. Моргаш бу таклифга ишонкирамай, уни Москвага чакиритирди. Аввалги куни Бугай билан ҳаммомда учрашиди. Яқиндагина күз ёши қилиб юрган Бугай Хонгирейнинг ўлимидан кейин катта гапирадиган бўлиб қолган эди. Хонгирей унинг шохини қайириб қўйган эди, Моргаш бира тўла синдирмоқни қасд қилди.

– Бугай, Хонгирей ўлмаганидан хабаринг борми? – деди у салом-алик ўрнига.

– Бизнинг ишимизда ҳеч ким ўлмайди, – деди Бугай.

– Хонгирейга фойданинг йигирма фоизини ваъда қилган эдинг-а?

– Адашдинг, беш фоизга келишганмиз.

– Хотиранг пасайиб қолибди, Бугай. «Орхидея»ни очганингда Хонгирей сендан ҳеч нима талаб қилмади. Четга темир чиқармоқчи бўлганингда йўлни сенга ким очиб берди? Хонгирейга йиғлаганинг эсингдами? Тўғри, сен беш фоиз бермоқчи эдинг, лекин Хонгирей йигирмани сўради. Охири, сенга раҳми келиб, ўнга рози бўлувди, а? Кеча Хонгирей ўликхонамга телефон қилиб, «ўшанда бекорга раҳмдиллик қилибман, айтиб қўй, фойданинг йигирма фоизини берсин», деди. Гапига ишонмасанг, ўзинг учраш унга.

– Оширишнинг иложи йўқ, вазият ўзгариб, харжатлар кўпайди, бир тийин ҳам қўша олмайман.

– Гапинг тўғри, вазият ўзгарди, менинг харажатларим ҳам кўпайди, шунинг учун йигирма фоизни тўлаб қўясан. Ўзинг биласан, мен ўликхонада ишлаб юрган одамман. Ўликни ечинтириб оладиган одам Хонгирейга ўхшаган раҳмдил бўладими? Ўликхонамда жой кўп... хоҳласанг, бориб кўр. Кўмадиганлари ҳам бор, куйдириб юборадиганлари ҳам бор. Кўнглингга караб, танлайверасан. Красноярскдаги Козёлни билармидинг? Эшитгандирсан? У крематорийдан қўрқар экан, кўма қолишибди.

Табиатан күркөк бўлган Бугайга шу гапларнинг ўзи кифоя эди. Унинг ваъдасини олган Моргаш қувониб, Хонгирейнинг Шаховскойдаги қароргоҳига жўнади. Балабуханинг масаласини шу ердан туриб ҳал қилмоқчи бўлди. Крот Маматбей билан Красноярга бориб, Козловни ўлдиргач, унга бўлган гумони тарқагандай бўлди. Унинг амрига биноан Маматбей Тошкентга, Крот эса Томскка учди. Иккови ҳам вазифани ўринлатди. Бу ёғи хотиржамлик...

Факат бир нарсада янгишиди: қиморда кўп ютқизадиган Крот унга эмас, Балабухага хизмат қилишни афзал кўрди.

Балабуханинг малла йигити Асадбекка тўғри маълумот берган эди: Моргаш эҳтиёт чораси сифатида қароргоҳдаги барча чироқни ёқтириб қўйиб, ўзи қазноқда тунарди. Ярим кечаси йигитларини Балабуха билан учрашувга жўнатгач, бу тунни ўзига баҳт келтиришига ишонгани учун қазноққа тушмай, ётокази партўшакда керилиб ётди.

Бирор «ҳаёт нима?» деб сўраган тақдирда «маза қилиб яшаш» деб жавоб қайтарувчи бу нодон ҳаётидаги сўнгти тунни ўғирлаб адо қилаётганини билмасди. Ҳаётнинг туғилиш онидан бошлаб ўлим паккасига қараб жону жаҳди билан югуришдан иборат эканини сира ўйлаб кўрмаган одамдан яна қандай жавоб кутиш мумкин? Барчани ўлим билан қўрқитувчи бандасига охир-оқибат Парвардигор қандай мукофот берарди...

Ширин туш кўраётганда бир шарпадан уйғонди. Шошилиб ёстиғи остига қўл юборди-ю, тўлпончани олишга улгурмади. Аввал жағига қаттиқ мушт тушиб, гангитди, кейин бўғзига пичоқнинг ўткир тифи тиради:

— Жон ширин бўлса, қимиirlама!

Овоз қай томондан келаётганини билиш учун аланглади. Бўғзига пичоқ тираган Ахтамнинг орқасида турган Асадбекни кўриб кўзларига ишонмади. Бир неча соат олдин Маматбей қўнғироқ қилиб:

«Ўқилон»ни чувалчангдай эзib ташладим, ҳамма шартларимизга кўнди. Ҳатто юкни ўзи орқалаб ўтишга ҳам рози», деган эди. Чувалчангдай хорланган одамнинг кутилмаганда бу ерда пайдо бўлиши эртак ўрнида баён қилинса, бирор ишонмайди. Лекин... Моргаш ишонишга мажбур. Чунки рўпарасидаги «ўқилон» эмас, нақ ўлимнинг ўзгинаси эди!

— Умрингдан бир дақиқаси қолди. Аклинг бўлса, узайтирасан, бўлмаса Хонгирейнинг олдига бекафан жўнайсан.

Бу дағдағадан Моргаш саросимага тушмади. Аксинча, кулимсираб, кўришмоқчи бўлгандай Асадбекка кўл узатди:

— Гап йўқ, Бек! Қойилман! Ҳеч қанақа гап-сўзсиз таслим бўламан! Сен мутлақ ғолибсан! Мен келишингни билардим, факат Балабуха билан бирга бўларсан, деб ўйлаб хато қилибман. Омадинг бор экан, Бек. Ҳозир у ерда менинг йигитларим мўъжиза яратишяпти. Учрашувни бекорга соат тўрт-у ўттизга белгиламадим. Худди шу пайтда мен роппа-роса қирқ ёшга тўламан. Йигитларим менга киркта аҳмоқ каллани кесиб совға қилмоқчи бўлишибди, сенинг ақлли бошинг буларнинг ичиди бўлмайди, шунисидан хурсандман. Юбилейимни сен билан бирга нишонлайман, энг ардокли меҳмоним бўласан. Ҳайдар ошнанг Хонгирейга тилла ҳайкалча совға қилган эди. Сенинг келишингнинг ўзи менга катта тухфа. Ҳозирнинг ўзида ташвишли масалангни ҳал қилиб бераман. Сен мендан ранжима, биз қизингни ўғирламадик, бу шунчаки ҳазил эди, Маматбейни биласан-ку, йўнилмаган таёққа ўхшайди, ҳазили шунақа кўполроқ бўлибди. Ҳозирнинг ўзида унга кўнғироқ қиласан, суюкли қизинг ярим соатда уйингда бўлади.

Шунча гапдан кейин ҳам бўғзидаги пичоқ олинмади. Асадбекнинг қаҳрли қарашида муроса сезилмади:

— Гапириб бўлдингми? Энди қизимнинг қаердагигини айт.

– Ўзим қўнғироқ қила қолай.

– Ярим дақиқа вактинг қолди. Маматбей йўнилмаган таёқ бўлса, бу бола ўткир ханжар, қўли қалтирамайди.

– Бек, сен билан талашадиган мулким йўқ, биргаликда гўзал ҳаёт кечиришимиз мумкин.

– Сен ҳозир ҳаётингни саклаб қолишни ўйла. Қирк ёшингга қиркта калла совға олмоқчимидинг? Илико билан Бугай Балабуханинг ёнида томоша килиб тургани йўқ. Йигитларинг ўттиз тўққизта чиқса, қирқинчи калла ўзингники бўлиши мумкин.

Асадбек Илико билан Бугайни тахминан айтган эди. Моргаш бунга ишониб, бўшашибди, энди Асадбекдан марҳамат кутиб қаради:

– Мен сен билан ҳеч нарсани талашмайман. Юкни олиб ўтишимга ҳалал бермасанг бўлди.

– Сен менга шарт қўйма. Маматбей кеча менга «шарт қўйиш ихтиёринг йўқ», девди.

– Бўпти айтаман: «Грек шаҳарчаси», деган жойларинг борми? Ўша ерда Нилуфар кўчаси бор. Номини чиройлилигини қара-я! Шу қўчадаги ўн учинчи уй.

Асадбек телефон томон юрди, унинг ўрнини Ҳалимжон эгаллади.

– Сени танидим, – деди Моргаш унга қараб, – Наркобаронга мол олиб бориб ишни пачавасини чиқарган эдинг-а? Биз жонингни саклаб қолган эдик.

Ҳалимжон кар-соков одам сингари индамай тураверди.

Асадбек Жамшид билан боғланиб, манзилни айтгач, «борган жойингнинг телефон рақамини ўзинг билган жойга маълум қилиб қўй», деб топшириғини эслаттач, жойига қайтди.

– Сен менга бир дақиқа ҳаёт инъом этмокчи эдинг, билишимча, яна ярим соат қўшасан шекилли? Лайчаларингни ол, мен сени алдамадим. Ўтириб, хотиржам гаплашиб олайлик. Агар менинг йўлимга юрсанг, иккаламиз дунёning энг бой одамларига айланамиз.

— Кўлларини боғлаб, оғзига пайпогини тикиб кўйларинг, вайсайвермасин, — деди Асадбек Ҳалимжонга қараб.

— Бек, сен аҳмок одам эмассан. Зурлар бир-бирлари билан ёвлашмаслиги керак. Бу оламни бошқаришга фақат иккаламиз ҳақлимиз...

Моргаш бошқа гапиролмади. Асадбекнинг амри ўша заҳоти бажарилди.

— Битта одам бошқариши мумкин бўлган оламда иккинчи одам нима қиласди? — деди Асадбек. У энди ўз зулмининг тантанасидан кувонган ғолиб овози билан гапирди: — Сен паст кетдинг. Хўжайнинг тахтида бир ўзинг ўтиromoқчи эдинг. Сен Хонгирейнинг сояси эдингми? Соя тахтда ўтира олмайди. Хўжайнинг «Машина яхши юриши учун мурватларини алмаштириб туриш керак», девди. Сен мурватликка ҳам ярамайсан. Хонгирей ақлли гапларни кўп гапирарди Охирги учрашувимиздамикин, «битта ўлик сиқкан гўрга иккитаси ҳам сиғади», деган эди. Шу ростмикин?

Бу гаплар Моргашнинг кўркувдан потирлаётган юрагига камон ўқлари каби санчилиб, баттар талвасага солди. Гўё мушукники сингари кичкина гавдасига қафасдаги йўлбарс ғазаби жойлашиб олгандай бўлди. Жавоб беришга, ўзини оқлашга ожизлигига чидолмай, тўлғонди. Унинг бу аҳволига қараб Асадбекнинг ичидага шайтон қаҳҳа отиб юборди.

— Эсингдами, «Оқ сурпга ўралиб, қироллигимга меҳмон бўлиб келишдан олдин мен билан дўстона равишда, тирик ҳолингда учрашишни ният қиласвер», деб таклиф этган эдинг. Энди таклифингдан ўзинг норозига ўхтайсан-а?

Асадбек деворда осиғлиқ турган қиличлар, турли ханжарларга кўзи тушиб, яқинлашди-да, кумуш сопли қиличини қўлига олди. Одамзоднинг ишлари ажабланарли: чолғу асбобларини садаф билан безашига тушуниш мумкин, нағислик, назокат акс этиб туради. Инсон қонини тўкиш, жон олиш учун ясалган қуролни

безашдан мақсад нима экан? Асадбек қилични салмоклаб кўриб, яна Моргашга яқинлашди. «Мени чопиб ташлайди шекилли?» деб ваҳимага тушган Моргашнинг кўзлари ола-кула бўлиб кетди. Айниқса, кўкрагига қилич тифи тиralганида ҳаётдан умидини узди. Лекин Асадбек тифни тиради-ю, ботирмади.

– Хонгирейнинг итдай хор бўлиб ўлганини эшиганимда қувонишим керак эди. Ҳарҳолда сен шундай деб ўйловдинг. «Хонгирейнинг ўлими муносабати билан бошлаган байраминг адогига етдими ё ҳали ҳам давом этяптими?» – деб сўровдинг, а? Сен янглишган эдинг, Хонгирейнинг ўлими менга қувонч эмас, алам берди. Чунки унинг ифлос пешонасига битта ўқни ўз қўлим билан қадашни истаётган эдим. Соясини чопиб ташлаганим билан кўнглим барибир ором олмайди. Сен хўжайнингни кўрганингда гапимни етказ: мен у билан дўзах гулханида учрашсан ҳам, барибир юрагини суғуриб оламан.

Асадбек шундай деди-да, хона бурчагида турган одам бўйи баравар келадиган нақшли кўзага қаради. Кўза ўртасига Хонгирейнинг кулиб турган сурати туширилган эди. Суратдаги Хонгирей унга гўё «ҳеч қачон бу мақсадингга ета олмайсан», дегандай бўлди. Асадбек кўза томон икки қадам ташлади-ю, қилични боши узра кўтариб, кўзага зарб билан урди. Зарб бериш чоғида йўлбарс каби ўкирдики, ҳатто йигитлари ҳам сескандилар. Асадбек кўза парчаларини тепкилаб, майдалаб ташлади. Унинг ҳаракатларини Моргаш қўрқув билан, йигитлар эса хавотир билан кузатиб туришди. Ҳеч ким унга яқинлашмади, «кўйинг, ўзингизни босинг», деб кўлидаги қилични олмади. Йигитларнинг бундай қилишга ҳаддилари сиғмасди.

Орадан ярим соат ўтгач, Асадбек ўзи билган телефонга кўнфироқ қилиб, «Менга хабар борми?» – деб сўради. Уч дақика олдин шу телефон билан боғланган Жамшид факат Асадбекнинг ўзигина тушунадиган рақамларни билдириб қўйган эди. Асадбек шошилиб, титроқ бармоклари билан рақамларни терди. У томон-

да гүшак күтарилиб, Жамшиднинг овозини эшитган заҳоти умид билан:

- Нима гап? – деб сўради.
- Алдамабди, ҳаммаси зўр бўлди, хавотирланманг.
- Зайнаб яхшими?
- Яхши, сал қўрқибди. Ҳозир ўзига келиб қолди.
- Эрини айтма. Ўзи қани?
- Ҳовлида ўтирибди, чақирайми?
- Чакир...

Зайнаб титроқ овозда салом берди, гўё унинг иссик нафаси Асадбекнинг юзини майин силагандай бўлиб, кўнглидаги дардларни кува кетди.

- Опоқмисан, жон қизим?
- Яхшиман, адажон... Ҳозир ойим билан гаплашдим, хавотир олманг, дедим.
- Ақлли қизим... яна менинг касримга қолдинг... мени қарғамагин, жон қизим.

Ўзини қизининг қарғишига лойик деб билган Асадбек бу гапни юракдан чиқариб, йигламсираб айтди. Агар Зайнаб бераҳм қиз каби отаси томон лаънат тошларини отганида ҳам, Асадбек бош тутиб берган бўларди. Бирок, Зайнабнинг тилидан шафқатсиз сўзлар учмади:

– Унақа деманг, адажон, ўзингизни эҳтиёт қилинг, – деди меҳрибонлик билан.

– Сен хотиржам бўл, жон қизим, мен буларни тинч қўймайман.

– Йўқ, йўқ! – Зайнаб баланд овозда шундай деб юборди-ю, жимиб қолди. Бир неча нафасдан сўнг босиқлик билан гапирди: – Адажон, унақа деманг, ҳеч кимга тегманг.

– Бу ҳаромиларнинг қонини ичган одам савобга қолади.

Асадбек «Акангни ўлдирғанлар ҳам шулар, хунини олмагунимча тинчимайман», демоқчи бўлди-ю, тилини тийди. Зайнаб унинг ниятини англағандай яна бир оз жим турди-да, ялиниш оҳангода гапирди:

– Адажон, тегманг уларга. Ўлим улар учун нажот бўлади.

Асадбек эслади: қизи олдин ҳам шудай деган эди. Ўшанда ҳам унинг ниятини тушунмаган эди, ҳозир ҳам. Зайнаб эса йиғисини қайтармоқчи бўлгандай яна сукут сақлагач, давом этди:

– Жазоларини Худо беради, сиз соғ-омон қайтинг. Набирангиз кон устига туғилмасин...

Зайнаб яна жимиб қолди. Асадбек у ҳовлида бир неча одам қонига беланиб ётганини билмагани учун қизининг аҳволига тушунмади.

Бир оздан сўнг Жамшиднинг «Бек ака» деган овози эшитилди.

– Маматбейни қидириб топларинг, – деди Асадбек катъий оҳангда.

– Қидиришимизнинг ҳожати йўқ. Ана, ҳовлида ётибди, – деди Жамшид.

– Нимага?

– Юраги чатоқ экан, қўрққанидан ёрилиб кетди шекилли?

– Бу ёғига зийрак бўл, нима қилишни ўзинг биласан.

Асадбек гўшакни жойига қўйгач, йигитларига қараб, «бўлди, кетдик!» деди.

Моргашнинг ёнидан жилмай турган Ахтам:

– Буни гумдон қиласми? – деб сўради.

– Ўзига тегма, уйга ўт қўйларинг.

Асадбек шундай деб чиқди. Ахтам унга эргашиб, икки қадам босди-ю, ишни чала ташлаб кеттиси келмади. Чўнтагидан рўмолчасини чиқариб, Моргашнинг ёстиқ остидаги тўппончасини олди. Сўнг бошига ёстиқ ташлаб, ўқ узди. Моргаш жон талвасасида ти-тириклишга ҳам улгурмади. Қадимгилар «Нечук шарбатки, сен элга ичирдинг, ўзинг ҳам охири уни симирдинг», деганларидаи, тириклик қадаҳини ўлим шарбати билан тўлдириб ичишдан ўзга чораси қолмади.

Кўп жонларни кийнаган бу одам жонини осонгина

топширди... Зайнаб айтганидай, ўлим унинг учун на-
жот бўлди.

Ахтамнинг қўлида рўмолча билан чиқаётганини
кўрган Асадбек «бунинг нимаси?» дегандай савол на-
зари билан қаради. Ахтам тушуниб, аянчли жилмай-
ди:

- Бурнини артиб кўйдим...
- Уйни ёқиш керак, – деди Асадбек малла йигитга
караб.

– Бу ёгини бажарадиган одамлар бор.

Малла йигит ишора қилган эди, кўчадаги дараҳт-
лар панасидан икки одам чиқиб келди. Асадбек Бала-
буханинг иши пухта эканига тан берди.

– Ленинград самолёти уч соатдан кейин учади, –
деб шоширди малла йигит.

Малла йигит улар билан бирга Ленинградга учди.
Шаҳарга чиқмай, Тошкентта учадиган самолётни шу
ерда кутадиган бўлишди. Асадбек шаҳарлараро авто-
мат-телефондан Жамшидга қўнғироқ қилди. Ҳамма
иш жойида бўлганини маълум қилган Жамшидинг
бир гапни айттолмай чайналаётганини сезган Асадбек:

- Яна нима гап? – деди зарда билан.
- Бек ака, айтмасликнинг иложи йўқ...
- Чайналма!
- Элчин аканинг қариндошлари билиб қолишибди.
- Қанақасига билишибди?
- Кўшнилар етказишгандир...
- Ношуд!.. «Ҳамма ишларингнинг орқасидан шил-
таси чиқади», деб сўкиб бермоқчи эди, мавриди эмас-
лигини фахмлаб, дағдағасини давом эттирмай, «нима
қилмоқчисан?» деган савол билан чекланди.

– Дўхтирлар маҳкам, касали бўйича ўлган, деб
қоғоз беришди. Қариндошлари бугун асрга чиқариш-
моқчи... Келишингизни кутишмасинми?

– Бориб тирилтириб бераманми? Кўмса кўма-
версин. Бунча латтачайнар бўлиб кетдинг, акангга
ўҳшасанг-чи?

Акаси Маҳмуд – Чувриндига ўхшаш осон эканми? Акасига ўхшичи учун хожаси укахонини қандай яхши кўрган бўлса, унга ҳам ўша даражада меҳрли бўлиши керак. Ўлимга ҳукм қилиб юборилганининг аниқ сабабини ҳалигача билолмаган Жамшид бир ишни ўзича ҳал қилиш мартабасига етмаган эди.

Жамшид билан гаплашиб, кўнгли хиралашган Асадбек одамлар кўзидан панароқ бўлсин, деб ресторанга ўтди. У Ҳалимжон билан алоҳида ўтириди. Ахтам малла йигит билан, қолган тўртта йигит ҳам алоҳида столдан жой олишиди.

– Қайтганимиздан кейин хўжайнларингга нима деб ҳисоб берасан? – деб Асадбек мулозимини кутилмаганда саволга тутди.

«Мен милисага хизмат қилмайман, сизга содикман», деб қасам ичиши фойдасиз эди, Ҳалимжон шу сабабли «билмайман» дегандай елка қисищ билан кифояланди.

– Ўзинг кўрдинг, аслида мен сенларнинг хизматингни қилдим.

– Бунақаларни жазолайдиган қонун бор, – деди Ҳалимжон.

– Қонунинг қўлидан нима келади? Турмага тиқсанми? Булар турмангдан кўркар эканми? Қамоғингнинг битта эшик, битта дарвозаси бор. Эшикдан кириб, дарвозадан тантана-ю шоду ҳуррамлик билан чиқиб кетаверади.

Ҳалимжон эътиroz билдиromoқчи эди, хизматчи йигит яқинлашиб, Асадбек томон энгашди-да, одоб билан: «Сизни сўрашяпти», деди.

– Ким? – Асадбек шундай деб атрофга аланглади. Ҳалимжон ҳам зийраклик билан каради.

– Ичкарида кутишяпти, – деди йигит яна ўша одобли оҳангда.

Асадбек Ҳалимжон билан кўз уришириб олгач, ўрнидан турди. Буни кўриб, Ахтам билан малла йигит ҳам қўзғолдилар.

– Бир ўзингиз кирав экансиз, – деб изоҳ берди хиз-

матчи йигит кўлидаги оппоқ сочиқни билагига ташлаб.

– Бир ўзлари кирмайдилар, иши бор одам бу ёққа чиқсин, ё бирга кирамиз, – деди Ҳалимжон Асадбекнинг йўлини тўсив.

– Улар чиқишимаса керак, – хизматчи йигит шундай дегач, Асадбекнинг кулогига: «Гап ўғлингиз тақдирига тегишли экан», деб пичирлади. Шундан кейин Асадбек мулозимларига қараб: «Қимирламай ўтиларинг», деди-да, хизматчи йигитта эргашди.

Ресторан директорининг хонасида уни сочига оқ оралаган, ўрта ёшлардаги хушмуомала одам кутиб олди. Хизматчи йигит икки финжонга қаҳва қўйгач, изига қайтди.

– Сизни яхши танийман, – деди нотаниш мезбон.– Мени танимадингиз, битта самолётда учиб келдик, эътибор қилмабсиз. Ташвиши кўп одам шунақа бўлади. Қаҳвадан ичинг, совумасин. Ўзимни сизга танимайман. Бу ердан чиқасиз-у унутасиз.

Битта самолётда учиб келдик?..

Демак... доимо буларнинг кузатувида бўлганми? «Босган ҳар бир қадаминг бизга маълум демоқчими?» Шаховскойдаги воқеани ҳам билишадими?

Асадбек Балабуханинг тадбирига тан берган эди. Лекин томсклик ўғрининг Илико билан эмас, кавказлик тўдаларни қиришга қиришган маҳсус хизмат идораси билан тил бириктирганини у қаёқдан ҳам билсин? Асадбек ҳозир бунга тегишли калаванинг учини топишга уринмайди, унинг дарди ўғлининг қисмати билан банд.

– Ўғлимга нима бўлди? – деди у хавотирини яшира олмай.

– Ўғлингизга нима бўлиши керак эди? Совет Иттифоқининг эркин граждани сифатида чет элда билим оляпти, менинг билганим шу.

– Унда мени нега чақирдингиз?

– Биласизми, азизим, хаёт шундайки, Ватан сени эркалар экан, сен Ватанга хизмат қилишинг ке-

рак. Ўғлингизнинг шу ҳақиқатни тушуниши қийии бўляпти. Сиз ҳам тушунмаяпсизми?

– У ўқияпти, хизматни кейин қиласди, – деди Асадбек.

– Хизматни ҳозир бошлаши керак. У бизга айрим илмга тегишли маълумотларни аниқлаб бериши мумкин, энди тушундингизми?

– Сирли маълумотми? Жосуслик килиши керакми?

– Кўпол гапирдингиз. Жосуслик эмас, Ватанга хизмат бу. Агар сиз ўғлингизни тўғри йўлга солмасангиз, кўргуликлари яхши бўлмайди.

Бу одамнинг сўзлари ширин бўлгани билан тилида заҳар борлигини Асадбек фаҳмлади. Кўргуликлари яхши бўлмаслигининг ортида қандай аянчли қисмат ётибди?

– Мен нима қилишим керак?

– Ҳозир ўғлингиз билан боғлаб қўяман, насиҳат қилинг, ўзини ҳали у ёкка, ҳали бу ёкка ташламасин. «Валерийнинг чизган чизигидан чиқма», десангиз кифоя. Ўғлингиз ақлли бола, нима демоқчи бўлганингизни дарров тушунади.

– Шунинг ўзими?

– Бу камми?

– Олдинги талабингизга солиштиргандага буниси осон.

– Қайси талабимиз?

Асадбек айтсанми ё айтмасанми, деган мулоҳазада бир оз сукут сақлагач, ўғилларини қамаб қўйган мили-саҳонадаги сұхбатни кисқа тарзда баён қилди.

– Мен буни текширириб кўраман, гапингизга қараганда, у бизнинг одамга ўхшамайди.

У шундай деб телефон ракамларини терди-да, у ёқдан овоз эшитилгач, немисчалаб сўрашиб, Абдусамад жанобларини чакириб беришларини илтимос қилди. Асадбек унинг гапларидан фақат ўғлингиз исминигина тушунди. У томондаги телефон гўшагини Абдусамад олиб, овоз бергач, бу киши туркчалаб «бир дакика, афандим», деди-да, гўшакни Асадбекка узатди.

Отасининг овозини эшитиб, Абдусамад ажабланди:

– Ада, тинчликми? Ойим яхшимилар? – деб сўради.

– Ҳаммаси яхши, сен гапимни диққат билан эшит: Валерий деган йигит анча бамаъни бола, у билан яхшилаб дўстлашиб олгин-у, чизган чизифидан чиқма.

Отасидан бундай насиҳатни кутмаган Абдусамад ажабланиб:

– Бунинг ҳеч иложи йўқ, ада, – деб эътиroz билдириди.

– Дунёда иложсиз нарсанинг ўзи йўқ! – деди Асадбек зарда билан. – Сен айтганимни қил. Яқинда борамиз, қолган гапни ўша ерда гаплашамиз.

Гапни мухтасар қилиб, гўшакни кўйгач, у одам савол назари билан қаради:

– «Яқинда борамиз», дедингизми? Сир бўлмаса айтинг-чи, қаерга бормоқчисиз?

– Сир эмас, ўғлимнинг олдига бормоқчимиз. Нима, ҳаққимиз йўқми?

– Ҳозирдан эътиборан ҳаққингиз йўқ, азизим. Бир қадам четга чикмоққа ҳаққингиз йўқ. Сиз ўзингиз билмаган ҳолда давлат сири билан танишдингиз. Энди бу сирни сақлаш мажбурияти ҳам бор. Мана буларга имзо чекинг.

У стол устидаги қоғозларни Асадбекка узатди. Асадбек қоғозларни кўлига олиб, кўз югуртириди, кейин давлат сирини ошкор қилмаслик ҳақидаги тилхатга имзо чекиб берди.

– Отангиз ҳақидаги ҳужжатлар билан танишмоқчи бўлганингизни айтишди. Сиз учун йўл очик. Борган идорангизда полковник Чернобородовга учрашсангиз, муаммоларингизни ҳал қилиб беради. Сизга уруш иштирокчисининг оиласи фойдаланадиган барча имтиёзлар берилади. Масалан, соликларнинг ярми кесилади, навбатсиз машина ҳам олишингиз мумкин.

У Асадбекнинг бундай имтиёзларга ҳожати йўқ-

лигини билгани учун кейинги гапларни киноя оҳангиди айтди. Асадбек «кетаверайми?» дегандай ўрнидан турди. У эса жойидан жилмай, гапини давом этирди:

– Иосиф Тито ўлганидан кейин Югославияда ҳам уруш тарихига муносабат ўзгарди. Кузатаётгандирсиз, мамлакати парчаланяпти. Сал олдинроқ бўлганда отангиз жанг қилган жойларни зиёрат қилиб келишиниз мумкин бўларди. Агар ўғлингиз истаса, айланиб чиқсин, унга монелик йўқ.

У яна телефон рақамини териб, овоз келишини кутди кейин туркчалаб, «хонум афандини лутфан», деб сўради. Манзурунинг овозини эшиштгач, «бир дақиқа, хонум афандим», деди-да гўшакни Асадбекка узатди. Асадбек нима дейишини ҳам билмай қолди.

– Тинч ўтирибсанларми? – дейишдан ўзга сўз тилига келмади.

– Вой, адаси қаердасиз? – деди Манзура салом бергач.

– Йўлдаман, тўрт соатдан кейин уйда бўламан.

Асадбек шундай деб хона соҳибига қараб қўйди.

– Нима овқат қилиб қўяй? – деб сўради Манзура соддалик билан.

Эрининг кимнинг ҳузурида, қандай ахволда эканини у бечора қаердан билсин? Хотинлик бурчига мувофиқ сўради. Асадбекнинг жаҳли чикиб, зардали оҳангда: «мошхўрда», деди-да, гўшакни жойига ташлади. У одам лутф қўргазиб, Асадбекни эшикка қадар кузатиб қўйди. Хожаси кетганидан бери жойига ўтиргмаган Ҳалимжон «Тинчликми?» деб сўрамаса-да, уни савол назари билан қарши олди.

– Эски танишим учраб қолди, – деди Асадбек жойига ўтириб. – Ҳар жой, ҳар жойда танишларинг бўлгани яхши-да!

Ичига чироқ ёқса ёришмайдиган одам кулимсирагани билан дардини яшиrolмайди. Зийрак назарли Ҳалимжон ичкарида қандайдир жиддий гап бўлганини англади.

Асадбек уйга қайтиб ахлиясини қувноқроқ ҳолда күришни умид қилғанды. Куёвинг жанозасидан эндигина қайтган Манзура аввалгидай паришон күриниши билан эрининг кўнглидаги умид чирогини учирди.

Асадбек Манзура билан Зайнабнинг маъюс бокувчи кўзларига қараб эзилди. Зайнаб уч кунгача эрининг жияниникида, майит чиқарилган уйда турди. Асадбек бунга қарши бўлса-да, дардини ичига ютди, индамади.

Асадбекнинг ўзи ҳам бу кунлар ичи кўчага чикмади. Пешин чоғи зерикиб, юраги сиқилиб ўтирганда телефон жиринглаб, болохонадаги йигитлар «Ҳайдар акамнинг хотинлари» дегач, Манзурага қараб, «ўзинг гаплаш», деди. Манзура итоаткорлик билан гўшакни олиб, кўнгил хуши бўлмаса ҳам, узок гаплашишга мажбур бўлди. Кетма-кет «хўп-хўп», деявериб кутулгач, гўшакни эрига узатди:

– Сизда зарил гапи бормиш.

Асадбекнинг энсаси қотиб, «ҳа, нима дейсан, сингилжон?» деди.

– Яқин орада Масковга бормадингизми?

Бу саволи қизиқ бўлди-ку? Бирордан эшитганми ё туスマллаб сўрайтими?

– Нима эди?

– Укангиздан дарак йўқ-ку?

– Дарак кутмагинам.

– Вой, нега?

– Анавинда нима девдинг, эсингдами? «Мегажини билан ўша ёқда қўшмозор бўлсин», деб қарғаганимидинг? «Қарғишинг уриб ўша томонларда ўлиб кетса, кейин пушаймон ейсан», девдимми? Ана энди ўзингдан кўр, дардингни кимга айтсанг айтавер, нафси бузуқ эринг ичбуруғ бўлиб ўлибди. Кундошинг ўрисчасига ҳам кўмдирмай, биратўласи куйдириб, кулинни сочдириб юборибди.

– Вой, мен энди нима қиласман?

— Нима қилардинг, битта мулла чақириб ис чикариб юборсанг етарли. Кунини айтсанг, борарман.

Гўшакни жойига кўйиши билаи Манзура ёқасини ушлаганича:

— Вой ўлмасам, рости биланми? — деб сўради.

— Кўявер, озгина куйсин, ўрис хотинга уйлангани рост. Эрнинг қадрига етмаганидан кейин энди тирикми ё ўликми, бунингга нима фарқи бор?

Манзура «ставба, тавба» деганича, нари кетиб, ўзининг юмушларига овора бўлди. Аср намозини ўқигач, Асадбекка қарашга ботинмай, «эрининг кирки чиқкунича уйида ўтирамиши», деди.

— Бўлмаган гап! — деди Асадбек ғазаб билан.

— Кўнглига қарамасак бўлмайди, адаси...

— Кўнглига?

Асадбек Зайнабнинг «неварангиз қон устига туғилмасин», деган гапини эслаб, хотинига савол назари билан қаради:

— Бўйида борми?

— Нега унака деяпсиз?

— Сен саволимга жавоб бер.

— Бўлмаса керак...

— Анигини айт!

— Йў-ўқ...

«Ҳайрият... — деб енгил нафас олди Асадбек, — «неварангиз» деганда акасининг боласини назарда тутибди-да...»

Асадбек ўйлаб кўйган режасини амалга оширишни галга солмай, Жамшидни чақирди:

— Ахтамга айт: Элчин акангнинг уйи эрталабгacha йўқолсин.

— Буздириб ташлайликми?

— Калланг жойидами? Бир хил уйларда газ очик қолса портлаб кетармишми?

Жамшид тушундим, дегандай куллук килиб, буйрукни бажаришга шошилди...

АБДУСАМАД

1990 йил, июнь, Олмония.

Асадбек навбатдаги қасос жомини симириб уйига қайтаётган вактда мусофирикдаги ўғли боши узра ташвиш булутлари түпданаётган эди. Отаси билан гаплашиб, унинг нима сабабдан бундай буйруқ бергани сабабини англашга уриниб ўтирганида уни телефонга чақиришди.

— Мен Валерийман, ўзинг билган ўша турк қахвахонасида кутяпман...

Буйруқ оҳангидаги бу гап... Яна сенсирашга ўтилиши... Беҳурматлик белгисими ё яқинлашишни англатувчи русларга хос одобми? Ёки кимга тобе эканини билишига ишорами?

Катта ўйин бошланганидан кўнгли гашланганича айтилган жойга етиб борди. Валерий ҳурматини жойига кўйиб кутиб олди. У қўлидаги кўп саҳифали рангли газетани бўш стул устига ташлаб, хизматчини чақирди-да, қаҳва буюрди:

— Ҳозир дунёни водород ёки нейтрон бомбаси кизиктирмай кўйди, — деди у. — Ҳамманинг бутун зътибори биогенетикада! Шу соҳага ўтиб кета қолсаммикин? Сен қизиқарсан? Мен клонлаштиришни назарда тутяпман. Қўллаб-куватлаётган одамлар бунинг нималигини дуруст англашмайди. Нима ўзи бу, деб сўрасанг, агар маъносини билса, ўз ҳужайрасидан фойдаланиб нусха кўчириш, дейиши мумкин. Тушунишимча, бола организми минглаб ҳужайралардан ташкил топади. Агар бир-икки ҳужайра етишмаса, ногирон, ҳатто қўлсиз ёки оёқсиз бўлиб тугилади, тўғрими? Хўп, энди менга тушунтириб бер: биттагина ҳужайрадан қанақа бола пайдо бўлади? Агар эллик ёшли киши ҳужайрасидан одам ясалса, неча йил яшайди? Дейлик, ҳужайраси олинган одам етмиш йил яшаши керак. Ундан эллик йиллик ҳужайра олинди-

ми, демак, ясалган одам йигирма йил яшар экан. Генетикларинг буни тушунтириб бера оладиларми?

– Буни генетиклардан сўранг.

– Сўрамайман, менга шу газетадаги вайсақиларнинг гапи ҳам етиб ортади. Илм ҳам отбозор бўлиб кетди.

Валерий илмдаги адолатсизликлар ҳақида гапира туриб, бирдан мавзуни ўзгартирди:

– Мени бошқа жойга юборишяпти. Яқинда сенинг жонажон дўстинг келади. Менга шу қаҳвахона ёқарди. Унга уйда гаплашиш маъқулмиш. Уйи қаердалигини ўзи айтади. Дераза дарчасининг ҳар куни соат саккиздан саккиз яримгача очиқ туриши хотиржамлик белгиси ҳисобланади. Уйга бемалол кираверасан. Манави газетани олиб, дикқат билан кўриб чиқасан. Рекламлардаги манзилларга белги қўйилган: ўн икки жойда учрашув нуктаси бор. Ҳар бирининг номланишини янги дўстинг айтади. Ҳозир қаҳвахонадан бирга чиқиб, кутубхонага борамиз. Ўша ерда хайрлашамиз. Отанг биз билан ҳамкорлик қилишга тилхат берди. Энди ота-онанг гаровда тургандай бўлади, бу ердаги қадамингни сал чатоқ боссанг, уларга жабр бўлади.

Абдусамад шу тариқа ўргимчак тўрига ўралди. Доктор Худоёр уни куткариш чораларини кўради, лекин фойдаси бўлмайди. Орадан ойлар ўтиб, советнинг чоки сўкилгач, енгил нафас олади. Унгача босиб ўтилиши керак бўлган анча ташвишли довонлар бор.

ЗОҲИД

1990 йил, июнь, Тошкент.

Элчиннинг ўлими ҳақидаги кутилмаган хабар Зоҳидни таажжубга солди. Унинг ўлимида жиноят унсурлари бўлса аниқлаш учун эмас, балки танишлиги хурматидан жанозага борди. Борди-ю... Асадбекнинг

куринмаганидан ажабланди. Күпчиликка қўшилиб, тобут орқасидан бораётганда Жамшид яқинлашиб саломлашди-да, ажабланганини сезгандай унга изоҳ берди:

– Бек акам яна қаттиқ иситмалаб қолдилар...

Шундай деди-ю, одамлар оқимига қўшилиб кетди.

«Ҳар бир нарсага гумон билан қарашимни атрофимдагилар ҳам сезишади шекилли?» деган ўй Зоҳиднинг кўнглини хира қилди.

Майит лаҳадга кўйилиб, яқинлари бир кафтдан тупроқ ташлаётган пайтда кўзларидан ёш куйилаётган кўркам йигит унинг диққатини тортди.

«Козимбек-ку!?

Суратига қарайвериб, чехраси ёд бўлиб кетган, адашиши мумкин эмасди. Ҳозирнинг ўзида бориб, билагидан ушлагиси келди. Ҳатто қабр томон икки қадам ҳам ташлади. Йигит ўзига тикилиб турган нигоҳни сезиб, Зоҳид томонга қаради. Кейин белкуракни олиб қабрга тупроқ ташлай бошлади. Зоҳид эса уни кузатиб туриш билан чекланди. «Агар қочадиган бўлса, куръон ўқилиб, ҳамма турган пайтдан фойдаланади», деб ўйлаган Зоҳид ундан узоклашмасликка ҳаракат қилди.

Фотиҳадан сўнг ҳамма тургач, йигитни кўздан қочирди. Жаноза маросимида эканини ҳам унутиб, атрофга аланглай бошлади. Қабристондан чиқаверишда орқа томонидан кимдир ширали овозда салом берди. Ўгирилиб қараса – Козимбек!

Зоҳид бир неча нафаслик таажжубдан сўнг ўзини ўнглаб олгач, «Козимбекмисиз?» деб сўради.

– Ҳа, сиз қидираётган Козимбек менман.

Зоҳид унинг кўзларига қараб, маъсум бир покликни кўрди.

– Мени танийсизми? – деди ажабланиб.

– Учрашмоқчи бўлиб икки марта йўлингизни пойладим. Сизни кўрдим-у, яқинлашишга қўрқдим. Уч кун олдин Элчин акамга кўнғироқ қилиб маслаҳат

сўраган эдим. Сизга учрашишимни тайинладилар. Мен ёвуз қотил эмасман... мен қўркоқман... Кошиб юрмаслигим керак эди.

– Нима бўлганини шу ерда айтмоқчимисиз ё идорага борамизми?

– Олдин эшитинг, кейин... ўзингиз биласиз. Қамодан қўрқмайман... Илёсбекнинг кўзларидан қўркяпман...

– Айтинг бўлмаса.

– Илёсбек менинг энг қадрдон дўстим эди. Кўп ашулаларни бирга айтганмиз.

– Лекин Илёсбекни сизга қараганда қобилиятлирок, деб ҳисоблашаркан.

– Бунга ўзим ҳам тан берардим. Илёсбек авжни мендан кўра яхшироқ оларди. Лекин ишонинг, иккимиз обрў, шухрат талашмас эдик.

– Шунга қарамасдан... Илёсбекни сиз отдингизми?

Козимбек хўрсинди.

– Отдим... Лекин бу бир ўйин эди.

– Қанақа ўйин?

– Толибжоннинг янги уйига борувдик. Деворига милтиқ осиб қўйилган экан. Урушда зўр мерган бўлганлари учун бобомга совға қилишган», деб мақтанди. «Ростакам милтиқми, отиладими?» деб қизиқдик. «Отилади, ўқлари ҳам бор», деди. Кейин: «менам мерганман, йигирма қадамдан шишани учириб юбораман», деб мақтанди. Ўқ отиш тўгарагига қатнаганим учун «ўттиз қадамдан олманинг уругини пойлайман», деб менам мактандим. Шунда Зулайҳо, «Йигитлар, унда гўзал маликага етишиш учун отишмайсизларми?» деб қолди. Олдин «Халқаро кўриқда ким ғолиб чиқса ўшанга тегаман», деб шарт кўйган эди. Уни уча-ламиз ҳам яхши кўрадик. Лекин унинг кўнгли бошқа йигитдалигини билардик. Билсак ҳам муносабатимиз яқин эди. Унинг шартлари жиддий эмас, ҳазил эди. Хуллас, боқقا яқин майдончада отишадиган бўлдик. Толибжон эплолмади. Мен олмани нишонга олмоқчи

бўлганимда Илёсбек «Тўхта, ҳақиқий мерган бўлсанг, циркдагига ўхшаб отасан», деб олмани бошига қўйиб олди. Мен ҳазиллашиб қўрқитмоқчи эдим. У ҳам «ҳазиллашяпти, барибир отолмайди», деб ўйлади шекилли. Мени калака қилиб чалғитмоқчи бўлди. Аввал секин ўтирди, кейин ўнг томонга сурилди. Мен кулиб нишонга олавердим. Чап томони бўш эди. Олманни ҳам, бошини ҳам нишонга олмадим, ишонинг, бўш томонни пойладим... Қанақасига сурилганини билмай қолдим...

Козимбек «гагларимга ишонинг», дегандай Зоҳидга илтижо билан қаради.

— Мен тахминан шундай бўлгандир, деб гумон қилган эдим. Отиш сабабини билмасам ҳам, Илёсбекнинг туриб берганига ишонардим. Ҳозир фотиҳа ўқиб, кейин идорамизга борамиз, айтганларингизни ёзib берасиз, — деди Зоҳид.

Козимбек унга итоат билан эргашди. Худди қўл-оёқларига оғир кишан урилгандай оғир-оғир қадам босди.

Козимбек «Тушунтириш хати» ёзаётган дамда Зоҳид милициядаги терговчига кўнғироқ қилиб, милтиқни ашёвий далил сифатида олиб келтирди. Ўша куниёқ Толибжон билан қиз гувоҳ сифатида кўрсатмаларини ёзиб беришгач, Саид Қодиров раҳбарлар хузурида қизаришдан кутулди...

АСАДБЕК

1991 йил, апрель.

Олдинги йили Каримулла тилёғламалик қилиб: «Ҳажга биллалашиб борсак бирам ярашади, сиз билан борсам икки марта ҳаж қилгандай бўламан», деганида Асадбек «Сен ҳаром қадамингни Маккага босма, Каъбатуллохга покиза одамлар бориши керак», деб

уни ҳайдаган эди. Масжид қурдираётганини писанда қилиб, Ҳажга боришга ундовчилар кейин ҳам топилди. Абдураҳмон табибникида даволанаётганида «тузалиб кетсам, Ҳажга бораман», деган ният ҳам туғилган эди. Кейинги воқеалар уни бу ниятдан қисман қайтарди. Рамазон байрамида йўқлаб келган Саматохун бу йил Ҳажни ният қилганини билдириб, Асадбекни ҳам даъват этганда, хаёлига ўзини ҳам қувонтириб юборган бир фикр келди: Манзура боради!

Қарорини хотинига айттан эди, у қувониши ўрнига эрига маъюслик билан тикилиб:

– Бирга бормаймизми? – деб сўради.
– Менинг тайёргарлигим йўқ. Бориб, болаларимизни дуо қиласан. Кейинги йили бирга борамиз. Ўшанақаси Германияга ўтиб, неваранг билан келинингни олиб келамиз.

Бу жонбахш ваъдадан Манзуранинг кўнглига чироқ ёқилгандай бўлди.

Невараси туғилгандан бери на ўзи бора олади, на келини келади. Абдусамад ҳам ҳар телефон қилганида галга солади. Эри тайнинли гап айтмайди. Четга чикиши мумкинмаслигини аниқ билмагани учун турли хаёллар буровида қийналаверади.

Эрининг эндинги ваъдаси... Дийдорга қадар яна бир йил вакт бўлса-да, кўнгли ёришди. Аслида Ҳаж ибодатини бажариш ўзининг дилида ҳам бор эди-ю, эрига билдиришдан тортиниб турганди.

– Сиз бормасангиз... маҳрамсиз боришим мумкин эмас, – деди етдим деганда йиқилган иложсиз одамнинг афсуси билан.

– Жалил боради. Жалил сенга aka қаторида, нағозини ҳам қотириб ўқийди. Хоҳласа Зайнаб ҳам борсин.

Қани эди! Лекин... канча тушунтирмасин, Зайнаб отаси каби саждага бош қўйишга рағбат қилмаётган эди. «Эҳтимол Ҳажга бориш баҳонасида иймонга кириб қолар», деган умидда яна гапирди. Зайнаб

зътиroz билдиришга баҳона ўйлаб турганида Манзу-
ранинг ўзи топиб берди. Отасининг сафарни кейин-
ги йилга мўлжаллаганини эшитиб, «мен адам билан
бора қоламан», деди. Манзура бундан ранжиса-да,
«на илож, Аллоҳ чакирмаганлар бормайди-да», деб
тақдирга тан берди. Эрининг розилигини олиб, Афру-
зани таклиф этди. Афруза Асадбекнинг маблағига бо-
ришдан оғринди-ю, буни сиртига чиқармади. «Бу йил
иложим йўқ, кейинги йилларда «лаббайка»ни айтиб
йўлга чиқиш насиб қилиб қолар», деб кўйди. Кўнгил
бу ибодатга чопгани билан, бориб-келишга етадиган
маблағни ҳеч қачон тўплай олмаслигини билса ҳам,
бу таклифни қайтаришга ўзида куч топди.

Асадбек Жалилнинг уйига бориб, ниятини баён
килганида у Афрузадан фарқли ўлароқ, «Мен Ҳажга
борадиган бойларданмасман», деб бобиллаб берди.

– Харажатини ўзим кўтараман, – деди Асадбек му-
лойимлик билан.

– Хотинингни Ҳажга юборгинг келаётган бўлса,
ўзинг намозга киргин-у, олиб боравер.

– Ҳеч бўлмаса битта яхши иш қилишимга ёрдам
бергин, илтимосимни қайтармагин.

Асадбек унга ҳеч қачон бундай синиқ оҳангда га-
пирмаган эди. Жалил бўшашибди. Асадбек ялиниш
оҳангидаги «Манзурани синглим, дегансан, синглинг
учун бориб келгин», дегач, ҳовури пайсайди.

– Битта шартим бор: бир йил ичидаги намозга кириб,
кейинги иили ўзинг ҳам борасан Ҳажга.

– Айтсанг, айтмасанг, шунақа ниятим бор. Бу са-
фар хотининг бирга борса янаям яхши бўларди, – деди
Асадбек.

– У нима қиласи? Намозни ўқишини ўргансин...
Мени ўйлаганинг учун раҳмат, лекин сен доим чала
ўйлайсан. Мухиддин ота билан гаплашмадингми?

– Ниятим бор. Отамга биргалашиб айтамиз, деб
олдин сенга келдим, бутун одам.

Жалил тезгина отланди-ю, Мухиддин отаникига
йўл олишибди.

Ҳар тонг намоздан сўнг китоб ўқиши Мухиддин отанинг одати эди. Бу тонг бир шарафли ҳадисга Мавлоно Румий томонидан берилган шарҳни ўқиб, мутассир бўлди. Нонуштадан кейин янада чуқурроқ англаб олиш мақсадида китобни қайта қўлга олди:

«Пайғамбар, соллаллоҳу алайҳи васаллам, марҳамат қилдиларким: «Олимларнинг ёмони амирларни зиёрат қилгани, амирларнинг яхшиси олимларни зиёрат этганидир. Фақирнинг эшигига келган амир нақадар хуш ва амирнинг эшигига борган факир нақадар ноҳушдир».

Халқ бу ҳадиснинг зоҳирий маъносинигина қабул килган. Яъни бир олим ёмон олим бўлмаслик учун амирни йўқламаслиги лозим, амирни бориб кўриш унга муносиб эмас, деб билган. Аслида фикрнинг ҳақиқий маъноси халқ ўйлагандай эмас, балки шундай: Олимларнинг ёмони амирдан ёрдам олгани ва улар воситасида ўз аҳволини яхшилагани, кучга кирганидир. Амирлар менга инъом берадилар, мени иззатикром қиласидар, бир яхши жой эҳсон этадилар, деган тушунча билан ва уларнинг кўркуви остида ўқиган кимса олимларнинг энг ёмонидир. Шу ҳолида бу кимса амирлар тарафидан ислоҳ бўлган, билимсизликлардан биладиган аҳволга келгандир. Олим бўлганда ҳам амирлар кўркувидан ва уларга ёмонлик қиласликдан тарбия кўрган бир инсонга айлангандир. Энди у истаса-истамаса, ҳамма вакт бу йўлга уйғун тарзда ҳаракат этмоғи керак бўлади. Хуллас, бу важдан зоҳиран хоҳ у амирни кўргани борсин, хоҳ амир унинг ҳузурига келсин, барибир, у зиёрат қилган, амир эса зиёрат қилинган бўлади.

Олим агар амирлар соясида олим бўлишни ўйламаса, унинг билими ибтидо ва интиҳода Аллоҳ учун қилинган бўлади. Унинг тутган йўли ва кўрсатган фаолияти савоблидир. Чунки яратилиши шундайдир, балиқ сувдан бошқа ерда яшай олмаганидек, у ҳам бундан ўзгани қилолмайди. Унинг

қулидан келгани шу. Бундай бир олим ҳаракатларини бошқариб йўлга солиб турган нарса – АҚЛдир. Ҳамма ундан қўрқади ва инсонлар бальзан билиб, бальзан билмасдан у тараттган нурдан баҳра оладилар. Ҳуллас, бундай бир олим амир ҳузурига борса, зоҳирان у зиёрат қилган, амир эса зиёрат қилинган бўлади. Аммо амир олимдан ҳамма вақт юксалишга чорловчи бир қувват – ёрдам олади, олимнинг эса амирга эҳтиёжи йўқ, чунки у бадавлатдир, нур сочаётган қуёш кабидир. Иши тамасиз кўмак бермоқ, эҳсон этмоқдир. У тошлардан лаъл ва ёкут қила олади. Таркиби тупрокдан иборат бўлган тоғлардан мис, олтин, кумуш ва темир маъданлар ясайди. Тупроқни тозалайди, ёшартиради. Дараҳтларни турли-туман мевалар билан бойитади. Иш ва эрмаги – бағишламоқдир, ҳадя киммоқдир.

Арабнинг «Биз бермоқни ўргандик, олмоқни ўргана олмадик» мақолидаги сингари олим ҳам беради-ю, бирордан олмайди. Ниҳоят, бундай олимлар ҳақиқатда зиёрат этилган, амирлар эса зиёрат этган бўладилар».

Муҳиддин ота бу фалсафанинг мағзини чақиб ўтирганда Асадбек билан Жалил кириб келиб, уни фикр дунёсидан юлиб олишди. Бир оз у ёқ-бу ёқдан гаплашиб ўтиришгач, Жалил мақсадни баён қилди. Муҳиддин ота уларга миннатдор назар билан боқди. Ҳатто кўзлари намланди. Кейин бошини эгиб, ўйга толди. Имкон ўзида бўлганда учиб борарди. Лекин... маблағ масаласи... Тўтри, пулнинг ҳароми бўлмайди. Бирок, уни топиш йўлларида шубҳа бўлса... Муҳиддин отанинг шубҳаси бор, аммо билдирамасликка уринаади. Асадбек келтирган неъматларнинг ўндан бирини олиб қолиб, колганини қўни-қўшниларга тарқатади. Ўзи Жалил келтирганлар билан кифояланади. Шундай ҳолда буларнинг таклифини қабул қила олармиди? Рад этса, қўнгилларини оғритади. Муҳиддин отанинг ўйга толгани шундан.

У бошини кўтариб аввал Асадбекка, сўнг Жалилга қаради-да, маъюсгина жилмайди:

— Сизларни Аллоҳ сийласин, — деди ҳаста овозда. — Ҳазрати Соҳибқирони Акбар Шероз шаҳрига боргандарида Ҳофиз Шерозий билан сұхбат қуриб, «Ғазалингизда гүзалнинг битта холига Самарқанд билан Бухорони тортиқ қилиб юбормоқчи бўлибсиз. Сизни Самарқандга олиб кетаман, бу шаҳарнинг нақадар гүзаллигини ўз кўзингиз билан кўринг», деб марҳамат қилғанларида, шоир: «кариб қолдим, етиб боролмай йўлда ўлиб қолишим мумкин, етиб борсам ҳам, она шахримга қайтиб келолмасман», деб узрини айтган экан.

Жалил бу тарихнинг баёнидан мурод не эканини англади. «Ҳали куч-қувватга тўласиз, Худо чакирганидан кейин Ўзи кўллайди», деб аврамоқчи бўлди. Унга Асадбек кўшилди. Бирок, икковининг ҳаракати зое кетди. Муҳиддин ота:

— Каъбатуллоҳда менинг ҳакимга ҳам дуо қилинг, Мадинаи Мунавварага бориб, Масжидул набавияга кирганингизда пайғамбаримиз алайҳиссаломга саломимни етказинг, — дегач, умидлари синган ҳолда хайрлашдилар.

МАНЗУРА

1991 йил, июнь, Маккаи Мукаррама.

Одамлар оқими ҳажарул-асвад томон интилади. Каъбатуллоҳ атрофида айланаштган ҳожиларнинг бир-бирларига азият етказишлари ман этилганига қарамай, одамлар бу одобни унутиб, бир-бирларини босиб бўлса-да, қора тошни ўпишга интилишади. Манзура бу оқимни ёриб бориб, муқаддас тошни ўпишдан умидини узган эди. Каъбани олтинчи айланишида оқим уни ҳажарул асвадга ўзи олиб борди. Ҳатто муқаддас тош рўпарасига келганда шошиб қолди. Тошдан тараляётган кўнгилни хуш этувчи ёқимли ҳид димоғига

урилди. «Жаннатдан чиқарилган бу тошдан жаннатнинг иси тараги туради», деган гапни эшилган эди. Ҳозир худди жаннатга тушгандай хис этди ўзини. Вужуди ҳалимдай юмшади. Ўзини гүё күш каби хис килди. Тошни ўпди. Кўз ёшлари тошга томди...

Кун бўйи ибодат билан банд бўлди, меҳмонхонага бориб овқатланиб келишни ҳам хоҳламади. Хуфтонни ўқигандан кейингина Жалилнинг зўри билан қайтди. Худди юрагининг бир парчасини ташлаб чиқаётгандай, айрилиқ азоби билан қайтди меҳмонхонага. Кечки таомни еб, хонасига қирганда кўнглини хира қилувчи манзарага гувоҳ бўлди.

Хотинлардан бири ўртага ўтириб олган, атрофига турли матолар ёйиб ташланган. Бу хона ҳожиялар ҳордик чиқарадиган жойга эмас, ёймачи бозорга ўхшаб қолган эди. Хотин барчани ўзига қаратиб гап берарди:

— Мен аҳмок, юк бўлади, деб ўн кило асал олибман. Кейинги йил икки фляга асал олиб келаман, биратўласи ойимга «ҳаж бадал» килиб кетаман.

Шундан сўнг харид қилиб келган молларини бир-бир тахлаб, риал долларга қанча, бу доллар рублга қанча бўлишини санади. Ҳисоб-китобга шу даражада берилган эди-ки, ҳозир намозга турса, «тўрт ракаат суннат ўқийман», деб ният қилиш ўрнига «тўрт риаллик намоз ўқийман», деб юбориши ҳеч гап эмасди.

Манзура секин орқасига қайтиб, Жалилга билдирамай, бир ўзи Каъбатуллоҳга қайтди. Тонгни шу ерда кутиб олди.

Мадинаи Мунавварага бориб келгунча ҳам, хайит арафаларида Минога чиқишганда ҳам, Арафотда туриб дуо қилганда ҳам, Муздалифадан тошчаларни териб келиб шайтонни лаънатлаб отганда ҳам қандайдир күш қанотида учиб юргандай бўлди. Унинг ибодатга бутун борлиғи билан берилганини кўрган Жалил алашмай, холи қўйди.

Жамаротда шайтонга сўнгти тошни отиб, Маккага

қайтгач, ҳадемай бу муқаддас жойларни тарк этажагини ўйлаб, юраги эзилди. Бир томондан уй соғинчи, иккинчи томондан айрилик уни паришон қилди.

Видолашув ибодатини бажариб бўлганда субҳ кириб, намоз чакириғи янгради. Бомдодни ўқиб бўлиб, қаъдага ўтирганида юраги бежо урди, худди қафасни бузиб чикишга қасд қилган күш каби потирлади. Шу онда Каъбатуллоҳ томон янада ёришиб кетиб, одамлар кўринмай қолишиди.

Кейин...

...Абдуҳамид кўринди.

Кучоқ очиб югуриб келарди...

«Жоним болам, сенам шу ердамисан?» Шундай деб пичирлади-ю...

юраги тўхтади...

АСАДБЕК

1991 йил, июнь.

– Қанча сарф қилиб бўлса ҳам жасадини олиб келсанг ўлармидинг? – деди Асадбек.

– Эсинг борми? Одамлар ўша ерда жон бериб, ўша ерда қолишни орзу қилишади-ку? Кейинги йили борасан, зиёрат қиласан, – деди Жалил бўш келмай.

Мухиддин ота бу фикрни қўлламаганида Асадбек унга яна аллақанча маломат тошларини отмоқчи эди.

Мухиддин ота билан Жалил аввал Асадбекка, кейин бошига қора рўмол ташлаган Зайнабга тасалли берувчи сўзларни айтишгач, уйларига қайтишиди. Зайнаб ошхонага кириб кетди. Асадбек шийпонга чиқиб, ёнбошлади.

Кўкрагида қаттиқ оғриқ қўзғолди. Икки кунгача оғриқ азоб берди. Кейин йўтала бошлади. Йўтади азобини Абдураҳмон табибининг дориси кесган эди. Энди унга шифо берувчи табиб йўқ. Асадбек мозор-

га тортиб борадиган дард билан оғриганини англади. Англади-ю, күнгли равшанлашди. Суйганлари билан қовушиш онлари яқин қолганидан ҳатто қувонди. Дунё ташвишларидан безган одамга яна нима керак?

Йўталгандан бўғзидан қоп-қора қон отилиб чиқди.

Ётган жойида умид билан кўча томон қаради: дарвозаси очилиб, бир тўп одам саф бўлиб кириб кела бошлади. Диққат қилиб қаради: барчалари ўлиб кетган қариндошлари. Қачондир шундай туш кўрган эди.

Дадаси... онаси... Самандар... Маҳмуд... Абдуҳамид...

Унга маънодор қарашибди, сўз айтишмади. Шийпонни ёнлаб, ўтиб кетишибди.

Сўнг... дарвозахона ёришибди. Зайнаб кўринди...

Фақат Зайнаб...

Кўзларида ўт чақнайди...

Кейин...

Асадбекнинг кўз олди коронғилашибди.

Хожаларини туну кун турли балою оғатлардан, фалокатлардан асрашлари шарт бўлган болохонадаги йигитлар ғафлатда қолдилар.

Агар киши атрофини етти қават темир кўрғон билан ўраса-да, ажал ўзига йўл топади. Игнадай тешикдан кириб бўлса ҳам вазифасини белгиланган кун, соат, дақиқа, сония, нафасда бажаради. Кишининг саноқли нафаси адогига етгач, қўшимча нафас ололмайди, ризқи тугагач, қўшимча бир қултум сув ҳам ичолмайди. Шундай экан, хатарнинг олдини олиш пайида болохонада ўтирувчи йигитларнинг қўлидан нима келарди?

В а с с а л о м .

СҮНГСҮЗ ЎРНИДА

Кўп йиллик ишимизни ниҳоясига еткурган Аллоҳ таборак ва таолога беадад шукурлар қиласиз. Окибатнинг хайрли бўлишини Раббимиздан сўраймиз.

Асарни сўнгти сатрларигача ўқиб чиқсан сиз – азизларга миннатдорлик билдириб, ҳақингизга хайрли дуолар қиласиз. Ҳафсалантлизни пир қиласидан сатрлар, сахифалар учраган бўлса, Аллоҳ ҳузурида тавба қиласан ҳолда, сиздан узр сўраймиз. Бир неча йиллар давомида учрашувларда «бешинчи китобни ёзасизми?» деб сўрашди. «Хоҳиш бор, ғайрат бор-у, журъат етишмаяпти», дердим. Ниҳоят, Аллоҳга таваккул қилиб иш бошладим. Китобхонлардан дуо қилишларини сўрадим. «Китобни ёзсин», деб шунчаки дуо қилманглар, «китобни яхшилаб ёзсин, савияси тушиб кетмасин, аввалгиларидан аълороқ даражада ёзсин», деб дуо қилинглар. Шояд, дуоларингиз ижобат бўлиб яхши асар ёзилса», деб эдим. Ҳозир сўнгти нуқтаси қўйилган бу китоб шу дуоларнинг натижасимикин, валлоҳи аълам!

Мазкур асарни ёзиш ҳаракати ўтган асрнинг саксонинчи йилларида бошланган эди. Биринчи китоб «Шарқ юлдузи» журналида 1992 йилда нашр килиндики, фурсатдан фойдаланиб таҳририят аҳлига ташаккурларимни айтаман. Аммо, афсуски, «Ёзувчи» нашриётининг «китобни босиб чикарсак сота олмаймиз, нашриёт зарар кўради» деган ғалати хавотири туфайли икки йилгача босилмай ётди. Ана шунда «Шарқ» нашриётининг эътибори ва мардлиги туфайли китоб мухлислар қўлига етиб борди-ки, бу учун нашриёт раҳбарлари, барча ходимлари ва ишчиларига миннатдорчилигимни билдираман. Ана шундан бери деярли

барча асарларим шу нашриётда нашр этиляптики, бу учун ҳам миннатдорман.

«Шайтанат»нинг тўрт китоби нашр этилгач, матбуотда ёзма равишда, учрашувларда оғзаки тарзда кўп сухбатлар бўлди. Ўқувчиларимиз мактублар йўллаб турли саволлар билан қизикдилар. Лозим жойда тандид ҳам қилдилар, баъзан жавоб қайтармокқа тилимиз ожизлик килган пайтлар ҳам бўлди. Бешинчи китобга якун ясашда беҳисоб саволларга муҳтасар жавоблар қайтаришни лозим кўрдик.

– «Шайтанат» асарингизни ёзишига нима туртки бўлган?

– Бу савол деярли ҳар учрашувда, ҳар мактубда такрорлангани учун сухбатни шундан бошладим. Учрашувларда бу саволни эшишишим билан ҳазил оҳангига «шайтонлар туртки бўлган», деб жавоб берардим. Гарчи жавоб ҳазилга йўйилса-да, унинг замираша ҳақиқат ҳам бор. Умуман, мен нима учун детектив, яъни жиноятлар жараёни баён этилган асар ёзишига ҳаракат қиласман? «Алвидо, болалик!», «Сўнгги ўқ», «Мурдалар гапирмайдилар», «Чархпалак» «Талваса» ва ниҳоят «Ов»... Одамлар шу мавзуга кўпроқ қизикканлари учунгина ёзилганми ё бошқа сабаб ҳам борми? Бор. Асосий сабаб, менинг асл мақсадим бошқа томонда. Мен жамиятни жиноятчиларсиз равнак топишини орзу қиласман. Ҳеч кимнинг боласи жиноятчи бўлиб туғилмайди. Ҳеч қайси ота-она фарзанди туғилганда «ўғлим (ёки қизим) ўғри бўлсин, гиёҳванд бўлсин», деб орзу қиласми. Лекин афсуски, маълум ёшга етганда айримлар жиноят кўчасига бурилиб, шайтанат оламига кириб кетганларини ўzlари ҳам билмай қоладилар.

1982–83-йилларда тоғам, машҳур ёзувчи Мирзакалон Исмоилий қайсар ўсмирнинг оқибатда жиноятчига айланиб қолиши мумкинлиги ҳакида асар ёзмокчи эканликларини айтдилар. У дамларда тоғамнинг сиҳатлари унча яхши эмасди. Шунга қарамасдан ёшлар-

га бир ибратли гап айтгилари бор эди. Ички ишлар вазирлигидагилар билан маслаҳатлашиб, ёзувчини ўсмир жиноятчилар сақланадиган «ахлоқ тузатиш меҳнат колонияси» деб аталмиш қамоқхонага юбордик. Тоғам кун бўйи ўша ердаги болалар билан танишиб қайтдилар. Мен тоғамни кутиб олиб: «Болаларни кўрдингизми?» дейишим билан кўзларида ёш кўринди. Йифидан ўзларини тутолмай: «Ўша болалар қамоқда ўтирадиган болаларми? Ўқийдиган, ўйнаб куладиган вақтларида-я!?» – дедилар. Тўрт йил урушда ваҳшийлигу даҳшатларни кўриб йиғламаган, тухмат билан қамалиб ётганида ҳам кўзларида ёш кўрсатмаган бу одам ўсмир жиноятчиларни кўрганларида чидай олмадилар. Оғир хасталикларига қарамасдан «Ўзингдан кўр» деб номланган ахлоқий қисса ёздилар. Бу ёзувчининг сўнгги асари – васияти бўлиб қолди.

Ўша саволни мен ҳам ўзимча тез-тез такрорлайман: нима учун болалар жиноят оламига кириб қоладилар? Адашибми? Нима учун биз, катталар улар адашгуналарича қараб турамиз?

«Шайтанат»ни ёзишда мен ўзимни қийнаган муаммоларга жавоб топишга ҳаракат қилганман. Ёзувчининг вазифаси нимадан иборат? Жамиятни кузатиш, таҳлил этиш, юзага чиқаётган муаммоларни ҳал этишда қатнашиш эмасми? Ўтмиш жамиятнинг касалликларидан бири – жиноят олами эди. Мен ўша хасталикнинг бир заррасинигина қаламга олганман. Жиноят олами, яъни шайтонлар етовидаги оламнинг нақадар қабиҳ эканини одамлар ўз кўзлари билан кўриб ёки эшитиб юрган эдилар. Мен шулардан айримларини жамлаб, қоғозга туширдим, холос. Бу воқеаларни ёзишдан асосий мақсадим – одамларни огоҳлантириш эди: «Одамлар, кўриб кўйинглар, бефарқ юрманглар, сиз билан бизнинг ёнимизда кўзга куринмас, аммо ваҳший бир олам борки, ундан ўзингиз ҳам эҳтиёт бўлинг, айниқса, фарзандларингизни асранг, токи бу

оламга банди бўлиб қолншмасин. Бу оламнинг биттагина эшиги бор. Кирдингми, тамом, ўз оёғинг билан қайтиб чиқишинг маҳол, кафансиз кетишинг аниқроқ...» – демокчи бўлганман.

– «Шайтанат» сўзи нимани англатади? Нима учун асарни айнан шундай деб атагансиз?

– Бу сўзни мен кашф этмаганман. Дастреб ҳазрат Навоийнинг асарларида, сўнг устоз Абдулла Қодирий романларида учратганман. Сўзниң лугавий маъноси – шайтонлик, шайтон етови таъсирида йўлдан оздиришликни ҳам тушунса бўлади. Бошқачароқ айтсак, шайтонлар бошқарадиган жиноят олами назарда тутилган. Ҳазрат Навоийнинг «Хазойинул-маоний» достонларидаги бир байт:

«Риёй шайхдурким шайтанатдин тавқи лаънатдек,
Солур ўз бўйниға тасбихни ҳар лахза ул мальун» –

дикқатимни тортиб, «Шайтанат» номи билан бир асар ёзиш истаги туғилган эди. Адашмасам, 1984 йил эди шекилли, Андижонда содир бўлган бир жиноят тафсилоти мени қизиқтириб қолиб, шу номда қисса ёза бошладим. Умидим – аввал бошдан уч китобдан иборат қисса ёзиш эди. Аммо тақдир тўрт китобни насиб этган экан, деб юрсам бешинчи китобнинг куртаклари ҳам кўриниб қолди. Андижонда эшитган воқеа Элчин билан Зайнаб тақдирига тааллукли эди. Ёзиш жараёнида бу воқеа асарга сингмай, тушиб қолди. Кейинроқ худди шу воқеа асосида «Мурдалар гапирмайдилар» деган асарни ёза бошладим. Ажабки, ўша воқеа бу асарга ҳам сингмади. Худо билади, балки янги асарга «томизғи» бўлар?

– Нима учун асарда қора бўёқлар қуюқ? Айниқса, аёллар образини бошқа асарларда ҳам кўпроқ қора рангларда бергансиз?

– Бу тасодиф эмас. Аввал бошдан ниятим шундай эди. Агар эсласангиз, биринчи китобга ёзилган

сүзбошида «Замон берган эркинликдан фойдаланиб, турмушимизнинг қора кўчаларига киришга жазм этдим. Ёзганларимни ўқиб, чор-атроф зимиستон экан-ку, деб ваҳнмага берилманг. Ёруғ куинда барча нарсаларни кўриб турамиз. Коронғида эса кўрмаймиз. Урилиб, сурилиб, қокилиб юрамиз. Алкисса, ёруғ кунининг қадрига етмоқ учун қоронғиликни ҳам кўриш лозим эмасми?» деганман. Асадаги бўёқлар кимгадир куюқ, кимгадир эса хира туюлиши мумкин. Бу ўринда у ёки бу одамнинг ҳаётни қай даражада англаши, воқеаларга муносабати ҳам муҳим. Масалан, Зайнабнинг тақдири бирорни ҳаяжонга солса, бошқа бир китобхон, «бунақа гиёҳванд аёлларни ўзим ҳам курганман», деб бефарқ қарashi мумкин. Дунёда неча миллиард одам яшаса, шуларнинг бармоқ излари бир-бирига ўхшамайди. Демак, шунча миллирад бармоқ излари мавжуд. Шунга кўра, айтиш мумкинки, одамларнинг феъл атворлари, хис-туйғулари, дунёни англамак зеҳнлари ҳам бир-бирига ўхшамайди.

«Шайтанат»да, бошқа асарларда ҳам ҳавас қилиш мумкин бўлган аёллар кам тасвирланганининг сабаби бор. Камина, такрор айтаман, шайтонлар бошқарадиган оламни, қора бўёқларни қаламга олганман. Бу оламда яхши аёлларнинг кўп бўлиши мумкинми? Очиги, мен ёмонларни тасвирлаганимда юрагимда оғриқ турарди. Буларни ёзмасликни истардим. Лекин на илож? Ибрат маъносида ҳам ёзиш керак эди.

– Асадаги қаҳрамонлар ҳаётдан олинганми ёки тўқимами?

– Яна биринчи китобни эслашга тўғри келади: «Асарни охиригача ўқий олсангиз, бунга сабрингиз ва вактингиз етса, бир қанча одамлар билан танишасиз. Улар балки қўшнингизга, балки дўстингизга, балки қариндошингизга ўхшаб кетар. Шу ҳол юз берса, «Фалончини ёзибдилар», деб юрманг. Бу шунчаки тасодифий ўхашликдан бошқа нарса эмас», дейилган.

Шунга кўра айтиш мумкинки, айрим миш-мишлар элакдан ўтказилиб, айрим воқеалар умумлаштирилиб, баъзилари бўрттирилиб ёки аксинча, камайтирилиб хаёл маҳсулига кўшилган. Чингиз Айтматов айтмоқчи, хаёл маҳсулини ишонарли тарзда баён қилиш ёзувчининг бурчи ҳисобланади. Биз «хаёл маҳсули» деймиз. Ўйлаб кўрайлик: хаёл маҳсули сув ичадиган булоқ қаерда экан? Асарда баён қилинган гап-сўзлар ҳам, ҳаётнинг ўзидан эмасми? Шунча гапларни тўкиб чиқаришга битта одамнинг куч-куввати етмаса керак?

— Асарингизни ўқиган одам сизни қаҳри қаттиқ инсон деб ўйлайди.

— Бу янгиш холоса. Мен қаҳри қаттиқ, бешафқат эмасман. Ҳаётнинг ўзи бешафқат. Менинг вазифам ўша бешафқатликнинг баёнини қоғозга кўчириш, холос. Асадбек қизини шармандали ҳолда кўргач, «ўзингни осиб ўлдира қол», деган маънода арқон ташлаб кетган сатрларни ёзаётганимда қалб оғриғидан кийналганман. Бир неча ҳафта кўлимга қалам ололмай юрганман. Кўпчиликни Асадбекнинг ўлиш ёки ўлмаслиги қизикириади. Ёки Жамшид билан Зайнабнинг муносабатлари ўйлантиради. Аксар китобхонлар Асадбекнинг тирик қолишини хоҳладилар. Андижондаги учрашувда бир муаллима синглими: «Мен Асадбекни яхши кўриб қолганман, илтимос, уни ўлдирманг», дедилар. Мен ҳазиллашиб: «Яхши кўришингизни эрингиз биладиларми?» деб сўрадим. Синглими: «Ҳа, биладилар. Асадбекни у киши ҳам яхши курадилар», дедилар. Бу масалада айтишим лозимки, Асадбек одам сифатида китобда тирик қолиши мумкиндир. Аммо жиноят оламининг сардорларидан бири сифатида ҳаётимизда қолиши мумкини? Бу масалада рамзий маъно излашимизга тўғри келди. Тўртинчи китобнинг сўнгги сатрларига шу маънолар жамланмоқчи бўлинди. Ёки Зайнабнинг тақдирини олайлик: агар у айтайлик, Глория ёки Наташа бўлганида мажруҳ эрини ташлаб, суйгани би-

лан қовушмоғи мумкин эди. Лекин кимнинг қизи бўлишидан қатъи назар, у ўзбек аёли! Ўзбек аёллари эса камдан-кам ҳолларда эрларидан юз ўгирадилар. Эрга кўнгиллари бўлмаса ҳам уларни оғир аҳволда ташлаб қўимайдилар. Агар мен Зайнабни китобхонлар истагига кўра Жамшид билан қовуштириб қўйсам, ўзбек аёлларининг бекиёс фазилатларига хиёнат қилган бўлардим.

— Асадбек ижобий қаҳрамонми ё салбийми?

— Асадбек, шубҳасиз, салбий одам. Тўғри, унинг айрим мардликлари ҳам бор. Лекин одам ўлдирган ёки ўлдиришга ҳукм этувчини яхши киши дея оламизми? Баъзиларга Асадбек яхши кўринаётгандай туюлиши ҳам мумкинdir. Лекин бу, менингча, алдамчи туйғу. Диққат қилайлик: аслида биз Асадбекни яхши кўрмаймиз, бошига кулфатлар ёғилаётгани учун унга ачиняпмиз. Бошига нима учун кулфат дўллари ёғиляпти? Бунга Жалилнинг гапи жавоб бўлади: «Худодан қайтибди!» Ҳали Зайнаб туғилмасидан олдин қизи ҳўрланган муштипар она уларни қарғаган эди, эслайсизми? «Дунё шайтоннинг дўкони, ундан бир нарса олдингми, шайтон ҳақини ундириб олмагунича тинчимайди». Асадбек шайтоннинг дўконидан кўп нарса олган эди, йиллар ўтиб, қизининг номуси ва бир ўғлининг жони билан ҳақ тўлади. Дунёда ҳеч қандай зулм жазосиз қолмайди. Мен бу сатрларни атай бешинчи китобда такрорладим.

Авваллари ижобий қаҳрамон фаришта каби тасвирланарди. Ҳолбуки, ҳаётда бутунлай яхши одам ҳам, бутунлай ёмон одам ҳам йўқ. Яхшининг оз бўлса-да, ёмон хулқлари, ёмоннинг оз бўлса-да, яхши ишлари бўлиши табиий. Асадбек ва унинг атрофидагилар, юқорида айтганимдай, жиноятчи, зулмкор бўлиб туғилмаган эдилар. Уларни ўтмиш жамиятнинг адолатсизлиги шу ҳолга солди. Асардаги асосий ғоялардан бири ҳам шу. Асадбек гурухини «аламзадалар тўдаси» десак ҳам бўлади.

— Нима учун асар бошида Зайнабнинг уйи қўриқланмайди?

— Биз чет эл мафияси ҳакидаги киноларни кўра-вериб, уларнинг уйлари ҳамиша қўриқланади, деб ўйлаб қолганмиз. Хориждаги жиноий гурухлар билан биздагиларнинг анча фарки бор. Майкл Корлеоне ма-фиясига ўхшаган тұдалар саксонинчи йилларда бизда йўқ эди. Гурухлар орасидаги «суруш»лар ҳам етилмаганди. Шунинг учун ҳам уларни катта куч билан қўриқлашга ҳожат йўқ эди. Шундай бўлса-да, бу са-волга тўртингчи ва бешинчи китобда жавоб беришга ҳожат сезилди.

— Ёшларга асар салбий таъсир этмайдими?

— Агар шундай бўлганида бу асарни ёзмаган бў-лардим. Мен ёшларнинг оқ-қорани ажратиб олишларига ишонаман. Назаримда ёшларнинг биронтаси Ҳосилбойвачча ёки Кесакполвонга ўхшаб яшаб, улар каби азобли ўлим топишни истамасалар керак. Ниятим – жиноят оламига қизиқиб, маҳлиё бўлиб юрганларни бу йўлдан қайтаришга хизмат қилиш. Умуман, у ёки бу китобни ўқиш натижасида жиноят оламига кириб қолган одамни ҳали учратганим йўқ. Лекин «Шайтанат»ни ўқиш натижасида бу разил оламдан чиқиб кетгандар билан учрашганим рост.

Дикқат қилинса, «Нафснинг келажаги зулмдир, зулмнинг келажаги эса хорликдир», деган фикр асарнинг шиори, дейиш ҳам мумкин. Бу каби асарларни ёзишдан мақсадим шайтанат олами, яъни шайтонларга тобе бўлган жиноят олами билан ёшларни таништириб, уларни бу ярамас йўлдан қайтаришга уринишдир. Бошқача айтганда атрофимизда шундай қабих олам борлигидан одамларни огоҳ этишдир. Бизнинг адабиётимизда ҳали «қонундаги ўғри» деб аталмиш жиноятчилар олами баёни берилмаган эди. Бу оламнинг шиорига зътибор беринг: «Дунёда ўгридан бошқа ҳеч ким инсон тақдирини ҳал қилиш ҳуқуқига эга эмас!» Мана шундай зулм оламини биз билиши-

миз керакми? Албатта керак. Фарзандларимизни бу олам таъсиридан ҳимоя қилишимиз учун ҳам керак. Ҳар ҳолда мен шундай бўлар деган мақсадда қўлга қалам олган эдим. Агар бирон-бир асар тарбияга хизмат килмас экан, ёзувчининг уринишлари зое кетибди, деб ҳисоблайман.

— *Асадбекдай одамнинг ҳаётда бўлишини хоҳлар-мидингиз?*

— Йўқ. У канчалик мард бўлмасин, қанчалик жабрдийда бўлмасин, жамиятимизнинг бундайлардан ҳоли бўлишини истардим. Асадбек бизнинг жамиятимизда яшашга ҳақли эмас!

— *Китобда кўп шеърларни ўқидик. Ўзингиз ёзган-мисиз?*

— Афсуски, дурустрок шеър ёзишга менинг қобилиятим йўқ. Кофиядан нарига ўтмайдиган нарсаларни ёзишдан ўзгаси қўлимдан келмайди. Шунинг учун нуктадон шоирларнинг шеърларидан фойдаланаман. Китобда марҳум дўстим Асқар Қосимнинг шеърларидан кўпроқ фойдаланганман. Асардаги Анвар тақдирига шу дўстим ҳаётини асос қилиб олганман. Шу боис Анвар Асқар Қосимни устозим деб билади ва хаёлан у билан учрашади ҳам. Асарда мумтоз назмдан, хусусан, ҳазрат Навоий, ҳазрат Бобур ғазалларидан, раҳматли Рауф Парфи, замондош шоирларимиздан Гулчехра Нур ва Садриддин Салим Бухорий шеърларидан ҳам фойдаландим. Кинофильмдаги кўшиклар шеърларини Кутлибека ва Шукур Курбон ёзганлар. Фурсатдан фойдаланиб, марҳумларни Аллоҳ мағфират қилсин, деб дуо қиласман, замондошларга эса миннатдорлигимни изҳор этаман.

— *Китоб билан фильм ўртасида ўзгаришлар бор. Буни қандай изоҳлайсиз?*

— Ҳазил тариқасида айтсам, бунга сабр ва чидам билан қарайман. Гап шундаки, кино санъати билан бадиий адабиёт орасида кескин фарқлар бор. Талаблар ҳам фарқланади. Шунга кўра, ёзувчилар киночи

биродарларининг инжиқликлариға чидашга мажбурлар. Чидаш қийин бўлгани учун ҳам кўп ёзувчилар ўзларини киночилардан нари олиб юрадилар. Айримлар китобнинг ўзгаришлар билан олинишидан норози бўлишади. «Шайтанат» фильмни учун мен санъаткорларимизга раҳмат айтаман. Лекин бир изоҳим ҳам бор: китобдаги Асадбек билан кинодаги Асадбек орасида фарқ мавжуд. Китобда Асадбекнинг ёмонликлари, бу ёмонликларни туғдирган омиллар баёни батафсил берилган. Кинода эса асосан унинг яхши томонлари бўрттириб кўрсатилган. Шу сабабли «Асадбек ижобий қаҳрамонми ё салбийми?» деган саволлар юзага чиқди. Китобни синчилаб ўқиган кишида бундай савол уйғонмаса керак, деб ўйлайман.

— Асарда диний мавзуларда ҳам фикр юритгансиз. Бу соҳада маҳсус билим олганмисиз?

— Афсуски, йўқ. Ёшлигимизда бундай илм олиш имконияти бўлмаган. Бу соҳада мен устоз кўрмаган шогирд мақомидаман. Диний масалаларга доир нашр этилган китобларни кўп ўкиш, уламолар сухбатидан баҳраманд бўлиш натижасида китобга айрим фикрларни киритишга уриниб кўрдик, холос.

— «Шайтанат»нинг барча китоблари муборак Куръон оятлари билан бошлангани сабаби нимада?

— Ҳаётнинг энг улуғ фалсафаси аввало Аллоҳнинг шу илохий китобида мужассам. Баъзи бирорлар муқаддас оятлардаги огоҳларга эътиборсизликлари туфайли адашиб, шайтанат дунёсига кириб қолишган. Шарқ адабиётига азалдан Куръон маёқ бўлиб, ҳақиқат йўлини кўрсатиб келган. Дунёнинг Фёдор Достоевский, Лев Толстой сингари буюк ёзувчилари ҳам асарларида Инжилга мурожаат қилиш орқали эзгуликнинг улуғворлигини таъкидлашган. Менинг ҳам мақсадим Аллоҳнинг хитобларини, огоҳлантиришларини одамларга эслатиш йўли билан эзгулик учун курашдир.

— Танқидга муносабатингиз? Асарни кўп танқид қилишдими?

— Танқидни яхши күрадиган одам бўлмаса керак. Ҳазрат Умар камчилигини айтмайдиган дўстдан фойда камлиги ҳақида ибратли гап айтганлар. Шунга кўра, ҳар бир одам танқидга чидамли бўлса ўзига фойда. Танқид ҳам икки хил бўлади: холис танқид учун миннатдор бўлиш жоиз. Танқид замирига хусумат жойлашган бўлса, бу танқидчига инсоф тилашдан ўзга чорамиз йўқ. Мен танқиддан бирданига лов этиб ёнмайман. Диққат билан эшитаман. Агар танқид нотўғри бўлса, кўп ҳам аччиқланмайман. Чунки ҳар бир одам ҳар бир масалада ўзининг танқидий фикрини билдириш ҳукуқига эга. Баъзи хато фикрга асосланган танқид бегараз бўлиши ҳам мумкинким, улардан мутлақо ранжимаслик керак. У ёки бу асарни барча бир хилда севсин, эъзозласин, деб талаб қилувчи ёки умид қилувчи ёзувчи нодондир. Агар танқид тўғри бўлса, мен кўпроқ ўзимдан ранжийман. Танқидчидан эмас, ўзимдан хафа бўламан. «Шу оддий нарсага аклинг етмадими?» деб ўзимни ўзим койиб. Эътиборсизлигим туфайли шу камчиликка йўл қўйганим мени кўп қийнайди. Маълум фурсат ўтгандан кейин ёзганларимни ўкиб, ўзим кўпроқ хатолар топаман. Бешинчи китобни ёзиш жараёнида аввалги тўрттала китобими ни қайта ўкиб, таҳрир қилдим. Хатолар, чалкашликларга дуч келганда юрагим ачишди. Бу хатоликлар учун муҳтарам китобхонлардан узр сўрайман. Худо хоҳласа, танлаган асарлар жумласига киритилса, бу хатоликларни тузатаман, деган умидим бор.

— Айрим фикрларни тақрорлашни яхши кўрасиз. Ҳатто айрим фикрлар бир китобдан бошқасига ҳам ўтади. Бу камчилигинизми?

— Баъзилар камчилик ўрнида қўришлари мумкин. Эътиборсизлиги учун тақрорлаяпти, дейишса ҳам эҳтимол. Лекин ундай эмас. Мен ўзимга ёққан фикрларни атайн тақрорлаб туришни ёқтираман. Ҳаёт учун зарур бўлган бирор фикр бир китобда ёзилса-ю,

ўқувчи эътиборсиз ўтиб кетган бўлса, яна диққатини тортиш учун тақрорлайман. Масалан, «Эй Одам фарзанди, мен зулмни Ўзимга ҳаром қилдим, бас, бир-бирларингизга зулм қилманглар», деган кудсий ҳадисни бир неча китобда тақрорлаганман. Аслида бу хитобни ҳар бир одам ёдлаб, амал қилишини истар эдим. Ёки нафс ҳақидаги фикрлар ҳам шулар жумласидан. Жалилнинг «Худодан қайтибди» деган гапи ҳам шунаقا. Биз ҳар қандай ишимиз учун Аллоҳдан ажр олмоғимизни унутмаслигимиз керак. Агар бу хақиқатни ўзимиз ҳам тақрорлаб турмасак, унугиб қўйишимиз мумкин. Асадбеклар шундай унугувчилардан эди. Биз ундай бўлмайлик.

2010 й.

Тоҳир МАЛИК

ШАЙТАНАТ

(Бешинчи китоб)

«Sharq» нашриёт-матбаа
акциядорлик компанияси
Бош таҳририяти
Тошкент – 2013

Рассом *Беҳзод Ҳайдаров*

Мухаррир З. *Мирзаҳакимова*
Бадиий мухаррир У. *Холиков*
Техник мухаррир Р. *Бобохонова*
Сахифаловчи М. *Атҳамова*
Мусаҳих М. *Зиямуҳамедова*

Нашр лицеизияси AI № 201, 28.08.2011 йил.

Тайёр диапозитивдан босишга руҳсат этилди 29.07.2013. Бичими
84x108 «TimesNewRoman» гарнитураси. Офсет босма. Шартли
босма табори 33.6. Нашриёт-хисоб табори 33.9. Адади 5000 нусха. Бу-
йортма № 3221. Баҳоси шартнома асосида.

**«Sharq» нашриёт-матбаа
акциядорлик компанияси босмахонаси,
100000, Тошкент шаҳри, Буюқ Турон кӯчаси, 41.**



ISBN 978-9943-26-051-1

Barcode for ISBN 978-9943-26-051-1

9 789943 260511

